

Panarangan di Kitab Vagu III

SURAT DI PAULUS PAKAA SID PIUMPUGAN dot ulun Kristian sid pomogunan do RUM om sid Korintus om Galatia

Rum nalad 1-34

1.-2.. Korintus nalad 35 -100 Galatia 101-110

UMPATOD:

Iti surat di Paulus pakaa sid Rum diti okonko i surat gulu-no kosurat di Paulus di nokosusun sid Kitab, tu i hoturan di gama monginumpok dit ongosurat sid Kitab Vagu isuhut di kogumuo dot ongo fasal, niogulu it anaru om ogumu o fasal om iri-ogit ongonaru-naru om sid kovian-no it onibak-no banal. Ong kiroon tokou it umul dit ongosurat, gulu-no banal kosuratai di Paulus ino-no i pakaa sid piumpugan sid Tesalonika om iri-ogi sid Korintus om Galatia om iri-ogi it ongosurat vokon. Na ensanan it ongosurat di Paulus gulu-no kosurat mantadko it ongo injil om it ongosurat vokon di nokosusun sid Kitab Vagu. I tinomod ko i sabap do varo surat di Paulus, kodung amu otibang di Paulus magandaha ko rumikot sid piumpugan om gorija, ko it a-kavasa iosido rumikot, tu varo kosusaan antawa a-koho i porinta sid iso o pomogunan do magandaha i Paulus, ong kodung varot norongou dau do varo kosusaan, ko varo duaton, varo hal dit a-milo-milo, nga osusa manahak do kovosihan, turus monurat i Paulus, supaya osinang it ulun sid piumpugan sino. Iadino i surat pakaa sid Tesalonika om sid Korintus om sid Galatia ko Filipi. Ong i surat kakaa sid Filipi, kagi hiza sid torungku mongirim i Paulus di surat dino, i harati, aso tenganan do rumikot iosido, tu sid tahanan do porinta.

Minsanko varo-not elaan tokou dot okudik kananganko isai i Paulus, avantang ong talahason-no vagu siti om onsizon do siombo kadapat tokou mamasa di kobuatano om kavazao di Paulus. It Usuran dit Ongorasul manarang sid Fasal ko-9 om 13-28 dit inantadon di Paulus om it ongo panahon dau di rasul iosido di Kristus. Baiko i kinapatazan ot a-notuturan sino. Ino dino bai elaan tokou antad sid usul do Gorija Rom. Varo habal dot i hiza di Kaisar Nero nohukuman-no i Paulus dot nanangan iosido do kapatai dot pudungan i liou dau. I kinapatazan dau dino hiza di Toun 64 TM.

I Paulus dino, ong i ngaran laid dau i Saulus, anak do Yahudi, warga negara do Rom, tu i pomogunan do Tarsus nokosuvang sid kuasa do Rom. Nokosikul iosido sid Yerusalim sid rombongan do Parisi, inot ongoulun di banalko siumodiri mantadko it ongoulun vokon, tu retanko ioti-no it osusi om sumusi-po, tu amu gumavul sid bansa vokon ko tumudu dot asakau, gam atatap ioti isuhut di sokovia i it ongopinuhuan di Kitab om it ongo adat dit antad sid pinonuhuan ko i Taurat. Na hiza di sid Yerusalim i Yesus, mad kakali sumikul i Paulus. Iri-ogi inanu iosido dot ulun di mangajaga dit ugama Yahudi om nakamung-no iosido sid rombongan do Parisi di mongontupat, supaya amu kalandu ko kotohiang it ongoulun sid ugama. Iti-no o sabap, do kodung nokosurut i piumpugan dot ulun Kristian om ziumazad sid ongo pomogunan om bandar vokon, inanu-no i Paulus do jaga dot ugama sampai iosido-no o mangaraun sid ongo pomogunan vokon om minoghihim dit isai-nopo it ulun di manarik ko mamalid dit ulun Yahudi sid vaza vokon om ugama vokon. I Saulus nakasasi-no di gama mongodumpau do vagu di Stepanus, nohukuman-no iosido, tu retanko iosido-no o mongusiba di ngaran do Kinoringan, ka dioti. Ong i Saulus kondiri amu nokopongodumpau do vatu, baiko sasi iosido diri, gamko iosido-no o minangajaga dit ongosulung dioti, di hiza di minongodumpau it a-ko piro ot ulun do Parisi di Stepanus. (Sabap i gama mongohukum mamatai dot dumapahon do vatu, hal dot ahatul. It ongoulun di pongodumahon dino, iduon-po laid it ongokurilib, supaya avazau banal mongologod podumpau do vatu tu mamatai dit ulun di nakaranggal di hoturan. Na i Saulus minogom-no mongontupat supaya asot ulun manganu dit ongokurilib dioti dino.) Kiroon tokou, i nakasasi-po i Saulus do iadino, iri-ogi noonsug-po iosido posurut di gama mongogusa dit isai-nopo it ulun di mangarait om pazazad di habal antad sid di Yesus. Sid gama di iadino, kinumaa-no i Saulus sid bandar do Damshek (imatai U.R. 9)

Antad sid Galatia F. I elaan tokou dot kodung nokokristian-no i Paulus, minamanau-no iosido sid Arabia dot tolu toun. Antad diri, kinumaa-no iosido sid Sur om Kilikia (TM 33 dati) om minamung-no sid Kunsil dit ongorasul sid Yerusalim (UR 15 om Gal. 2). Sid kunsil dino nolumbatasan-no dot i Paulus-no o rasul ponong sid ongo bansa dit okonko Yahudi om it ongorasul vokon, nga posurut di Habal do Kovosihan ponong sid ulun do Yahudi (TM 45) Iri-ogi minamanau-no vagu i Paulus antad sid piumpugan do Antakia,

do varo-no laid piouduhan gima i Petrus minongolim dot gumavul om milang makan dit ongoulun dit okonko Yahudi (Gal. 2) sampai tinumongkop-no di daerah dot Asia dot opodok (Turkey ong bianco) sampai tinumupak-no antad sid Troas kumaa sid Eropa: Filipi, Tesalonika, Athen, Korintus.

Osomok dot duvo toun iosido sid Korintus om minuli-ogi sid Yerusalim (TM 51)

Iri-ogi sid efesus iosido dot tolu toun om minagandaha-no vagu sid Korintus om it ongopiumpungan vokon sid Eropa sampai minangatod do rukut dit ongopiumpungan sid Yerusalim. Natangkap-no iosido sid Yerusalim om natahan-no sid torungku do duvo toun. Kakali sid torungku, ilombus-po sid Rom, tu amangakun i Paulus dot hukuman ong sid Yerusalim. Duvo toun sid Rom dot mad obebas iosido do sumamung dit ongoulun Kristian sino, iri-ogi nanangan-no iosido do hukum di Kaisar dit engin momunso dit ugama Kristian.

I kobuatano di gorija sid Rom hiza di nokorikot i surat di Paulus: Okonko i Paulus ko i Petrus o minongimbulai di piumpungan sid Rom. Asot elaan tokou dot isai o nokogulu mangahabal di Habal do Kovosihan sid Rom. Varo momoros ong i kopitan di nakasasi di kinapatazan di Yesus o najadi do kristian sampai iosido-no o minongovit di Habal do Kovosihan sid Rom. Kagi, hiza di Kaisar Klaudius diri, TM 45, sinunsub-no di Kaisar i sokoviai it ongoulun do Yahudi. Na amu atalahas do nunu o kinosunsuban diri: i-ka gama dit ongoulun Yahudi mangamu sumamba sid gambal di Kaisar, ko i-ka gama do Kristian sumasi do baiko iso-no o Tuhan, ino-no i Yesus. Mad hiza di Klaudius diri, varo-no laid piumpungan sid Rom sampai i Akuila om i Priskila, nga minogidu-no sampai rinumungkap sid bandar do Korintus. (imatai UR 18)

I Rom i hiza diri ibu kota di karajaan do Rom ko Roman Empire, i karajaan do Kaisar, i mangahatul di sokoviai it ongopomogunan sid rilion sid Rahat Tanga. Ahatul it tentara do Rom monguasa dit ongopomogunan vokon sampai pokodou di hoturan do Rom. I tanda di kuasa do Rom diri, songhongkos o lalapos do mad sumbling om kapak-po do nokokogos sid tiang. I harati, isai ot amu sumuhut di hoturan do Rom, alapos iosido ko opudung i liou dau.

I hiza diri it Afrika Utara okonko belantara iadko bianco, inoi nga kabun do gandum di banalko orombung. Sinod Afrika o pongonuvan do Rom di balanja di razat do Rom. Ioti sid Rom amu osusa do gumama ko mansahari ko mutanom om mukabun, inoi nga i Kaisar o monumad dioti suvab-suvab antad sid rodiki dit ongopomogunan vokon. Iti-no o sabap do monukoi i sokoviai it ongobansa vokon. Ino sukoi dino o balanja sid Ibu Kota Rom. Kagi i Kaisar o pohigak dit razat do Rom sid pinokowayang do mipapatai om milalawan, ulun ko dupot dot orongit sid padang do Rom, ino-no i Koloseum. Ino padang om valai wayang dino, kakali sampai bianco sid tanga do bandar Rom.

Ong onsizon tokou i Surat di Paulus pakaa sid gorija Rom, mad tolu bahagi i surat dau, ino-no,

1,1-11,36 I Paulus manarang di kosipan dot ulun Kristian

12,1-15,21 I Paulus manarang di kavazao om gama dot ulun Kristian

15,22-16,27 I Paulus manansalamat dit ulion om it ongokoubasan dau sid Rom om monorima kaseh-po sid dioti.

Ong sodirizon tokou it toriso-iso bahagi, pengkaa dino

1,1-7 i gama di Paulus manansalamat: it inantadon om rikoton do surat, salam

1,8-15 I tinomod di Paulus i rikoton sid Rom

1,16-17 I kogunaan di Habal do Kovosihan: Kuasa di kapanapul

1,18-3,20: Asot isot ulun ot abanal sid tinoguvangon do Kinoringan

1,18-32 I kasalaan do riniba: potongkizad antad sid hoturan do Minamangun

a) i kotigiran, hungot om sana do Kinoringan, tu

b) nokedu-no i riniba sid tinoguvangon do Kinoringan,

c) iri-ogi i Kinoringan posuvang di riniba sid kalavangan om karalazan

d) om i riniba mamalid-po dit ulun vokon sid karaatan

2,1-16 I kobuatano om gama dot ulun o manala om mamanal dot ulun. Amu monodiri i Kinoringan do bansa o tirisian.

2,17-29 I gama mokindazou dit Ongoyahudi om kumihi-po di vokon. Topot aso kanangan, tu okonko i ngaran ko i sunat o kiguna, inoi nga i gama sumuhut di kenginan do Kinoringan.

3,1-20 aso bida, minsanko i Kinoringan minonuluk di janji dau sid Ongoyahudi. Sabap i kalabao do kohormatan sid tinoguvangon do Kinoringan mad nolumpatiu-no sampai najadi-no do kokurangan om

korumaato. Aso tanganan dumahava sid Kinoringan, iso nga asot ot abanal, Yahudi om vokon. Sabap i Pinonuhuan mamalang di rontob om i kasalaan dot ulun.

3,21-8,39: I gama do Kinoringan mamanal di riniba, ivaza sid di Yesus om i gama di Yesus manapul di riniba.

3,21-31 I vaza di Kinoringan mamanal, ino-no i Yesus Kristus o nipangandus. Iosido-no o mongontok di riniba, mad notobus-no it amu nonong sid pialatan do Kinoringan om i riniba, mad nogontian-no i norungoi

4,1-25 I Ibrahim o suntuan di vaza do Kinoringan mamanal di riniba

5,1-11 Nabanal tokou-no, gima i kosipan. Amu mongiro i Kinoringan di koguguzan om kasalaan tokou om i gama kumisangod do Kinoringan, gam nokembulai-no i kopioondusan.

5,12-21 Iadko i Adam minongimbulai do karaatan om kapatazan do riniba, i Yesus o mongimbulai di kovosihan om koposizan penlaid.

6,1-14 I kopomoduan, nga suntuan di kinapatazan di vangun laid om tanda do kogulianan do vangun vagu sid saralom di kinogulianan di Kristus. Iti-no o sabap do masi tokou-no sid tinoguvangon do Kinoringan, om kakavid tokou-no di kabanaran do Kinoringan. Pakakas tokou-no di kabanaran dau.

6,15-23 Uripon om pakakas tokou-no di kabanaran do Kinoringan, iadko Mat.6,33

7,1-25 i duvo i ginavo di misaap om sompirang sid saralom dit ipat-ipat it ulun, nga atatarik-no it ulun. Ko i kovosihan do Kinoringan om i karaatan do riniba momitas di ginavo dot ulun.

1-6 Ong kakali i pinonuhuan o kiroon, it ulun mongitung di rontob dot amu monimbaru do karaatan, kakali oluvau i pongitungan dau. Ong sid kavazao di dang Sundu o kiroon, mogihim-poma it ulun di kemumuzan sid kabanaran, nga mad kakali dot aso tanganan momumui.

7-13 to i pinonuhuan o pentalang di gama-ku tumolatui sid karaatan.

Avantang dara o tomodon om kenginan, topot tigogi i karaatan o rikoton om otimboruon.

14-25 Opiduvo i ginavo om i gama om kenginan dot ulun. Osopulan di Kristus dara, nga kakali atarik sid kuasa dot otuvong.

8,1-17 Ong sid vaza do Kinoringan o kiroon, o bebas-no it ulun antad sid hoturan do kasalaan om kapatazan. Nokotoguvang-no it ulun ponong sid kotulukan om kosurutan di kabanaran do Kinoringan, i kuasa di Sundu do Kinoringan o kagama.

1-11 I Sundu do Kinoringan mangahatul di tokou, okonko i guvas om i karalazan do guvas.

12-17 I Sundu do Kinoringan o mangagazad dit anganak do Kinoringan om mongontok om kumuruhang di tokou ponong sid kohormatan do Kinoringan

8,18-39 I kosungguvo dit ulun Kristian

18-27 I Sundu mongontok dit ulun, ong okugui ko opiduvo i ginavo dau

28-30 sid sokoviai i kahajangan kopisurut it ulun, gima kopitabang i Sundu, supaya varo kemumuzan.

31-39 I samod do Kinori ngan o mangahatul di sokoviai i koposizan dot ulun sid tanga di nunu-nopo songkosusaaan.

9,1-11,36 It agazo ot onsug di Paulus bahagi di Bansa do Yahudi

I piumpugan dot ulun Kristian sid Rom nakaharati-no do varo gama do porinta mongorodsit om monguripon dit ongoulun di bansa do Yahudi. Varo-no laid hiza do nosunsub-no it ensanan it ulun Yahudi antad sid Ibu Kota Rom, ino-no i hiza di Kaisar Klaudius TG 45 (imatai sid UR 18,2) Minsanko nokinsil-no vagu ino kinosunsuban dino sampai nokoguli-no vagu it ulun Yahudi sid Rom do manansanganu-no vagu dit ongovalai om ongokadai om kilang, mad rinumosi-no i piumpugan dot ulun Kristian do kotombil-no vagu ioti sid hoturan di Kaisar ponong sid ongoulun do Yahudi, retanko i ugama Kristian nga antadi sid ugama do Yahudi. Sabap ino, sumodiri i piumpugan do Kristian i pasok do Rom dot amu gumavul do Kristian di pasok Yahudi. I kiniro dioti diri, supaya amu korundun di pasok Yahudi monunsub pedu sid Rom, ko i nunu-nopo songhoturan di Kaisar kanangan it Ongoyahudi, sukoi ko hukum mamatai om momunso dioti, ka di pongitungan dioti Kristian dit okonko Yahudi.

Nening-po di Paulus dot nopiduvo-no i piumpugan do Kristian sid Rom, agazo o gama dau popizo vagu dioti sampai mongogorot om manalahas i Paulus dot aso tanganan tumongkizad i piumpugan antad sid ulun Yahudi ko sumodiri om tumanid antad sid puun om gamut di kosipan do Kristian. Tu i kosipan do Kristian, iso-no ot inantadon om iso-no o puun om gamut. Sabap iadko i tolid amu kopitongkizad sid gamut ko tuot,

ko i raan di nokototol-no sid puun, pengkaa dino amu mopud i piumpugan tokou ulun Kristian, ong nogii-no sid gorija di Kristus it antad sid bansa do Yahudi. Iti-no o sabap dot i tugas do gorija bahagi di bansa do Yahudi dit amu-po kemumui, mongonsug banal dioti om saapon mongogorot, mad podzuhul dioti sumuhut di Yesus,ka.

9,1-5 Agazo o gama di Paulus mogihim di kosopulan di bansa dau, om manarang-po di kalabao dioti Ongoyahudi, ino-no, kitinungkusan ioti antad sid Kinoringan, nangaranan ioti dot anganak do Kinoringan, kasanganu ioti di kohormatan do Kinoringan, varo janji om pinonuhuan om hoturan sumambayangn, varo-no ong mad sumpa do Kinoringan sid dioti, Varo-po't usul dit angaki, om i Kristus, nga antad-no sid tanga dioti ino, ka.

6-18 I gama do Kinoringan amu sumuhut di kiroon do riniba

19-29 Aso tangan dumahava di kenginan do Kinoringan om i kobinsianan dau

9,30-10,4 I kabanaran antad sid gama mangasip, aso tanganan monobus di kabanaran sid gama monuluk di hurup di pinonuhuan.

10,5-21 Minsanko osomok sid Kinoringan it Ongoisrael, nga amu kaharati ioti di vaza do Kinoringan manapul di sokoviai i riniba. Moguhang ioti do Kinoringan, sabap asaang-no i palad dau ponong sid ensanan i riniba.

11,1-10 I vaza do Kinoringan momili amu sumuhut di vaza do riniba momili

11,11-24 I kinorotuan dot Israel ino-no i kosopulan dit ongobansa. Na kakali amu atag do kihizon di bansa dot Israel. Atag dot i gorija di sid tanga dit ongobansa mongohondom dit inantadon om i gamut dau, ino-no it Israel. Gamko i korotuan dioti o poronok di tokou Kristian do suvai osopulan tokou, ong i kovosihan om kobinsianan do Kinoringan. Sid kazu Zaitun manarang i Paulus di hal dino di mad obolukung o gama, it avantang o gamut om puun, topot orobuk ong i raan, i Zaitun dit okonko pilion dino matag di raan dino, tu sid puun do pilion, ka. Mad oruhai dot i Kinoringan mongopud vagu di bansa dau.

11,25-32 I tinomod om panangan do Kinoringan, ensanan i riniba osopulan kavi om kamung kavi sid kenginan do Kinoringan, kopivozo di bansa dot Israel.

11,33-36 Baiko iso-no ot atag, mongindazou-nopo do Kinoringan...

12,1-15,21 I kavazao om gama dot ulun Kristian.

12,1-21 Ensanan i kobuatano om gama dit ulun Kristian suvab-suvab, ino-no i persembaan ponong sid Kinoringan.

12,2-4 Antad sid ginavo vagu posunu it ulun di kenginan do Kinoringan

5-13 ipat-ipat it ulun, varo vaza mongimbulai di kovosihan do Kinoringan sid saralom di gama mitutulung om mangarangkap di kovosihan om samod ponong sid ulun vokon

14-21 Ong varo karaatan om kobolikungo, suvai osuau om osibak o ginavo posurut di kavantango om kopioondusan

13,1-7 I gama mongoguna di porinta:minsanko i hoturan do porinta nokosuvang sid kuasa do Kinoringan. Sabap ino, it ulun Kristian rumonok di hoturan do porinta di monunda dit atag o gama do razat om it araat o gama sid pialatan do razat. I porinta ponulung do Kinoringan, minsanko a-elaan di Porinta i Kinoringan.

13,8-14 I pinonuhuan dot asamod mangahatul di sokoviai i gama dot ulun ponong sid Kinoringan om it ulun vokon

14,1-12 I sokoviai i kopolisan om kavazao tokou alanta sid tinoguvangon do Kinoringan om i razat. Kinoringan-no ot ulion tokou

14,13-23 Kitanggung jawab tokou ponong sid koruhang, it okugui om it orukung ontok sid kakanan om it ongohal vokon

15,1-6 Varo-po tugas tokou, ino-no mamabo om mangagazad dit okugui it ulun, supaya varo rikoton dioti

15,7-13 Mongimbulit i Paulus di tugas dau ponong sid ongobansa dit okonko Yahudi sampai ensanan it ulun Kristian nga sasi di Habal do Kovosihan

15,14-21 Manarang i Paulus di tomodon dau monurat

15,22-16,27 I kovian di surat: maanansalamat dioti sid Rom

15,22-33 Manarang i Paulus di tomodon dau magandaha sid piumpugan do Rom sampai mongingut dioti supaya osukung iosido dioti sid umba dau kumaa sid Spanyol.
16,1-16 Manansalamat i Paulus dit ulun di koubasan dau sid Rom
16,17-27 Imuhun do kovian om selamat di Paulus om i gama dau mindamo do barakat bahagi di gorija sid Rom

TAFSIRAN:

1,1-7: I Paulus rasul dit ongobansa. Iadko it ongosurat vokon i hiza diri, varo tolu bahagi o gama monimpuun do surat, ino-no, tarangan-po laid it inantadon om i rikoton di surat om iamung om iri-pogi i selamat. Ong sid Surat di Yakobus, banalko onibak o gama do iadino, bai iso-no ot ayat, ko surat vokon, bai mangarait di ngaran dit ulun di monurat, kokirai, I Asung mongirim do surat sid Arun. Selamat sid dikau. Iti-no i vaza kodori diri mongirim do surat.

Na I Paulus, ong kodung monurat, i ngaran-po laid dau, ko i setiausaha dau di minonurat, om iri-ogi it a-ko piro o panarangan, supaya antad kotimpunaan, osodiri-no om atalahas-no laid dot isai i monurat om nunu i kuasa ko hak dau monurat, i tugas dau om isai ot antakan dau. Na momungaran iosido di kondiri dau dot uripon di Yesus Kristus. Manjadi ong uripon, harati, ulun di nokosuvang sid kuasa do vokon. Ino-no i tuan ko sanganu dau. I tuan manansanganu dit uripon dino. It uripon asot elaan do kenginan kondiri, ong engin i tuan dau mamatai dit uripon, aso tenganan sumaap di kenginan di tuan dau. Matai ko masi it uripon, nga ino tuan dau o mangahatul om mamakai dit uripon sid gama dau posurut di kenginan om tomodon dau. Na sid Kitab Laid, ino-no sid Yesaya varo't a-ko piro o longoi dit "uripon di Tuhan", ino-no it ulun di posurut di kenginan do Kinoringan. Imatai sid Yesaya 42; 49; 50; 53. Dot inot ongolongoi dino mad kentalangan di gama di Yesus, ko sid Filipi 2,7 momoros i Paulus dot i Yesus sinumuvang sid kobuatano dot uripon, ka dau. Asarok it ongorasul mangarait di kondiri dau dot, Uripon do Kinoringan, Yakobus 1,1; 2.Petrus 1,1 ko Gal. 1,10: Boros di Paulus, Bang kakali-oku-po mogkovosihan dit ongoulun, okon-noko uripon-oku-po di Kristus, ka. Kagi varo-po boros di Paulus dot kuran-kuran di sandad riniba a-milo-milo uripon do karalazan om karaatan om kasalaan ko rogon om nunu-nopo songkuasa di momorinta dot ulun. Suvaiko i Kristus o pobeas dit ulun om nakavaliu-ogi iosido sid kuasa di Yesus om iri-ogi obebas-no it ulun, gima nokosokot-no iosido sid kuasa om kenginan do Kinoringan. Na i pitonidan di kinuripanan gulu om i sid di Kristus, pengkaa dino, sid kinuripanan di gulu, aso tinganan mogidu dit ulun, tu oporinta banal do iadko nokotorungku om nokokorovingan do rantai ko balud. Ong sid di Kristus, okonko lalapos o momorinta ko momogos dit ulun, inoi nga agazad iosido do samod om kovosihan do Kinoringan.

I Paulus, **nokodim** om **nisodiri do mangahabal do kovosihan do Kinoringan**: manarang i Paulus dot okonko antad sid dau do kuasa om kenginan o gama dau mangahabal di habal do kovosihan. Kinoringan o minongodim om minangahatas dot iadino o tugas om gamaon di Paulus. I rasul baiko mongontok di minonuhu dau, aso gama dau do pribadi ko suka rela ko bai tomodon, inoi nga antad sid suhu do Kinoringan o gama dau do iadino.

1,2 **najanji-no laid**: manarang-po iosido di tomodon om it inantadon di Habal do

Kovosihan: nokembulai om nentahan-no laid dit Ongonabi i nokosurat sid Kitab Ibrani, dot i lavis di Habal dino, i Yesus, retanko Anak do Kinoringan, dit antad sid rurungan di raja Daud, ong sandad riniba ot itungon om kiroon, topot ong kosunduvo o kiroon, nga antad sid Kinoringan om kuasa do Kinoringan. Ino dino nokembulai-no hiza di kinogulianan di Yesus antad sid ongoulun minatai. Noboros-no kavi ino, mangarait-no i Paulus di ngaran di Yesus Kristus dot iosido-no dino, o Tuhan tokou, ka. Yesus-no dino ot inantadon om puun do kovosihan om tugas do rasul i Paulus, dot ino tugas dau dino ponong sid ongobansa, supaya it ongobansa mangasip om sumuhut di hoturan vagu.

Ikou sid Rum, nga nakamung-no dit ongoulun di mangasip do iadino, ka.(6)

1,7:Ino-no i rikoton di surat dino, It Ongokristian sid Rom. Niamung-po di Paulus i nunu i garal om hormat dioti sid Rom, ino-no, **sinamadan ioti do Kinoringan, nokodim ioti om nosusi-no di Kinoringan**. I harati, it ongoulun Kristian kigral om kihormat antad sid kovosihan do Kinoringan, inanu ioti do hormat om pangkat. It ongohal di nakatahak-no sid dioti dot okonko tinumburuan dioti. I kosusian dioti dino okonko antad sid atag om alus o gama om kavazao ko kobuatano, inoi nga nakaraliu-no sid dioti, pinosusi di Tuhan ioti, iadko i nabi Yesaya dit nosusi-no i kabang dau antad sid popou di malaikat (Yesaya 6)

1,7b: Pinorikot-po i Paulus do kopivosihan om kopioondusan do Kinoringan sid piumpugan do Rom dino.

Iti-no i vazaan di rasul mamarakat om manansalamat dit ongopiumpugan diri.

1,8-15 Monorima Kaseh i Paulus sid Kinoringan, gima i gorija do Rom.

Monguji i Paulus di kosipan dioti sid Rom di nokoronuw sid pentongkop do karajaan do Rom. Asarok o gama di Paulus monguji di kobuatano di piumpugan di rikoton di surat dau, iadko sid 1. Tes.1,1-9: Ikuo dino ajadi do suntuan sid Akaia om sid Makedonia, ka. Na i rasul mongontok minta dua monorima kaseh bahagi dit ipat-ipat i piumpugan dit ombo it engat di rasul, soumul-umul minta dua iosido bahagi dioti. Ino gama dau dino antad sid tanggung jawab dau mamabo om posurut di Habal do Kovosihan.

1,10-12 Iri-ogi manarang i Paulus di kenginan dau magandaha sid dioti sid Rom, dot i kiroom dau dino, suvaiko kondiri do Kinoringan poriat om monodia di panahon dau kumaa sid Rom om ajadi-ogi, dot i tomodon sid Rom okonko bai tomodi magandaha, inoi nga pembulai sid dioti di tahak do Sundu om momihot di kosipan dioti. Kagi, sid gama di rasul momihot do kosipan do piumpugan, iosido kondiri nga kaanu do kopomihatan om kakansangan di dau do kosipan. Sabap i kopudan om kakansangan do kosipan do gorija iuli-no vagu sid rasul, i kitugas do meng-khotbah om monginjil sid gorija dino. I kovosihan om samod om barakat do Kinoringan, varo duvo o vazaan mamananu om lumombus: it ulun di manamod om mamarakat nga osulian do samod om barakat om kovosihan do Kinoringan.

1,13-15 Manarang i Paulus dit poduan dau kumaa sid pomogunan do Rom. Sid gama di Paulus monginjil om pazasad di Habal do Kovosihan mad atalahas-no dot i dau dot umba, tiririkot sid ongobandar dot agazo om sid ibu kota, supaya antad sid ibu kota kazasad i Habal do Kovosihan sid daerah di mintutuk dino, iadko i vatu di naratu sid vaig, di mongimbulai do gimpu antad sid tanga di lumombus mintutuk sampai rumikot sid timbang. Sid ayat diti kagi i Paulus manarang di dau do tugas di mad utang dit a-milo-milo kopuson: ino-no it utang, pahabal di Habal do Kovosihan sid sokovia i riniba dot amu-no monodiri dot ulun dot elo om ulun di buta hurup, bansa do Yahudi om bansa do Yunani. Tu sokovia it ulun di nokosuvang sid kuasa do porinta do Rom, retanko ulun do Yunani om ulun dot kisurat. Topot it ongobansa vokon sid sampaping di volit do Roman Empire retanko Barbaroi, tu amu kaharati di boros dioti (i pongoretan Barbaroi mad mongimbulai di dolou dioti dit amu avalang om amu koduzaan: bar bar bara, ka). Manjadi minsanko ioti nga anangan-no di Habal do Kovosihan dot i Paulus o otugasan ponong sid dioti,ka dau. Iti-no ot poniat di ginavo di Paulus kumaa sid Rom, okonko tomod mirimpanau ko makan angin.

1,16-17 I Habal do Kovosihan, kuasa di kapanapul

Amu-oku amalu posurut di Habal do Kovosihan. Amu atag dot olimon i Habal do Kovosihan. Ong i Petrus diri minongolim do koruhang iosido di Yesus, do baiko uripon sid istana o minongoduat. Lobipo ong mata-mata mongoduat ko monginsosok ko varo hoturan sid pomogunan dot a-kavasa do mamung sid Kristian. Sino dino amu oruhai sumasi. Gam hiza di kinapatazan di Paulus sid Rom, ong kodung sumasi it ulun Kristian dot iosido nga nakamung-no sid gorija, anangan-no iosido do hukum kapatai. Topot kakali ogumu o Kristian sinumasi sampai ohukuman-no ioti. Na ong siti, tanid-no o hal, tu it ulun di nokemot om nokotorima di kovosihan om samod do Kinoringan amu-no mongitung dot iosido nga polombus-po sid vokon, supaya it ulun vokon kaanu di samod om kovosihan dino. Kuran-no diti, it ulun di nokemot do kakanan amu-no pendongou sid ulun di lumikop do siombo o kadapatan do kopolosizon? naku. Varo minonuturan sid PLA dot isot anak nokosuvang sid Asrama sid Kudat dot amu-po kaharati di hal do gorija, tu ulun labus iosido gima. Na osomok do tanga toun minongolim iosido dot ulun labus iosido. Kodung miumpug it anganak dot asrama sumabayang om mindolongoi, mamung-no iosido iadko ioti, tu rumosi ong elaan dot okonko Kristian, sunsubon iosido. Alaid-po diri, gam minokipodsu-no, tu nakaharati-no di kosipan dot ulun Kristian. Ong i Paulus mongitung, ino Habal do Kovosihan mad kuasa om kakansangan dit aso tanganan mongumpalad.

>**habal do kovosihan: ong Yunani, Euangelion ko avasih o habal.** It inantadon di pongoretan dino, i nakamanang sid rumpak, varo sojal tumangkus muli sid raja mangahabal dot, Nakamang tokou-no, ka. It ulun di minangahabal do iadino, retanko Ponginjil om i habal dau dino, Euangelion ko Injil. It ulun di minangahabal sid ulun di narakop sid babil do kadapat-no vagu ioti muli sid Yerusalim, retanko ponginjil. Pengkaa dino i Yesus minamasa di boros sid Yesaya dino sampai minomoros dot, Bianco kosunu-no ino kavi (Lukas 4,21 om Mat. 11,5) Ko i Markus minonurat 1,1: Iti-no i kinotimpunan di Habal do Kovosihan: mad kondiri di Yesus o habal do Kovosihan, ka. Manjadi kodung norongou i habal dino, ino-

no it atag tumimpa it ulun, Mangasip iosido sampai i kavazao dau sumusui di Habal do Kovosihan (Markus 1,15: Pangasip-kou-no om piguli-kou-no, ka ko Fil. 1,27)

Kagi, a-kavasa do monobon di ralan di Habal do Kovosihan di Kristus (1.Kor,9,12)

1,17 I Habal do Kovosihan o **kointalangan di kapamanaran do Kinoringan**, ka. Iti mad tajuk om tema di Surat pakaa sid gorija do Rom. Kapamanaran. Ong mongimpuras tokou di Kitab Laid (Kitab Ibrani), ino pongoretan **kabanaran** banalko asarok koimbulai do manarang di kenginan do Kinoringan, tu ka di Kinoringan sid Kinotimpunaan 18,19: inanu-no i Ibrahim supaya iosido-no monuduk dit anganak om it ongobansa di kabanaran om katapatan, ka. Ong sukul i riniba wakil do Kinoringan sid tanga do vinangun, ino-no o gama: psurut di kabanaran, ombo it abanal om ombo it otopot. I sokovia i hal dit amu abanal om amu otopot, atandas do karaatan om kasalaan om kobungahan om koguvailan dit amu mongohormat di Minamangun.

Nunu-ka o harati sid Kitab : KABANARAN?

Sid a-ko piro ot ayat tumarang i harati dino:

a) **Ong arait sid Kitab i kasalaan di mad kasangai do karaatan, atalahas-no dot ino gama dino sumaap di kabanaran!**

1.Yahya 1,9-2,1+6: misangai di kasalaan om karaatan. Baiko i Yesus ot abanal.

Na it ulun di sid tinoguvangon di Tuhan, sumuhut di kobuatano di Yesus(6).

Rom 6,12: Kadan-no dot i sala o raja di guvas dikou...

Rom 6,13: Kadan-no jumadi do pakakas do karaatan, ..gam jodizo-no do pakakas do kabanaran.16: isai-nopo o patahakan di guvas dikou, tantu ajadi-kou-no dot uripon dau. Ong i kasalaan o patahakan, kosunggu-kou sid kapatazan. Ong obinsuhut-kou-no do Kinoringan, kosunggu-kou sid kabanaran. 18: nakalabus-kou-no sid kuasa do kasalaan om najadi-kou-no dot uripon di kabanaran.

19: i gulu minongimbulai di karaatan, ong bianco, uripon-kou do kabanaran do mongimbulai di kosusian.

b) **Kinoringan mongining om mongontupat, ong varo karaatan sid tanga do riniba!**

Kinotimpunaan 4,10: Boros do Kinoringan sid di Kain: Nunu-ka o ginama-nu diri? Tu kinodim-oku di raha dit obpinai-nu antad sid tana.

Kinot.6,5: Nemot-no di Tuhan do gumazo-no i karaatan do riniba..

6,11: i pomogunan dino noposok-no do karaatan om guvail sid tinoguvangon do Kinoringan.

Kinot.18,20: Banalko araat i gulonggong dit ongoulun do Sodom om Gomora.

Yehezk.16,49-50 Ino-no i karaatan dit obpinai-nu Sodom. Amu minongontupat ioti dit ongomosikim om it ousiba o ngaran. Osumbung ioti om oguvail sampai minonimbaru dit ongohal dit ikasana-ku. Sabap ino rinungoi-ku ioti.

c) **Kinoringan posurut di kabanaran om katapatan**

Kinot.4,9: Boros di Kinoringan sid di Kain: Siombo-no it obpinai-nu. Boros di Kain: Tau. A-ku elaan. Ioku-naku o mongontupat dit obpinai-ku? ka.

Na inot timpa di Kain, amu tumorima iosido di tugas dau do mongontupat om manamod dit obpinai (it riniba vokon) mad onsi banal di kenginan do Kinoringan.

Banal-no, ingin i Kinoringan dot i tokou sokovia, momoros om mongusaha dot,

IOKU O MONGONTUPAT DIT OBPINAI-KU!

Yesaya 5,7: Boros di nabi Yesaya: Minonginud iosido(Kinoringan) do kabanaran, topot imatai-no bianco, baiko karaatan. Minonginud iosido dit avantang o gama, topot bianco ogulou-no ioti do mititipu om mioodu.

d) **Kinoringan mangahatul om posurut di kabanaran**

Kolobusan 22,21-26: Kadan-no monusa ko mongorodsit dit ombuvoi...

Kadan-no mangaladtak di bituanon om usan-usan. Ong aladtakan do sampai mongogizak ioti, iningon-ku i dolou om it ihad dioti dino sampai mongoloub-oku dioti sampai rodusan-ku om punsoon-ku ikou om pempuson-ku i savo om anganak dikou do bituanon om usan-usan. Ong paangkat-kou do siin sid ulun di mosikim sid simbol, kada-kou-no pokibunga ko mokisanda di kurilib dau..

Ulangan 15,4 Polobuso-no it obpinai-nu antad sid longon-nu, supaya aso mosikim sid pialatan dikou.. (7) kada-kou-no kodoot om kokodou do ginavo ong varo mosikim sid pialatan dikou do , (9) Apatut dot

osukup o gama-nu manahak dau dot otomon o ginavo-nu. Sabap barakatan-ko do Kinoringan sid saralom di sokoviai i gagamaon-nu.

Zabur 98,2 om 103,6 I Kinoringan mongimbulai di kabanaran sid tinoguvangon di sokoviai it ongobansa. Yesaya 1,17 Ihimo-no dikou i kabanaran.

Yesaya 41,10 I longon-ku do vanan o mangagazad pakansang dikau sid kabanaran (kamanangan).

Yes.42,3 It uripon di Tuhan pentalang di hukum do kabanaran sid sokoviai.

Yeremia 7,5 Suvaiko simbanan dikou i kavazao om i kobuatano dikou di didino om mongimbulai-kou do kabanaran sid pialatan dikou. Amu-kou-no momogos dit ongoombuvoi om it usan-usan om it ongobituanon ko monguza-po do raha dit aso sala sid valai...

Amos 5,24 Ino-no o kengina-ku,ka di Kinoringan,

kikabanaran-kou iadko momurulun o vaig om iadko vosoi dot osou.

Mikha 6,8 Nokentahan-no di Tuhan sid dikou i nunu-nopo it avantang om ombo it onggohan dau sid dikou, o ino-no:

Posurut-kou do kabanaran om i gama misasamod, om soumul-umul-kou sid tinoguvangon do Kinoringan dot osibak o ginavo dikou.

Rom 3,21 Ong biano nokembulai-no i kapamanaran do Kinoringan dot okonko i pinonuhuan o minongimbulai, iadko i niintahan-no laid sid pinonuhuan om sid ongonabi dot i Kinoringan o mamaanal dit ipat-ipat it ulun di mangasip sid di Yesus Kristus.

Rom 3,25-26 I kolonuto do Kinoringan pinosimozo di kasalaan di gulu, supaya kembulai i kapamanaran dau biano dot iosido-no ot abanal om iosido-no o mamaanal dit isai-nopo i mangasip sid di Yesus.

e) **I kabanaran do Kinoringan mongimbulai di kabanaran tokou**

Rom 12,21 Kadan-ko-no mokitori do karaatan, inoi nga torio--no do kovosihan i karaatan. Rom 14,17 Sabap i karajaan do Kinoringan okonko hal do kakanan om kenuman, inoi nga kabanaran om kopioondusan om katamanan sid saralom di Sundu dot Osusi. Isai-nopo i mokikoburuo di Kristus do iadino, iosido-no ot ikozi do Kinoringan sampai oguna dot ulun.

2. Timotius 3,16-17 I nunu-nopo i nokosurat sid Kitab... kiguna do pakazon manarang di katapatan om monugat dit ongovudut om potolunung di golivong sampai mangagazad sid ralan do kabanaran.

Fil.1,11 Osukup banal sid dikou it uva do kabanaran i nagama di Kristus, tu mamantug om mongindazou di Kinoringan.

Luk 1,74 I Kinoringan manahak sid di tokou do kolobusan antad sid palad dit ongosangod, supaya sumamba tokou sid dau ...sid saralom do kosusian om kabanaran sid tinoguvangon dau.

f) **Kinoringan mongoguna di kabanaran dot ulun**

Mat.5,6;10;20: Osinang-no it ulun di monombitil om tuliohon do kabanaran, sabap it ulun dino envizahan. (10) Osinang-no it ulun di kopuriman do kosusaan, sabap gima i kabanaran, sabap it ulun dino kasanganu di karajaan do surga. (20) Bang aso kabanaran dikou di lobipo abanal mantadko i kabanaran dit ulun do Farisi om it ongoulun dit elo do Kitab, tantu-tantu-ko amu-kou kosuvang sid karajaan do surga.

Mat. 6,33 Ihimo-no banal dikou i karajaan do Kinoringan om i kabanaran dau, tu ongiadino, itahak sid dikou it ongohal vokon.

Sid Mat. 19,30 sampai 20,16 monuriban i Yesus di kabanaran do Kinoringan: ino-no miuma dot ipat-ipat it ulun varo kosukupu di balanja dau bahagi dit ongkob dau do monumad kavi sid suvang dit ongkob dau. It ulun di baiko pukul lima-po do minsosodop kadapat do ponsohorian tumorima di kosukupu miabal dit ulun dit nasadapan gumaji di minangakun di kosukupu di gama dau sangadau.

Imatai sid vokon it ongoayat di manarang di kabanaran: Rom 5,21; 8,10; 1. Petrus 2,24; Yakub 1,20;3,18; Kentalangan 22,11.

Iadino ong i hal do kabanaran. Na i Paulus mamakai-po di pongoretan do kapamanaran, ino-no o harati, varo gama mamaanal, minsanko amu abanal kondiri. Insan-po dino, i pongoretan di manarang di kobuatano do hal, ino-no ABANAL iadko i pongoretan dit otopot di manarang do varo hal dit isuhut dit atag. Na i pongoretan di sumaap di pongoretan dot abanal, ino-no asala, ko araat. Ong i ngaran do hal dino, kabanaran om karaatan ko kasalaan. Ong sid Inggeris, iseso o pongoretan apakai, ino-no Justice om Injustice (i sumaap do Justice= i duvo i hurup >in< miabal di >a< sid Momogun. Kavasa om a-kavasa, ko asavat om

a-asavat, ka. I pongoretan koduvo sid Inggeris, Righteousness= ino-no i hal do nabanal-no. I sumaap dino, wrongness , antawa ong baiko adjective "right" om "wrong" =it atag om it amu atag ko abanal om araat. Na mad amu miuma dot it ulun mongitung dot abanal iosido ong varo kalamahan ko karaatan. Suvaiko i hakim o mamalang di hukum do mamanal dit iso om manala di vokon om atalahas-ogi. Iadko i hiza di Sulaiman: varo duvo ot ondu di sompi kianak. Minirusod ioti sid iso ot ongekob sampai midudun ioti modop. Do tigogi, it iso ot ondu minongoloub sampai minongodsit dit anak dau di ragang-po sampai minatai it anak. Kakali modop i koruhang, sinolon-no dit ondu it anak di koruhang om pogilizo-no sid koruhang dau i buntung dit anak dau dino. Noposik-po, nelaan-ogi do minatai-no it iso it anak. Topot it idi banal dit anak di kakal-po mizau otutunan dot okonko dau dot anak i bai-ko buntung-po. Manjadi sabap tu minigagagut sampai minioduw-no ioti't ongondur diri, inovit-no ino hal dino sid raja Sulaiman. Kakali midahava i duvo it ondu dino, minonuhu i raja dot mongoi do sapadang, tu osuhul lapakon it anak di mizau, ka dau. I tomodon mongimazaan banal iosido dot isai banal it idi dit anak dino. Kodung noboros i iadino, minogihad-no it idi banal sampai mindamo do suhulon-po dit itahak it anak sid ondu vokon mantadko apatai alapak it anak dino. Sino-no dino o nokembulai dot isai banal it idi diri. Tu it ondu vokon dit elaan dot okonko dau dot anak amu-no minoniag do mamatai dit anak di koruhang. Iri-ogi pinouli-no di Sulaiman it anak dino sid idi banal dit anak dino. Ino gama di raja minamanal dit ondu dino. Ong bai ioti miduvo dino, tantu a-kemot do kabanaran. I harati,

I hakim mogihim om mongimbulai sampai mamalang di kabanaran. Banal-no, ong sid vaza do Momogun mamakai di pongoretan do "banal" dino, mad amu avagat banal ino boros dino, bai ngaran "banal", dot asarok do kopolombusan it ulun dot, "banal, topot" dot ino "topot" mad pahaba di gama mamanal. Ong it ulun do Yunani om Rom diri, elo banal mongohukum om monodiri dit atag om amu, it abanal om it araat. Gam nosusun-no dioti it ongohukum kodori diri sampai akapal it ongohukum om panarangan dot ombo it abanal om otopot om ombo it araat om asala. Iri-ogi it ongohakim amu osusa do mogkovosihan kondiri om monodiri dit ongokiis, bai mogihim sid surat hukum do sera varo hal di iadino om kuran i hukum laid sid hal dino.

Na i Paulus mamakai dino koubasan dit ulun Rom om Yunani sid panarangan dau kananganko i gama do Kinoringan ponong sid riniba. I Kinoringan iadko hakim di mangaratu dara di hukum dot apatut dara manala di riniba. Topot antad sid samod do Kinoringan di mogihim di riniba di napalid antad sid tinoguvangon do Kinoringan okonko manaala i Kinoringan di riniba, gam mamanal dioti, ong sukul tumolikud i riniba di vazaan ponong sid karaatan om tumoguvang vagu sid Kinoringan om muli-no sid Kinoringan. Ino gama do Kinoringan mamanal dot ulun, hiza-no laid di Ibrahim. Iosido dino, anak dot ulun di sumamba sid ongopatong, nga orikatan-no iosido di suhu do Kinoringan mogidu sid pomogunan om varis om molohing dau, kumaa sid pomogunan dot okonko elaan dau, nga sinumuhut-no iosido Ibrahim dot aso-nunu-nunu o koguvailan dau. Iti-no o sabap do minongi i Kinoringan di gama di Ibrahim mangasip do kabanaran dau.(4,2)

Varo vaza vokon di Kitab manarang di gama di Kinoringan sid saralom di Yesus bahagi di riniba: Kiutang i riniba dot aso tanganan mangapus, Kinoringan o minangapus (Mat. 18). Ko i riniba tumiim mokisian do Kinoringan sid gama pasamba do dupot, topot aso tanganan. Iri-ogi i Yesus ginaras-no do riniba sampai iosido mad persembaan di mongimbulai di kosianan do Kinoringan (Ibrani) Varo-po, mad pisanaan sid pialatan do Kinoringan om i riniba, nga kondiri do Kinoringan mandus sampai sumamba om minongimbulai di kopioondusan. Iti-no kavi o vaza manarang di gama di Yesus, baiko mamakai di pongitungan do riniba sid gama mangatag ombo it amu atag sid pialatan do sandad riniba, dot ong otopot, banalko tanid mantad di sokovia i gama dino i gama do Kinoringan manamod om mogihim sampai posinang di riniba. Tasantanid-tanid o vaza om suntuan di manarang di kogo zoo do samod do Kinoringan do mongonsug om pemumui iosido di riniba. Tu amu ozi i Kinoringan pada ko manaus di riniba, inoi nga ozi iosido di kosopulan om kiulian do riniba sid tinoguvangon dau (Yah. 3,16) ko 1. Tim 2,4 Ino-no i kenginan do Kinoringan, Sokovia i ongoulun osopulan sampai ohorotizan om kemumui sid katapatan. Insanpo dino, Suntuan: Varo manala dohon retanko ioku o minanakau do pazas sid kabun do sombol, gam sid sunsud di valai nokogili-no i pazas dino. Kuran kadapat do mongimbulai ombo it otopot. Ong varo sasi di nokemot dot varot ulun vokon di minanakau sampai minanahu di pazas sid sunsud di valai-ku do pakaraat dohon o tomodon om manala dohon, iri-ogi nokembulai-no it abanal. Manjadi ino sasi o mamanal dohon. Ioku kondiri amu kadapat mamanal dohon, tu amu kasip it ulun, kagi sid sunsud di valai-ku mili-

gili-no i pazas di natakau-no. Ong i Kinoringan mamanal di tokou, ino-no o harati, Amu mongitung iosido di nunu-nopo i nakatalib, ino-no i vaza tumolikud sid Kinoringan, inoi nga iosido kumavid di palad-ku om mananganak dohon om pouli dohon sid kovosihan dau, iadko it ama di monorima dit anak di nokokozou diri (Luk. 15,11-24). Ino suriban dino, nga suntuan di gama do Kinoringan ponong sid riniba di natagak om noko-kozou diri, di minongohormat di ginama di palad dau mantadko i Minongurug di riniba.

Insan-po dino, Boros di Paulus Ayat 17: I Habal do Kovosihan o kentalangan di kapamanaran do Kinoringan, antad sid kosipan sampai monong sid kosipan, ka. Na i pongoretan **koıntalangan** mamalang do varo hal dit amu-po avalang, amu-po ajadi, okonko baiko monorou ko monginipi. Inoi nga, pahabal di hal dit amu songkuro om kosunu-no. Ong bai mangalu-kalu, hal dit amu-po elaan do varo. Iadko darun, amu elaan do varo ko sera. bai hal do bambol iadko kemot do bakas sid himbaan.

Ong monorou, iadko inipi, varo't opuriman do varo. Ong nokoling i sovoon, monorou i kusai do nokouliau. Amu elaan do kuran, do tigogi, banal-no i iadino. Baiko momurimon. Ong sid ongonabi, otudukan-po i ginavo dau antad sid savat do kuran om jumadi-ogi.

Ong mongintalang, varo keloo dot ulun. I Dokutol monorupung di kitizan sampai kadapat-no mongintalang do kusai ko ondu it anak dino. Ko i saientist sid Pilipin otutunan-no laid dot amu songkuro om mulapak i burul Pinotobu.

1,18-32 I kasalaan do riniba

I Kinoringan sumana di karaatan om kasalaan, okonko it ulun di kisala.

a) sokoviai i riniba, osomok, ko osodu, i Yahudi, bansa vokon, elaan-no laid do Kinoringan, ka di Paulus, tu i kinourugan, ko i hal do pomogunan, vinangun, dupot, riniba o kapanalahasan do varo Minamangun om Minongurug. Ino-no rontob, i riniba misingelo, nga nokolovong-no ioti. Nokotiim-no i riniba rumompok ko tumalib do Kinoringan sampai kaharati-no dot ombo it atag om it amu, ombo it avantang om it araat, minsanko it avantang o tomodon dara, nga tumompok sid korumaato. Kiroon tokou it ongokurita di kotulung dara dot ulun dot oruhai it ulun rumikot sid tampat vokon, dot tigogi, ogumu ot ulun matai, gima aksiden. Sid Malaysia-ogi o kiroon do minatai sid saralom do toun 1991 labaan do 1800 ot ulun. It ongoenjin tumulung di riniba mangagama dot ongobarang. Topot tigogi, ino-no o kasabap dot aso-no karaja dot ulun dit aso tana om aso ponsohorian vokon tanid mantadko sid kilang, tu i kilang mamakai-no do robot om enjin di mongusaha dit ongobarang. Varo bajah di porombung dara di tana, supaya ogumu ot hasil, tigogi, norosunan it tana sampai it ongototodukon nga amu-no avantang mangakan, tu kiubat. It ongoubat, ong amu onong i gama mamakai, nga mongorongoi di guvas dot ulun.

Kinoringan pokoulau dit ulun sid karalazan dau. It ulun di mokilulundu rumosi do varo manakau. Iri-ogi osusa-no iosido mangajaga om mongkuta di valai dau. A-kodop it ulun, tu rumosi do varo't abanakau rumikot sid valai dau. Iri-ogi

amu mongoguna i riniba do Kinoringan, gam sumamba sid ongotatong di ginama di palad dioti.

araat i pongitungan dioti pahali ioti sid kensasasakahan om korumaato do ginavo

akanggau it ongoulun mongivogu, momodrusuk, mongizut om miaagai, sompikusai om sompiondu

sampai anangan do sakit i kosongoho di karaatan neduan do tuo, aso bahazan

mongonsug do rumaat banal

mokindazou sid karaatan, olugagai

akahag, mamalid di vokon

Ensan i riniba, varo nokosurat sid ginavo dit atag o gama misasala om mitataud (2,15) Manjadi ombo i kolonduo do riniba, ino-no ot rugizon i riniba. Osulian-no i riniba di dau om dau do karaatan om korumaato om karanggalan.

Na ino gama di Paulus mangarait dit a-ko piro o karaatan sid tanga do riniba, ino dino okonko harati, bai iti-no it araat ko ino-no it oholian araat. Ong i vokon, timbangon do Kinoringan ko kuran. Banal-no, i minangarait i Paulus diri, i hal sid pialatan do kusai om ondu om sompi kusai ko ondu, ko ponong sid anganak, dot it anganak mad zaza dit ongoosukod, vaza dit ongoyunani diri do rumaat. Ong kiroon tokou do kuran ong bianco, atag do mangarait dit ongokobuatano di bianco dit amu atag, iadko i gama do molohing do mamambang dot anganak ko it ama di mongoginaka dit anak dau dot ondu, om pengkaa i gama dit ulun di kihak do mongorugi dit ongoulun do mosikim ko it ongobansa di kikuasa di momorinta dit ongobansa vokon, ko i monolod do tana om i nunu-nopo i gama mongorongoi di pomogunan om himbaan om mamaniit

do vaig om barat om i iadino. Ombo i narait di Paulus bai a-ko piro o hal di mad suntuan kananganko i karaatan di kasaap di kabanaran om kovosihan om samod do Kinoringan.

Ong otopot, i sala sid tinoguvangon okonko i toriso-iso o hal, inoi nga i gama pakaso do Kinoringan ot sala keso di mongimbulai di karanggalan sid tasantanid-tanid o hal. Sabap ino, i nunu-nopo sansala, nga gulu-no i gama do sumaap di kabanaran do Kinoringan, iri-ogi humambil sid kobuatano om barang di dang koruhang ko ulun vokon.

32 Iri-ogi it oholian sid hal dino, okonko bai monimbaru do sala di iadino, gam mongonsug dit ulun vokon di monimbaru om tumomon-no ioti, ong varot ulun monimbaru do karaatan.

2,1-11 Ong iadino manala i Kinoringan iadko kogom sid pihukuman, it ulun di nokoruput dino kadapat tumimpa om dumahava. Manjadi sid F. 2 tumimpa om dumahava it ulun di "kibahazan" (1-11) om it ulun dit obebas (12-16) sampai it ulun dit elin banal (17-3,2)

Ong horubon manala i riniba sid F. 1,18-32, na, i Paulus mongolumbatos om manarang sid ulun kondiri, I dikau do nagama, ikau-no o momurimon ko monoruntud. Ong it ulun vokon, ioti-no kondiri o monoruntud. Tu ipat-ipat itulun kokondiri tumoguvang sid Kinoringan, ka di rasul Paulus. Moniim it ulun di kibahazan do manarang dot iosido banalko tanid mantadko it ulun do kisala sampai oholian o gama do Kinoringan mamajak manala, ka. Ino-no i timpa di Paulus, Ong Kinoringan monodiri (6)(Ong sid Matius 25 minsanko it sansangkil-no o vaig, nga amu-no nolingan do Kinoringan). Sabap ino, aso tinganan do misingkavaro ko pokoulau do Kinoringan. Amu momili i Kinoringan. Topot monodiri iosido dit ombo it atag om it amu, sampai ombo it osomok sid Kinoringan, ino-no it ongoulun do Yahudi, kogulu dot ohukuman om iri-ogi it ongovokon, ino-no it ongoulun Grik ko Yunani (ong i Paulus momungaran do Grik, ino-no i harati, sokovia i it ongoulun dit okonko ulun Yahudi, tu i hiza diri sokovia i it ongoulun om ongobansa dit engat di Paulus, nga ulun di nokosuvang sid kuasa di Kaisar do Rom.

2,12-16 It ulun dit obebas, it amu nokelo di pinonuhuan do Kinoringan, nga a-milo-milo kotoguvang sid Kinoringan, i manala om mongohukum di riniba. Ino-no rontob, tanid i gama do Kinoringan ponong sid ulun di nokelo-no laid di pinonuhuan om it amu-po. Kagi, iadko noboros-no laid sid 1,18-32, varo kelaan do Kinoringan om varo keloo do bahazan do riniba antad sid kinourugan dino. Ino dino, amu oruhai manarang sid Momogun. Ino keloo dino, nunu ino? I boros Momogun varo't iso pongoretan "ginavo" it ogumu o harati. I ginavo, siombo ino, sid utok, ko sid kangkap, ko sid busul, ko siombo. Ong sid tuturan di kinourugan do riniba, i tana dot osilou pinopiamung di pinohobo do Kinoringan jumadi do riniba di kiginavo

ong sid Bahasa: Nyawa ko jiwa = hal dit amu emot ko iadko undundu ko atoi. Ong amu osinang it ulun dot okonko sakit do guvas, retanko oruol do ginavo.

a) ong ototok it unturu, tu notibas, retanko dot aso-no ginavo sid unturu dino. Minsanko kakali varo sondulu, nga aso-not ontok. Ong minatai it ulun ko bai nokimai i palad mad "aso-no ginavo" ka.

b) ong duvo ot ulun miingin, retanko miginavo ioti, tu it duvo it ulun dino mizo sid pongitungan om sid gama mioopud-opud. Ko it ulun di guminavo, nga agazo o kenginan dau ponong sid ulun vokon.. Ong mingin banal it ulun, mad neduan-no do tuo. Mad amu elaan dot ulun monodiri om mongitung banal.

c) Iri-ogi i ginavo dot ulun monuduk dit ulun ombo it atag o gama ko kiroon ko gama tumimpa ko mongolumbatos om monodiri dit atag om amu. "Ong i dohon do ginavo, iadino," ka dit ulun. Na boros di Paulus, ino ginavo monuduk di tokou ombo it atag, gam monuduk dit ipat-ipat it ulun dot isai om kuran i Kinoringan, om nunu-nopo i kenginan do Kinoringan ponong sid riniba di ginama dau. Antad sino karatu i hukum do Kinoringan, tu i pinonuhuan do Kinoringan nokosurat-no sid ginavo dot ulun.

Vokon-no ong it ulun, minsanko nelaan-no dau dot ombo it atag, nga kakali gamaon do iadko aso hoturan om aso ginavo di monuduk dit avantang, tu arampus iosido ko oporintaan do rogon. Ino dino, nga pakaso-no do Kinoringan.

Vokon-no it ulun ong ozi ogorot iosido do kikuasa mangagama do iadino om iadilo, engin do kisundu-kisindaat, tu obebas iosido sampai i hoturan baiko ulun vokon-po o panangan. Ong iosido kondiri, nga aso rontob om aso't a-kavasa. Inot ulun di iadino, mad norungoi-no i ginavo dau.

Vokon-no it ulun ong mongitung dot okonko kitanggungng jawab iosido ponong sid isai-nopo. Sino dino momoros om manarang i Paulus dot a-milo-milo, nga ohukuman it ulun isuhut di tanggung jawab di nakatahak sid dau (I Kain amu tumorima dot iosido o mongontupat dit obpinai dau)

Kuran kadapat it ulun monimbaru di ginavo dau, supaya i ginavo dino mangagazad sid kavantango om kabanaran do Kinoringan? Ino dino, suvai jumadi, ong koguli vagu it ulun sid tinoguvangon do Kinoringan. Ong momoros i Yesus dot, Piguli-kou-no, ka, ino-no o harati, ensanan it ulun, guvas om ginavo tumolikud di vazaan om gagamaon laid om tumoguvang-no sid Kinoringan, sid ginavo om sid gagamaon dau.

2,17-3,2 It ulun dit elin om apaham ko okosog. Binokuvis di Paulus it ulun Yahudi, i retanko elin om atapat iosido sid tinoguvangon do Kinoringan. Na i tokou ulun Kristian, atag do turus omungon tokou i ngaran tokou Kristian, ong i Paulus mangarait dot Yahudi, tu sompi anangan tokou dino boros di Paulus dino. Ong i Paulus momoros "Pinonuhuan", ong sid di tokou, ino-no "I Kitab" ko, ong "sunat", nga i tokou "ulun tokou do piumpugan do Kristian ko "ahli". Banal-no, ong Yahudi om Kristian, ino dino, hal dot avantang. Banal-noko varo pitonidan ong i tokou om it ulun dit amu mangasip. Ino-no o rontob, kuran o gama tokou mamakai di nakatahak sid di tokou, iadko tinungkusan. Ong 3,2, ka di Paulus, Nipataud do Kinoringan dioti it ongojanji dau. Ko i tokou Kristian, atahakan tokou do kovosihan om samod do Kinoringan. Elo tokou monuduk dit ulun vokon. Topot ong i tokou-ogi kondiri ot amu sumuhut. I harati, amu tokou mongoguna di nakatahak sid di tokou. Iadko i moligun, tinungkusan dot ulun antad sid aki-aki dot amu kaharati mongoguna do songkuro o kagazo do horogo. Bai kiluvang iti, ka dit ulun diri. Suvaiko biano om elaan-ogi dot agazo o horogo, tu tinungkusan do banalko alaid om otiru sampai pilian.

Osumbung i Kristian, tu varo kovosihan do Kinoringan sid dau, ko mamakai iosido di kovosihan dino om posurut di kovosihan om kabanaran do Kinoringan? Okonko i ngaran om okonko i tanda do nakamung sid bansa do Kinoringan (sunat) o kiguna, ka di Paulus, inoi nga suvai mimbulai i kokoristian om mad osunatan i ginavo (i Paulus monuriban dot, suvai nedu-no i kosumbungo om korusuko om kobungoho sid ginavo om atag-ogi i ginavo). Kuran i vaza tokou humarati om mamakai di kopomodsuan ko mogontong sid gorija, bai tomod moginakan om mangaramai sid ongakob ko banalko tanda di mongohondom tokou sodop adau dot i tokou diti dang Kinoringan?

Ong mamasa tokou di usuran do gorija sompomogunan, banal-no ogumu o hal di nakagama sid ngaran do gorija om sid ngaran di Kristus di banalnoko mongusiba om mongorongoi di ngaran di Kristus om pakaso do Kinoringan, ino-no i perang salib ko i gama manansanganu dit ongopomogunan ko i gama ponong sid ulun Yahudi (hiza di Hitler om vokon-no) ko mirurumpak it ongopomogunan di retanko Kristian Eropa. Kuran-kuran, aso tinganan sumaap di hukum do Kinoringan ponong sid ensanan i riniba...

3,3-20 Ong tumiim i riniba manala om mongohukum do Kinoringan, tantu aso tinganan ino.

Sid gama di Paulus dumahava, tigogi varo boros dot ulun di mad manala do Kinoringan. Retanko mad aso kogunaan di gama do Kinoringan pataud dit Yahudi di janji dau. Tu ong atag o janji, aso kolonduo, gam korintuodo ong riniba,ka.

Okonko iadino, tu ino hal dino okonko hal do otomatik, I riniba kikuasa do kumavid di janji om pakaso ko tumongizad sid janji dino, ka. Sabap ino, iso-no ot otopot, Abanal i Kinoringan. Topot ong i riniba, momudut-nopo om mogihim-nopo do vazaan manangkis di hukum om kabanaran do Kinoringan.

Topot varo-no momoros, ong i iadino kembulai i katatapo om kabanaro do Kinoringan, osinang iti, iadno dino i kenginan do Kinoringan, tu otopot iosido, ong i tokou riniba ulun do momomudut. Alanta-no kavi ino. Apakai, tu iadno dino i kenginan do Kinoringan, ka. Kuozon-po. Ombo-nopo ong ino, ka. Nelaan-no laid do iadino o kenginan dau, ka. Nahatul-no laid dau i iadino, ka. Ino dino bai misingkavaro i Kinoringan di tokou, ka. Kodung iadino o pongitungan do riniba, tiagon di Paulus vagu dot, Tantu-tantu-ko aso iadino, ka.

3,7 Om varo-po o banl-noko bolikung o gama mongitung, retanko, ong sid sala-ku, gumazo-no i hormat om kabanaran do Kinoringan, nokokuro, tu ohukuman-oku-po dino, tu ino gama-ku dino gam monulung om posurut-po di kohormatan do Kinoringan, ka. Mad, rumaat tokou banal, sabap tumimpak sid kavantango do Kinoringan. Nokokuro tu ohukuman-oku, ong sid karaatan-ku dino nga kembulai-no i kovosihan do Kinoringan? (ka dit iso o YB do Rungus, Ong aso-no mangagama om monimbaru do sala, nunu-po o gamaon do Kinoringan? ka)

Ino gama misingulau om mongusiba do Kinoringan dino pembulai di korumaato om it oholian kalandu di riniba, di kakali kumodui om sumaap-po do Kinoringan.

Iti-no o sabap dot i Paulus mongogovit dit a-ko piro o ayat dit ongonabi, tu monombol di kabang dit ulun dit oburuvak sid tinoguvangon do Kinoringan. Tu iso-no ot atag, tumimpa tokou sid hukum do Kinoringan di mongoduat om monginsosok dot, Tumorima-ko di hukum dino ko amu. Topot i timpa tokou, Oh, tu aso tinganan dumahava do tanid mantadko mangakun om mongoho sid vaza do Kinoringan mongonsi di kobuatano-ku om kavazao tokou sid tinoguvangon do Kinoringan.

3,21-30 I Kinoringan mamanal di riniba dit apatut dot ohukuman.

Ong antad sid riniba o kiroon, noputut-no i ralan ponong sid Kinoringan, tu i riniba nokotongkizad-no om nokedu-no sampai aso-no vazaan muli sid Kinoringan.

Ong antad sid riniba, aso kosurutan om aso-no kopudan ponong sid Kinoringan. Iri-ogi ong i Paulus manarang, I kabanaran do Kinoringan rumikot sid riniba. I Kinoringan mamanal dit ulun di kisala, it ulun di pakaso do Kinoringan. Varo-no vazaan muli. Inoput-no vagu do Kinoringan i timbagos di noputut. Ino dino iadko i gama di Yesus momoros did ulun do kibalang: Pamanau-kou-no sid imam om mokiporisa-kou-no sori, dot okonko osihat-no laid i guvas dioti diri.

Kinoringan palanta di kabanaran dau, ka di Paulus. Ong i riniba aso tinganan mongimbulai di kabanaran, mogihim do kabanaran, mongusaha di kabanaran do iadko mangagama do meja ko muvalai, tu nokogili-no, nakatahak-no sino.

Ong sid boros do Inggeris Pidgin sid Papua, varo vaza manarang di boros di Paulus kananganko i kapamanaran dino, God sei, fellow OK. Ong sid di tokou, Ino-no, I Kinoringan mangatag ombo dit amu atag, ino-no i karaatan dot ulun, i gama do riniba tumongkizad om mogidu, i gama pakaso do Kinoringan. Kondiri di Kinoringan tumanggihai-no vagu di tokou, manamod-no vagu di tokou, mangavid-no di tokou, gobuon tokou-no iadko it ama di hiza di muli it anak di nokokozou diri. Kavi it asakau om kavi it amu atag om i nunu-nopo i hal di kinensoduan tokou antad sid Kinoringan, nga nedu-no kavi, nosusi-no kavi, natagan-no vagu sampai i tokou iadko ulun dit a-nosunsub sid kabun dot Eden ko it a-nokedu sid tinoguvangon do Kinoringan. Iadko it ulun do nasala-no dara, tu ogumu o hal do nagama dit aso tinganan dot okonko salaon. Topot tigogi, boros di hakim, oebas-ko-no dino. Ulio-no sid valai-nu, ka. Ino-no i kovosihan, ino-no i kapamanaran do Kinoringan.

Antad siongo ino kavi ? ka. 25 Antad-no sid di Yesus, i nisangkap-no. Sid kazu do sangkap o kinembulazan di kapamanaran do Kinoringan. Noumpai-no do Kinoringan,(ino-no i boros sid ongonabi om sid ongozabur- Yesaya 53) om i kolonuto do Kinoringan o minangagama sampai manarang dot i Kinoringan ot abanal om iosido-no o mamanal dit isai-nopo i humarap om mangasip sid di Yesus, i nisangkap-no. Ong iadino, aso-no tinganan momuruvak ko mokindazou ko nunu-nopo kananganko i hormat om garal do riniba, Yahudi ko okonko yahudi. Bai iso-po ot atag, ino-no tumorima dino kabanaran dino om mangasip sid di Yesus dot iosido-no o vazaan tokou miguli vagu sid Kinoringan. Ino dino bai suromo dot aso tinganan horotizon ko tarangon ko kuo-kuozon, baiko torimaon-po om gunaon-po ot atag o gama. I harati, baiko mangasip-po ot atag o gama tumimpa sid agazo o gama do Kinoringan mamanal di tokou ko monindal di tokou di nakada-no sid luvang ko nokolobong-no sid rapak ko nokotorungku-no do sampai pempatai dara. Topot i Yesus o pouli om mamasi-no vagu di tokou om popebas di tokou, posihat di tokou, pengkakat di tokou. Baiko i kosip-po ot atag o gama tumimpa sid gama do Kinoringan. Sabap ino, aso pobidaan dot ulun Yahudi om Yunani, ko i nunu-nopo o pitonidan do riniba, ondu ko kusai, anak ko osukod, boros ko kulit ko lumundu om mosikim. Ensanan tokou otorima. Manjadi ong bianco, ong iadino notorima-no laid, i pinonuhuan dino okonko manala om mongohukum ko momogos di tokou, inoi nga vazaan monuduk di tokou monorima kaseh sid Kinoringan.

4,1-25 I Ibrahim i Ama dit ongoulun di mangasip

Sid saralom di surat pakaa i Rom i Paulus moniim do pavalang om pahaba dit a-ko piro o vaza dot ulun momudali di Habal do Kovosihan om pakaraat di gama di Yesus dot i kosurutan di dau om dau do rombongan o tomodon. Sabap ino, manarang i Paulus dot isai banal nga warga negara di bansa do Kinoringan. Ong sid piumpugan do Galatia, varo-no laid di minomoros do suvai nosunatan-no om sid gama monuluk di sokovia i it ongroundang-undang om hoturan di Musa omjumadi-ogi dot ulun di dang Kinoringan. Isai-nopo it engin milang sid barakat di Ibrahim, suvai mozo iosido di vazaan dit ongoulun do Yahudi, ka. Ga, i Paulus i bai mongohodtol di "baiko kosipan" pagaan banal di vaza sumuhut do Kinoringan bahagi dit ongoulun do labus, inot ongoulun di bansa Yunani dit mad aso bahazan. ka dioti diri.

Sid surat pakaa sid Galatia sinalazai-no di Paulus ino hal dino, vokon-no dot madhadsak o boros dau. Boros dau diri, ino barakat antd sid di Ibrahim okonko sid sunat o vinazaan, inoi nga itahak di Sundu dot Kinoringan. Ong sukul momoros om mongodim tokou dot "Abba", tu tinudukan di Sundu do iadino, iri-ogi jumadi tokou dot anganak do Kinoringan sampai ulun tokou di monungkus di bahanda di sid di Ibrahim diri (Kinotimpunaan 12,3)

Sid f. 4 di surat pakaa sid Rom, momongo i Paulus, dot doromozo-no o gama manarang di tema dino. I Kitab okonko buuk do pongumpugan do hukum do Kinoringan, inoi nga buuk do mongusul di pangalaman dit ongoulun di apasi sid tinoguvangon do Kinoringan. Ioti dino mad suntuan bahagi di tokou. Bang i Yesus momuka di ralan tokou tumoronong sid Kinoringan sampai i Kinoringan ot Ama tokou sid surga, kopihiza tokou mamung tokou sid ongakob om bansa do Kinoringan, ino-no it ongoulun do Kitab di mad amai om inai tokou ponong sid kosipan. I Ibrahim nga suntuan do kuran it ulun jumadi dot abanal sid tinoguvangon do Kinoringan, tu kodung nokening iosido di bahanda do Kinoringan, tinumorima iosido di bahanda dino sampai minangasip do kosunu kavi i noboros sino dino. Ong ulun vokon ko pangalaman dot ulun tumimpa dara sid Kinoringan dot, Kuozon-no do maganak ong noruzahan-no i savo omlumohing i kusai, nga kakali hinumarap om minangasip i Ibrahim dot i Kinoringan kadapat do paranzat dit Ibrahim do bansa vagu. Na it ongoulun Yahudi minomoros dot ino kosipan di Ibrahim di iadino, nga hal om gama di Ibrahim, retanko iadino o gama di Ibrahim monobus om mamarai di barakat dau dino, ka. Topot i Paulus dumahava di boros di iadino, tu, ka dau, Ong iadino, mad porosuma i gama di Yesus momuka do ralan muli sid Kinoringan.

4-5: Iadino mongonsi i Paulus di kopoulosan om suntuan di Ibrahim: Ong varo dara gama di Ibrahim tumalad di gama do Kinoringan, gam i Kinoringan osusa do mangapus dit utang dau sid di Ibrahim, tu apatut do varo gaji di Ibrahim. Topot okonko iadino, Aso harapan di Ibrahim sid dau kondiri, ensanan iosido hinumarap sid kovosihan om kagazadan do Kinoringan, hiza di minamanau iosido sid pomogunan dot okonko elaan dau o rikoton om minongizad dit ongakorimbutuon dot elaan dau dot aso tenganan mongizap; na hinarap dau do varot anganak om muaki dau. Ino pongoretan dot, Pokiroon, mad monurat dot utang ko i natahu-no i siin sid bank ko kadai. Ino kosipan di Ibrahim, nga ajadi do kabanaran, okonko i gama misimbanal om nunu-nopo o gama mamanal di kondiri. Ino-no o boros di Paulus, Ong sukul kumavid-ko di samod di Yesus om i sokoviai i gama di Yesus bahagi dikau dot amu moniim-ko sid tinoguvangon do Kinoringan do mamanal di kondiri, retanko notuluk-ku-no kavi i kenginan do Kinoringan, ka, iri-ogi retan-ko, ulun dot abanal.

6-8 I Paulus momihot di noboros sino, isuhut di vaza dot ulun dit elo do Kitab do mamakai dot duvo o sasi, ino-no i Ibrahim om i Daud. Ulangan 17.6; 19,15) Sid Zabur 32 momoros i Daud, Osinang-no it ulun di niada di Tuhan i karanggalan dau om tinakapan di Tuhan i karaatan dau. Osinang-no it ulun di tinanus di Tuhan i kasalaan dau... tu ino gama do Kinoringan o mamanal dit ulun di kisala. Kondiri di Kinoringan mangada di karaatan, okonko i gama mangapus ko monogid o kadapat mananus ko mangaganti di karaatan. Suvai i Kinoringan iadko hakim mamalang dot obebas it ulun, dot amu okiro i sala dau om kalabus-ogi it ulun antad sid torungku. Hiza di kinapatazan di Yesus o minanarang i Kinoringan sid riniba dot tumorima i Kinoringan di riniba, it isai-nopo it ulun, ong sukul it ulun tumoguvang do Kinoringan.

9-12: Omungon-po di Paulus sid panarangan dau dot, Okonko mihiza i janji do Kinoringan sid di Ibrahim om i suhu do monunat do kusai (Kinotimpunaan 15 om 17) inoi nga antad mangajangji i Kinoringan sampai i suhu monunat, varo 29 toun (ka di tafsiran dit elo do Kitab Ibrani). Boros di Paulus, I sunat bai tanda, mad sijil do janji do Kinoringan di momihot do nakasip-no i Ibrahim sid janji dino. Sabap ino i Ibrahim nga ama do kosipan dit isai-nopo it ulun di mangasip, Yahudi ko Yunani ko nunu-nopo sambansa.

13-22: momongo i Paulus do monodiri di gama monuluk di pinonuhuan om i gama mangasip sampai posuntu-no vagu sid kosipan di Ibrahim do bai i kosipan om i harapan hiza dot banalko aso tinganan humarap o miuma do tumorima di kovosihan om kabanaran do Kinoringan. Sinod paangalaman di Ibrahim o kaharati tokou dot nunu banal i harati kosipan om mangasip. mangasip okonko hal do mising... ko monorou om malu-kalu di nunu-nopo ko monguvo-kuvo, retanko varo dot ong otopot aso, inoi nga i gama tumorima di boros om bahanda do Kinoringan sampai kumavid di boros dino, tu elaan dot ino-no it otopot om abanal. Iadko i Ibrahim, "minsanko mad minatai-no i guvas dau, tu osomok hatas toun ot umul om i savo dau nga noruzahan do tamanang laid iosido, nga amu minipiduvo i ginavo dau, minagavi-no mangasip dot nunu-nopo i najanji di Kinoringan, kopongimbulai. Amu-no nelaan di Ibrahim do sera om

kuran o gama do Kinoringan, bai nelaan om nohorotizan dau dot a-milo-milo varo gama do Kinoringan monuluk di janji dau, sera om kuran do kenginan do Kinoringan.

23-25: Na iadko ino kosipan di Ibrahim dit antad sid kuasa om sundu do Kinoringan nokembulai, o kosipan tokou sid di Yesus, i nogulian-no antad sid ulun di minatai. Sabap i kosipan di Ibrahim nga kosipan dot i Kinoringan kopohijau vagu di minatai (mongogulian di minatai). I Sara di tamanang-no laid om lumohing banal maganak om i riniba di nokonong sid kapatazan, gima i vaza dau mogidu sid Kinoringan om monimbaru do karaatan, nga kanu do kuposizan vagu, sampai i tokou, ong sukul mangasip, isuhut di kosipan di Ibrahim, nga tumorima di kuposizan vagu om kuposizan penlaid. Ino dino kavi antad sid di Yesus, i nohukuman-no, mongontok di karaatan om kasalaan tokou, om i ginulianan, gima mamanal di tokou.

5,1-11 Nabanl tokou, gima i kosipan

Nopongo-nopo di Paulus dumahava ponong sid isai-nopo it ulun di gumuvail di Paulus, iri-ogi manarang iosido di kapangaan om kanangan di gama di Yesus: i tokou diti nabanal-no. Varo kopioondusan sid pialatan do Kinoringan om i tokou riniba. Kopioondusan o harati, aso kelemoan om asot utang, aso sana om aso hungot ko karaatan sid pialatan dit miaandus. Na kopioondusan ponong sid Kinoringan, ino-no, oluvas i ralan ponong sid Kinoringan, oging-no i mato ponong sid Kinoringan. It ulun momurimon di kovosihan om samod do Kinoringan. Ong varo nosodia do ralan muli sid ko tumoguvang sid Kinoringan, varo-po kosurutan sid ralan dino, ino-no i harapan do posurut di kohormatan do Kinoringan. Minsanko i kapagasan nga kiguna, tu papalanut dit ulun om momihot di ginavo dot ulun sampai mongingkansang-no vagu di harapan. Ino gama mokindazou om mongimbulai di kohormatan do Kinoringan, ino-no nga i timpa dit ulun di mangasip, mad gama di kosipan. Na varo-po panarangan di Paulus kananganko it a-ko piro o pongoretan, iadko:

kosipan om kolonutan: a-milo-milo it ulun di mangasip okonko ensanan oruhai momongo mangasip om posurut di kopioondusan do Kinoringan. Varo't ongohal ko ulun di monusa om mongohigong di ralan dit ulun di mangasip. Varo di mad monobon di vazaan ko sumaap-po om mangahavud, iadko ohubang o ralan om amu oluvas o panahon. Topot sid panahon di iadino, kumogoos om lumanut it ulun sampai tumatap om kumansang-no.

ginavo dot osibak om harapan: ong sumuhut it ulun di suntuan di Yesus dit okonko osumbung ko oburuvak o kobuatano, inoi nga tumahan om osibak o gama sid pialatan dot ulun, it ulun Kristian nga tumatap sid harapan dau, gima nosusi-no i harapan iadko it amas di nosusi-no (nososob-no) sid apui.

harapan om samod: topot ino harapan dino okonko ginama kondiri ko katatapo kondiri, inoi nga gama di Sundu do Kinoringan do minananom di samod do Kinoringan sid ongoginavo tokou. Ino samod dino monguva sid saralom di ginavo om gama tokou. I harati, it natahak sid di tokou, suntuan: i siin di natahu-no sid simpanan wang, supaya varo hasil ko bunga. Sinod bank dino momusak i natahu sino, ino-no i samod do Kinoringan o sumuni om sumurut sid gama tokou polombus di samod do Kinoringan sid ulun vokon om monuli di samod dino sid Kinoringan i minamangun di tokou om manual di tokou, isuhut di kenginan dau. 6-8 Ong varo dara ulun di kodung nokening di pongoretan, Sundu do Kinoringan, mad surga ot engat om surga o tirikoton dioti, mongovit i Paulus di tokou sid inantadon di kovosihan om samod om Sundu do Kinoringan, ino-no sid sangkap di Yesus. Mangalapis i Paulus dit ayat dot,

nitahak sid di tokou i Sundu do Kinoringan(5) dot,

minatai i Kristus ontokko it ulun di pakaso do Kinoringan (6)

I Sundu do Kinoringan mopud om mimbulai sid kapagasan di Kristus. I samod do Kinoringan tinumimpun sid ulun di banalko aso garal om hormat: okugui, ulun di pakaso do Kinoringan, ulun tokou do kisala, sangod tokou do Kinoringan. Okonko impiro-piro o gama di Paulus mongohodtol dot ong riniba o kiroon, asot iso ot avantang om kiguna ko apakai, tanid mantadko kokuguzan, kasalaan, karaatan, kasangadan, kosoduo antad sid Kinoringan. Aso't iso kavazao dit atag ponong sid samod do Kinoringan. Topot sino dino tumimpun i Kinoringan mangatag om mongimbulai di vagun vagu om hoturan vagu.

9-11 **kopioondusan om kosinangan:** I gama di Yesus sid sangkap om i gama dau biano di nogulianan-no iosido, nga iseso o tomodon: konihab, biano, sampai penlaid iosido. Nobuka-no, nogiang-no i ralan muli, nakadapat tokou di kopioondusan do Kinoringan om najadi tokou do pakakas di kopioondusan dino ponong sid sokoviai i riniba. Sabap ino, otomon tokou, mamung tokou sid gama mongindazou di

Kinoringan. Ino katamanan dino ot panangan di kopolisan tokou sid tanga di razat, supaya ino katamanan dino rumaliu sid ulun vokon.

5,12-21 I Adam om i Kristus: Sid di Ibrahim misisingilo tokou mangasip om manganu tokou di kapamanaran do Kinoringan. Iri-ogi nakamung tokou sid ulun di tumorima di bahanda di Ibrahim om i barakat dau, minsanko okonko nokoyahudi tokou dino. Sid a-ko piro o ayat manarang-no vagu i Paulus dot, Ong i Yesus o manapul di riniba, okonko bai it ongoulun Yahudi (sid gama mongimbulai om porikot di samod do Kinoringan), tantu i Kristus nga mongimbulai do generasi om ranzat om riniba vagu.

I Paulus manarang sid piumpugan do Rom dot i kenginan do Kinoringan okonko baiko iso it ulun di mangasip ko ponong iso rombongan dot ulun Kristian, inoi nga agazo o tomodon do Kinoringan di mongingut iosido dit ulun sid ralan om ihut di Ibrahim: Kinoringan mongurug vagu, mongimbulit di kinourugan diri. Iti-no o sabap do mangarait om manarang i Paulus di Adam di mad kotuaan ko moguli di Kristus dino.

I kasalaan o kopomorintaan di pakaso om sumaap do Kinoringan:

Kasalaan ko sala okonko bai kobungahan di riniba gulu banal di mad mungkus tungkus sid anganak, inoi nga sala om karaatan, ino-no i kuasa di sumaap do Kinoringan, nga tinumimpuun-no sid adam do momorinta di riniba. I sala okonko bai kotohiangen antad sid ralan dot abanal ko korotuan sid parit sid alun-alun ko kabambaran om kahajangan, inoi nga i gama sumamba sid kuasa di sumaap do Kinoringan. Sabap ino amu atag do momoros, kuozon-po, okonko dohon do tomodon, bai kabambaran om kahajangan dot okonko ioku o minangagama, ka, inoi nga atag do mongitung om mogihim di vazaan lumabus antad sid hoturan di kuasa dino.

I kovosihan, it itahak do Kinoringan sid isai-nopo i tumorima:

Na i Yesus o simpangan ko sabap dot ogiang-no i rongobon do Kabanaran, ko i kembulazan do kuasa di sumaap di karaatan om kasalaan. Ong i ralan di kembulai hiza di Adam ponong sid kapatazan, nga i ralan vagu di Yesus, nga ponong sid kopolisan, isuhut di kabanaran, ong sukul it ulun kumavid (mangasip) di kabanaran.

i kosipan om i pinonuhuan: ayat 19 tumalad di ayat 18: i sala, ino-no i gama pakaso do Kinoringan ko gumuvail. Topot kabanaran, ino-no i gama sumuhut isuhut di Kristus. Ong momoros i Paulus sid ayat 18 "i sokoviai i riniba", topot ong sid 19 " i kogumuai", okonko harati, it iso hal bahagi di sokoviai i riniba, ino-no i kasalaan, topot ong i kabanaran ko kobinsusuhuto baiko bahagi dit a-ko piro ot ulun. Sino dino kembulai dot i Paulus ulun dit oubas sid boros Ibrani. Sabap sid boros Ibrani amu monodiri dot, kogumuai om sokoviai, miabal ino duvo pongoretan dino.

13-14: it a-ko piro ayat 13-17 mad panarangan vokon: varo-no dara vagu it ulun Yahudi di momoros om dumahava di panarangan di Paulus, tu ka dioti, amu osusa banal ino hal do sala, tu varo pinonuhuan. Ong sukul it ulun sumuhut om monuluk di pinonuhuan dino, varo vazaan muli sid Kinoringan. It ulun kondiri kogoos do mogihim om sumuhut di ralan ponong sid toguvangon sid Kinoringan, ka dara dioti dino. Na boros di Paulus, keso, i hiza di kinem-bulazan di karaatan om kasalaan, aso-po pinonuhuan. I hiza di nokembulai-no i pinonuhuan dino, natagak-no laid i riniba om nakaraat-no. Iri-ogi i pinonuhuan dino amu miuma, okugui, amu kasaap di kuasa di pakaso do Kinoringan. Ong momoros i Paulus do iadino, amu mongindaraat iosido di pinonuhuan dino, gam manarang iosido dot i pinonuhuan mongimbulai om mongiro di karaatan, ka dau. Ino-no rontob i kogunaan di pinonuhuan ko Taurat, manarang di karaatan om manala dit ulun.

I panangan di kasalaan, ino-no i kapatazan:

20-21 (14-17) Monodiri i Paulus dit kasalaan dot ulun, i di Adam om i dit ongogenerasi di sid tohudi, i dang ulun Yahudi om it on gobansa vokon, it ulun di nokelo di pinonuhuan om it ulun dit otudukan di ginavo dau ombo it atag om amu. Ong it Ongoyahudi rinumanggal di pinonuhuan do Kinoringan. topot it on gobansa nga pinozimozo dit atag o bahazan sid ulun vokon (1,18)

Sabap ino i pinonuhuan (sid ulun Yahudi) om i ginavo(sid ulun vokon) enizo o tugas, ino-no manarang dit atag om amu sampai manala dit araat.

Sid 15-17 monodiri om popiperad di Kristus om i Adam di mad misasaap. I Kristus o minangantod di kovosihan om i patahak do Kinoringan sampai mongingut di tokou mamung sid gama di Kristus mangahatul om momorinta. Ino hoturan om kopomorintaan dino amu engat do kagaratan om

koponguripanan, inoi nga agazad-no do samod om kovosihan om kopioondusan. Iri-ogi it ulun di nakamung sid hoturan dino, kadapat momorinta, supaya amu okuasaan iosido do karaatan om kasalaan. (Fasal 6)

I KOPIOMORINTAAN DI SALA OM I KOLOBUSAN ANTAD SID KUASA DINO

gima nipalabus di Kristus. Bai i Paulus o manarang di kuasa do sala do iadino aralom. Boros dau, I sala mongouripon/nokoponguripon di riniba om ipat-ipat it ulun sampai it ulun nouripon dot aso't elaan dau tanid mantadko monimbaru do sala. Minsanko it avantang dara o tomodon, tigogi, nokotopik-no sid karaatan. Mad natandon-no sid rinibai i gama mobul-obul sid kasalaan. Suvai i Kristus o palabus antad sid kuasa om hoturan do sala sid gama dau monobus di mad utang om potindal antad sid daerah (kuasa) do sala. Ino pongitungan di Paulus dino okonko bai vaza manarang di tuturan di kinourugan om kuran i Adam om i Hava naratu-no si pensubaan. Gam i Paulus humarati di hiza dau, do kuran i hoturan Rom o momorinta om momogos dit ongoulun di nokosuvang sid hoturan dino. Suvai kaharati tokou do kuran it ongoulun sid Rom diri nokuasaan do porinta Rom om karamit tokou (koduzan) di vaza di Paulus manarang di kopomorintaan do sala om i kobebasan/kolobusan dit ulun di nakavaliu sid kuasa om karajaan di Kristus. Ong nakamung-no sid hoturan di Kristus, banalko tanid i kouripanan om kosokotan sid Habal do Kovosihan (6,19 om 8,15), tu ka di Paulus, i kinuripanan sid di Kristus, ong otopot, ino-no i kobebasan om kolobusan dot avantang.

I SALA mad kuasa om i gama monimbaru do sala om karaatan, nga kopisuput om kopiopuput, nga mad amu miabal, ong sid di Paulus. Tu ing-48 varo panarangan di Paulus kananganko i SALA, topot ong i gama monimbaru do sala bai inturu-no napakai-no. Ong mamakai i Paulus di pongoretan SALA om KASALAAN, manarang iosido do varo kuasa di momorinta om momogos swampai monguripon, isuhut di vaza momorinta di kodori diri. Mad tolu o vaza momorinta diri,

Keso, i sanganu monguripon dit uripon dau. Iosido o nokotobus dot ulun iadko notobus i karabau, dot it ulun (uripon) dino inanu do kaki tangan. Aso hak it uripon dino, makan, modop, mangagama, matai, ombo i sanganu.

Koduvo, I sala momorinta di sompomogunan. Rom 6,12 om 5,21 = i sala momorinta. I vatas di kuasa do sala, songvinangun (5,12 om 6,1-2) It ulun mad nokotorungku-no, i sala mad tuan do rumpak di pagaji di sojal dau(6,23), nga it ulun mad pakakas do rumpak (6,13) om i vaza momorinta, ino-no i kapatazan (5,21) I sala mamakai do hoturan, mad pinonuhuan di momogos om momorinta di riniba (7,23,25;8,2) I pinonuhuan do sala okonko i Taurat ko i hopod pinonuhuan, inoi nga i vaza mongogorot sid dau do hal om potongkizad dit ulun antad sid Taurat om i kenginan do Kinoringan.

Ensanani i riniba inuripanan di hukum di kasalaan (3,9; 3,12; 3,23) dot amu monodiri do Yahudi ko vokon. Amu kogoos ioti tumahan om padsaap di pensubaan om amu miuma i gama dioti sumuhut di kenginan do Kinoringan. Ong momoros i Paulus dot, "ensanan i vinangun,"ka, nengat dau i sokoviai it ongopomogunan di nokosuvang-no sid kuasa do Rom. I kogoos di karajaan do Rom o kiniro di Paulus do retanko songvinangun, ong noboros laid dau dot, "kiutang-oku sid sokoviai it ongobansa om ongopomogunan"(1,16-17) Sabap i gama di Yesus mangalabus di sokoviai i riniba om mongimbulai do hoturan do karajaan do Kinoringan, i rasul nga inanu-no do pazazad di kolobusan sid sokoviai i vinangun. (8,18-22)

Suvai it ulun di mangasip o kentutun di kuasa om kopomorintaan di sala, gam humarati iosido dot i sala mamakai-po di Taurat do mad pakakas dau. Kagi, ensanan it usuran do riniba, antad sid di Adam, nga sejarah di kuasa do Sala.

Kotolu: Isai om kuran it uripon do sala? Ong uripon it ulun, ensanan iosido nokosuvang sid kuasa di tuan dau, i gama, guvas, pongitungan, ginavo dau oporintaan om ohoturan di sanganu. Suvai matai it ulun om engkod-no i kuasa di sanganu dino. (6,6 om 7,24) It uripon, nga paakakas di tuan dau, iadko pangazam. Okudik nga aso dit uripon kondiri; ensanan iosido nokosuvang sid kuasa di tuan dau. Iti-no o sabap do momoros i Paulus dot, "i guvas di dang saala" ko," i sala o raja di guvas". Sabap it ulun mad nagaratan do panansara di mad lalapos di kirugi (1. Kor. 15,56) I kapatazan om i sala misangai do sompi momorinta di vinangun om momogos di riniba. Sabap it ulun nojuval-no sid SALA (7,14)

Kapat: I sala di mad rogon. It ulun di sid kuasa do sala mad nosorungan-no, i sala mad nokezon-no sid ginavo dot ulun (7,17+20 om 7,8-11) i SALA ino-no i vozoon do rogon i magavang dot ulun do mamalid

o tomodon. (7,8-11) Sabap ino, it ulun mongohomu om mongogiak (7,24) dot uripon iosido do sala, nosorungan-no iosido di rogon SALA; mokitulung o tomodon dau mongogizak tazon-ko lumabus antad sid kuasa om torungku di rogon dino.

I vaza di Kaisar do Rom momorinta di karajaan do Rom mad suntuan di kopomorintaan di SALA, tu sompi momogos om monguripon di sokoviai i razat di karajaan do Rom. I hiza diri, lumbotoson-no di Kaisar do Rom do iosido o sanganu di sokoviai i razat do Rom. It ongojojal dau pinosuvang dit ongobansa sid kuasa dau. Agaratan-no it ongoulun sumamba sid Kaisar om i gambal di Kaisar, retanko i Kaisar nga Kinoringan ko turunan do Kinoringan. Topot ong Paulus sumasi, isuhut di boros di Yesus Mat. 28,16 dot bai iso-no o Tuhan, aso vokon, ino-no i Yesus Kristus. Sabap ino, it ulun di nakamung-no sid di Kristus, nobebas-no, baiko "uripon-po di Kristus, " ka di Paulus. It ongokuasa vokon amu kadapat monguasa-po vagu dit ulun Kristisan, okonko ong i Kaisar, okon-no ong i sala, ka. Manjadi iti-no i kososizan om kopolosizan dit ulun Kristian sid tanga do razat Rom: it ulun di mangasip sid di Yesus nakalabus-no antad sid kuasa dot otuvong sampai obebaskan-no iosido (1. Kor. 14) om Rom 14,7-9. Iti-no i pangalaman di Paulus sid Rom.

6,1-14 Nogontian-no i manansanganu dit ulun (riniba)

I sala nogontian-no do kovosihan. Obebaskan tokou naku ponong sid sala, tu i kovosihan do Kinoringan? Tantu-tantu-ko, Amu, ka di Paulus. I Paulus manarang di tomodon di kopomoduan dino. Sid kopomoduan kaamung it ulun Kristian sid di Yesus, sampai i sokoviai i gama di Yesus, iadko ipat-ipat it ulun nokovojo-no di Yesus, matai om masi vagu. Nengkod-no i kuasa di sala om i kapatazan, gam Yesus-no o manansanganu om mangahatul dit ulun di nopodsuno. Nakavaliu-no it ulun antad sid watas do sala sid watas di kovosihan do Kinoringan, ino-no i vangun vagu, supaya it ulun mopud om mamantau om mangagama sid kovongunan vagu dino. Ino kopolosizan vagu dino, nokotimpun-ogi, amu-po notuluk. Kakal tokoui sid tanga do ralan kumaa om kumuruhang di Yesus Kristus (8-9). Sabap ino, it ulun Kristian mongitung om mamakal di kavazao dau ponong sid kabanaran om hoturan di Kristus.

12-14 Ong iadino, nosusi tokou-no di kovosihan do Kinoringan, amu-no atag do miguli-po vagu sid kuasa do kasalaan. Baik o vogok di nosusi-no (nopodsuno) nga miguli vagu sid lolobuhon, iadko i karabau di mobul-obul sid lolobuhon dau. Iti-no o kavazao di karabau om vogok.

6,15-23 I kopolosizan vagu dot ulun Kristian

Sabap tu notorima tokou-no i sokoviai i kovosihan om kapamanaran di Kristus, lumuu tokou-no om mongusaha tokou-no di kabanaran do Kinoringan. Kuran o kadapatan tokou lumabus sid kuasa di sala om karaatan? Ino-no, Suvai sumuvang tokou om sumodia tokou do jumadi tokou do pakakas do kabanaran om kovosihan do Kinoringan. Amu miama ong insan-no tumoguvang sid Kinoringan om tumolikud-no vagu, inoi nga suvab-suvab tokou tumoguvang om sumuhut di kenginan do Kinoringan.

Nunu-ka o harati do pakakas di kabanaran do Kinoringan? Kikabang tokou dot ipongohormat om pasasi do Kinoringan o tomodon. Kipalad, kihakod tokou dot posurut di samod do Kinoringan sid pialatan do razat o tomodon. I sokoviai it onkokoburuo tokou nga jumadi do pakakas om koburuo di kabanaran om kovosihan om samod do Kinoringan. Amu miama do bai i ginavo mongitung dot ombo it avantang dara. Suvai sokoviai i guvas om ginavo nga posurut om mongopud di kuasa om samod di karajaan do Kinoringan om miama-ogi. Iti-no o harati, uripon tokou do Kinoringan. Ino-no i pitonidan di kinuripanan laid om i kouripanan vagu: i gulu diri, ginaratan tokou do sala di momogos dot ulun. Ong bianco, obebaskan tokou do nokosuvang sid kuasa di samod om kovosihan sampai kabanaran do Kinoringan. Okonko impiropiro mongimbulit i Paulus manarang di hiza diri om i bianco, i gulu diri om i vagu o kopolosizan dot ulun, dot ino-no o panangan di Paulus, mongohodtol iosido banal di kovolihan dit ulun Kristian antad sid kuasa laid pakaa sid kuasa do Kinoringan. Ong lukison tokou ino panarangan di Paulus, pengkaa dino,

	kumuruhang tokou di Kristus		kopolosizan vagu
	xx		^
sid	xxxxxxxx xxxxx	sangkap	kosusian di Sundu dot K.
	xx		xxx
	xx		x x x

natanus- xx no i sala	xxxxxxx
xx	kosipan x om samod
V	î
i kopomodsuan	nosukab-no i lobong
v	î
nolobong-no it ulun gulu-->>>	kumoruhang-no di Kristus i gumulian

Varo tangon di Martin Luther do pengkaa dino, I vozoon do rogon minongoritik sid gondila di valai di Luther. Sinukab-po di Luther, dinuat-no di vozoon do rogon i Luther dot, Okon-ka-ko siti-no it intoronon di Martin Luther? ka. Ponimpa-nopo i Luther, Amu-no. Alaid-no kapatai i Martin Luther, ka dau. Dinuat-no vagu di vozoon do rogon dot, Disai-ka do valai iti? ka. Ponimpa-nopo i Luther, Iti-no i valai di Kristus, ka dau. Kodung nening-no di vozoon do rogon i iadino, minogidu-no iosido dot banalko minagavi tumangkus.

Iti-no it atag o gama om vaza tokou suvab-suvab, ino-no pembulai dot i Kristus o mangahatul om mongopud di sokoviai i kobuatano om kavazao om bahazan tokou. Ino-no o harati, I Kristus dino nga di tokou-no: Immanuel, sampai i tokou, nga di Kristus-no. Iti-no it atag o gama mongohondom dot, "nopodsu tokou-no", ka di kososizan tokou.

7,1-25 I kogunaan di pinonuhuan ko Taurat

Iti fasal diti, amu oruhai humarati. iti fasal diti sid tanga di bahagi koduvo di surat di Paulus pakaa sid piumpugan sid Rom (5-8) di manarang dot nunu o kogunaan om gama dot ulun Kristian. F.5 manarang dot it ulun Kristian nakanu om nokotorima di kopioondusan sampai nakalabus-no iosido antad sid kuasa do kapatazan (5) om sala (6). Sid F. 7 varo panarangan do kuran i kobebasan dit ulun Kristian antad sid kuasa di pinonuhuan om sid F. 8 i panarangan di kobebasan antad sid kuasa di Sundu dot Osusi.

7,1-6 Sid suntuan di bituanon dit obebas-no, tu minatai-no i savo dau, manarang i Paulus dot it ulun Kristian do Yahudi ko i vokon nga nobebas-no antad sid kuasa di pinonuhuan, gima nakamung-no sid kuasa di Kristus. I Paulus tumoguvang-po dit ulun Kristian di dang yahudi sid Rom di kakali humarap sid Taurat. Ino-no i tajuk di Paulus: (6) Nakalabus tokou-no antad sid kuasa di pinonuhuan, ka. Ino-no o vaza dau dumahava: I pinonuhuan bai monguasa dit ulun di kakal-po mizau, iadko i minisavo, tu i kusai monguasa di savo dau dot ondu. Topot ong minatai-no i kusai, obebas-no it ondu do mokisavo vagu dot kusai vokon ko amu-no. I kapatazan di kusai o rontob di gaama misavo di duvo it ulun dino. Iadko i hal do minisavo o kobuatano tokou sid tinoguvangon do Kinoringan, ka.(4-6).

Iri-ogi varo hal vagu om kotimpuunan vagu dit amu-no okuasa di kavazao laid diri. Ino-no, Monguva tokou di dang Kinoringan dot okonko ginaratan iadko i kodori, (i kakal-po i pinonuhuan o mongogorot), gamko monguva tokou, sabap nakamung tokou-no sid di Kristus, iadko i Kristus o minongontok di tokou. Ino-no i lavis di Paulus (7,6): Nakalabus tokou-no antad sid kuasa di pinonuhuan, sabap nakanu tokou-no di kopioondusan (5,1) om nokobebas-no antad sid kuasa do kapatazan (5,12-21) om i sala (.....F.6) sampai i pinonuhuan (F.7). Bai iti-po ot osusa tokou mongusaha, Tumorima om rumamit ditt ombo-nopo i nosodia om nitahak sid di tokou, sampai mangasip om sumondu sid Tuhan Yesus Kristus, i nogulian-no antad sid ulun minatai.

7,7-25 Minsanko naparas-no kavi di Paulus manarang i kogunaan om i kodolikatan di pinonuhuan sampai kuran dit ulun Kristian sumuhut di kavazao vagu di dang Sundu (7,6), kakali ginii-no di Paulus manarang it toriso-iso o duaton om dahavaon dit ulun sid Rom sid gama dau dumahava do do pengkaa dino,

- 7,7-13 I kavazao dit ulun dit oporintaan do sala
- 7,14-23 I gama dit ulun dit oporintaan do sala
- 7,14 I pinonuhuan sumaap di kobuatano-ku
- 7,15 I kenginan-ku sumaap di gama-ku
- 7,17 I sala sumaap dohon
- 7,19 I kavantango sumaap di korumaato sid saralom di ginavo-ku
- 7,22 Ioku kondiri opiduvo oginavo

- 7,24 I kosungguvo do sala
 7,25 I kosopulan dit ulun antad sid sala, gima i Kristus

Pinaras-po di Paulus monimpa i panalaan dot ulun sid dau di retanko i Paulus nakapangaraat di pinonuhuan ko Taurat. Varot ulun Kristian do Yahudi di sinumaap om minonginsosok di Paulus, tu, ka dioti, I Paulus tumolikud-no dit ugama do Yahudi om pakaso-no di Taurat, ka. Dot ong otopot, natarang-no laid di Paulus dot iti-no i kalaba dit ulun Yahudi, "nitahak-no sid dioti i janji om i pinonuhuan do Kinoringan", (F. 3,2 om 9,4).

Mad humungot i Paulus, Tantu-tantu ko amu, ka.(7,7) Monodiri i Paulus di sala om i pinonuhuan. I sala, ino-no it araat, okonko i pinonuhuan, ka dau. I sala mad kuasa om raja di minguasa dit ulun. Topot ong i pinonuhuan, osusi, abanal, om avantang (12). Mad i pinonuhuan sumaap banal di sala. Ino-no o kogolivong: kodung varo-no pinonuhuan, kembulai-no i karalazan dot ulun (7), gam gumazo-no i sala (9) sampai i pinonuhuan mad osongkutan do sala (8; 11) iadko i barat di mangahakang dit opodok-po ot apui ko i kumut dot aragang porongit di banggala do sapi. Okonko i barat ko i kumut ot araat, topot kodung nokensomok sino, humali it apui ko humakang i sala. Iadko it anak dit otiag-ogi mongotu dot kouvaan do koruhang, osolon-ogi banal di kouvaan dino.

I Paulus manarang di kogunaan om kavantang di Taurat om kuran i pinonuhuan mamalang di kobuatano om kavazao do riniba. Sabap ino, i sala o minongimbulai di kapatazan om i pinonuhuan o mongintalang di karaatan di sala. (Ong sid Galatia 3,24 varo boros di Paulus, I pinonuhuan ino-no i guru di mangagazad sid di Kristus - dot i guru dino mamakai do lalapos, supaya agaratan i murid). Sabap ino, i kogunaan do pinonuhuan, ino-no monuduk di tokou sid kosopulan di Kristus.

14-24 Isai-ka it ulun (riniba)? Aso't elaan di Paulus monguji di kavantango dot ulun, retanko ipat-ipat it ulun varo't onsi (lugu) dot avantang. Gam, nivagat-no di Paulus dot, Ai, atuk, sinusa-ku diti.(24) Iso-no ot elaan di Paulus, i riniba oporinta do sala (14; 17; 20) sumuhut di hoturan do karaatan. Ong kiroon tokou sid hal do politik dot agazo, ko sid kobuatano dit ipat-ipat it ulun, varo ogumu o suntuan di mangalapis dino vaza di Paulus manarang. Rontob-nopo, okonko ayat 24 o kinompuso di Paulus manarang. Minangamung-po iosido dit ayat 7,25, ino-no i Habal do Kovosihan nakamanang-no i Kristus. Minsan banalko osusa it ulun diri (24) nosopulan-no iosido di Kristus, notindal-no, nemvoguvan-no (2. Kor. 5,17) om nembanaran-no (3,24).

Isai-ka it ulun Kristian? Ong i Martin Luther minanarang dot sid F.7 minanarang i Paulus dot it ulun Kristian podsolvon, tu notingkazu dot ulun kisala om ulun dot abanal. (simul iustus et peccator). Topot mad oholian ino iadino. I tomodon di Paulus sino, manarang iosido di kobuatano dit ulun dit amu-po koduzan di Kristus. Ino-no rontob, minsanko it ulun Kristian, varo hiza dot opiduvo i ginavo dau sampai atarik iosido sid kraatan, tu it ulun Kristian kakali sid tanga do razat om riniba, amu-po nokorikot sid surga. Elaan dit ulun Kristian dot vokon-no ong amu kopionong i kenginan om i gamaon dau. Kakali amu-po korikot sid rikoton tokou, ino-no i karajaan om hoturan do Kinoringan, sid tanga-ogi do ralan kumaa sino. Do tigogi, mad kotolikud-no vagu sid rikoton dino. Manjadi ong kasadu ko kotongkihal it ulun Kristian, kakali elaan dau it inantadon do kovosihan (5,2), ino-no i sangkap di Kristus di mad sondihon om kopioondusan sampai kapangadaan do karaatan om sala. Ong i Paulus minomoros om minonurat dot, Ioku, ka, ginavo-ku, ka, okonko bai iosido (Paulus) ot boroson dau, inoi nga nahampan-no it ipat-ipat it ulun om riniba.

8,1-39 manarang di kavazao om kobuatano dot ulun Kristian dit obebas-no, gima i kotolongan di Sundu dot Osusi. I Paulus manarang di kuasa di Sundu dot Osusi di mongindazou di Kristus o kanangan (8,31-39 om kuran i Sundu patatap om pakansang dit ulun di mangasip (8; 12; 18) om menggembala dit ulun dino (8,26) sampai kuran i Sundu do mad tanda om timbagos di janji do Kinoringan bahagi dit ulun Kristian (8,23). Apat bahagi sid F. 8 dino, ino-no,

8,1-11 I kobuatano dot ulun Kristian - Kobebasan ponong sid kopolisan

8,12-18 I kobuatano dot ulun Kristian,- agazad di Sundu dot Osusi

8,19-30 I kobuatano dot ulun Kristian, minsanko sid kapagasan kogoos, tu nensasamadan-no

8,31-39 I kobuatano dot ulun Kristian: kikatamanan do ginavo

8,1-11 I kobatano dot Kristian: Kobebasan ponong sid kopolosizan!
 Noboros-no sid 7,25 i longoi do kamanangan, potuvad-no i Paulus dot,
 Manjadi, varo-no hal vagu, ino-no, "ong biano, aso-not ipongohukum-po dit ulun di nokoluzung-no sid di
 Kristus Yesus, ka di Paulus. F.8 manarang di lavis di 7,25: Monorima kaseh-oku sid Kinoringan>>> om
 7,6: Nakalabus tokou-no
 8,1-4 Aso-no't ipongohukum
 8,5-8 Aso kopisaapan di guvas om ginavo
 8,9-11 I kavazao do Kristian: Apasi sid saralom di Sundu dot Osusi!
 8,1 sumuput sid longoi dot 7,25: Monorima kaseh-oku.... Nengkod-no i kuasa do sala, kapatazan, i vozoon
 do rogon om i nunu-nopo i monguasa om mongindorosi dara dit ulun Kristian. Ino-no i vaza mongengkod
 di kuasa dino, I Kristus ot nohukuman-no lumuu iosido di kobatano di riniba di kisala. Yesus Kristus-no
 dino o minonuluk di kabanaran sampai minongogiang di hoturan do Sundu. Sabap ino, it ulun Kristian
 sumuhut di koozian di Sundu (8,4).
 5-8 I kopisaapan do guvas om ginavo
 I pongoretan guvas pinakai di Paulus tu manarang di koozian dit ulun di dang koubasan, ko it ulun di
 nokotombil sid sala. Ino-no i vaza di guvas: sumaap do Kinoringan (7), amu sumuhut di pinonuhuan (7) om
 kapatazan (2). Ino vaza di guvas dino, mad hal dit a-milo-milo varo, mad kagaratan om vangun dot ulun
 (iadko i vaza dot using manabpo om mogihim dot ikus. Aso tenganan moniag dot using manabpo dot ikus).
 Topot ong i kagaratan di Sundu, ino-no kopolosizan, kopioondusan, kenginan do Kinoringan, mad kuasa
 ponong sid kopolosizan.
 9-11 Noboros-po i iadino, monginsasamod-no i Paulus dioti sid Rom, tu, ka dau, ikou dino, nga ulun-kou
 di nohoturanan-no do Sundu, sabap i Sundu do Kinoringan nokezon-no sid dikou, ka. I hal do rumusod i
 Sundu do Kinoringan sid ulun Kristian okonko hal dot osodiri iadko i panarangan dit rombongan do
 Karismatik, inoi nga ipat-ipat it ulun di mangasip sid Kristus, ino-no it ulun dit asanganu di Kristus.
 Kodung nakamung-no sid Kristus, nga orusadan di Sundu do Kinoringan it ulun dino. Iti-no o sabap dot i
 Paulus mangarait dit ulun Kristian sid Rom dot ulun di nakanu-no di Sundu do Kinoringan (11). Ino Sundu
 o minongogulian di Kristus om mamasi-po dit ulun Kristian sid Rom (11). Ino Sundu dino o kuasa do
 Kinoringan, i mongimbulai di kopolosizan.
 8,12-18 I kavazao do Kristian- agazad di Sundu dot Osusi
 12 Varo-no vagu dot > Manjadi = Sabap ino. I Paulus monginumpak dit ongopanarangan dau dot toriso-
 iso, topot iseso o tomodon.
 12-13 kapatazan dara- nga i Sundu o mamasi
 14-15 Aso-no korosizan vagu: Humarap tokou sid Sundu.
 16-17 Anganak tokou do Kinoringan, tumungkus di Kristus
 18 I Sundu o patatap di tokou dot anganak tokou do Kinoringan

I vaza di Paulus monurat, vokon-no ong, >Ikou ongoobpinai<, ka ko >I tokou diti<, ka sampai monurat
 iosido dot, >Ong i dohon do jangkaon.<

I Paulus monginsosok om mongimuhun dit ulun Kristian dit ohuzan om olungui sid Rom. Mongonsug
 iosido dioti dit okugui o kosipan ko it opiduvo o ginavo. Popuhondom iosido dioti dot i Sundu do
 Kinoringan o patatap, posuhut, mngagazad dioti. I Sundu dot Osusi mozo-vozo om monunda dioti, sampai
 pemumui dioti porikot sid sangkap di Kristus. Sinod sahau di sangkap di Kristus kaanu it ulun Kristian do
 kaadaan do sala om kakansangan do kosipan. Sundu o mangagazad (14).

Pomungaranan di Paulus it piumpugan sid Rom dot, >Anganak do Kinoringan<. Gulu-ko i Paulus, bai it
 ulun Yahudi i retanko >anganak do Kinoringan<, ka. Topot i Paulus mongohodtol dot ensanan it ulun di
 mangasip nga retan-no dot Anganak do Kinoringan, amu-no monodiri vagu do Yahudi ko vokon. Isai-nopo
 i mangasip sid di >Kristus, ajadi-no iosido dot ulun di dang Kinoringan ko anak do Kinoringan.

Ong opiduvo dara i ginavo dot ulun Kristian, gima varo kosusaan dau di nunu-nopo, i Paulus momihot
 dot, Nokotorima-kou-no di bahanda di Sundu dot, >anganak-kou-no do Kinoringan, ka (15). Ino Sundu
 dino pobeas dikou, amu-no monguripon dikou, ka. Kada-kou-no korosi, ko posusa di ginavo dikou. Ikou
 dino, Kinoringan-no o sanganu, anganak-kou-no. Oruhai o gama dikou kumiboros do Kinoringan sid gama
 manangama do Kinoringan. Iti-no i gama di Sundu kumiboros do Kinoringan.

15-18 It ongoulun Kristian sid Rom nokotiim do kosusaan om kapagasan. Sabap ino i Paulus patatap dioti sid gama popitimbang di kapagasan dit oduruk om i kohormatan dit amu tumanus. Gam sumasi i Paulus di kozoos di kohormatan do Kinoringan.

18-30 It ulun Kristian atapat sid tanga do kosompitan

18 I kososizan di Paulus bahagi di kosompitan

19-27 I tolu o vaza mongohomu

19-22 i homu do vinangun

23-25 i homu dit ulun Kristian

26-27 i homu di Sundu dot Osusi

28-30 I sabap do harapan

I ayat 8,18 okonko bai lavis dit ayat 12-18, inoi nga mad buka pintu dot ayat 19-30: I Paulus monimbang di kavagato do kapagasan di didino om i kohormatan om harapan dit amu engkod. Elaan-no di Paulus it ongokosusaan sid Rom. Amu pakaso iosido dinot ongokapagasan dioti dino, topot manarang iosido dot it ongohal di monusa dit ongoulun Kristian: I kobuatano do vinangun (20) manantu dot i riniba di tigogi masi, tigogi lumikop ko sumakit om matai dot aso't elaan, kumuro om sera om kuozon-no. Aso't elaan di riniba mangahatul ko mangahavud di vinangun.

I tokou ulun sid Sabah momurimon biano di kosimbanan dit adau om darun, i pangi om i man angadau dot aso't elaan do sionggo antad ko kumuro. Okurang-no i vaig sid ongobavang om sid ongotalaga, amu-no tantu it ongomusim. Tigogi varo panakit di rumaliu sid riniba om dupot ko sid ongotonomon om kouvaan. I vinangun mongohomu sampai mongindorosi di riniba. Varo gama do riniba monguripon om mongorongoi di vinangun, iadko i gama mangavi di himbaan ko mamanit di vaig sid bavang om botung ko mongolisun di barat sampai apagon momuhobo.

Na boros di Paulus, Ino korungazan do vinangun, varo kovian om kengkadan, tu minsanko i vinangun sampai i kosuvang sid hoturan di karajaan do Kinoringan, ka.

Rumosi i riniba sampai humongkob, tu "aso tantu-tantu"(20) manarang dot vokon-no ong banalko aso panangan di kobuatano do riniba om vinangun, mad kotonusan o rikoton dau. Topot elaan-no dot okonko i kotonusan o rikoton. Ino kopurimanan dino koluu dit ondu di hiza do hingoton, mogos do ruol di rumalat i bizahat. Topot agazo o harapan dot amu songkuro om katalib it oruol sampai kosino-no it anak. Sid saralom do kosusaan kalandau-no it anak, sumino i mizau vagu. Okonko i kosusaan o kosungguvo do riniba om vinangun.(20) Gam agazo o harapan dit ongokristian dot i vinangun nga nakamung sid kolobusan om kobebasan do riniba, ka di Paulus.

23-25 I homu dit Ongokristian:

Okonko bai i vinangun o mongohomu om mogodoi. Minsanko it Ongokristian di nokotorima-no di Sundu dot Osusi, humongkob. Nelaan tokou i kosungguvo tokou, ino-no i hoturan di karajaan do Kinoringan, nga kakali nakagavul om sid tanga tokou do kosusaan om karanggalan do riniba. Ino-no rontob, mongohomu tokou, nga kakali nengat om humarap tokou sid rikoton om kosungguvo tokou, ino-no i kosopulan om kotindalan (7,24 om 8,24). I Paulus manarang do nunu o harati ong "harapan", ino-no i gama monginud dot alanut o ginavo. Varo't elaan dot a-milo-milo nga kosunu. Rontob amu-po ajadi om amu elaan do sera jumadi (iadko sid Zabur 130 i manaud di monginud di kosilahan dit adau, kakali otuvong banal, nga elaan dot amu songkuro sumilau it adau).

Atag dot i tokou ulun do PCS engat ino harapan dino sampai tumatap sid harapan, supaya amu tokou atarik sid ongohal dit aso tantu-tantu, ino-no it ongopolitik di mimban-simban do mokipangkat om mokihuntung om mokisinang o tomodon.

26-27 I homu di Sundu dot Osusi

Na nelaan di Paulus do vokon-no banalko ohuzan it ulun Kristian om kumugui om lumuvau-po i kosipan om harapan dau. Varo pangalaman dot a-kogoos it ulun Kristian, ko opiduvo i ginavo dau gima varo pensubaan ko kosusaan om panakit om i iadino. Ong varo iadino, tantu kondiri di Kinoringan tumalad dit ulun Kristian. Kinoringan tumabang om monunda sid pensubaan (26). I Sundu o mongontok di tokou minta dua, pavalang sid Kinoringan dit ongokosusaan tokou sid saralom do gama "dit a-koumbongut." I Sundu monoruntut di kokuguzo tokou dino. I Sundu mongonsug di tokou, supaya katama vagu tokou minta dua.

28-30 Na i lavis di tudukan di Paulus kananganko i gama di Sundu do Kinoringan, ino-no, I nunu-nopo i nahajangan, kosusaan, kosompitan, sakit om vokon, nga iseso o tomodon, ino-no, i kosurutan di gama tokou manamod do Kinoringan (28). Ino-no i pinotukadan di kosurutan dino, nopili i tokou-no, nahatul-no do kolu di suntuan di Kristus, gam jumadi tokou dot obpinai di Yesus om songobpinai-no i sokovia i it ongoulun Kristian. Antad sid hoturan dino kembulai-no i kodim, om iri-ogi i kapamanaran om i kohormatan dit ulun Kristian. Isai-nopo i humarap sid Kinoringan, tumorima di nunu-nopo o kahajangan ko kosurupuan iadko vaza do Kinoringan pemumui om mangagazad dit ulun Kristian sid rikoton dau (tokou). Ino-no ot atalahas, amu momudut i Paulus ko mongonsug dit ulun sid Rom do bai mongovongo ioti kananganko i kobuatano dit ulun Kristian. Okonko i tana sosogulian o rikoton om harapan dit ulun Kristian ko sumodiri i piumpugan dot amu-no gumavul vagu sid razat vokon, tu mad nakatanid-no banal ponong sid surga, gamko ong i Paulus patatap dit ulun Kristian, supaya kogoos om katama iosido tumoguvang di sokovia i kosompito om kapagasan om kosusaan sid tanga do razat.

8,31-39 I kavazao dit ulun Kristian - I sabap di katamanan

30 Natahakan tokou di kohormatan do Kinoringan: Iti-no i kalaba tokou. Okonko i kogo zoo do kabun-ku, ko gaji, ko pangkat sid tanga do riniba, business ko nunu-nopo o hal di kiguna sid tanga do riniba. Ino-no o kiguna: Ong nokotoguvang tokou sid Kinoringan, okon-noko iseso tokou ko aso mangapad di tokou. Ingapat mongoduat i Paulus dot nelaan-no laid dau i timpa: Isai-ka kadapat sumaap di tokou? ong

31-32 I panahak om janji do Kinoringan sid di tokou

33-39 I janji do Kinoringan, i tumalib di sokovia i kosompitan

33 Iso nga aso mongoruput om kapanala di tokou

34 Iso nga aso kopongohukum di tokou

35 Iso nga aso kopotongkizad di tokou sid samod do Kinoringan

31 Mad noboros-no kavi di Paulus i hal. Nouza-no kavi i vagas di Paulus, nga kakali mangamung-po i Paulus do lavis, tu kaluto ong varo-po dumahava ko lumuvau i kosipan ko varo sumolon di kohormatan di natahakan-no (30). Inot a-ko piro ayat 31-39 mongonsi di sokovia i panarangan di F. 5-8, iadko i Paulus mongonsi di F. 9-11 sid 11,33-36 om i Fasal 12-15 sid ayat 15,54-57.

I Paulus mongohodtol sid ulun Kristian sid Rom di kogo zoo di samod do Kinoringan, supaya katandon sid ginavo dioti ino samod dino. Ong Kinoringan mozo-vozo di tokou, tantu-nopo iso nga aso kasaap di tokou (31). Sid Anak do Kinoringan kembulai do kuran i Kinoringan mongorinding om monunda di tokou.

Intolu-no noboros-no laid di Paulus dot i riniba nouripon om niada-no do Kinoringan, gima i sala dioti diri (F. 1,18-32), nga sino intolu-no i Paulus mamalang di kovosihan do Kinoringan, di momili om manapul di riniba dot i Kristus o vaza mongorinding. Sabap ino, aso kavaza mongoruput, manala, mongohukum, potongkizad (33; 34; 35)

33 Iso nga aso o kapanala! Varo-nopo manala om mognoruput di retanko kisala it ulun Kristian. Na tumimpa i Paulus: Amu tumorima i Kinoringan di kopongoruputan om kapanalaan dikou. I Kinoringan o hakim om i Kinoringan o kapanapul(3,24). Nopongo-no i hukuman (5,1). Sabap ino amu rumosi vagu it ulun Kristian, tu nakanu-no iosido di kopioondusan do Kinoringan (5,1)

34 Iso nga aso kopongohukum! Varo-no mongindaraat di retanko it adau do kopongohukuman manala dit ulun, tu amu otuluk-no i pinonuhuan, ka dioti. Timpa di Paulus, Okonko iadino. I Kristus mongontok di tokou sid sangkap om sid lobong dau om iri-ogi sid tinoguvangon do Kinoringan. Ino Kristus dino korompok sid Kinoringan, i mongohukum di tokou.

35 Iso nga aso kopotongkizad di tokou sid samod do Kinoringan!

Mangarait i Paulus dit ongosangkut di mongohigong om monongkizad dara di tokou sid di Kristus: Kosusaan, ka? Kosompitan, ka? karakapan, ka? vitil? ka, aso kosulungan? ka, kopunavatan? ka, rumpak? ka, Elaan-no kavi laid di Paulus inot ongopensubaan om sangkut dino. Nokotiim kavi iosido dit ongokuasa di mangahavud dit ulun Kristian. I tima dau, I samod do Kinoringan nakamanang, ino samod dino amu engkod (1.Kor. 13,13 om Rom 5,5) sampai lumavan di nunu-nopo songkuasa dot ulun (Yahya 16,33). Otori-no kavi.

36-39 Sabap ino, bai iso-po ot atag. I Paulus mongindazou-nopo di samod do Kinoringan om mongimbulai di harapan di kiguna hiza do mizau-po om hiza do matai-no. Insanpo dino pangarait i Paulus dit ongokuasa di varo-no laid om i didino om i rumikot-ogi i monusa do Kristian o tomodon. Na i sokovia i hopod

tomodon di monusa om mamalid ko povudso dara dit ulun Kristian,, iso nga aso kasaap di samod do Kinoringan. Kapatazan, kopoulosan, malaikat ko kuasa vokon, biano, ko i hiza di rumikot-ogi, i savat ko i sibak, nunu-nopo songvinangun, iso nga aso kopotongkizad... ka di Paulus. Aso boros di Paulus do retanko aso kosusaan vagu, ong kodung nokokristian, ino-no rontob, Sid tinoguvangon di samod do Kinoringan banalko aso kuasa i sokovia i it ongokuasa di varo. Sabap i samod tumalib di sokovia i nunu-nopo. Amu engkod i gama di Paulus mongohodtol om momihot di kososizan dot, **I Kinoringan o sondihon om kopihatan tokou ulun Kristian.**

Fasal 9-11 I bahagi koduvo di Surat di Paulus pakaa sid Rom:

I rasul Paulus monodiri om manarang di kuran i gorija om i piumpugan dot ulun >Kristian nokosokot-no sid bansa do Yahudi. I piumpugan sid Rom nokotiim di hiza diri tumongkizad ko tumanid antad sid tradisi do Yahudi, gam minoniim ioti monunsub dit ulun Kristian di wwarga negara Yahudi, tu i hiza diri minonusa i Kaisar do Rom dit ongoulun Yahudi, retanko ioti-no ot inantadon di sokovia i kosusaan do pomogunan, borizu ko lizud, apui di mangahandab do pomogunan ko panakit di rumaliu. I Kaisar Klaudius minonunsub tantu dioti Ongoyahudi antad sid ibu kota do Rom. Nakatalib-po i hoturan dau, nokouli-no vagu it ongoulun Yahudi, Kristian ko it amu-po, nga amu-no ozi it Ongokristian di warga negara do Rom do kamung vagu ioti sid piumpugan. Kagi, nokouli-po ioti sid Rom, a-no koho i porinta dot it ulun Yahudi mogihim do ponsohorian sid kotukangan do basi ko kazu. Baiko midagang-po o kavasa antad sid hoturan dit a-ko piro it ulion do Rom. Antad sid hoturan dino oruhai-no otutunan dot Yahudi om okon. Na i piumpugan dot ulun Kristian tinumiim do sumodiri sumambayang om monimban di hoturan sumambayang, a-koho do mamung-po it ulun Kristian di warga negara Yahudi. Na i Paulus, ulun Yahudi iosido, magavi mongogorot manarang do kuran i gorija di Kristus nokosokot sid ugama do Yahudi sampai aso tinganan tumongkizad antad sid hoturan om inantadon dino. Kagi agazo o ginavo di Paulus mogihim di kosopulan di bansa dot Israel.

9,1-5 Kakali sid palad do Kinoringan i bansa dot Israel.

1-3 I Paulus mongonsug om mongimuhun dit ongobpinai di bansa dau dot Israel.

4-5 manantu i Paulus dot i janji do Kinoringan sid bansa dau a-engkod. Iti-no o sabap dot a-milomilo mongindazou do Kinoringan.

1-3 Osusa i ginavo di Paulus, tu it ulun Israel kakali amu-po koduzan dit isai i Kristus. Iosido kondiri om i Sundu do Kinoringan o sasi do kakali ogiang-no i vazaan rumikot sid kovosihan do Kinoringan. Kagi i Paulus magavi mongonsug, gam suhulon dau dot iosido ot olupu, sukul osopulan i bansa dau (3). I Kristus najadi-no laid do lulupu, gima i bansa dot Israel (Gal. 3,13), nga i Paulus mamung om rumundun di Kristus, tu ozi iosido monulung om pemumuai dit Ongoisrael, ino-no i varis dau. I hal do lulupu banalko aralom o harati. I Yesus minangarait dit ongosinusa (Lukas 6) ko i Paulus minongolupu sid Gal. 1,9 om sid 1. Kor. 16,22 ko i Ananias om Sapira sid Usuran Rasul F. 5 nolupu-no. Ino-no o tomodon, it ulun nosunsub-no sid tinoguvangon do Kinoringan. Aso-no vokon kerad kavagat di lulupu dino. It ulun di nolupu-no mad nakada-no sid naraka. Natanus-no i ngaran dau sid pialatan do razat.

4-5 Iti-no i sabap dot i Paulus mongogorot banal do pemumui di varis dau o tomodon. I ngaran dot Israel o harati, Sojal om jaga do Kinoringan, ka. Ioti diri najadi-no dot anganak do Kinoringan. Ino kobuatano dioti dino amu-no osimbanan. Iri-no ko iri, ka di Paulus. I janji do Kinoringan amu sumimban ko mengkod. Sabap ino, kakali kumavid ioti di kohormatan do Kinoringan. It ongojanji do Kinoringan om i pinonuhuan om i hoturan do sumambayang, nga kakali opud sid tanga dioti dino. Manarang kavi i Paulus di kalaba dit ulun Yahudi di sid tanga di razat do Rom.

Kohormatan: I kavut om apui i kohormatan do Kinoringan minangagazad om minonunda di bansa dot Israel antad sid Masir kumaa om sumuvang sid pomogunan do Kanaan (Kolobusan 24,7; Ulangan 28,69-29,28)

I Pinonuhuan ko Taurat: minangahatul di kogumuai it ulun Israel dit a-po opitiiman di nunu-nopo songhoturan hiza di nakalabus ioti antad sid Masir. Tu sampai sid kinolobusan-no dioti diri, bai uripon ioti sid Masir di rinumonok di lalapos di mandul. A-insan ioti kotiim do mihahatul-hatul do bansa ko rurungan ko varis om ongekob. Ensan ioti diri ulun dit atalou om azazou o ginavo.

Hoturan sumambayang: I Paulus mongohondom di tradisi sumambayang di sid ugama do Yahudi. It piumpugan do Kristian minilang sid tradisi dino, ino vaza minta dua om mongontok minta dua, it ongolongi do Yahudi, it Ongozabur di sumasi di kotolongan do Kinoringan.

It angaki dot ulun Israel: i Kristian nakamung sid usuran di bansa dot Israel, ino-no sid pangalaman di humarati di vaza do Kinoringan mangagazad om monunda di bansa dau. Okonko bai i Paulus o nokotombil sid usuran dino, inoi nga i gorija nga nokezo sid usuran di Ibrahim sampai i Zakaria om i Yusup om i Yesus. Aso tinangan mongolim dinot inantadon di kovosihan do Kinoringan. Sabap ino, it ulun Yahudi (Israel), banalko kiguna bahagi dit ulun Kristian om i gorija di Kristus. Ong i Paulus kondiri, asot elaan dau tumongkizad sid bansa dau om i pangalaman di bansa dau. Nokotombil iosido sid kopunavatan om kahajangan om kohormatan dioti dino. Kagi sino dino kembulai do kakali varo vazaan muli sid Kinoringan. Iti-no o sabap dot pendazou i Paulus di Kinoringan (5).

9,6-13 Amu oruhai humarati di vaza do Kinoringan momili di dau do kenginan.

I Paulus kakali humongkob, tu it ongoulun do Yahudi, ino "kovorisan" dau, nga amu-po kotorima di Kristus, nga mongintalang i Paulus di kogunaan om i kavantango di bansa dot Israel: Ino-no, Sid di Ibrahim varo-no laid bahanda do Kinoringan kananganko i Kristus. Rontob-nopo, amu hinumarati ko sinumuhut i sokoviai it ongoulun dot Israel dino bahanda om barakat do Kinoringan. Varo varis dara di bansa dot Israel, nga kakali amu kotungkus ioti di kovosihan do Kinoringan. Minsanko i iadino, kakali amu engkod i bahanda om barakat di nitahak-no sid di Ibrahim. I Ismail nga anak di Ibrahim, topot okonko iosido o kotungkus di barakat diri, inoi nga i Ishak, it anak sid di Sara. Sabap i kinosiaan di Ismail baik antad sid gorot di Sara, okonko antad sid kenginan do Kinoringan. Amu atag dot i riniba mumpalad ko momudali di barakat om kovosihan do Kinoringan. Minsanko i tokou bianco, nga ong amu ontupat, popigavul di kenginan kondiri om i di Kinoringan.

10-11 I Ishak minindamo dot anak antqd sid Kinoringan, dot a-po nokosino, noboros-no laid dot i komulakan o monungkus di barakat di kotuaan. I Kinoringan obebas momili ombo o kenginan dau. Ino kavi ongotuturan di Kitab Laid mamakai i Paulus manarang dot i Kinoringan om i kabanaran dau amu sumuhut om amu lumuu di vaza do riniba momili om monodiri. Okonko i kotuaan o kanu do tinungkusan, inoi nga ombo-nopo i kenginan do Kinoringan.

14-18 Abanal-no i Kinoringan

Tumimpa-no vagu i Paulus sid ongoulun di pakaraat do Kinoringan, retanko i Kinoringan momili dit amu apatut (tu i komulakan ot inanu do Kinoringan do puun do barakat). Ong otopot, banalko agazo o gama do Kinoringan monian om mongoruhun di riniba. Rontob it ulun di sumaap di kuasa do Kinoringan o rumato antad sid kovosihan do Kinoringan.

19-24 Varo-no vagu boros di retanko "aso tinganan dit ulun dit okodou o ginavo do saapon ko oduhon, gima nikodou do Kinoringan. Ino-no o timpa di Paulus, I riniba amu atag do dumahava ko sumaap do Kinoringan om i gama dau. Kuran-kuran, i riniba nga antad sid palad do Kinoringan, om ginama om inurug di Minamangun. Sabap ino, amu atag do sumaap ko mamajal i ginama di minangagama om minongurug. Minsanko it ulun di nakasaap do Kinoringan amu kalabus antad sid tunda om kovosihan do Kinoringan. Somp ijadi ioti do pakakas di kobinsiananom kohormatan do Kinoringan, ko pakakas di hungot om rodus do Kinoringan. Na it ulun Kristian sid Rom, ensanan do nopili om nokodim-no sampai nakamung-no kavi, Yahudi ko i vokon, sid razat ko gorija di Kristus.

9,25-10,13 I panangan di kopomilihan do Kinoringan.

Boros di Paulus, nogiang-no i vazaan kumaa om muli sid Kinoringan, nga kakali okonko ensanan it ulun tiuli sid Kinoringan.

25-26 I Kinoringan mongodim di sokoviai it ongobansa

27-29 <i bansa dot Israel nataapan-no.

30-33 I vatu di kosoduvan om i kapamanaran dit antad sid kosipan!

10,1-4 I Paulus mongontok minta dua bahagi di bansa dau Israel.

5-13 I kabanaran gima i kosipan kiguna sid ulun Yahudi om sid bansa vokon.

Aso bida, Yahudi om vokon. Ombo i ginavo dot ulun nakaharati sampai nakasip-no dot i Yesus o minongimbulai di kotindalan om kosopulan do riniba, a-milo-milo i kabang dit ulun dino sumasi om palabpu dot i Yesus o Tuhan (1.Kor. 12,3) Ino kosipan dino amu mogihim di Yesus sid surga ko sid

pomogunan dit ulun minatai, inoi nga sumamung di Yesus sid Kitab om i tudukan di Habal do Kovosihan. Kagi i janji do Kinoringan sid bansa dot Israel, nokolombus-no sid ongobansa vokon (12).

10,14-21 I tanggung jawab dit ongoulun di mongining

Sid duvo o duaton om insosok, tumimpa i Paulus dot,

a) kuran-ka kinoromitan dot Israel di kapamanaran do Kinoringan sid gama do baiko mangasip? om

b) Nokokuro,ka, tu a-kaharati i Israel di tudukan di Yesus?

a) I Paulus manarang dit ongotukad ponong sid kosipan. Gulu-no i suhu do Kinoringan porikot di Habal do Kovosihan om i samod dau sid riniba. Iri-ogi ino Habal dino naramit-no dot ulun, tu mongining sampai mangasip it ulun dino om lumombus-no mongindazou om monorima kaseh sid Kinoringan. Iti kavi, varo dara sid ongoulun dot Israel. Rontob-nopo, ong bai mongining-po amu miuma. Suvaiko mongining om mongusaha ko sumuhut om miuma-ogi. It ulun di minongining sampai iningutan-no, suvaiko sumuhut iosido om mongimbulai di kosipan om harapan, om kiguna-ogi i gama mongining.

I kosipan mimbulai sid keningan di boros do Kinoringan di manarang di kobuatano dot ulun om it ensanan i riniba di didino. I tudukan di Yesus om i bahanda laid dit ongonabi o minonodia di kosipan om i vaza do riniba muli sid Kinoringan.

b) Nokening-no it Israel, nga amu karamit ioti, tu mad amu ozi ioti mongining om sumuhut. Topot kakali mongogorot i Kinoringan mongonsug pemumui diot dino. I Musa (Ulangan 32,21 om i nabi Yesaya (65) o sasi di kagaratan do Kinoringan. Sabap kakali amu mongining i Israel, iri-ogi mongoi i Kinoringan dit ongoulun di bansa vokon, supaya monginsosolon di bansa dot Israel. Andaman tokou i bandar Ninive. Kodung nokening ioti di hukum do Kinoringan, dot i kabang di Yunus o minangahabal, minokiada-no ioti di karaatan om minokisian-no ioti do Kinoringan smpai nakanu ioti di kaadaan do karaatan om tumorima ioti di kovosihan do Kinoringan (Yunus 3-4)

Topot ong i bansa dot Israel, pinosimozo-no kavi it ongonabi antad di Amos sampai i Maleaki diri. Minsanko mad opupusan o Kinoringan mogihim di bansa dau, nga kakali amu-po abasan iosido, gam minilombus-no i kolonuto di ginavo do Kinoringan mongonsug om mongingut. I suriban dit ama di gumobu dit anak dau di nokokozou-no diri (Luk. 15,11-34) mongimbulai di kolonuto di samod di Yesus om Kinoringan, Amu engkod i vaza do Kinoringan mogihim om pemumui di natagak it ulun. Kakali kisamod i Kinoringan ponong sid bansa dau dot Israel, kakali monginud i Kinoringan di kouliau dioti dino.

11,1-16 I panangan om rikoton di bansa dot Israel

1-6 I katatapo do Kinoringan ponong sid Israel

I rasul Paulus kondiri tanda di katatapo do Kinoringan ponong sid bansa dau. IPaulus nakasaap-po do Kinoringan sampai nokoponusa di piumpugan dit ulun Kristian sampai kumaa iosido sid Damshek. Iri-ogi i Kinoringan minogihim sampai pinotugas di Paulus, supaya rasul iosido ponong sid ongobansa. Na i Paulus okonko ulun do randavi ko mononsiou ko nunu-nopo songpangkat. Gam i Paulus dino antad sid rurungan di komulakan Benyamin. Varo-no vokon dit antad sid rurungan di Benyamin, ino-no i nabi Yeremia om i raja Saul.

Minsanko okodou i ginavo di kogumuai dot Israel, iadko i hiza di raja Saul ko i hiza di nabi Elia sid timpak di burul do Karmel sampai retan di Elia dot bai iosido-po ot ataap sid tinoguvangon do Kinoringan, ka, manarang i Kinoringan do varo-po nobi di bansa dot Israel di mangasip om tumatap sid tinoguvangon do Kinoringan (7000 o nobi, ka). Pengkaa dino i nabi Yesaya minomoros do varo nobi (Yesaya 7,3 om 10,20-22). Gam mamakai i Yesaya do suntuan sid kazu di natagad-no. Minsanko bai mad tuod-po o nobi i karajaan di Daud, mongimbulai-no vagu i Kinoringan do mad tolid (Yesaya 11,1). Nohukuman-no i bansa dot Israel sampai narakaop-no sid Babil, kakali varo nobi di bansa dino di miniguli vagu sid pomogunan do Yerusalem. It usuran di bansa dot Israel o tanda om sasi di kosopulan om kabanaran dit antad sid kovosihan do Kinoringan, okonko antad sid gama do riniba.

7-10 Okonko bai i Faraun sid Masir ot okodou sampai amu mongining, gam i Israel nga sinumaap do Kinoringan do miabal di Faraun diri. Topot songkoledai do kumodou ioti, kakali mongingut i Kinoringan om mamahanda dioti (Yesaya 28,12; 6,9; Zabur 69 om pentalang do varo hiza rumikot do sumimban ino ginavo dit okodou di mad vatu. (Yeremia 31,33 om Yehezkiel 36,26) I ginavo di mad vatu sumiliu do ginavo dit olomi... Ong i Zabur di narait siti, minamakai di suntuan do meja, ino-no o harati, Sid

panambayanan o kotimpuun i vaza malid om mamalid sampai tumolikud do Kinoringan. Ino dino o manarang dot i tokou ulun Kristian biano, nga mongontupati, supaya i gorija tokou amu sumusui di bansa dot Israel do masi om mopud mikondiri . Tu oruhai jumadi i meja do Kinoringan do meja do hukuman om korotuan. Nokolombus-no sid di tokou i kovosihan do Kinoringan i mamasi di tokou. Topot ino kavantango tokou dino okonko suul do kabanaran om karangkapo tokou, inoi nga atandas do kovosihan do Kinoringan. Sabap ino, ensanan tokou sumokot om kumapit tokou sid kovosihan dino.

11-16 Sabap ino, ong oonsug it Israel do sampai kouli om kemumui-no, lobi-po osinang tokou sokovia, tu opompon i bansa dot Israel om i tokou ongobansa vokon sid tinoguvangon do Kinoringan. Aralom i harati di boros diti: A-nakada i bansa dot Israel, bai nokobibi sampai i kinorotuan dioti dino najadi-no do kolunduo om kosurupuvan dit ongobansa.

- 11 I kinorotuan dot Israel > kosopulan dit ongobansa
- 12 I kinorotuan dioti > kolunduan di vinangun
I kinoomuan dioti > kolunduan dit ongobansa
- 15 I kinaadaan dioti > kinopiondusan do vinangun
I kotorimaan vagu dioti > kogulianan di vinangun
- 12b I kapampanan dioti > kalabaan di nunu-nopo

Mad ingonom i Paulus manarang di kosuruto di kovosihan di tumalib om monori di korotuan dioti dino. I Paulus popiluzung om popihongkos di nasib dit Ongoyahudi om i kosurupuvan dit ongobansa vokon. Andaman tokou i tudukan diPaulus sid Usuran Rasu 13,45: Sabap iIsrael amu tumorima di Habal do Kovosihan, ino Habal dino nokolombus sid ongobansa vokon, ka. Ino-no rontob, sid tohudi rumikot vagu i Habal do Kovosihan sid bansa dot Israel. Sabap it ongobansa di nokotorima di Habal do Kovosihan om i kopioondusan do Kinoringan mongonsug sampai mongogorot di bansa dot Israel, supaya sumolon ioti sumuhut om tumorima di Habal do Kovosihan (14) >solon- ko pembulai do mongivogu ko tumalib.

12 mipopompon = ong Kolose 1,19 sokovia i karangkapo... om Rom 11,25 it ulun do labus opompon sumuvang mangasip..i harati ponong di kotulukan ko koimbulitan di hopod om duvo rurungan dot Israel, iadko noboros-no sid Kentalangan.

15 I Yehezkiel minonorou dot ogulianan-no vagu it ongotulang di nokoromizas sid ongotagad (Yer. 37,1-10 ko i Zabur 67,2-4 manarang dot i kopompono dot Israel mongingut di kapampanan dit ongobansa vokon.

14 I Paulus mongitung dot i dau do tugas, ino-no, posolon di bansa om varis dau, supaya tisuhut ioti sid Habal do Kovosihan.

11,17-24 A-kavasa mokindazou ko momuruvak it ongobansa

sid ayat 16 varo-no suntuan kananganko i kinulat di gulu-no kansak antad sid vinotong (iadko i parai vagu dit ipakan sid asu...) Ino kakanan di gulu-no kansak tanid-no. Ino gama patanid o harati, posusi-no ko posodiri, tu tanda do barakat do Kinoringan. Antad dino kakanan dino nabarakatan-no i sokovia i kakanan, kinulat ko parai om vagas om ginazau. I suntuan koduvo pengkaa dino, ong i gamut do kazu obisa (clonal stump ong kolopioi), ensanan i kazu sampai sokovia i raan nga opili-no. Ino suntuan koduvo dino manarang i Paulus sid ayat 17-24.

17-18 i kopioputan do Kristian di dang ongobansa om it Israel do mad nokowinan o kazu. I gorija nokotimpak sid origi do Yahudi om Israel.

19-22 I raan di nokokawin sid puun amu mongusiba ko kumihi di raan di nedu-no - i gorija dit ongobansa amu kumihi ko mongusiba dit ongoulun do Yahudi. Sabap i gorija bai mopud antad sid kovosihan om kosipan sid Kinoringan. Aso kinogomon kondiri, aso pangkat kondiri. Baiko sinumarung om sumurut antad sid puun do vokon (do kovosihan) om minasi-ko mopud-ogi i gorija iadko i nunuk ko panau raan.

23-24 Varo-po harapan bahagi di bansa dot Israel. Amu engkod i Paulus humarap di kotindalan om kosopulan di bansa dau.

24 **Zaitun** do vangun. Ong i kazu do Zaitun, tanid mantadko kolopioi ko mampalam. Ong kolopioi, antad sid linsou sumuni i kazu. Rontob-nopo amu obisa i susu do kolopioi. Suvaiko ikawin i raan dot nopili om iri-ogi kivonodo dot asapou. Ko i mampalam, hongkoston-no i raan dot olopot do tana sampai kosuni i

gamut, iri-ogi pudungon om itanom-no, supaya oduruk om monguva-no. Topot ong zaitun, i puun laid do vokon-no ong hatas ko saribu-no toun ot umul, bai tuod-po, nga kakali asapou o vonod, ong sukul kakawin i raan vokon dot amu osusa momili di raan dino. Sid raan vagu rumombung-no vagu i Zaitun sampai monguva-no vagu dot asapou. I tumokin dino mopud antad sid vonod di bai tuod-po dot asapou ot uva. I harati, ikou ulun Kristian di dang ongobansa engat dot nokotohudi-kou-no kamung sid di Kristus om it onkob do Kinoringan. I Yesus antad sid ulun Yahudi sampai it usuran di bansa dot Israel nga usuran di pangalaman dit ulun di mangasip om sumuhut sid Kinoringan. Sabap ino, i tokou okonko bai anganak tokou do Kinoringan, inoi nga anganak tokou di Ibrahim (Rom 4). Ong andaman tokou inot inantadon tokou dino, a-kopomuruvak tokou ko kumihi dit ulun vokon, minsanko amu-po mangasip ioti sid di Yesus. It ongoulun Yahudi ot ongoamai om ongobpinai tokou, minsanko amu kengat ioti ko kaharati om kasip sid di Kristus. I Kinoringan-kagi kikuasa do potokin vagu dioti sid puun... Elaan di Paulus dot okonko bai i gorija o kadapat pemumui dit ulun do Yahudi. Sid palad do Kinoringan om i kuasa dau mili-gili i kosopulan di bansa do Yahudi.

11,25-36 I harapan

- 25-27 I rikoton di gorija om Israel

- 28-32 I lavis dit ongoasal 9-11

- 33-36 I longoi di Paulus mongindazou do Kinoringan

- 25-27 Suriban ko suromo: hal dit amu oruhai humarati.

a) varo bahagi dotIsrael di nikodou, supaya lumombus i Habal do Kovosihan sid ulun vokon om it ongobansa vokon.

b) i kosusaan dot Israel bai pempompon dit ongobansa mamung sid gorija di Kristus.

c) iri-ogi varo-no kosopulan dot Israel

I Paulus manarang di hiza di rumikot-ogi bahagi di sokoviai i riniba.

It amu-po opongo i kazazadan di Habal do Kovosihan sid pentongkob do pomogunan (Matius 24,14 om Markus 13,10), nga amu-po otuluk i kapagasan dit ongosasi di Habal do Kovosihan (Kentalangan 6,11) om i kosurutan do karaatan sid riniba om amu-po opompon it ulun Kristian antad sid sokoviai it ongobansa om ongoboros.

Ong opongo-no kavi, iri-ogi "manapul-no i Kinoringan di sokoviai it Israel" (26). Manjadi ensanan tokou, Kristian dit ongobansa om dang Israel minud di kotulukan di bahanda dino. Kondiri di Kristus rumikot vagu, tu pemumui di bansa dau.

28-32 I tomodon do Kinoringan, engin iosido pemumui om monian di sokoviai, minsanko varo hiza do mongohukum iosido di bansa dau. I kobinsianan do Kinoringan tumalib di gama dau pokodou di ginavo dot ulun.

33-36 I Paulus mongompus di bahagi koduvo di surat dau pakaa sid Rom sid gama mongindzou di kolunduo om keloo om kohorotizo do Kinoringan. Ong i riniba apagon rumamit humarati dino kavi antad sid Kinoringan. I riniba bai hovo-hovoron om mongindazou sampai mongohormat do Kinoringan o tomodon, aso vokon. Atalahas-kagi dot i gamut di Habal do Kovosihan sid Kitab Laid, tu i Kitab Laid minonodia om manarang di vazaan di Minananggung ponong sid Yahudi, om ponong sid ongokristian dit ongobansa.

Rom 12-15 I kavazao om kobuatano dit ulun Kristian

12, 11-21 It atag o gama do Kristian sid tinoguvangon do Kinoringan

1-2 I gama sumambayang...om i parsambaan dit atag sid tinoguvangon do Kinoringan. Koubasan tokou humarati di gama sumambayang, ino-no i hiza di sid panambayagan, i hal do mindolongoi, minta dua, i tudukan om i gama mongindazou do Kinoringan. Topot boros di Paulus, Amu miuma do bai sid panambayagan sumamba tokou sid Kinoringan, inoi nga pempatai it ulun, suvab-suvab om soumul-umul i Kristian pasamba sid Kinoringan do ginavo om guvas om gama dau (12,1) Ino-no it apatut om atarang o gama sid tinoguvangon do Kinoringan. I hiza di Paulus diri, kakali pasamba it ulun do Yahudi do dupot sid tinoguvangon do Kinoringan, sapi, ka, domba, ko kambing om burung asang do monorima kaseh om mokisian do Kinoringan o tomodon. Antawa i tokou ong sumambayang, mongining do khotbah om minta dua-po sampai manahak dot a-ko piro o siin parsambaan, om varo pomintaan dua dot ino-no it apatut

padsamba, guvas om ginavo, ka. I Paulus pohodtol di iadino, ino-no it atag o pasamba sid Kinoringan, ensanan i guvas, ginavo om gama soumul-umul, tatad inan it ulun Kristian. Sokovia i vaza mangagama, mamakai di kouvaan om i siin, i hiza tokou om i barang tokou, ko i piniizaan sid onkob om sid razat, i koponulungan ponong sid porinta ko ponong sid simbol, iti-no kavi o pasamba sid tinoguvangon do Kinoringan.

Ong minanarang i Paulus sid Rom 1-11 di kosipan dot ulun Kristian om i i habal do Kovosihan, i retanko Dogmatik, do kuran pasip tokou antad sid kovosihan do Kinoringan om i kosipan sid Kinoringan sampai i Kristus-no o kosopulan tokou, inot ayat 12,1-2 mad tajuk di bahagi koduvo di surat di Paulus pakaa sid piumpugan sid Rum, ino-no Fasal 12-16, tu panarangan ino di Paulus kananganko i kopudan om kagamaan dit ulun Kristian, ko retanko Etika. Ino tajuk dino (12,1-2) atag dara do popuhondom banal om patahu sid ginavo.

Ino-no it inogomon dit atag o gama sumuhut di kenginan do Kinoringan, ino-no, I kobinsianan do Kinoringan. I Kinoringan o pinada di karaatan om popiandus-nopo. I Kinoringan o minongimbulai di kopioondusan om harapan vagu. Aso-no kopitongkizadan vagu antad sid somod do Kinoringan, sampai it ulun Kristian di dang Yahudi om i vokon, nga apasi, gima i kobinsianan do Kinoringan. Iti-no i sabap di gama tokou sumamba om tumimpa sid Kinoringan.

Ino kobinsianan do Kinoringan alanta sid kavazao di Tuhan Yesus. I Yesus pinembulai di kavantango dit Ama sid anak dau (LUK. 15), i vaza dau minsamung di sumakit om it orukung, ko it ondu di minokiagai om isai-nopo it okugui om nakalandu sid karaatan. Tinumorima i Yesus di Tomas dit opiduvo o ginavo om i Petrus i minongolim do koruhang iosido di Yesus, gam minongingut i Yesus dit ongoulun dit nopogos om nemvagatan-no (Mat. 11,28-30)

Yesus-no o panarangan om tanda di kobinsianan do Kinoringan. Ino-no o harati IMMANUEL- mozo-vozo i Kinoringan di tokou. Sabap ino, i tokou nga tumimpa di kobinsianan do Kinoringan sid gama tokou monuluk di kenginan do Kinoringan soumul-umul sid kavazao om kagamaan tokou.

I gama tokou sumambayang amu engat do kalatangan om suti. Ensanan tokou sid tinoguvangon, guvas, om ginavo om gama, kabang, palad, hakod, dila, mato, tolingo, pongitungan, umba om latang. Iti-no o harati dino pinonuhuan dot asamod: Manamod-ko di Kinoringan dot iseso o ginavo-nu om pongitungan-nu om kakansangan-nu...(Ulangan 6,4-5)

I kodori diri, i Momogun kogoos mangavi dit ongovogok dau padsamba sid rogon. Nunu-nopo i indomoon do rogon om i bobolizan dau, kogoos i Momogun manahak sid rogon. Topot ong i tokou Kristian okonko barang ot itahak sid Kinoringan, inoi nga kumondiri tokou sumamba om sumuhut sid Kinoringan (Mat. 6,33: Ihimo-no laid dikou i karajaan do Kinoringan om i kabanaran dau..) Okonko adat ko varis om kobudayaan-po o momorinta di tokou, inoi nga ensanan tokou mozo-vozo dit ihud di Yesus (Luk 9,60) I gama mongolobong dot ulun minatai, ino-no o gamaon dot ulun di minatai, ka. Topot ong ikou dino, pamanau-no om pangahabal-no di karajaan do Kinoringan, ka di Yesus.

Okonko it a-ko piro siin ko ringgit o parsambaan ko rukut ko i sanjaham sumambayang ontok do minggu o miuma, suvai iseso o guvas om ginavo om gama kosunu om kopud sid tinoguvangon do Kinoringan om isuhut di kenginan do Kinoringan, tu iti-no it apatut om ikozi do Kinoringan.

Ino gama di iadino amu sumusui di kobuatano om koubasan do vinangun om razat. It ongoulun Kristian mad asin sid tanga do riniba om iadko panganavau sid tanga do kotuvangan do vinangun (Mat. 5,13-15), antawa mad gama tumozog ponong sid sarazo sumunsung di lizud.

Banal-no, sid tanga do razat i tokou Ongokristian, sid tanga dit ongokosusaan om kodolikatan do razat, koruzahan ko lizud om sid tanga dit ongokenginan om karalazan do razat, mokilulundu om moki papangkat. Topot okonko i razat manantu di tokou do kavazao om bahazan, tu i razat mogihim di dau do kosinango om i dau do kopudan dot amu-no mongitung di kenginan do Kinoringan ko i kavantango om kosinango dit sokovia i it ongoulun om i bansa vokon. I razat om ensanan i riniba mad bolintang di murug-turug di dau om dau do hal, ko mad ruda di tumurug, nga a-kosondot sid tana, tu nokoginit-no. Topot ong i tokou masi ponong sid Kinoringan, engat tokou it ongoulun vokon om i kogunaan tokou ponong sid ongoulun dino.

It ongorogon laid om it ongorogon vagu di kingaran do mad "mokisisiin", ka, mokilulundu, ka, moki papangkat, ka, moki kingaran- ka ko mokibarang, ozi mongorongoi di ginavo tokou. Topot i Sundu do Kinoringan tumabang di tokou, supaya kotutun tokou dinot ongokuasa om rogon di mamalid sampai

kogoos tokou tumahan om mogihim di kolobusan om kosurutan dit atag o gama sumuhut di Tuhan Yesus Kristus.

Varo-no panarangan di kenginan do Kinoringan, iadko i Tudukan di Yesus sdi Burul (Mat. 5-7). Topot i kenginan do Kinoringan okonko buuk di hinotusan o ponuhuan om poniagan iadko i hujud sid Silam. Ino-no i panangan di kenginan do Kinoringan, i ginavo om i pongitungan tokou a-milo-milo imvoguvan-nopo suvab-suvab, isuhut di vaza humarati di pongitungan di Yesus, iadko i boros di Yesus diri dot: Ino-no i kakanan-ku, i gama-ku monuluk di kenginan dit minonuhu dohon,(i Ama-ku), ka di Yesus (Yahya 4,34) Om sid Filipi 4,8 manarang i Paulus dot, Ombo it otopot, ombo i hal do bahazan, ombo it abanal, ombo it osusi, ombo i hal do samod, ombo it avantang ot iningon, ino-no ot itungon dikou, ka dau.

Sid pongoretan dot "supaya kaharati-kou" varo nakamung i harati dot, Porisao-no dikou. It ulun Kristian amu sumusui di vokon do tomod sumusui, ko mozo-vozo dot a-engkat i rikoton, iadko i bahanan do domba, do kodung mamanan no i mangagazad i banggala, mozo-no kavi, dot amu engat i rikoton, belantara ko kohubungan. Inoi nga i tokou Kristian momorisa om monodiri di tomodon om rikoton om kogunaan di gama ko panahon, supaya sid sokoviai i kavazao om kobuatano om gamaon oindazou-nopo om kasasi-nobo do Kinoringan.

12,3-8 I piumpugan di karismatik

I Paulus manarang-po vagu dit atag o kobuatano di piumpugan om gorija. Ino-no i hoturan di Paulus bahagi di piumpugan: i piumpugan o tomodon, okonko it iseso it ulun Kristian. Ipat-ipat it ulun Kristian suvaiko koburuo di guvas di Kristus om kiguna-ogi iosido. Amu enizo it ongoulun antad sid vangun dau. Amu enizo o gama do Kinoringan manahak dit ipat-ipat it ulun Kristian do tugas om kovosihan om keloo ponong sid kosurutan om kopudan do piumpugan. Varo-no ong nabi, varo-no ong ponulung, varo-no ong guru, varo-no ong mogkovosihan. Topot ioti kavi, iso-no o panangan, ino-no i kolunggaran om kengkakatan om kopudan do piumpugan.

Manjadi i piumpugan di kisundu, okonko enizo i sokoviai it ongokristian nakanu di Sundu. Topot i tasantanid-tanid o kobuatano om tugas dit ongoulun Kristian sid piumpugan, kakali iseso o panangan sid kesaan om kosurutan di piumpugan.

a) **I piumpugan sid Rom okonko enizo ulun Rom**, inoi nga varo-po Yahudi, varo warge negara Rom, Yunani, ulun antad sid Asia-po. Varo-no lumundu om mosikim, ulun do midadagang om bai uripon, kuli sid pasal om sid pangkalan, usan-usan om ongobituanon. It inantadon dioti, tasantanid-tanid ot ugama: Yahudi, ulun di nakasamba sid Kaisar, ko keloo do Stoa om Epikur ko ulun di pakaso do Kinoringan. Varo-no pitonidan dot sukod vagu om lumohing, ondu om kusai ko elo om buta hurup. Topot kakali ioti diri do najadi do kesaan sid kosipan. Iti-no o sabap dot i Paulus posuntu di piumpugan sid guvas dot ulun, sampai minomoros dot, Ipat-ipat i koburuo do guvas, posurut di kosinango di ensanan i guvas. It iso Sundu do Kinoringan o monunda om mangagazad dit ulun Yahudi om Yunani, it ongobebas om it bai uripon, ondu om kusai, gam pinodsu-no ioti kavi om pinezo-no dioti sid poginakanan di Tuhan Yesus supaya jumadi om kosuntu ioti di guvas di Kristus. Aso-no harati dit ongoinantadon dot ulun Kristian (Gal. 3,28)

b) **I piumpugan do Karismatik okonko potirai dit toriso-iso ot ulun**, inoi nga mogihim di kosurutan dit ensanan i piumpugan. Ino-no i pensubaan dit ipat-ipat it ulun Kristian, i pasavat iosido di pongitungan dau tumalib dit apatut, sabap i netung dau, iosido lobipo apaham om elin om osundu mantadko it ulun Kristian vokon. Ino gama mokindazou sid tinoguvangon do Kinoringan om it ongoulun mad karaatan di tumalib di sokoviai i karaatan vokon. Iadino-no laid i sid piumpugan sid Korintus, indoson dit ongoulun ko it elo kumiboros dot osundu ot asavat mantadko it ulun vokon, ino-no i minongorongoi di piniizaan do piumpugan. Na mogoduw i Paulus dit ongoulun di mongivogu ko sinumolon di panahak do Sundu (Karisma). Suvaiko i keloo-ku tumabang sid kosuruto do piumpugan om varo-ogi kogunaan-ku. Ino-no i kogunaan dit ongokarisma (ongopanahak di Sundu), ipongindazou di Yesus om posurut di kosipan om piniizaan di piumpugan dot ulun Kristian. I karisma dit ulun amu kumisangod do karisma dit ulun vokon.

c) **It ongokarisma suvai kiguna ong kembulai ponong sid kososizan di piumpugan di mad guvas di Kristus.**

Sid Rom 12,6-8 mangarait i Paulus dit a-ko piro o karisma. Topot amu otimung inot ongokarisma sino dino. Imatai-no sid 1. Kor. 12-14 ko 1. Petrus 4,9-11 om Efesus 3,11. Ong siti, bai turu-no o karisma o noboros di Paulus, ino-no,

nabi om keloo do nabi: koubasan tokou dot i nabi elo monorou om mongintalang di hiza di rumikot-ogi.

Topot sid Kitab varo-po harati om tugas koduvo, ino-no, i nabi pentahan sid ulun di kenginan do Kinoringan sampai i tudukan dau pentahan om monginsasamod sampai mongimuhun dit ongoulun, isuhut di tudukan di Sundu dot Osusi (1. Kor. 14,3) Ino boros di nabi bai onong, ong isuhut di kosipan (12,6). I Sundu do Kinoringan mangagazad dit ulun, supaya it ulun dino mongolumbatos dit onghal sampai monuduk dit atag o gama om vazaan.

Koponulungan ko monorundakai: ino-no i gama sid tanga do piumpugan monulung dit ulun dot osusa iadko usan-usan, bituanon, ulun dit orukung om sumakit. I vaza monulung dino suvai amu monodiri ko pibidaan, isuhut di koginavaan om kozian dot ulun om atag-ogi.

Tudukan: iadko sid ugama do Yahudi varo retan do rabi ko guru, i piumpugan dot Ulun Kristian pengkakat do guru di monuduk dit anganak om mengkhotbah sid ongosukod. Na i guru varo keloo manarang di kosipan, supaya i piumpugan rumamit om humarati di kosipan om i vaza pasasi sid razat di Habal do Kovosihan. Na suvaiko i guru di monuduk isuhut dit atarang o tudukan om atag-ogi i gama dau.

Penggebalaan: ko mogkovosihan. Sid 1. Tes. 5,14 manarang i Paulus dot, Tiago-no dikou it ongoulun di tumohiang, ponginsasamod-kou-no dit ongoulun dit atalou. Tulungai-no dikou it ulun dit okugui om polonuto-no dikou i ginavo sid sokovia i it ongoulun, ka. Ino-no i tomodon di penggebalaan. Ong varot ulun di kisala, pohorotizon-no i karaatan om padaon i kasalaan dino sampai mongingut dit ulun ponong sid katagan om monuduk di kabanaran do Kinoringan (2. Tim. 3,16-17). I boros do Kitab, antad kavi sid Sundu do Kinoringan, nga kiguna do pakazon manarang di katapatan, om monugat dit ongovudut om potolonung di golivong sampai mangagazad sid ralan do kabanaran, supaya it ulun di dang Kinoringan soumul-umul mongimbulai dit avantang o gamaon, ka di Paulus sino.

Amu odoot manahak: Amu oruhai it ulun humarati dot, i nunu-nopo i sid dau, nga antad kavi sid kovosihan do Kinoringan. Iti-no o sabap it ulun dino amu odoot manahak sid ulun dit okurang om pelang dit ulun do mosikim sid dau do balanja om koposizon di mad laba ko rontob kakan-kakan. Ino-no i karisma sid hal dino, i Kinoringan mamarkat-po dit okudik, ong sukul amu odoot it ulun manahak ko rumosi dot amu miuma ong iosido kondiri.

I gama mangahatul: okonko enizo it ulun dot elo mangahatul ko mongintiru do barang ko mongumba om mongumpai di gama om kosukupan. Suvaiko ino keloo dino posurut di piniizaan do piumpugan dot amu obingmalan, gamko kogoos mangagazad dit ulun dot obul om obungou ko okugui, om atag-ogi, amu mogihim di dau do kosinangan om kohuntungan.

Kobinsianan: I gama monian dit ulun dit sisianan, suvai antad sid kogozoo do ginavo, tu elaan dot i dau do barang om dau do kosinangan antad kavi sid patahak di Sundu do Kinoringan. I gama mongorinding om monunda dit ulun dit osusa okonko antad sid ginavo kondiri, inoi nga suvai otudukan di Sundu mongogiang di ginavo dot ulun ponong sid ongoulun dot osusa...

12,9-21 I samod mangagazad om monoruntud!

Potuvad-no i Paulus manarang dit atag o gama dit ulun Kristian ponong sid ulun vokon. Tu ponong sid ulun vokon kembulai it atag o gama manamod do Kinoringan. Ino samod dino amu engat i rontob. Minsanko i sangod asamadan kavi dit ulun Kristian.

9-13 I samod ponong sid ulun vokon, gulu-po i sid piumpugan. I samod kembulai sid ginavo dot ulun, okonko tomodi kobozoturur, inoi nga iadko i gama di Yesus di sinumirod sid ulun sampai manamod dizau (Markus 10,21) I samod sid ulun vokon amu poniat do mokikapus ko mokisuli om kohuzanan (1.Kor. 13,7) Amu manakabul om amu momuruvak i samod.

14-21 I samod ponong sid sangod, isuhut di samod di Yesus (Mat. 5,43-48)

I Yesus minanamod di tokou di kakal tokoui sangod do Kinoringan (Rom 5,10) Minindamo i Yesus bahagi dit ulun di minamaku di Yesus sid kazu do sangkap. Manjadi i Paulus minongimbulit di boros di Yesus sid Mat. 5,44.

Atag do humarati tokou dot i Paulus diri om it ongopiumpugan dot ulun Kristian nogusa-no sampai it Abad kapat. Na sid tanga do kosusaan dino, aso kiroon dioti do monuli di karaatan, inoi nga minongitung ioti do kuran kadapat ioti poromut sid sangod di samod do Kinoringan om i vaza mamarkat di sangod. Iti-no i tinomod di Paulus manarang di samod ponong sid sangod.

It ulun Kristian milang sid kosusaan dot ulun. I vaza kodori monuli/ mononsuli do karaatan dot ulun isuhut di kavagato do karaatan: mato gontian do mato, nipon gontian do nipon, ka. Na ino dino amu apatut ong sid

ulun Kristian. Tu ino hoturan do posulian dino posurut om pagazo do karaatan. Aso-no kengkadan do karaatan. Suvaiko i samod ponong sid sangod o monutup di ralan di vozoon do rogon dot, I gama-ku sid dikau monuli di karaatan-nu sumusui di ginaama-nu ponong sid dohon, ka. I hal do mononsuli do karaatan, ino-no tugas om kuasa do Kinoringan, ka laid sid Ulangan 32,35. Sabap i karaatan a-insan otori ong bai ohukuman ko osulian.

13,1-7 I hoturan do porinta om i vaza mangamu dit araat o hoturan

I Paulus mongimuhun di piumpugan sid Rom, supaya sumuhut di hoturan do porinta (13,1+5) sampai mamarai do sukoi (7). I Paulus pogili dit ongokuasa sid Rom (1) om it Ongomangahatul (6), karani, i mongumpug do sukoi, it ulun di ponumpangan. Ioti mangahatul dino mongindazou om mongoguna dit ulun dit obinsuhut (3), topot kumavid di sapadang ponong sid ulun di monimbaru do karaatan (4).

Ino-no i kogolivongo tokou sid boros di Paulus: I hiza di Paulus (TM 56) monurat, a-po kopiro toun kinotoliban di kosunsuban dit ulun Yahudi antad sid bandar Rom (I Kaisar Klaudius o minonunsub). Kodung najadi-no do Kaisar i Nero, kadapat-no vagu it ulun Yahudi muli sid Rom (TM 54). It amu-po nokotimpun i gama di Kaisar Nero monusa om momunso dit ongoulun Kristian.

Na i Paulus ozi mangapad dit ulun Kristian om i piumpugan, supaya aso kosusaan dioti vagu antad sid hoturan di Kaisar. Sabap ino mangarangkai i Paulus dit a-ko piro o hal dit atag do suhuton dioti, ino-no:

a) I hoturan do porinta antad sid hoturan do Kinoringan (1-2)

b) I gama sumaap di hoturan do porinta mad sumaap do Kinoringan (3)

c) Ong sukul sumuhut it ulun Kristian di hoturan do porinta, amu asala iosido sampai a-endorosi di porinta. Baiko it ulun di mangaranggal di hoturan ot asala om ohukuman (3-4). Ong aso hoturan do porinta, banalko osusa i pomogunan, tu i hoturan do porinta mangansal di karaatan, supaya amu humali i karaatan. d) Amu-po otiiman di Paulus i karaatan di Kaisar Nero. >Iti-no o sabap do kakal-po avantangan i Paulus dino hoturan di Kaisar, tu ino hoturan dino mongonsug di kavantango om manahan di karaatan, ka. Sabap ino, it ulun Kristian monukung om momorisa di hoturan ombo i posurut di kavantango om kosinango dot ulun ko amu.

e) I hal do sukoi dino, balanja do porinta mangahatul do pomogunan. Kondiri di Yesus minangakun do varo sukoi (Luk, 20,25) ong sukul amu misingkinoringan i Kaisar. (Sid ringgit di nipemot-no sid di Yesus diri varo surat dot, Iti-no i Tiberius, it anak di Kaisar di mad Kinoringan.

Amu oruhai humarati i panarangan di Paulus sid fasal dino. Amu pajakon dau pokovantang ko monguji di hoturan do porinta. Ino-no rontob o tudukan di Paulus, Mongimuhun iosido dit ulun Kristian diri do sumuhut di hoturan do porinta om moniag iosido do mamakai do kuasa om kagaratan om pakakas di sumaap. Iri-ogi mongonsug iosido di vaza manamod ponong sid ongokuasa om ongomangahatul.

Notiiman-no di Paulus i hoturan do porinta Rom (Usuran R. 22,26). Sid saralom di hoturan dino minirimpanau i Paulus mangahabal om pazazad di Habal do Kovosihan sid pentongkop di karajaan do Rom. I hoturan dino minanahan do karaatan (UR 18,12). Topot pengkaa dino nelaan-no di Paulus do varo korapsi sid hoturan dino (UR 24,26) om varo karaatan dit amu engat di kabanaran (UR 16,22). Kuran-kuran, kakali opud i boros di Petrus (UR 5,29) dot, Osuhul-po do Kinoringan o suhuton mantadko i bai riniba, ka. Ino-no nelaan di Paulus, i gama tumahan di karaatan lobipo kikuasa mantadko i kuasa do sapadang ong monimban di karaatan o tomodon.

Ong biano i hal do sukoi om it ongohoturan vokon, nasalasai-no om nolun-batasan-no di Dewan Rakyat. I hoturan do pomogunan isuhut dit undang-undang sompomogunan di mongoguna dit ipat-ipat it ulun (Ruku Negara Dunia). Na i PCS manarang dit atag o gama do Kristian ponong sid porinta sid ayat ko-9 di perlembagaan, ino-no, *I gorija mangalapik dit ipat-ipat it ulun Kristian sumuhut di hoturan do porinta, ong sukul ino hoturan dino, nga amu sumaap di hoturan do Kinoringan.* ka.

13,8-14 It ulun Kristian nokontok ponong sid korikatan vagu di Kristus.

I tokou ulun Kristian masi ponong sid karajaan om hoturan do Kinoringan. Nokorikot-no it adau do koposikan tokou (11). Osomok-no i kosopulan. Tororikoto-no dit adau di Tuhan (12) I sokoviai i kobuatano om kavazao kopionong di hoturan di Kristus (13). I Paulus diri om i tokou biano amu engat do sera banal i korikatan vagu di Yesus. Ino-no o rontob, iadko i noboros-no laid di Yesus dot, Ontupato-no dikou, ka, i kobuatano om gama tokou, i kavazao om pongitungan, it poduan tokou suvai atag ong sid tinoguvangon-nopo di Yesus Kristus.

14,1-15,13 I gama mitotorima om miupakat om mitotoguvang do songkoruhang.

Amu enizo o kakansango i kosipan om harapan dit ongoulun Kristian. Sid piumpugan do Rom varo duvo o rombongan, it iso hinumarap di kobebasan do kakan di nunu-nopo songkakanan, onsi om vokon dot amu.no monodiri dot it onsi dino nisamba-no laid sid rogon ko amu. (i hiza diri kodung nagaras-no i dupot, nisamba-no sid ongopinokokinoringan do Rom, tu i tukang mangagaras nga bobolizan dit ongorogon diri). Topot boros dioti, ino dino, aso harati sid di tokou. Topot ong i rombongan koduvo kakali rinumosi dinot onsi dino sampai minoniag do mangakan dot onsi di iadino. Gam suhulon dioti do bai totodukon ot akanon mantadko kalandu mangakan di nakasamba sid rogon. Ino rombongan dino nokoubozo-no it ongobebas it ulun dot ulun dit okugui o kosipan, ka. It ongokakansang minomoros do iadko it ulun sid Korintus dot, Sokoviai kavasa, ka (1. Kor. 6,12). Manjadi miduvo-duvo i rombongan do Kristian sid Rom soumul mioduw om minanala di vokon (14,3+10) sampai minamalang di vokon dot okon-noko otopot-po ko Kristian ioti (14,16). Manjadi i Paulus minoniim mongonsug om mogkovosihan dioti dino, dot ino-no o gama dau, mongonsug dioti dot, Pitotorima-kou-no sokoviai, iadko i Kristus nokoponorima-no laid dikou (15,7). Kada-kou-no pilombus manala om pakaraat ko mongusiba di vokon, gam tonggungo-no dikou i vokon om boboo-no it okugui, ka. Ino-no o sabap di Paulus dino:

a) ipat-ipat it ulun Kristian, suvai isesoon-no banal i ginavo sid dau do kosipan om dau do pongitungan dot amu opiduvo o ginavo om amu sangkahaba dot amu elaan dau ombo it otopot om amu (14,5) It ulun dit opiduvo o ginavo iadko iku do barangkas ko bondira (14,22-23) sampai kalandu iosido sampai monimbaru do sala, tu amu opihot o kosipan om ginavo, bai sumusui iosido dit ulun vokon, amu kaharati di tomodon om panangan. Ong i kuvo momoros di iadino, sumusui iosido dot kodung momoros i vokon do tanid o hal, nga sumusui-no vagu iosido dit boros dino.

b) Sokoviai i kavazao om kobuatano-ku suvai nokoluzung-noom koluu di gama om kavazao di Kristus (14,7-9). I tokou diti dang Kristus sid sokoviai i gama, hoturan om kosipan. Tu i sokoviai sid di tokou, antad kavi sid Tuhan (1. Kor. 10,26 om Zabur 24,1) I boros dot, Sokoviai kavasa, ka, suvai konong ong orinding-no di boros koduvo di Paulus dot, topot ikou dino, i Kristus-no o sanganu, ka (1. Kor. 3,22-23) I Kristus okonko bai minatai bahagi dohon, inoi nga bahagi di sokoviai i riniba. Sabap ino, amu atag do ioku o mongusiba ko mangarat di kosipan dit ulun vokon di dang Kristus. Ong sukul notorima-ku-no i samod do Kinoringan di ponong sid ulun do kisala om i pakaso do Kinoringan (Rom 5,7-10), tantu amu-oku-no kavasa do suhulon i kosipan om harapan dit ulun vokon. Ong mongusiba-oku dit obpinai sid piumpugan, mad kousiba-oku di Kristus (1. Kor. 8,12) om kounang di piumpugan do Kristian (14,10).

Topot, ong lumuzung-oku sid Tuhan Yesus, ino Tuhan di sokoviai, amu-oku-no mongogorot di kakansangan-ku om kobebasan-ku.

c) Ino-no ot atag o gamaon, posurut-nopo di kengkakatan di piumpugan om ogrija di Kristus sid sokoviai i gama-ku do tumabang sid vokon ponong sid kosurutan di piumpugan (15,2). Sabap i kosipan sid Hab al do Kovosihan pobebas antad sid pinonuhuan, om kapatazan om karaatan/kasalaan (5,1). Amu monodiri it ulun Kristian i retanko osusi ko haram (asakau) Markus 7,15; Luk.,11,41; UR 10,11-15. Sabap ino, i Paulus, ulun dit akansang dara (14,14+20), oebas iosido dot amu mamakai di kobebasan dau ponong sid ulun dit okugui om amu mongogorot iosido dit ulun dot okugui, gam mogkovosihan dit ulun dino, supaya mopud i piniizaan dot ulun Kristian. Isai-nopo it amu engat dit ulun vokon, nga monimbaru do sala, tu pasadu dit obpinai (14,3 om 1. Kor. 8,9) sampai mongorongoi iosido di piumpugan (14,20). A-milo milo ipat-ipat it ulun Kristian mogihim di kogunaan di koruhang dau. (1. Kor. 10,24).

d) Kagi, suvai atag i gama do Kristian sid tinoguvangon dit ulun labus, supaya amu ousiba i ngaran di Kristus sid tanga dioti dino (14,16). Sabap i razat mongontupat om mongimpa di kavazao dit ongoulun Kristian om i piniizaan do piumpugan (14,19). Na i Paulus minanarang sid 1. Kor. 9, 19-23 do kuran iosido kondiri moniim minsomok sid isai-nopo it ulun do poromot di samod do Kinoringan sid ulun dino o tomodon.

e) 15,8-13 Minsanko amu enizo it ulun sid Rom dino ulun do labus ko Yahudi, i Kinoringan minongodim dioti sokoviai om pinamung dioti sid dau do gorija, supaya i kogunaan do gorija mopud sid piniizaan di mongohormat di Kinoringan om posuntu di samod do Kinoringan sid tanga do riniba.

f) Okonko i gama dot ulun manala dit ulun vokon o kiguna, gam ipat-ipat it ulun kotoronong sid pihukuman do Kinoringan (14,10;12). Sabap ino, sokovia i kopolisan dot ulun kalanta laid sid tinoguvangon do Kinoringan.

g) Okonko i kakanan ko kosulungan o kiguna, inoi nga i gama tokou mongindazou do Kinoringan sid sokovia i kopolisan om i gama mamung sid piumpugan di iadino o gama.(15,6), supaya iseso o ginavo om enizo i boros mongindazou do Kinoringan, it Ama di Tuhan Yesus Kristus. Ino-no kesaan do kopongindazahan do Kinoringan jumadi sid gama mitotorima.

15,14-33 Nokodim-no om notugasan-no!

Sid surat pakaa sid piumpugan sid Rom pentutun i Paulus di kondiri dau sid piumpugan sid Rom. Amu-po kopirikot i Paulus sid Rom, baiko agazo o ginavo dau rumikot. Kagi i kenginan di Paulus, lumombus-po antad sid Rom kumaa sid Spanyol. Engin iosido dot i piumpugan sid Rom tumabang di Paulus kumaa sid Spanyol. Mongimbulit iosido di boros dau sid 1,10-15 sampai mongolumbok-po dioti sid Rom: it ongoginavo dikou oponu do kovosihan om osukup o keloo dikou sampai eli-kou-no mitutuduk-tuduk, ka. Iri-ogi i Paulus manarang do rasul iosido dot i dau do tugas ponong sid labus om ino tugas dino iadko imam iosido do pazasad di Habal do Kovosihan o tomodon. Koubasan dau, amu rumikot iosido sid ongopiumpugan di nokengkakat-no laid diri, tu rumosi do pengkakat do piumpugan koduvo isuhut di dau do vaza mangahabal. Sid ayat 20-21 humarati tokou dot amu atag do monginjil sid piumpugan do gorija vokon do povongo dit ulun sino o tomodon, iadko i gama dit a-ko piro ot ponulung di SIB di tumanga sid PCS. Ino-no it atag, pazasad di Habal do Kovosihan sid ulun dit amu-po kopirongou di habal dino, ka di Paulus. Amu magapon sid pukot ko rambat di dang vokon.

25-28 Manarang-po i Paulus di rukut sid Korintus om i tomodon di rukut dino. Iosido o patod di rukut sid Yerusalim. Tu nokopiupakat-no laid sid kunsil dit ongorasul (UR 15) dot it ongopiumpugan mongorukut bahagi di piumpugan sid Yerusalim, tu i toun 46-48 TM banalko noruzahan i pomogunan do Yahuda sampai monombitil i pomogunan sino. Kagi it piumpugan sid Yerusalim, nga ogumu ot ulun do lumohing-no dit amu nokogoos mansahari. I balanja dioti navi-no.

Iri-ogi mongingut i Paulus dioti sid Rom, supaya ioti mongorinding di Paulus sid gama mongontok minta dua, supaya kosunu it umba di Paulus om abarakatan-no i panahon di Paulus.

16,1-27 I gama mitatabang dit ongonulung sid Habal do Kovosihan

I Paulus mangarait di sokovia it ongoulun sid Rom di koubasan laid di Paulus. Niogulu-no di Paulus i Febe pentutun, i ponulung dot ondu antad sid Kangkeria i sid Korintus di kumaa sid Rom (1-2). Iri-ogi pinelo-no dit ongosalamat dau sid ongokoubasan dau sid Rom, gulu-no i Priskila om Akula, ino-no i koruhang laid dau sid Korintus diri. Ioti nosunsub-no sid Rom hiza di Kaisar Klaudius, do kodung ogiang-no vagu i hoturan di Nero, miniguli-no vagu ioti kumaa sid Rom sampai minitoron-no sid Rom. Na i sokovia i kinelaan di Paulus kananganko i piumpugan sid Rom, nening antad sid di Priskila om Akula dati, i pinokoruhang-po dau sid Korintus.

Iri-ogi pinoontupat i Paulus dioti, gima it ongoguru di momudut om mamalid (17-20) om polombus-po i Paulus dit ongosalamat dit ongokoruhang dau sid Korintus, ino-no i Timotius, iLukius om Yason om Sosipater. Minanarang-po i Paulus di ponuraton, ino-no i Tertius miamung dau do panangsalamat. Varo-po salamat antad sid tuan rumah sid Korintus om i bendahari di piumpugan om i Kuartus-po.

25-27 Iadko i salamat kotimpunan di surat di Paulus o gama dau monutup di surat sid gama mongindazou do Kinoringan sid saralom di Tuhan Yesus Kristus. Ino gama mongindazou mad indomoon di Paulus om harapan dau, supaya it ongokristian sid Rom mamung sid gama dau mongindazou do Kinoringan.

Bahagi 5

It ongosurat di Paulus pakaa sid piumpugan sid Korintus

Umpatod: Sid duvo it ongosurat di Paulus pakaa sid Korintus dino inonsi-no i tudukan di Paulus kananganko i Habal do Kovosihan om i teologia dau do kopionong di hiza diri om bahagi di kavazao di piumpugan dot ulun Kristian sid Kuala Korintus. Minsanko amu oruhai tokou mongintutun di kobuatano di hiza diri, kadapat tokou momurimon dit ongokosusaan om kosinangan di piumpugan do Korintus diri om humarati dot amu enizo atag i kopizaan dioti sid di Paulus. Minagavi i Paulus posurut di kopongingkakatan do gorija sid Korintus om sumaap di nunu-nopo o hal di mongunang ko mangasau om mangaraag di gama dau dino.

Na i surat Keso Korintus dino pengilo di tokou do kuran i gama di Paulus pengkakat om manaud di piumpugan sino om i vaza dau monginjil om mogkovosihan sampai potorontog di piumpugan sino. Sid surat koduvo dino mamanal i rasul Paulus di dau do tugas om gama om kuasa do rasul iosido, minsanko varo't ongoulun di minangasau retanko, ong i Paulus okonko rasul banal, tu bai misingrasul, ka dioti. Topot i miduvo-duvo i surat dino, iseso o tomodon om panangan, ino-no, pasasi sid ongoulun Kristian sid Korintus di Habal do Kovosihan di mangagazad dit ongoulun sid atag o gama sumuhut di kenginan do Kinoringan.

Labaan do sontoun mintanga do nokentoron i Paulus sid Korintus. I kuala Korintus dino, bandar do banalko agazo sid pangkalan do duvo o rahat miampaping, mad pintu om bantaran sid pialatan do Eropa om Asia. Ogumu o hal dot ekonomi di midagang sino. Pengkaa dino nokoronuw i bandar dino, gima i kobudayaan dau om it ongougama dit ataud sino diri. Ombo i barang antad sid Asia di nokotindal sid bandar timor, mintana-no patod sid tuhanan ponong sid kotonobon polombus sid Eropa. Pengkaa dino i barang antad sid Eropa tindalon sid tuhanan sid kotonobon om iatod mintana sid tuhanan sid timor sampai iudan-no vagu sid kapal ponong sid Asia.

Manjadi intolu i Paulus korikot sid Korintus. Ontok di TM 51 nokorikot i Paulus dit insan-ogi minaza sid Makedonia om Athen sampai minintoron sino, tu monginjil om pengkakat di piumpugan sino. (UR 18,11). I kogumuai dot ulun Kristian diri, ulun do mosikim di mansahari sid pangkalan do baiko kuli ioti (1.Kor. 1,26...), gam varo't a-ko piro o bai uripon (1. Kor. 7,21; 12,13). I gulu diri, ulun labus ioti (1. Kor.12,2). Topot varo't a-ko piro di nokokristian-no antad sid ugama do Yahudi iadko i Akila om Priskila om it ulion do panambayangan do Yahudi i Krispus (1. Kor. 16,9 om UR 18,2+ 8) Kagi gulu-no tudukai di Paulus i sid panambayangan do Yahudi sid Korintus sampai varo-no't ongoulun Yahudi om i sinumako dit ugama do Yahudi di kinumokristian-no diri mogulu dit ongoulun vokon. Baiko it ongoulun do Yahudi dit sinumaap di Habal do Kovosihan o minonusa om sinumaap di Paulus, gam minongoruput-no ioti di Paulus sid porinta Galio (UR 18,12...) Nokolombus-po i Paulus sid pomogunan vokon, rinumikot-no i Apolos, ulun Yahudi antad sid Alexandria om pinosurut-no monuduk di piumpugan (UR 18,24-19,1), i noboros dot elo banal do Kitab do Yahudi (i Kitab Laid) om kihukum. Ong sid 1. Kor. 16,12 varo boros dot i Apolos kinumoruhang di Paulus sid Efesus.

Bai duvo o surat di Paulus pakaa sid Korintus o nakamung sid Kitab Vagu, minsanko varo boros sid duvo i surat dino do varo-po't ongosurat vokon di nokokirim-no di Paulus sid Korintus. I Surat Keso nikirim di Paulus antad sid Efesus ontok di TM 55. Tolu-no toun i Paulus sid Efesus diri. Na i tinomod di surat dino alanta sid vaza di Paulus mangambat dit ongokosusaan sid Korintus di norongou di Paulus (1. Kor. 1,11 om 5,1) Mad varo surat dioti sid Korintus pakaa sid di Paulus di monginsosok sampai minongoduat dot a-ko piro o hal. Sid 7,1; 8,1; 11,1; 12,1 om 16,1 kembulai it ongohal dit antad sid duatan dioti sid surat. Sid ongohal dino mimbulai i sokovia i kavazao om kobuatano di piumpugan di vagu di kakali amu-po mansak. Na mongimot tokou sid surat dino do kuran i gama di Paulus posurut om manaud om monunda do piumpugan om kuran i gama dau mogkovosihan ko mamajal sampai manamod di piumpugan dino. Iti-no o sabap dot ino surat dino mad panarangan dot ahatul bahagi di

gorija sompomogunan di nakatanga sid razat, nga kakali osodiri om osusi dot amu mozo di kavazao dit ongoulun vokon (1,2; 5,12; 6,6; 10,27). Ino-no, i gorija nakatanga sid razat ko riniba dot amu kadapat maliu sid tampat dot bai Kristian-nopo sino, dot osusa i gorija om it ongoulun Kristian do mongontupat om mangajaga, supaya amu kotombil sid hoturan do tanid o kuasa di mad rogon. Antad sid Habal do Kovosihan mogkovosihan i Paulus dioti, supaya kemumui ioti sid kenginan do Kinoringan sid sokovia i kobatano om gamaon dioti.

Ong apajak mongonsi di surat **Keso sid Korintus** dino, pengkaa dino, 1,1-9 manansalamat i Paulus om monorima kaseh bahagi di kolunduo di kovosihan di sid piumpugan. Iri-ogi i bahagi keso 1,10-4,21 mogoduw i Paulus di gama dioti miihas sid a-ko piro o rombongan di miaagil-agil om i gama dioti mongoguna om monodiri dit ongoguru do piumpugan dit oholian gunaon ko usibaon. Kagi popigimbang i Paulus di Habal do Kovosihan om i keloo do riniba di mitotori. Sid bahagi koduvo 5,1-6,20 mogkovosihan i Paulus dit a-ko piro o hal do bahazan sid piumpugan, ino-no i sumbang, i mihukum sid pongohukuman dot ulun labus om i kolugagazan. Sid bahagi kotolu tumimpa i Paulus dit ongoduaton sid surat dioti 7,1-11,1 kananganko i hal do misavo, i hal do mamung sid poginakanan sid rogon ko i mangakan dot onsi di nisamba om nagaras-no sid panambayanan do patung om kuran iosido nga suntuan dot atag bahagi di piumpugan sampai nunu o harati kolobusan om kobebasan, ong ulun Kristian. Sid bahagi kapat 11,2-14,40 mangahatul i Paulus di vaza miuumpug i piumpugan dot ulun Kristian. Sid kovian 15-16 manarang i Paulus di kogunaan di kinogulianan di Tuhan Yesus bahagi di kogulianan dot ensanan it ulun Kristian, i minatai laid om i kakal-po mizaui sampai manarang di vaza mongumpug do rukut bahagi di piumpugan sid Yerusalim om it umba dit ongopanahon dau dot iamung-po i salamet ponutup do surat.

Na i surat **Koduvo sid Korintus**, sid banalko tanid o kavazao di piumpugan sid Korintus ot anangan, gima varo't ogumu o hal najadi om nembulazan sid Korintus dit amu alanta om amu oruhai otutunan. Mad saapon dot ulun, tu amu minorima di kovosihan di Paulus, gam moguhang om mogoduw di Paulus sampai pakaraat di Paulus. Iti-no o sabap dot osusa i Paulus do magavi sumaap om mamajal dit ongoulun di mangasau di piumpugan. Ino-no o gama dioti pokoulau, retanko okonko otopot rasul i Paulus sampai i sakit dau, nga tanda dot aso kuasa di Paulus antad sid Kinoringan. Manjadi ensanan i surat koduvo dino, do kososizan di Paulus bahagi di tugas om tanggung jawab dau sampai i kovosihan di minorunda dau dot ulun iosido do kosorou om kinuagan kananganko i kosungguvo di rikoton om panangan di rasul iosido do randavi. Topot kavi-avi i gama di Paulus do pogili sid dioti di dau do kobatano, okonko harati do mokindazou, inoi nga posurut iosido di kosihatan om kengkakatan om kosurutan di piumpugan sid Korintus. Ong sompuruvon mongonsi, pengkaa dino ino Surat Koduvo sid Korintus:

1,1-2 manansalamat i Paulus di piumpugan om 1,3-11 monorima kaseh bahagi di kinosopulan dau di sisiri ong apatai iosido. Iri-ogi bahagi keso 1,12-7,16 monodiri ombo it amu atarang sid pialatan di piumpugan om i rasul. Retan dioti dot amu katama i Paulus magandaha vagu (1,12- 2,17). Manarang i Paulus do nunu banal i tugas om tanggung jawab do rasul iosido sampai i rasul amu milo-milo saapon om onong do kosusaan om kapagasan (3,1-6,10). 6,11-7,1 ipoontupat di Paulus dioti, supaya amu miguli vagu sid ugama laid. Iri-ogi manarang i Paulus di kohigakan, gima nokorikot i habal di Titus sid rasul dot varo-no vagu katagan sid Korintus om i harapan di Paulus sid piumpugan dino. Sid bahagi koduvo F. 8-9 mangahatul i Paulus di rukut bahagi dit ongomosikim sid piumpugan sid Yerusalim. Sid bahagi kotolu 10-13 magavi i Paulus sumaap dit ongoulun di misingrasul, di nakapangasau di piumpugan do Korintus. Mongimbulai iosido di vudut dioti (10), iri-ogi monguji iosido di kavazao dau kondiri di rasul iosido di Kristus dit nakatalib di sokovia it isai-nopo om nunu-nopo i kohormatan om garal do rasul (11-12). Iri-ogi mamakal iosido di panahon vagu magandaha dioti sid Korintus.

Ino-no ot atalahas. Sid pialatan di duvo i surat dino varo hal di minangasau di kopiizaan di rasul om i piumpugan dau dino. Mad tolu o hal najadi nokohiza sid pialatan di surat keso om koduvo, ino-no,

1. minagandaha i Paulus sid Korintus dot oduruk;
2. i hiza di sid Korintus i Paulus varo gama sid tanga dioti do mongimbuhai di rasul; om
3. varo surat di Paulus sid dioti i retan do surat mogihad do sid surat diri minonuhu i Paulus dot it ulun di minongimbuhai a-milo mokimahap sid di Paulus sampai suvaiko i piumpugan humarap vagu di Paulus om varo-ogi katagan.

Iri-ogi sinuhu di Paulus i Titus pakaa sid Korintus do mangatag vagu di hoturan sino dino om i piumpugan tumorima vagu di rasul Paulus. Manjadi nokosunu i panahon di Titus, gam tinuluk-no dau i tinomod om panangan dau sino sampai koguli vagu sid di Paulus mangahabal di katagan sori diri. Manjadi hiza di minonurat i Paulus dino surat koduvo dino, sinuhu-no vagu dau i Titus pakaa vagu sid Korintus om patod di surat dino om pentahan di kaandahaan dau sid Korintus. Iti-no o sabap dot i surat koduvo dino mad vaza koponodaaan di panahon di Paulus pakaa sid dioti, supaya otorima i Paulus sid dioti dot aso sarangut. Iti-no o sabap banalko avadsak i boros di Paulus kananganko it ongoulun di sinumaap di Paulus. Sabap kuran-kuran, i tugas do rasul i Paulus, nga nokosokot sid di Kristus dot amu koho i Paulus do varo momoros retanko i Paulus okonko kitugas antad sid di Yesus Kristus.

SURAT KESO DI PAULUS PAKAA SID PIUMPUGAN SID KORINTUS

1,1-3 Manansalamat i Paulus. I Paulus mamakai di koubasan monurat sid ulun vokon. Mangarait-po laid di dau do ngaran om tugas om it inantadon di tugas dau dino om i koruhang dau. Mongohodtol i Paulus dot iosido dino okonko ulun di nokengkakat kondiri ko ulun di kikuasa laid, inoi nga iosido nga ulun di nokosuhut di kodim do Kinoringan. I tugas dau dino antad sid kenginan do Kinoringan, okonko bai kenginan di dang riniba. Om i koruhang ino-no i Sostenes (UR 18,17). Amu elaan tokou dot i Sostenes dino, nga it ulion laid di panambayanan dot Ugama Yahudi sid Korintus ko vokon. Kaluto ong i Sostenes kinumoruhang di Paulus sid panahon i nokentoron sid Efesus.

Iri-ogi narait-no i rikoton di surat dau, ino-no i piumpugan ko gorija do Kinoringan. Sid kiroon di Paulus, kondiri di Kinoringan o minongimbulai di piumpugan sid Korintus sampai i piumpugan dino, dang Kinoringan. Iti-no i pitonidan mantad di sokovia i it ongotompok ko rombongan di varo. I pongoretan do Yunani EKKLESIA varo harati dot, umpug di nokodim-no antad sid kinogumuan. Vokon-no ong apakai biano i pongoretan GORIJA, ino-no i DANG KINORINGAN, ka, di miabal di pongoretan piumpugan. Ino-no ot ohorotizan dit ongoulun Kristian kodori diri, it ongoulun Kristian o jinumadi di bansa do Kinoringan, ganti di bansa dot Israel. Manjadi ong dang Kinoringan, tantu ulun ioti dot osusi om nokosodiri antadko sid ongoulun vokon. Ino-no o pasandatan di retan dot *osusi*, Kinoringan pinosuvang dioti sid kosusian dau. Ino kosusian dino antad sid piniizaan di Kristus. Suvai osusi ioti ong nokodim ioti do Kinoringan. Ino gama di Paulus manarang di iadino, sabap kakali i sid piumpugan varo nakagavul do kobuatano dit amu atag. I harati, ong osusi it ulun Kristian, ino dino okonko antad sid bahazan dau dit aso borotuduon, inoi nga i nanu iosido di Kristus pamung sid hoturan om karajaan do Kinoringan. I kosusian dino, nitahak do Kinoringan, okonko ulun o nakagama. Iti-no o sabap dot i Paulus mongonsug dit ongoulun muli om sumokot sid hoturan do Kinoringan do tumolikud di kavazao di nunu-nopo it aso tantu-tantu.

Ong manansalamat i Paulus dioti dino, manarang iosido dot ino kovosihan dau okonko rontob sid dioti sid Korintus, inoi nga sid sokovia i it ongopiumpugan om ongogorija sompomogunan. Kodung i varo-no piumpugan sid Korintus, ino piumpugan dino nga nakamung sid songgorija sompomogunan. Ensanan i gorija kopiizo sid gama mongodim om mangarait di ngaran di Tuhan Yesus Kristus. Manjadi i kenginan om kovosihan di Paulus bahagi dioti sid Korintus, ino-no, kovosihan om kopioondusan do Kinoringan om i Kristus. I Kinoringan, ino-no it Ama, i minongurug di songriniba om i vinangun, i manamod di riniba sampai pajadi dit ongoulun dot anganak dau. Om i Yesus Kristus, ino-no i Tuhan dioti, i porikot sid riniba di samod do Kinoringan sampai mangalabus di riniba antad sid nunu-nopo songkouripanan om posuvang dioti sid karajaan dau. Iosido o manansanganu di tokou. Manjadi i kopioondusan dino okonko bai kopurimanan dot osinang o ginavo, inoi nga monohungkoi di bahanda dit ongonabi (Yesaya 9,5-6; 52,7; ko i Zabur) do varo hiza rumikot do natanus-no kavi i piuduhan om pisanaan. Isai-nopo i nakamung sid karajaan do Kinoringan jumadi do piumpugan di tumorima di kopioondusan.

1,4-9 Monorima kaseh i rasul. Sumusui i Paulus di koubasan dot ongosurat kodori do monorima kaseh-po laid. Topot okonko bai tinomod i boros di iadino, inoi nga, songkuro-nopo o kosusaan sid Korintus diri, kakali apatut monorima kaseh sid Kinoringan do varo piumpugan sid Korintus. Sabap i gama di iadino mongohormat om mangarazou di gama do Kinoringan pengkakat di piumpugan dino. Ong okonko kikovosihan antad sid Kinoringan, tantu aso piumpugan sinod Korintus dino. Mad nokolundu-no do kovosihan om tudukan om kohorotizan sampai kosunduvo i piumpugan sid Korintus. Mad otimung-no do tahakan do Sundu om osukod-no i piumpugan sid Korintus dino. I retan do

tudukan aralom o harati, tu manarang di gama dioti rumamit di keloo do Kinoringan, ko i *kohorotizan* sid hal do monodiri om mongolumbatos do kosipan i boros dino. Ino-no, i piumpugan sid Korintus i nopud antad sid kuasa om Sundu do Kinoringan. Kagi sid piumpugan varo harapan di rikoton dioti, ino-no it adau di Tuhan. Na siti mamakai i Paulus di pongoretan *Adau di Tuhan* om posondot dot it adau di Kristus, isuhut dit ongonabi diri iadko i Amos om i Yesaya. Sabap i Kristus o monuluk om polombus di hoturan do Kinoringan. Na i harati dit adau dino, sid 15,23.. om 51.. Varo-po panarangan di Paulus do suvaiko antad kavi sid Tuhan Yesus om varo-ogi kosungguvon di piumpugan. Ino Tuhan di nokorikot-no laid om rumikot vagu iosido, tu... mongohukum dit ongoulun di mizau om minatai. Manjadi kenginan di Paulus dot i piumpugan di kakal-po ogumu o nalazan om kokurangan, tumatap om rumangkap antad sid gama do Kinoringan patatap om parangkap dioti.

BAHAGI KESO

I Paulus mogoduw/sumaap di kopiihasan di piumpugan sid Korintus 1,10-4,21.

1. Miihas i piumpugan, gima varo't apat rombongan di miaagil-agil 1,10-17

Mongonsug laid i rasul dioti do miizo ioti sid boros om pongitungan om upakat. Iri-ogi manarang iosido do nakasabap do iadino o gama dau mongonsug, ino-no, norongou di rasul antad sid ulun do varo piroduhan dioti. Ong mongonsug iosido dioti, okonko bai antad sid dau do kenginan, inoi nga iosido kondiri nga nonsug iosido di ngaran di Tuhan Yesus. Sabap i Yesus o puun do kopiizaan, i moniag di kopitongkizadan. Bai siti om narait-ogi i ngaran di Keloe, ulun dati do Korintus i nokorikot sid di Paulus sid Efesus. I hiza diri asarok varo't ongokapal lumazag antad sid Korintus korikot sid Efesus miuli-uli mangatod do barang om ulun. Bai onibak o panarangan di Paulus di kobuatano di kopitongkizadan sid Korintus dot aso boros do kuran nokotimpun i iadino. Pengkaa dino aso boros di Paulus do manala dit iso o rombongan ko mamanal di vokon. Bai iso o tomodon di Paulus, popiizo vagu dioti. Sid Korintus varo't apat o rombongan di mad parti. Inot apat o rombongan o nokembulai sid tasanglaang-laang o kosurutan do piumpugan. Sabap nokogulu i Paulus sid Korintus, iri-ogi i Apolos. Varo-po't ulun nokorikot di nokokoruhang di Petrus om iri-ogi varo't ulun di minongitung dot amu-no sumusui dot isai o rasul, gima obebasi ioti do turus sid di Kristus ot ulion, ka. Ino-no i kosusaan diri, kodung nokosuhut it ongoulun di dau om dau do harapan, minongusiba-no ioti di harapan dit ongovokon, retanko bai i dau do harapan ot otopot sampai minomuruvak ioti di dau do harapan om kosipan. Manjadi i Paulus dino moniag di sokovia i gama dit ongorombongan miaagil-agil. Minsanko i rombongan i retanko humarap sid di Kristus, nga tiagon di Paulus. Tu kuran it ulun humarap sid di Kristus, ong kakali mongusiba iosido di rasul di ponuhu do Kinoringan?

I rombongan i retan do di Apolos, ulun di banalko ozi di tudukan di Apolos, mantadko i di Paulus. Sabap ong i Paulus monuduk, minsanko it ulun dit amu nokosikul om amu aralom o pongitungan, kakali nakaharati di gama do Kinoringan. Topot ong i Apolos, retanko ulun dit elo om kihukum (UR 18,24...) antad sid sikul do Yahudi sid Alexandria, nga harapan dit ongoulun di nokosikul. I rombongan sid di Kefas, varo dati ulun di minangasau di gama di rasul Paulus, retanko suvai i Petrus om rasul-ogi banal, tu koruhang laid di Yesus om pinangkat di Yesus dot ulion do gorija (Matius 16). Inot ongoulun dino, nga ulun Kristian antad sid bansa do Yahudi dati. Ong i di Paulus do rombongan, ino-no it ulun di kakali hinumarap sid di Paulus, tu i Paulus o pengkakat di piumpugan dot nakasasi ioti kavi di kapagasan di Paulus om i gama dau magavi pahabal di Habal do Kovosihan dot amu mongimvagas dit ongoulun mosikim, tu amu mokibalanja. Ino rombongan dino suvai nokembulai, ong nokembulai i duvo rombongan vokon di minongusiba di Paulus om i gama dau. Ong i rombongan di Kristus, ulun dati di minongitung dot atagal ong varo-no rasul. Sabap ioti kondiri nga kisundu om kaharati di Habal do Kovosihan om kosorou-po ioti. Manjadi i Paulus, bai onibak o gama dumahava, ino-no: Nabahagi-hagi-no-ka i Kristus antawa nakasangkap-no-ka i Paulus mongontok dikou? Ong iso-no ot i Kristus, tantu iso-no o piumpugan (12,4...). Onuvon-po di Paulus i kondiri dau do suntuan do pokulau di gama dioti misosodiri. Mangasip-kou-naku sid di Paulus? ka. Bai i Kristus o minongontok dikou, aso vokon. I

Paulus minongodim dioti rumikot sid di Kristus. Pengkaa dino sid kinopomodsuan narait-no i ngaran di Kristus, okonko i ngaran di Paulus ko Kefas ko i Apolos! Gam avantangan i Paulus dot iosido kondiri alambat pomodsu dot ongoulun, inoi nga it ongokoruhang dau o minomodsu. Iti-no o sabap dot iso nga aso kadapat momoros do nopodsu iosido sid di Paulus. Supaya atalahas ino, gam minangarait-po i Paulus dit isai-nopo sid dioti dit nopodsu-no di palad dau. Ong i di Paulus do tugas, ino-no pahabal di Habal do Kovosihan! Aso boros sino dot okurang o tugas dau momodsu mantadko mangahabal di Habal do Kovosihan, inoi nga bai osodiri ino duvo i tugas dino, ka di Paulus. Om nivagat-po vagu di Paulus do bai iso o kiguna, ino-no i tuturan kaananganko i sangkap di Kristus dot i hal di sangkap di Kristus okonko hal do monguji ko mongolumbok om kumotogimozoon-po, inoi nga atarang om avalang o boros, okonko mamaraling-nopo.

2. I Habal do Kovosihan om i keloo do riniba misaap 1,18-3,23.

a) I kolovongo do sangkap nga kuasa do Kinoringan 1,18-25. I kinapatazan di Yesus sid kazu do sangkap tantu ong sid kiroon do riniba kolovongo do Kinoringan. Topot sino dino mongimbulai i Kinoringan di kuasa dau. Ong i riniba ensanan misingkinoringan om misingkuasa om misingsavat-nopo, nga i Kinoringan mongolumbatos di vazaan do riniba do monginsibak di kondiri di ruminiba sampai rinumundun dit ulun di nasala do kapatai sid kapatazan di banalko araat om kikihizon, ino-no isangkap sid kazu. Ino-no i tudukan di Habal do Kovosihan om it onsi dit Ugama Kristian. Manjadi isai-nopo it ozi posiliu di kosipan dino do tudukan di korolomo do keloo, tantu tumongkizad antad sid Habal do Kovosian. Sabap i kelaan di iadino amu engat di iadino o vazaan do Kinoringan minsomok sid riniba. I sangkap di Yesus, ino-no o tempat dot kosodirizan ponong sid kosopulan om ponong sid kobinasaan. Isai-nopo i pokolovong di sangkap, ino-no o tumagak. Ombo-nopo i tumorima sampai humarati dot ino dino tanda di kuasa do Kinoringan, ino-no ot osopulan. Manjadi i Paulus manarang dot ombo i retanko keloo do riniba, gam it aralom o keloo iadko i retanko filsofia, it okonko kohokian do Kinoringan, gima kakali mogihim di kosurutan di kovosihan di dang riniba, i pakaso do Kinoringan ko sumaap do Kinoringan. Ino kelaan dino mongitung di sangkap di Yesus iadko kokuguzan, gima amu sinumaap i Yesus dit araat o gama dot ulun, i Pilatus ko it ongoparisi om katib ko i sojal. Topot sid saralom di iadino nokembulai-no i kuasa do Kinoringan dit amu mamakai di kahakango do longon om palad di mongorodsit dit okugui, inoi nga kumugui om aladtakan sampai momurimon di sokoviai i korualan di varo sid pialatan do riniba, tu mangalabus antad sid kosusaan do iadino o tomodon. Sid Rom 1-2 manarang i Paulus do kuran i Kinoringan manahak do keloo sid riniba, supaya i riniba mongintutun dara di kavazao om kuasa do Kinoringan. Topot i riniba kakali amu kentutun, gam pakaso do Kinoringan om minogidu antad sid Kinoringan. Iri-ogi i Kinoringan minonuntuvad om linumpatiu i vazaan dau minsomok sid riniba, ino-no rinumiba iosido dot i Yesus o nokoriniba. I minatai i Yesus sid kazu do sangkap o mongimbulai i Kinoringan di kenginan dau manapul om mangalabus di riniba. Sinod kazu do sangkap nokentalang-no vagu i kenginan do Kinoringan minsomok sid riniba om manamod di riniba do iadino magavi manamod om mongontok. Isai-nopo i mangasip om tumorima di iadino, ino-no o nokemot do kosopulan om kobebasan. Ombo i bai pokolovong di sangkap dino, ino-no obintagak sampai alaid-no.

Iharati, okonko i keloo do riniba o rumamit do Kinoringan. Baiko it ulun di tumorima om mangasip di gama do Kinoringan sid saralom di gama di mad kolovongo, ong riniba mongitung, ino-no o nakamung sid hoturan di karajaan do Kinoringan sampai kotoguvang do Kinoringan. Ino-no o nakamung sid bansa vagu. Okonko i nunu-nopo songkeloo do riniba o kadapat posuvang sid piniizaan do Kinoringan ko milang sid kovosihan do Kinoringan. Minsanko i keloo di bansa dot Israel nga kakal dot amu miuma. Ong it ulun do Yahudi minogihim do tanda di kuasa do Kinoringan om kosunduvo iadko i hiza di sid belantara: kokiraai-no, ong i Yesus minonunsub dit ongoulun do Rom antad sid pomogunan do Yudea diri, turus ensanan dati ioti minongohormat om minongtuhan di Yesus. Topot nohukuman i Yesus

sampai nisangkap-no dioti, tu retanko bai porupun dot pangangada om kihizon om pasangapon om nolupu-no do Kinoringan it ulun dino i iadino i kinapatazan dau. Pengkaa dino it ongoulun Yunani om i nokelo di ponilaan do Yunani diri, minogihim do kohorotizan di kavazao di kuasa sid surga do minsomok om rumompok sid kuasa dino o tomodon. Iadko i gama dit ongoulun Yunani minonodiri dit ongorumbul om minonginsosok sampai minongintutun di vinangun, supaya kaharati di sokovia i korolomo di vinangun, kiniro dioti dot ozi ioti mongintutun om mangaharati d kuasa sid savat iadko it ongobarang do vinangun. Suvai humarati do hal om tumorima-ogi it ulun Yunani. Iti-no o sabap do polovong om pobungou i keloo do Yunani di sangkap di Yesus, gima amu kadapat mangaharati iadko it ongorumbul do kodung ingapat ot apat jumadi hopod om onom, ko kodung $axa + bxb = cxc$. Mongohodtol banal i Paulus di kokuguzo om kolovongo do Kinoringan di nokoponori di nunu-nopo i keloo om kakansangan di dang riniba.

b) I kinodim i piumpugan o sasi do Kinoringan di mongusiba di keloo do riniba 1,26-31 Manahak-po i Paulus do duvo o suntuan di mangalapis di boros sid 18-25, ino-no: i kavazao di piumpugan dot ulun Kristian sid Korintus o tanda di gama do Kinoringan pobungou di keloo do riniba om momili om mamangkat di kokuguzo. I kogumuai dot ulun Kristian sid Korintus okonko ulun dit asavat o nokosikul ko kipangkat om kigalar, inoi nga ulun do kapadatai, okugui om tutusan dot osibak. Amu mongimot i Kinoringan dit ongoгарal om hormat dot ulun, inoi nga tumorima dit ongoulun dit okugui om mosikim, it ulun dit aso ngaran, iadko i gama di Yesus diri pokoruhang dit ulun di retanko ulun do kisala, ongosundal, karani di mongumpug do sukoi om i monginsada om i kuran-nopo. Aso tinganan humarati di gama do Kinoringan di iadino, nga kakali vaza do Kinoringan momili dot ulun. *i kihizon om it aso guna o pinili do Kinoringan*. Sid ongoayat dino momoros i Paulus iadko i Yesus sid Matius 5,3... om 11,25-30. Elaan di Paulus dot isot ulun nga aso kadapat mokindazou sid tinoguvangon do Kinoringan. Pengkaa dino iso nga aso kadapat mamanal di kondiri sid tinoguvangon do Kinoringan. Yunani ko Yahudi, sompi minogihim di dau do vazaan minsomok sampai rumompok sid Kinoringan antad sid kuasa om keloo kondiri. Topot suvai it ulun dit aso guna ko hormat osodia do tumorima di kovosihan do Kinoringan om kamung-ogi iosido sid hoturan vagu, ino-no i piumpugan dot ulun Kristian. Manjadi iadko i gama di Paulus pakaso om pobungou di sokovia i gama do riniba mamanal om manapul di kondiri o gama dau pendongou dioti sid Korintus do kuran ioti nakanu di kovosihan om kensamakan sid Kinoringan, gima nokodim ioti do Kinoringan om pinelo do Kinoringan sampai nembanaran do Kinoringan om nosusi om nilabus do Kinoringan. Okonko varo keloo kondiri, inoi nga i Kristus o karangkapo di kineloo dioti (Kol. 2,3). Pengkaa dino i kabanaran okonko ioti kondiri o nakadapat ko nokopongimbulai, inoi nga inembanaran ioti do Kinoringan (Rom 3,21...). Pengkaa dino, ino kosusian dino, ino-no, gama di Kristus posusi om posodiri dioti. Ong nakamung sid di Kristus, amu-no kadapat do gumavul vagu sid rogon om sala om karaatan. Ko i kolobusan, nga ino-no i kimerdakaan antad sid kinuripanan dot ongo kuasa vokon di momorinta dara dit ongoulun. Manjadi ong iadino, bai iso-po o vazaan mokindazou, ino-no mokindazou sid saralom di Tuhan, ka di Paulus. Ino hormat dino katalib di nunu-nopo songhormat di dang riniba.

c) Koduvo tanda di keloo do Kinoringan, i tudukan di Paulus sid Korintus 2,1-5 Sid piumpugan sid Korintus alanta dot i Kinoringan amu mongoguna di keloo. Minsanko i tudukan di Paulus sino, i minonimpuun di piumpugan sid Korintus, amu minozo di vazaan di kihukum om keloo di dang riniba. Bai i habal di kinasangkapan di Yesus ot onsi di tudukan di Paulus diri. Ino-no o nigili dau sid dioti, i kososizan do Kinoringan retan do, *suromo do Kinoringan*, ka. I harati di boros dino, i Paulus amu nokopotim do sumusui di vazaan do Yunani diri do mokiilo om mongolombok dit ongoulun. Kagi minsanko i kobuatano di rasul kondiri, nga orukung om kisakit. Mad rinumosi i Paulus di hiza di tinumoguvang iosido dit ongoulun sid Korintus. Kaluto, tu antad sid Athen i rasul diri di nokorikot sid Korintus, rumosi-ko kakali andaman dit ongoulun sid Athen it amu tinumorima di habal

dau, gam varo mangagauk om pinada di tudukan di Paulus. Iti-no o sabap, mad ohuzan i Paulus om atalou, tu rumosi dot aso't ontok i gama dau mangahabal di Habal do Kovosihan. Topot i kuasa di Sundu dot Osusi minongogiang dit ongoginavo dot ongoulun sid Korintus sampai minangasip ioti di boros di Paulus dino, okonko antad sid gama di Paulus magavi mongimbulai di hukum om keloo dau. I kuasa om Sundu do Kinoringan amu mamakai di vaza dot ulun di pouza di sangkarong vagas do posuhut dit ongoulun o tomodon. I Paulus minongonsug di kosipan dot ulun, okonko i keloo di dang riniba. Bai sid tudukan di sangkap di Yesus mimbulai i Sundu om kuasa do Kinoringan. Ong varo boros di Paulus do iadino, ino-no o harati, i vaza humarati di Kinoringan okonko hal do keloo om kotutunan dot ugama, inoi nga suvai sid kovosihan do Kinoringan, i minaza sid sangkap di Yesus, kentutun it ulun di ralan kumaa sid tinoguvangon do Kinoringan.

d) I Paulus pazazad di keloo di dang Kinoringan 2,6-16

- Tigogi, tanid-no i boros ong siti. Didino tiniag-no di Paulus i kogunaan di keloo dot tigogi, monguji iosido di keloo sampai pentahan dot iosido dino ulun di kikeloo sampai iosido dino elo-po monuduk di keloo. Ino-no o rontob, ino keloo di Paulus dino antad sid Kinoringan om ino keloo dino, suvai koboros om ipaharati dit ongoulun di nosukup-no o kohorotizan ko i narangkap-no (Mat. 5,48; Fil. 3,15) Mad varo duvo liang o kosipan, keso i kosipan di nokotimpuun-ogi mangasip om iri-ogi i kosipan di oubanno di sokovia. Rontob-nopo, ino duvo liang dino amu monodiri dit ongoulun di mangasip, inoi nga pentahan dot i hiza di kovian, kotutun it ulun di mangasip do Kinoringan, minsanko biano, bai ngaran o kotutun (1. Kor. 13,10+12). Varo kiroon di Paulus do varo't ongokuasa do vinangun di mad malaikat ko rogon di momorinta di vinangun sampai i riniba. Inot ongokuasa dino amu nakaharati dit umba do Kinoringan mananggung di riniba. Tu ong nokelo-ogi, tantu minoniim ioti do mangasau di gama do Kinoringan mananggung di riniba, gima elaan dot ino gama do Kinoringan di iadino monori om mananus di kuasa dioti dino. Ino-no o kiroon di Paulus, inot ongokuasa dino nakagavul sid kapamatazan di Yesus, indoson dioti, ong minatai i Yesus, notori-no i kuasa do Kinoringan. Topot i kinapatazan di Yesus o vaza do Kinoringan manapul om mananggung di riniba sampai monori dit ongokuasa di sumaap do Kinoringan (Rom 8,38; Kol. 2,15; Efes. 1,21; 6,12). Sabap ino i Paulus momungaran di Kristus do *Tuhan di kikohormatan*, ino ngaran di napakai laid dit ongoulun do Yahudi bahagi do Kinoringan. Gam ino bantug dino pembulai di kogolivangan sid tudukan di Paulus dot inot ulun di nisangkap-no, ino-no i Tuhan di kikohormatan. Ong sid sangkap, kakali nokosusut om olingob ino bantug dino. Topot hiza di kinogulianan di Yesus nakalanta-no i kohormatan sampai notuluk-no i hiza di kinensavatan di Yesus. Kagi ino kohormatan o kosungguvo di sokovia it ongoulun Kristian (Rom 8,17; Kol. 3,4). Ino-no i vaza di Paulus monguji di keloo di dang Kinoringan. Minsanko it ongokuasa do vinangun amu kaharati di suromo do Kinoringan. Manjadi i Paulus mongimbulit dot iso ayat, tu mangalapis di tudukan dau. Rontob-nopo, ino ayat dino okonko nokosurat sid Kitab Ibrani. Varo boros di Origenes dot ino boros dino inanu sid Kentalangan di Elia, ino surat dit a-kosuvang sid Kitab Laid. - *I keloo di dang Kinoringan suvai karamit ong oluhungan di Sundu do Kinoringan.*

I keloo di dang Kinoringan bai Kinoringan kondiri ot elo monuduk. Ino-no i tugas di Sundu do Kinoringan. Manjadi it ulun di mangasip om nokotorima di Sundu do Kinoringan gam oduzaan i korolomo do Kinoringan. Ino-no it ongovaza do Kinoringan mananggung di riniba. Na varo-po boros di Paulus sid 1. Kor. 13,8.. dot i hiza di kovian, i gama mamahanda om pentalang, nga engkod-no, om i kotutunan do Kinoringan suvai hiza sid penlaid. Ino boros dino amu sumaap di boros siti, sabap i kotutunan tokou do Kinoringan sumurut mavi di hiza di didino. Suvai sid kovian om otuluk-ogi i kopentutunan tokou do Kinoringan (13,12). Manjadi i Sundu do Kinoringan, ino-no i kiroon om pongitungan do Kinoringan i retan do Sundu di nokoluhung-no sid ulun di mangasip o mangagazad di pongitungan dot ulun ponong sid Kinoringan om i kovosihan dau. Tanid mantadko ino, varo-po mad sundu di dang riniba di mamalid dot ulun. Ino sundu di dang riniba ko *ginavo dau kondiri*, ino-no i kosumbungo dot ulun di mongitung do nakaharati-no iosido kavi sampai elo-no iosido do mangahatul

di dau do kotongungan om kosopulan om mokierad-po do Kinoringan. Vokon-no ong ino sundu dino mad rogon banal, tu mamalid dit ulun sid karaatan om kalavangan. Ong varo boros dot *it ulun di kisundu-no, ka*, mamakai i Paulus di boros di nabi Yesaya 40,13 kananganko i kohorotizan di suromo om kenginan do Kinoringan. Ino-no rontob, varo't ongoulun Kristian di retanko, iosido-no ot ulun di kisundu. Na i kobuatano di iadino mokilalatui sid pialatan dit ongoulun Kristian vokon ko kumihi dit ulun vokon, retanko aso sundu ong i vokon. Na sid kovian di surat pakaa sid Korintus manarang i Paulus dot suvai otopotko kisundu it ulun, ong ino gagamaon dau ponong sid kosurutan di gorija om piumpugan, okonko ponong sid ongopantang om korungazan do piniizaan di piumpugan. Sabap minsanko sino, oruhai sumumbung it ulun dot okonko i gazadan di Sundu do Kinoringan ot itungan dau, inoi nga i dau do gama manansanganu di Sundu. Suvai asanganu tokou di Sundu di Kristus, i mozo di sokoviai i kobuatano om gama di Kristus om kaharati tokou-ogi di kenginan do Kinoringan om kaharati tokou-ogi di keloo om suromo do Kinoringan. Iadino laid i noboros sid ongonabi diri, ka di Paulus. Siti manarang-po i Paulus dot i gama do Kinoringan ponong sid riniba, mad tolu o vaza do Kinoringan minsomok sid riniba, ino-no, i Kinoringan it Ama, i minongurug om i Yesus Kristus, i minananggung sampai i Sundu do Kinoringan, i monunda om mangagazad dot ulun. Mitatanid i gama dino, topot kakali iseso o panangan om iseso ot inantadon. Suvai i Sundu do Kinoringan o mongintalang sid ulun di mangasip, karamit-ogi it ulun Kristian di kogofoo di gama do Kinoringan sid saralom di tugas di Yesus Kristus.

e) Kenduvo di Paulus monoguvang di kehasan di piumpugan sid Korintus 3,1-23
- 1-4 Inot ongorombongan sid piumpugan o tanda dot aso guna di keloo di dang riniba. Mad anganak-po ioti sid Korintus sid hal do kokristianan dioti. Amu-po nosukod om okonpo ko ulun do kisundu. Kodung miihas i piumpugan sid a-ko piro o rombongan di miaagil-agil om miooduw om miiivogu, tantu kakali nagazad ioti di mad rogon i ginavo kondiri, tu mokitalib di koruhang. Amu-po osukod-kou, ka di Paulus. I Paulus posuntu dit ulun di kisundu i kobuatano dot ulun di osukod-no banal. Topot ong it ulun di kakali humarap di dau do ginavo, mad anak-po. Okonko bai siti o varo panarangan di Paulus di iadino, inoi nga varo-po sid Fas. 14,20; Efes. 4,13-14. Ong iadino nihodtol di Paulus do retanko anak-kou-po dino, ka, kuran-ka ino? Okon-ka-ko nopodsu-no ioti sid Korintus dino? Banal-no, kodung nopodsu-no it ulun, nasanganu-no iosido di Sundu (3,16; 6,19; 12,3). Mad misaap ino duvo i boros di Paulus dino, antawa amu? tu varo boros sid 1,4...; 3,1+16; 6,11 dot ulun ioti di nokokristian-no. Banal-no, notorima-no ioti di kovosihan do Kinoringan, nga kakali ioti dot amu-po osukod sid saralom di Kristus, tu kakali amu-po ensanan i kavazao om gama isunsui di kobuatano om gama di Kristus. Amu-po ensanan ioti do nokotongkizad sid kiroon om kobuatano di dang riniba. Suvai isuhut di tudukan di Sundu sid sokoviai i kavazao om gama om ulun-ogi di kisundu it ulun Kristian. Ong ioti sid Korintus, vokon-no ong kakali agazad di kiroon di *guvas* om i kozian do guvas, ka di Paulus. I Paulus monodiri di kopiduvaan dot ulun i tumiim sumuhut di Sundu di mad osundu-no iosido do kakali sumokot it ulun dino sid kozian om karalazan do guvas. Ong otopot it agazad do Sundu, tantu ino nagazad-no iosido embulai sid gama om kavazao dot ulun (Rom 8,12-14). Mongohondom i Paulus di kinotimpunani dau sid Korintus, tu i gama dau diri mad posusu-ogi dioti iadko anak di ragang-po. I kosusaan dioti, kakali do suvai susu di dang ragang-po ot atag ipakan dioti, tu gatasoni ong okonko posusuvon. Sid Ibrani 5,12-14 om 1. Petr. 2,2 varo boros di mamakai dino suntuan do posusu. Ong kakali it ongoulun humarap ko monodiri sid bai ulun, iadko i Apolos ko Paulus, inot ulun dino kakali mongitung om sumuhut di kiroon om keloo di dang riniba.
- 5-9 i kobungoho di bai humarap sid guru dau lobipo mantadko sid piniizaan di Sundu. Manarang i Paulus di kogunaan di rasul om guru bahagi di piumpugan. Keso, i rasul om i guru baiko ponulung do Kinoringan, tu i sokoviai i hak dioti, nga antad kavi sid Kinoringan. Aso garal om aso hak kondiri. Sabap i sokoviai i gama dioti sid tagad ko valai do Kinoringan, nga Kinoringan o mangahatul om Kinoringan-no o mangarancang sampai mongumpai. Koduvo, i sabap do rasul ko guru ioti di mad

uripon do Kinoringan, iseso o tomodon om iseso o kezaan. Minsanko tasantanid-tanid o vaza posurut dit ipat-ipat i ponulung di tugas dau, ong i panangan dioti, iri-no ko iri. Ipat-ipat i guru nga kinodim do Kinoringan sid dau do tugas di tanid mantadko i tugas dit ulun vokon. Iadko i pitonidan di gama mangasok ko monuntug ko mongomot, tanid i gama pengkakat do piumpugan iadko i gama di Paulus om i gama mangagazad om posurut do piumpugan, iadko ino tugas di Apolos. Topot i guna dioti, mirad. Iti-no o sabap dot amu atag ong humarap sid iso-no o guru om kumihi-no di vokon. Kagi i gama di duvo ioti dino amu kerad di gama do Kinoringan i mongopud di kosipan iadko i kosunizan dit ongototonomon dit okonko agama di minananom ko i monuntug. Sid vaza dau gumama manarang i Paulus di kobuatano dau do iadiko it onogoguru vokon. Kanangan ong i hasil di dau om dau do tugas, Kinoringan o manantu, otorima ko amu om kisuul ko aso ipat-ipat it ulun, isuhut di nagama dau. Kondiri di Yesus minanarang dot a-milo-milo varo suul bahagi dit ulun di sumuhut di Yesus (Mark. 10,29). Rontob-nopo ino suul ko gaji dino okonko indomoon ko susaon dot ulun kondiri mindamo mokisuul, inoi nga kovosihan do Kinoringan. Andaman i suriban sid Mat. 20,1... dot it ulun di nokopiupakat-no laid di gaji sangadau dot soringgit-no. Topot miradi di gaji di baiko sanjaham-no nakagama sid kabun dot anggul dit ulun diri. Sino-no i panarangan di Paulus do pinopiluu dau di piumpugan om i kabun do Kinoringan om i valai do Kinoringan. Atalahas i vaza di Paulus mamakai dit ongosuriban om suntuan dit oruhai ohorotizan. Ong i rasul ko guru baiko ponulung do Kinoringan. Topot kakali i Kinoringan o mongimbulai di kakansangan di ponulung om mongopud di gama di ponulung monguva. Noboros-po om neluu-no i piumpugan do valai, ilombus-no di Paulus monuduk do poluuvon-ko sid valai.

- 10-15 I usaha di guru oporisa sid pihukuman.

Ong Kinoringan o mongudal di tugas di ponulung dau, iosido-no vagu o momorisa do nokonong ko amu i tugas om i gama isuhut dit udal dau. Amu momuruvak i Paulus dot iosido-no ot origi, inoi nga linumbatos di Paulus dot ino gamaon dau dino antad sid kovosihan do Kinoringan. Ong i gama dau muvalai, minomili-no laid iosido dit atag ot origi. Elaan di Paulus dot ino gama dau dino nokonong-no, isuhut di suhu do Kinoringan. Topot i tanggung jawab bahagi di kapangaan di valai, okonko i Paulus ot manantu. Suvai kopionong dit origi om i gama momongo di valai om atag-ogi o valai. Ikid tukang muvalai, varo dau om dau do tanggung jawab. Kagi amu enizo it ongobarang dit apakai sid gama muvalai. I tukang momili dit ongobarang dino, vatu ko kazu ko nunu-nopo. Na i vaza di Paulus mamakai do suntuan om suriban, mimban-simban, tu tigogi, okonko i kogunaan dit ongobabaal di valai ot boroson di Paulus, inoi nga i horogo om i kotiruo dit ongobabaal dino sid apui. Ong arait ot apui, ong apui kopongohukuman penlaid o boroson sino. Ino-no o harati, i gama di guru do piumpugan oporisa om kalanta hiza dit adau do kovian. Sori osusa-no it ipat-ipat i guru om rasul pogili di dau dot usaha. Na ino boroson do hukuman di mad sid apui o monodiri ombo it atahan sid apui om amu, varo noboros-no laid sid Maleaki 3,1.. om Yesaya 16,11;31,9; 66,24 om Daniel 7,9.. sampai varo-no laid kiroon di iadino sid ugama do Parsia. Ino-no o harati: obungou it ulun di humarap sid bai iso o guru. Sabap i gama di guru dino suvai oporisa ong hiza-no do penlaid. Okonko iadko it ongoulun o mangaratu, tu ombo it otopot om amu, inoi nga ino gama monodiri, nga Kinoringan kondiri hiza do penlaid. Suvaiko i Kinoringan kondiri o pogili di katatapo om koobulo dit ongoPONULUNG dau.

- 16-23 Ipoontupat di Paulus di piumpugan kananganko i keloo do riniba om i kosumbungo dot ulun. Na toguvangon-po di Paulus i piumpugan, kodung nopongo-no dau manarang i hal dit onogoguru om rasul. Linumbatos di Paulus i kogunaan di piumpugan, ino-no, ikou dino *valai do Kinoringan om izonon ko intoronon di Sundu do Kinoringan*. Ino gama dioti monguji dit iso o guru om pokih di rasul antad sid gama dioti mamakai di vaza di keloo do riniba monodiri om it amu nakaharati ioti di keloo di dang Kinoringan, ino-no i suromo di sangkap di Yesus. Sid gama di iadino minongorungoi ioti di piumpugan, ino gama om valai do Kinoringan. Ong sid Kitab Laid i panambayanan sid Yerusalim ot inintoronon

do Kinoringan, sid ongoulun Kristian jumadi i piumpugan ko gorija do intoronon do Kinoringan (2. Kor. 6,16). Mangakun i Paulus diri do mintoron i Sundu do Kinoringan sid dioti (1,1-3). Rontob-nopo, rumosi i Paulus do tumongkizad ioti sid kavazao dino, ong mihas ioti sampai miudu om mivogu. Varo tanggung jawab dioti posurut di tugas dino dot inintonon ioti do Kinoringan, ulun ioti di dang Kinoringan. Iti-no o sabap do pokolovong iosido insan-po dino i keloo do riniba om vinangun. Insan-po dino pakaso i Paulus di gama dioti humarap sid iso o guru om i gama mokindazou sid iso o rombongan. Okonko ikou ot asanganu di guru dikou iadko i gama dioti sumasi dot, Ioku diti dang Kefas ko Paulus, ka, inoi nga it ongoguru, nga ikou-no o sanganu. Sabap i piumpugan manansanganu di riniba om vinangun, i koposizan om kapatazan, i hiza bianco om i hiza di rumikot-ogi, sabap i piumpugan, nga dang Kinoringan om dang Kristus (Rom. 8,38-39 om 1. Kor. 6,3). I piumpugan nga kotoguvang sid hakim hiza di kopongohukuman ontok do penlaid. Isai-nopo i kakali mongindazou dot ulun, tantu iadnoko mongusiba do Kinoringan. Ong i piumpugan o kotimpuunan di hoturan vagu do Kinoringan di rumikot-ogi, amu atag do kakali gumavul i piumpugan sid inuagan om pongitungan di dang riniba di mokitalib om miaanggan-anggan ko mokindazou.

3. I Piumpugan om i rasul 4,1-21

a) 1-5 I tugas om tanggung jawab di Paulus 1-5

Tinarang-no laid di Paulus i kogunaan dit ongoguru om rasul bahagi di piumpugan. Pakazon dau ino panarangan dino ponong sid dau do tugas om dau do gama sid Korintus dino. Ino-no rontob, okonko i piumpugan o hakim di monodiri do kuran i gama di guru ko rasul. Amu mangakun i Paulus dot it ongoulun Kristian sid Korintus monimbang di rasul. Atalahas-no dot i pioduhan om kehasan sid Korintus, nga monimbal di Paulus o tomodon. Varo't ulun dit amu ozi di kavazao di Paulus. Ino dino lobipo alanta sid surat koduvo, tu sino varo retanko i Paulus okonko rasul om aso hak antad sid di Kristus, ka. Manjadi moniag i Paulus di gama dioti mongindaraat di rasul, kagi ong varo gama do iadino, pemozooni di Paulus ino. Sabap keso, iosido bai uripon om ponulung di Tuhan dot okonko iosido o mangahatul om mangagazad di piumpugan, inoi nga kondiri di Tuhan, om iri-ogi, i Tuhan o kaharati monodiri dot atapat i ponulung dau ko amu. Okonko i piumpugan o kopongohukum. I pongoretan suromo (Mat. 13,11 suromo di kokuasaan di karajaan do surga) ino-no o harati: i keloo do Kinoringan om i suvang di kangkab do Kinoringan it a-oduzan di riniba (2,7).

Iri-ogi manarang i Paulus dot asot andaman di ginavo dau do varo gama dau sid Korintus dit a-nokonong. Ino-no o rontob, minsanko aso't andaman, okonko iosido ot eloo mangahatas di kondiri dau. Topot ong bai ginavo dot ulun o mongitung, kakali amu-po miuma manantu dot abanal it ulun ko asala. Suvai i kopongohukuman-no do Kinoringan o mangahatas. Suvai i Kristus o mamanal hiza do penlaid om abanal-ogi, okonko i ginavo kadapat mamanal. I Tuhan o mongolumbatos dit uripon om ponuhu dau. Suvai korikot-no vagu i Kristus om atalahas-ogi do nokonong i gama ko amu. Sabap i Kristus o koponodiri dot ombo i nosusut-no sid ginavo dot ulun.

Na sid Rom 3,21... om 5,15+ 17 sampai sid Gal. 2,16... lobipo posondot i Paulus di harati di kapamanaran do Kinoringan. Vokon-no ong varo boros di Paulus dot i Kinoringan, vokon-no ong i Tuhan o retan dau dot iri-no ko iri, tu iseso o harati. Sabap i Kristus o mongohukum di sokoviai i mizau om minatai, tu iosido-no dino o Kinoringan (Fil. 2,11). Ong varo boros dot *ipat-ipat it ulun kotorima di dau do kendazahan*, ka, okonko harati dot ensanan it ongoulun endazou do Kinoringan. Inoi nga isuhut di nagama dot ulun endazou iosido ko apajal iosido.

b) 6-13 I kosumbungo dioti sid Korintus om i kosompito di rasul.

Ong siti odoromoi-no i boros di Paulus sid dioti, linsohon dau i boros sid a-ko piro it ayat dino sumaap di kosumbungo dioti sid Korintus. I gama mihas om migagagut it ongorombongan sid Korintus mad oholian koburvak, tu palatui di dau do harapan om monosot di vokon. Aso bida di Apolos om i Paulus, sompi ponuhu om ponulung ioti di Tuhan om i gama dioti dino, nga i Kinoringan o manantu do

nokoumbangan ko amu. I harati, i Paulus okonko bai mangapad di kondiri dau, inoi nga i gama di Apolos nga apadani dau. Kagi, mad varo't onsug sid Korintus do mangamu-amu di Kitab, retanko ong it ulun dit elo om kisundu amu osusa-no do mamakai-po di Kitab, gam i harapan sid di Petrus dino katalib-po di Kitab. Sabap iosido nokotoguvang kondiri sid Kinoringan, ka. Na i Paulus mongohondom di rontob dit atag om sionggo ot inantadon dioti dino sampai mamajal dioti, gima i kobuatano dioti sid Korintus mad tinumalib ioti rontob dit atag o gama om kopotutan. Agazo banal o pitonidan di kosusaan di rasul om i kosinangan dioti sid Korintus. Mad notuluk-no i karajaan do Kinoringan sid tanga dioti, ovizau-no ioti do tudukan, nokolundu-no ioti do sundu, ka ko mad nokorikot-no laid ioti sid Kinoringan om manansanganu-no di surga. Dot i rasul ot opogos momurimon dit ongokosusaan di guvas om ginavo. Nigili kavi i Paulus ombo i nongokonong sid dau sid tanga do ralan om i hiza di pazasad iosido di Habal do Kovosihan. Ong otopotko nokorikot-no ioti sid kosinangan, avantangan-no i Paulus. Rontob-nopo, nelaan-no dau dot amu otopot ino iadino dino. Ong banal-ko sumusui ioti di Tuhan Yesus om sumuvang sid tugas do sasi ioti di samod do Kinoringan, tantu ioti iadko i rasul kopurimon di kihizon iadko notiiman laid di Yesus. It ongorasul nokosuhut dit ihud di Yesus sampai nakababo do kapagasan di Yesus, gamko it ongorasul iadko bai momoi sid wayang dot rogon om riniba. Siti manarang i Paulus di vaza sid Rom, it inanu it ulun Kristian do momoi sid circus, do piumbalan ioti dit ongomondou om singa sid tinoguvangon do razat iadko wayang kodori. Intolu i Paulus pogimbang di piumpugan om iosido osilat om akansang om ohormat ioti, topot ong i rasul lovong, okugui om kikihizon dot ulun. Topot i sokovia i kosusaan di rasul koluu di kosusaan om kapagasan di Yesus Kristus, isuhut di kapangahabaran di sangkap di Kristus. Iri-ogi lopison di Paulus i sokovia i panarangan dau dino sid iso ot ayat, ino-no, *ong indaraaton-okoi, sullivan-za do samod...* iadko i boros di Yesus sid Luk. 6,28 *pongumbasih-kou-no dit ongoulun dit asana dikou. Pinta dua-kou-no bahagi dit ongoulun di mongindaraat dikou...* I kodori ong sid ulun do Yunani, ong iadino o gama, lobipo kihizon it ulun sampai iadko bai gansisng om sampa it ulun. Ino-no o lavis di boros dino, i gama tumabang om humogizo di Kristus okonko kosumbungo om kamanangan o kematian, inoi nga kokihizan om kokuguzo.

c) 14-17 I samod di Paulus ponong sid piumpugan sid Korintus.

Nokotuntug-no kavi i hungot om i rampus, gima i kosumbungo om koburuvako dioti diri, odoromoi om oluhud-no vagu i boros di Paulus monginsasamod dioti. Sabap iso-no o tomodon di Paulus monurat sid dioti. Kenginan dau pemumui vagu dioti sid ralan om bahazan dot atag. Ong momoros iosido do iadino, ino dino okonko harati do posuri iosido di kokodoho di boros dau laid ko mokimahap di gama dau mamajal. Tu i pajal dau nga manamodi dioti, tu antad sid agazo o ginavo dau mongumbasih di piumpugan sid Korintus. Sid sokovia i gama di Paulus di iadino okonko mongusiba iosido dioti, gam iadko molohing dioti o gama dau mongira. I Paulus okonko bai guru di mamakai do sumbiling, tu mangalapos dit anak dit arampus ko obungou om akangin. I kodori diri, kogumuai dit onogoguru dot anganak sid karajaan do Rom, ulun Yunani di inuripon, topot nokosikul-no laid sid pomogunan dau. Iti-no o sabap dot amu gunaon banal it onogoguru, minsanko avantang o gama di guru. Topot i kogumuai dit onogoguru diri, sumbiling o pangalapos dit anak sikul, ong mongira om posuhuton it anganak do sikul. Tanid banal ong i gama di Paulus sid dioti. Iadko it ama sid sinamadan it anak dau o gama di Paulus. kagi bana-banal ko i Paulus o minongimbulai di piumpugan dioti. Iosido o minaganak dioti. Minsanko sumaap ioti di Paulus, kakali agazo o gama di Paulus monginsasamod om monunda dioti. Iti-no o sabap do nikirim dau i Timotius do mad tanda di samod di Paulus sid dioti, ino samod di pemumui om monginsasamod dioti. Ino-no i kenginan di Paulus, sumusui ioti di kavazao dau. Ong i Timotius, tu alaid moruhang-koruhang di mozo-vozo iosido di Paulus, elaan banal dau manarang sid dioti di gama i Paulus dino. Ong varo dara hal dit a-nohorotizan i gama di Paulus diri, i Timotius ot elo manalahas om manarang sampai mangatag ombo i nogolivong. Tu ino-no i kavazao di Paulus, sumuhut iosido di Kristus. I harati, amu mogihim i Paulus di dau do panahon om rikoton ko vazaan di koposizan, inoi nga

sumusui iosido di Kristus sampai lumuu di Kristus sid gama om kavazao om kenginan. Suvai sid F. 12,31 om monuduk-ogi i Paulus dino vazaan om mad ralan di Kristus, tu ino-no i ralan di banalko atarang, ka.

d) 18-21 Pentahan i Paulus di tipagandaha iosido.

Toguvangan di Paulus i boros dit a-ko piro it ulun sid Korintus di retanko, Atalou iosido, amu katama magandaha vagu sid Korintus, ka. (iadko sid 2. Kor. 10-13) Na momopok i Paulus di koburuvako dit ongoulun di iadino sid vaza dau pentahan dot amu songkuro om moriat iosido magandaha sid dioti. Ino-no rontob, ino koriatan dino, Kinoringan o mangahatul, ka di Paulus. Sabap kodung rasul iosido, okonko iosido mangarancang di panahon, inoi nga agazad iosido di kovosihan om kenginan do Kinoringan. Iadko sid Galatia diri (UR 16), varo boros dot tiniag di Sundu i Paulus di kumaa dara sid Asia, ka. Ong korikot vagu sid Korintus, tumoguvang i Paulus dinot ongoulun di pakatalou dau, supaya atalahas dot ombo it otopot do banalko kikuasa om kihukum ioti i baiko moro-boros dit aso panangan momuruvak. Sid kovian mongoduat iosido dot ombo ot atag ong rumikot iosido sid Korintus, iadko i guru di kilalapos do kisumbiling, tu mangalapos dit arampus om oguvail it anganak antawa iadko it Ama dioti di nalabaai do samod om osuau o gama dau antad sid kovonuso do ginavo dau?

II. Mamajal i Paulus di karaatan sid tanga di piumpugan sid Korintus 5,1-6,20.

1. I sumbang dit oholian o gama sid Korintus 5,1-13

a) 1-5 I vaza mangatag di sumbang: Tumoguvang i Paulus dit a-ko piro o hal di norongou dau antad sid piumpugan sid Korintus. Manalahas iosido dot banalko varo't a-ko piro onogogama sid Korintus di palanta dot amu atag i kosumbungo do piumpugan, retanko nokotuluk om nakarangkap iosido di kosunduvo. Ong otopot, ka di Paulus, varo hal sid tanga dikou dit amu opibambaran sid ulun do labus. Ino-no, varo't ulun di minanansavo di savo dit ama dau. Aso boros sino do kuran, minatai it ama dau ko bai nakada it ondu dino. Kuran-kuran, isuhut do hoturan om undang-undang do Rom ko Yahudi (Imamat 18,7-8 om 20,11), a-kavasa do iadino. Na i Paulus bai manala di kusai, tu kaluto ong it ondu okonko nokokristian. Na minotos i piumpugan, mad linopot i hal dino. Aso boros om gama dioti moniag ko manarang dot a-kavasa do iadino sid piumpugan. (Ong sid Hoturan do PCS varo boros dot, kodung varo gama dit amu atag di mongorongoi di ngaran di piumpugan, i piumpugan manarang dot it ulun dino nokedu-no sid piumpugan sampai okonnoko Kristian-po iosido). Ong ioti sid Korintus, sid koburuvako i retanko, sokoviaai kavasa, varo kiroon dot it ongohoturan laid, nga natanus-no kavi sampai obebas-no it ulun sid nunu-nopo o gama om kenginan. Iti-no sabap do mamajal i Paulus di piumpugan sampai momoros dot atag ong mogkorudu-kou om mogihad-kou mantadko momuruvak om monginsavat-kou di kondiri dikou. Kagi okonko bai popuhondom i Paulus dioti ko it ulun dino, gam monuhu iosido do iadko hakim om pogom iosido dit umpug di piumpugan, supaya sid saralom di ngaran do Kinoringan mangaratu ioti di hukum do monunsub dit ulun dino sid piumpugan. Gam varo kiroon di Paulus dot sid saralom di hukum di piumpugan, kondiri di Sundu do Kinoringan sid tanga dioti do manantu om monuluk di hukum dino do monunsub om patahak di guvas dit ulun dino sid kuasa di vozoon do rogon. Mad varo kiroon di Paulus do sid kobuatano dit ulun dino anangan iosido do sakit sampai matai, topot kakali varo kiroon di Paulus dot i ginavo dit ulun dino osopulan, gima it ulun dino, hiza di nokokristian iosido, notorima-no iosido di Sundu do Kinoringan di minionobus di ginavo dit ulun dino. Ong ohukuman i guvas, mad osopulan i ginavo hiza di kopongohukuman penlaid di Tuhan. Ong iadino, i hukuman bahagi dit ulun dino okonko mominasa o tomodon, inoi nga manapul di ginavo dau, supaya kemumui vagu it ulun dino. Sid hal dino misingilo tokou dot i piumpugan om i rasul kihak mongohukum dit araat o gama, iadko i noboros sid Matius 16,18... om 18,18. Ino gama mongohukum dino kihak antad sid ngaran di Tuhan. Kagi humarap i Paulus dot i hukum di iadino sumondot sid ulun di kikaraatan om kikasalaan, iadko i hiza di Ananias om Sapira (UR 5,1-11). Sabap okonko bai i vozoon

do rogon kikuasa, inoi nga i ngaran di Yesus posuntu di kenginan do Kinoringan. Na i gama mongohukum okonko hal dit iso it ulun di iadko hakim sid tanga do piumpugan, inoi nga it ensanan i piumpugan o monodiri om mongohukum. Ong iadino o gama di piumpugan, kondiri di Sundu do Kinoringan posusi di piumpugan do iadko koponusian dit ipat-ipat it ulun Kristian di posuvang di sokoviai i koburuo dau sid hoturan om kuasa di Tuhan (1. Tes. 4,1-12).. (Ong sid Ongorongus diri do bai limo nopod toun katalib, varo hal sid iso kampong, ino-no, notizanan dit ama it anak dau. Na nigorot sid di M. do iosido o nokotizan dit ondu dino. Iri-ogi amu-no nonong it ama do hukum do bubu. Tu varo koubasan ong kodung iadino o sumbang, hukuman isuvang sid bubu pirusodon om iada-ogi sid rahat)

b) 6-8 A-milo-milo mokisusi i piumpugan. Nahatul-po it iso i hal dit orogot sid piumpugan, varo-no mongimuhun di rasul kananganko i kosusian, ino-no manarang i Paulus di hal dino sid suntuan do pangambang om i poginakanan do Paska. Kaluto ong ioti sid Korintus dumahava dara, retanko ino hal dino bai insan-no sid dioti, okonko hal do koubasan. Iti-no o sabap do manarang i Paulus do minsan iso-no o sala kakali monginsasakau sampai rumaliu sid ensanan i piumpugan iadko i pangambang di rumaliu sid ensanan i kakanan ko tapung (Gal. 5,9). Ong sid poginakanan do Paska varo hoturan dot sokoviai i pangambang laid di sid valai dot ulun, a-milo-milo iduon om padaon, supaya osusi it ensanan i valai om it ongopogozovan. I pangambang laid, ino-no i karaatan di pakaraat iadko povunos di piumpugan. Ong nedu-neno, osusi-no vagu i piumpugan. Kagi, i piumpugan nga osusi-no laid, gima i gama di Kristus posusi dioti sid saralom di kinapatazan om kinogulianan dau. I Kristus o kosusian om koposizan dioti dino. Sabap ino, atag dot i piumpugan sumusi, gima nensusi-no di Kristus. Iti-no o koposizan om kavazao di piumpugan, otulid om otopot i ginavo, okonko araat om kagavul sid kaagazan di nunu-nopo sambansa. Amu-po miuma ong kaharati di katapatan di Kristus, inoi nga suvai mongusaha di katapatan dino om miuma-ogi (Yahya 3,21)

c) 9-13 Manarang-po i Paulus i boros sid surat laid dau diri, it a-kaharati ioti kananganko i kolugagazan. Mad varo surat laid di Paulus di pentahan sid dioti dot amu atag ong gumavul sid kolugagazan. Na indoson ko tinomod dioti dot amu rumamit di boros dau diri, i retanko ino boros di Paulus dino aso kanangan. Boros dioti, siombo-nopo it ongoulun, sid kampong ko sid bandar, varo't ulun dit olugagai. Aso tinganan tumongkizad sid kobuatano di iadino di mad koubasan sid tanga do razat, ka dioti. Iti-no o sabap do manarang vagu i Paulus sampai manalahas dot, Banal-no aso tinganan do mopud dot osodiri antad sid razat dit amu sumuhut di hoturan do Kinoringan. I piumpugan dot ulun Kristian nakatanga sid razat om riniba vokon. A-milo-milo it ulun Kristian kigamaon om kitugas sid tanga do razat, midagang, gumaji om mangagaji, mangahatul di razat ko i nunu-nopo sanggamaon om tanggung jawab sid tanga do razat, tantu kopigavul sid tasantanid-tanid ot ulun di dau om dau do kavazao om bahazan om karaatan. Okonko ino kopezaan di suvab-suvab ot nitung om niboros di Paulus diri. Topot i boros diri dot, Kadan-kou-no gumavul om mizo sid ulun dot olugagai om it ongokobuatano vokon dit aso tantu-tantu, ino-no o harati, Ong varo't ulun i retanko Kristian iosido om obpinai sid piumpugan, topot i kobuatano dau nga iadno dino, ino-no ot amu atag do torimaon om toudon, gam atag do peduon it ulun di iadino sid piumpugan. Omungon-po di Paulus sid kobuatano dot kolugagazan i gama sumamba sid rogon om mangarampas om magavuk om i vokon. Sabap ino sokoviai i gama di iadino monginsasakau om povunos di piumpugan. Kananganko i gama mamung sid gama sumamba sid rogon, varo-po boros vagu di Paulus sid F. 8-10.

Manjadi atalahas sid boros di Paulus diri dot i piumpugan di bai nokosuvang om nokengkakat diri, kakali ogumu o pensubaan om okonpoko piumpugan do pillion ko alus sid ensanan o kobuatano om kavazao. Kakali it ongoulun atarik sid kavazao laid diri om nounangan di hoturan laid. Topot pohodtol i Paulus dot i piumpugan okonko hakim dit ongoulun vokon, i sid labus. I gama mongohukum dioti, nga kuasa om hak do Kinoringan. Ino-no i tugas do piumpugan, monodiri om mangaratu do hukum kananganko it ongoanggota do piumpugan di kakali gumavul sid karaatan, sampai peduon ioti dino.

Ong varo boros sid 6,2 dot it ongoulun dot osusi mamung sid kopongohukuman penlaid, ino boros di iadino, okonko i hiza do didino ot boroson, inoi nga i hiza do penlaid.

2. Kadan-no mihuhukum it ulun Kristian sid pihukuman do labus 6,1-11

a) 1-6 Amu apatut do mihuhukum it ongoulun Kristian. Toguvangon vagu di Paulus it iso o karaatan sid Korintus diri, ino-no varo't ulun Kristian di mioduw sampai miruput om mihuhukum sid makama dit okonko dang Kristian, i harati, mokihukum di hoturan do labus. Sid panarangan dino varo't a-ko piro o duaton di Paulus di mad pokolovong om mangagauk iosido di kobuatano dioti sid piumpugan di iadino o gama mokikovosihan dit ulun do labus. Sabap i gama di iadino mongusiba om pokihi di piumpugan sid tinoguvangon dit ulun do labus.

Pentahan i Paulus dot it ulun Kristian, hiza do kopongohukuman penlaid mad rumompok di Yesus Kristus mongohukum di riniba, i mizau om i minatai sampai it ongomalaikat. Ino-no i garal om pangkat dit ongoulun Kristian. Iti-no o sabap dot amu apatut dot it ulun Kristian biano mioduw om mihukum, lobipo ong sid tinoguvangon dot ulun labus. Ong otopot, amu apatut do varo pioduhan. Ong varo, tu kakali amu-po arangkap o kavazao, inot ongopodok it ongohal dino, a-milo-milo mihakatul om miupaakat sid tanga do piumpugan, okonko sid tinoguvangon dit ulun do labus ko i hakim di mamakai di hoturan do labus. Aso boros di Paulus kananganko i vaza dot ulun Kristian tumorima om mamakai di hoturan do porinta, inoi nga bai mogkovosihan di kobuatano dioti sid Korintus diri dot ino-no o tinomod dau manarang: I piumpugan dot ulun Kristian, nga riniba vagu, isuhut di hoturan om kenginan do Kinoringan, nga ajadi do piumpugan dot osusi om kopiobpinezan di iadko rantas pusod di Tuhan Yesus. Iti-no o sabap dot hoturan i piumpugan di kenginan di Kristus om i karajaan do Kinoringan. Sabap ino amu atag do varo-po pioduhan om karaatan om pisanaan om i nunu-nopo sangkaraatan sid pialatan dot ulun Kristian. Ong varo karaatan, i piumpugan pokisasalazan ombo it amu atag. Iti-no i tanggung jawab do piumpugan, sabap i piumpugan nohoturan di samod om kosusian do Kinoringan sampai amu-no osusa do mokihukum-po di hoturan do jasmani.

b) 7-11 Mongimuhun i Paulus dot, karaatan amu kopionong di karajaan do Kinoringan. Ong otopot, ka di Paulus, amu atag do varo pioduhan dit osusa salasazon ko hukumon. Ong varo, iadino tanda dot amu-po nopud i samod do Kinoringan. Manjadi polombus i Paulus di kovosihan laid di Yesus sid Mat. 5,39 dot osuhul-po dot anangan om kotorimaon do karaatan antad sid ulun vokon mantadko monimbaru do karaatan ponong sid ulun vokon. Tu ino-no it amu atag sid Korintus diri, banal oholian i gama monongkudau it ongoulun om pokobanal di kondiri mantadko sumuhut di Sundu do samod. Miobpinai ioti, nga miraraati, minsanko sampi nokezo-no sid Kinoringan. Ino-no i puun do karaatan. I rikoton om panangan di piumpugan, ino-no i karajaan om hoturan do Kinoringan. Na it ulun di kakali sumokot sid karaatan om monimbaru di gama dit aso tantu-tantu, kalabus-no sid hoturan di karajaan sampai amu-no kotungkus di karajaan dino. I tudukan di Paulus sino iadko i tudukan di Yahya i minomodu diri sid belantara, ino-no kadan-no monimbaru di nunu-nopo sangkaraatan. Sabap i gamaon iadino o kiontok om i kosungguvo dino sid kovian (Mat. 25,34 ko Mat. 19,29). Ko sid Gal. 5,19-21 ginaranggai-no di Paulus it ongokaraatan sampai minomoros-no dot, ino dino kavi, tantu amu kotungkus di karajaan do Kinoringan, ka. Om manarang-po i Paulus dot sid tanga di piumpugan do Korintus, varo't a-ko piro ot ulun di gulu diri, nga ulun di iadino o kobuatano om karaato, iadko i tinarang laid sid 1,26.... Topot ong biano, nosusi-no i piumpugan om ipat-ipat it anggota dino, gima i gama di Kristus om i Sundu do Kinoringan: *nohugusan-kou-no, nosusi-kou-no, nembanaran-kou-no sid saralom di ngaran di Tuhan...* Amu engkod i rasul mongohodtol dot, Nosusi-kou-no, sabap ino, susi-kou-no sokovia i kavazao om kobuatano dikou. Jumadi-kou-no dot ombo i jinadi-kou di Kristus! Sabap varo gama do Kinoringan di iadino bahagi dit ulun Kristian, kogoos it ulun sumuhut di

kenginan do Kinoringan sampai manamod dit obpinai, minsanko it obpinai di kakali monimbaru do karaatan sampai pakaraat dit ulun. Sabap elaan dit ulun Kristian dot nosusi om nembanaran iosido dino.

3. I kaagazan om i kobebasan dot ulun Kristian 6,12-20

Toguvangon di Paulus i retan dioti dot, *Sokoviai kavasa*, ka. Varo't ulun sid Korintus diri do minomuruvak do kisundu ioti om tumalib ioti di rasul ko kokondiri ioti sid Kinoringan, ko, kikuasa ioti om hak antad sid kondiri di Tuhan Yesus, ka. Varo tudukan dioti di retanko aso rontob, ong kodung ulun Kristian. Kagi i hal do guvas amu korundun i ginavo om sundu dot ulun. Ong mizut i guvas, ino dino amu korungoi ko kensasakau di sundu om ginavo dot ulun, ka. It ulun di iadino okonko sundu o mangahatul, sabap iosido kondiri o o kinovidan di dau do hoturan om kenginan. Manjadi ino kobuatano di iadino toroon di Paulus. Mamanal i Paulus do kodung nokokristian-no, varo-no kobebasan. Ino-no rontob, nunu-ka o kogunaan di kobebasan dot ulun Kristian? Minsanko kavasa kavi, okonko harati do sokoviai kiguna. Ong engin mangakan do kavanit, kavasa-no ko kavasa, ino-no rontob, i kavanit kapatai dit ulun. Ong kobebasan o mangahatul, gima engin mangagama di nunu-nopo it adapat mangagama, tigogi, i kobebasan o monguripon dit ulun sid aso panangan om rikoton. Ino kobebasan tokou it antad sid nakamung tokou sid Tuhan Yesus sampai dang Tuhan tokou diti. Iti-no o sabap dot i kobebasan tokou, ino-no, i dang Tuhan tokou diti. Suvai nokosuvang tokou sid kuasa om tanggung jawab om hoturan om kenginan di Tuhan om obebas tokou-ogi. Varo pitonidan kananganko i kobebasan do tumiim i sokoviai di nunu-nopo om i sokoviai i nunu-nopo di monguripon dot ulun. Retan dioti ko ombo i kakanan di nokosuvang sid tizan, lumabus-no vagu sid totezon. Na amu monginsasakau di guvas. Iti-no o sabap ong miagai it ulun, ino dino nga bai vaza pouru di karalazan iadko i kakanan pouru dit ivou dot ulun. Na timpa di Paulus, amu nonong i gama do popiluu agai-agai om kakanan. Sabap i mangagai it ulun, mamakai iosido di dau do guvas om i guvas dit ulun vokon. Na i guvas dot ulun okonko kuhakop do ginavo, inoi nga i guvas om i pomuhobo do Kinoringan kopiamung do ginavo dot ulun dit ogulian vagu hiza di kogulianan dit ulun minatai. I guvas dot ulun, dang Tuhan, okonko dang dato kondiri. Sid piniizaan di Tuhan nakamung-no it ulun do guvas om ginavo. Minsanko bahagi di guvas varo bahanda dot ogulian i hiza do penlaid.

Ong iadino, agazo o pitonidan di monuvang do gituko om monamo dit izou sid sundal, tu kopiluzung ko kopiluzung i guvas sid sundal. Topot i guvas tokou, koburuo di Kristus, okonko bai mamung ko gumavul sid di Kristus. Varo boros di Paulus dot, ong kodung kogobu di sundal, iadko nokoluzungno sid sundal, isuhut di boros sid Kinotimpunaan 2,24 dot i kusai om it ondu di mizo, sampai jumadi do kopizaan dot guvas. Ino koluzung sid sundal mongusiba di Kristus. Ong it ulun Kristian, tantu nokezo sid Sundu do Kinoringan. Iti-no o sabap dot a-kezo do sundal i guvas dit ulun Kristian. Sabap i guvas tokou, dang karajaan do Kinoringan.

Insan-po pohodtol i Paulus sampai momihot di kogofoo do karaatan dino sampai poontupat dot, Tolikud-kou-no sid kaagazan. Ino-no, ong mangakan ko monginum dot oholian ko it amu apakai, bai sala ponong sid guvas om dato kondiri. Ong avuk-oku, ino dino, bai dohon do hal, ko om makan do kavanit, baiko ioku ot osusa. Topot ong otoliban, iri-no ko iri i guvas. Ong kumiagai, tantu i guvas kezo dit ulun vokon, ino-no i sundal sampai lumapas sid kezaan di Kristus. Sabap i guvas, ino-no intoronon ko valai di Sundu dot Osusi, gam, Kinoringan o manansanganu om mangahatul di guvas-ku diti. Iadko i piumpugan dot ulun Kristian, nga dang Kinoringan, ipat-ipat it ulun Kristian, nga pengkaa dino o ginavo om guvas, ensanan it ulun, nga nokosuvang sid kuasa om hoturan do Kinoringan. (2. Kor. 5,15 om Gal. 2,20) Ino boros di Paulus di iadino sinumaap di kohorotizan di filosofia do Yunani, retanko bai i hatod kiguna bahagi dit ugama, sabap i hatod dot ulun sumuvang sid surga. Ong i guvas, nga masa sid lobong dot nunu-nopo i kobuatano do guvas, araat ko avantang, kisakit ko ohijau, iri-no ko iri dot aso guna ponong sid hiza do penlaid. Ino-no i boros di Paulus, ensanan it ulun, guvas om ginavo kiharati om kiguna ponong sid hoturan om karajaan do Kinoringan sampai kodung nokemumui it ulun sid di

Kristus, iri-ogi kamung iosido om kosuhut iosido di hoturan vagu dino, gima nokodulung -no iosido ponong sid karajaan do Kinoringan.

Sid kovian manarang i Paulus di hal dino sid vaza monobus dot uripon antad sid sanganu laid. Kodung notobus it uripon, nakavaliu it uripon sid kuasa do Kinoringan sampai i sokovia i gama om kobuatano, nga sumuhut om mongoguna di sanganu vagu. Ino-no o harati, i kobebasan tokou ulun Kristian dino di nakadapat tokou, gima nakavaliu tokou sid kuasa di Kristus, okonko kobebasan ponong sid karaatan om tumolong sid aso tantu-tantu, inoi nga kobebasan di nohoturan di gama om kavazao di Kristus, gima it ulun dino nokobebas di Kristus, nga nakaraving-no sid di Kristus. Ino kobebasan dino okonko kobebasan ponong sid karaatan om kasalaan om karanggalan, inoi nga kobebasan dit amu noboludan sid karaatan, inoi nga obebas ponong sid rikoton om kosungguvon. Na i kosungguvon tokou diti, ino-no mongohormat tokou do Kinoringan sid sokovia i kavazao om gama om bahazan.

BAHAGI KOTOLU: IT A-KO PIRO DUATON OM KOGOLIVONGO SID PIUMPUGAN SID KORINTUS 7,1-11,1

1. Musavo ko amu musavo it ulun 7,1-40

a) 7,1-7 I hal do misavo

Mangambat i Paulus dit a-ko piro duaton di piumpugan sid surat dioti diri. Keso i hal do musavo. Sabap sid piumpugan do Korintus varo kopigogutan dot ombo it atag om apatut. Amu enizo i kiroon dit ongoulun Kristian sid Korintus. Varo minongitung dot i hal musavo isuhut di hoturan laid dot i molohing o popusavo dit anganak. Varo-no ong miniada, tu a-kovoza i savo sumuhut di Kristus. Varo-no ong kiroon dot kodung nokokristian, aso hoturan sid Kristian bahagi di kopiizaan dot ondu om kusai. Varo-no ong, kodung nokosuhut di Kristus, amu atag do musavo-po, tu okonko ensanan i ginavo om gama ponong sid karajaan do Kinoringan dit koduruk om kembulai-ogi i hiza di kogulian i Yesus Kristus. I kiniro diri, oduruk om korikot it ontok do penlaid. Ong kisavo om kiongkob om anak, okonko ensanan it ulun kadapat sumodia om sumuhut di Kristus sid karajaan dau, tu ogumu o obingpipitan ko bimpipitan do jasmani.

Ong i duaton dioti diri, ino-no, okon-ka ko atag ong kodung Kristian, amu-no tagal om kisavo. Om i kisavo nga okonko amu-no miopud. Tanid mantadko it ongoulun di minongitung dot obebas it ulun Kristian do mamakai do sundal, gima bai hal do guvas ino, ka, minongitung i koduvo i rombongan dit atapat om okosog om tumahan dot, kodung nokokristian, osuhul ong amu-no rumompit-po do savo. Tu ino kopiluzungan sid savo o pensubaan do tumolikud sid Tuhan om monimbaru do sala. I duduvo rombongan dino, nga napalidi di filosofia do kelaan do Yunani: it iso rinumosi dot ensasakau i kobuatano do guvas om jasmani, i koduvo, minomuruvak do retanko sokovia kavasa sampai amu-no engat do varo pangarantaban. Sompi amu tinumorima di hoturan do musavo iadko hoturan di kinourugan ponong sid kosinangan do riniba om i vaza misasamod i duvo it ulun di minisavo mikokoruhang om mitutulung sampai pempatai. Ino-no it ambat di Paulus: Keso, Atag dot amu tumudu dot ondu i kusai. Mad varo pongitungan di Paulus dot lobipo avantang ong amu miluzung dit ondu om i kusai, dot i dau do kiroon, antad sid kusai-kagi o boroson. Sabap i hiza diri varo't undang-undang dot amu kopiompok i kuasa dot ondu om i kusai. Kananganko i kiroon dino, varo vokon o boros di Paulus di iadino di pensibak di kuasa om hak dit ongondu. Ino-no rontob, ong siti momoros i Paulus dot, lobipo avantang dot iseso it ulun dot amu manansavo mantadko musavo, gima i kosusaan di mogihim di kosukupan do kopoloson om i gama manaud dit ongkob. Ino boros di iadino antad sid kiniro dau dot osomok-no it adau di Tuhan. Sabap i hiza diri kakal-po initung di Paulus dot kakali iosido, korikot-no vagu i Tuhan Yesus. Koduvo, aso boros di Paulus do moniag manansavo. Ino-no o kiroon di Paulus, i hoturan do musavo kiguna, supaya aso kaagazan om kolugagazan (6,18). I harati, amu moniag i Paulus do manansavo om mokisavo ko monuhu dot ulun do musavo. Ong sid kobudayaan do Yunani diri, varo't ogumu o kobuatano dit ulun dot amu manansavo/mokisavo. Obebas ioti kumiagai om mamung

sid sundal, tu i kiniro di kobudayaan dino dot ino kavi bai hal do guvas di kuran-kuran masa, hiza do mogidu i "hatod" sid kuhakop do guvas om minsavat-no sid surga. Na i Paulus dumahava dino kiroon om kobuatano iadino, tu ong sid Kristian di mangasip sid Kinoringan, i minongurug di vinangun om riniba, elaani dot i guvas o nopud, tu antad sid pinuhobo do Kinoringan kiginavo it ensanan it ulun, guvas om ginavo, nokosuvang om nahatul di kovosihan om samod do Kinoringan. Kagi poontupat i Paulus dit ongoulun Kristian sid Korintus di retanko, suvai iseso it ulun om kogoos-ogi mangajaga di karalazan ponong sid ondu ko kusai. Tu, ka dau, i hoturan do musavo mongorinding dit ulun, supaya amu kosuvang iosido sid karaatan do humambil sid ulun vokon. Ino-no i kiroon di Paulus, i hoturan di musavo miabali di hoturan do varo porinta, miduvo-duvo i hoturan dino mangapad dit ulun, supaya amu rumanggal it ulun om monimbaru do karaatan. Aso boros di Paulus siti do nunu banal i kogunaan do kopisavaan dot ulun. Bai inot ongohal sid Korintus o hinukum di Paulus dino. Tu aso dinuat dioti sid Korintus om i nunu banal i tinomod do Kinoringan mangahatul di misavo.

Iri-ogi mangahatul i Paulus do kuran ot atag o kopudan di minisavo, ondu om kusai. Varo dati't ulun Kristian sid Korintus di kisavo, nga minoniag di savo dau do miolunung ko mizut, tu ino iadino amu kavasa ong kodungko ulun Kristian. Sabap ino i savo dit ulun di iadino banalko osusa, gima amu kopongodos di kenginan dau ponong sid savo dau. Ong kisavo, tantu it duvo it ulun dino kopisavo dot ensanan, guvas om ginavo kopezo do sompi mitorima di samod do savo, isuhut di hoturan do sompiriniba. Okonko i kusai o momorinta dit ondu ko it ondu o monguripon di kusai, inoi nga miduvo-duvo ioti mizo sid guvas om ginavo. Sabap, ong okonko iadino, tigogi i vozoon do rogon mamakai di sangkut dino iadko sungkoliu do pangaraat dit ulun. Ino-no rontob, i gama miluzung i minisavo antad sid upakatan sampai engat dioti i hiza do tumoguvang sid Kinoringan i sid pomintaan dua ko i kasambayanan.

Noboros-po kavi i iadino, pentahan-no i Paulus dot ino dino kavi okonko pinonuhuan, inoi nga baik cadangan dau om kovosihan dau. Tinarang di rasul dot iosido amu musavo sampai varo kiroon dau dot ong iadino, varo-po kavantango. Ino-no rontob, i dau do kavazao dino, mad tahak do Kinoringan ko karisma, tu tasantanid-tanid o vaza do Kinoringan manahak om mongopud dot ongoulun.

b) 8-11 It aso (-po) savo om i miada.

Bahagi dit ulun dit aso savo om it bituanon pogili i Paulus do kovosihan miabal di noboros laid sid ayat 1-2, ino-no, osuhul ong amu-no manansavo ko mokisavo ko mokitaud. Rontob-nobo, minsanko i iadino, nga kakali suvai do kopionong di kavazao om kenginan dot ulun. Elaan di Paulus dot ong bituanon dit noubas-no do kisavo, amu oruhai mongodos di kenginan dau. Iti-no o sabap do momoros om mancadang i Paulus dot it ulun di iadino osuhul-po mokisavo ko mokitaud mantadko kumanggau om kumahag ko gumilat.

Na varo-po boros di Paulus dot ino tudukan dino okonko bai dau do kovosihan om kenginan, inoi nga hoturan do Tuhan, ino-no, Kadan-no mitongkizad i minisavo. Mongohodtol i Paulus di boros laid di Yesus sid Mat. 5,32; Mark. 10,9...; Luk. 16,18. Tu nelaan-no di Paulus do minsanko varo-no hoturan di Yesus di iadino, kakali varo nokopiada. Iti-no o sabap do mancadang iosido dot ong iadino, osuhul ong muli-no vagu iosido sid savo laid dau, ong amu-no kogoos dot iseso it ulun dino. Do kuran-kuran, ino hoturan dino amu monodiri do kusai ko ondu, ka di Paulus.

c) 12-16 I kisavo dot okonko ulun Kristian.

I kinembulazan do piumpugan, varo't iso o kosusaan di banalko ahatul, ino-no, ong sinumuvang Kristian, bai it iso't ulun, topot ong i savo dau kakali ulun labus dit amu engin sumuhut di hoturan do Kristian. Na kuran-kuran, osusa i piumpugan do tumanid banal mantadko i hoturan om ugama laid sampai mongontupat di rontob ponong sid labus. Iti-no o sabap do varo duaton dioti dot, Kuran-no ong nokokristian-no it ulun, ondu ko kusai dot i savo dau, nga kakali sid ugama laid? Kavasa-ka ioti mirurut miopud ong iadino? Na aso't iso boros di Paulus monuhu dot ong iadino osuhul ong miada ko sukul-po

misavo-savo, atagal ong kopiizo-no, ka. Ino-no i kovosihan di Paulus, ong sukul it savo dit a-nokokristian nga bozoturur sampai mangakun, kakali avantang do miopud ioti minisavo. Aso gama di Paulus mongogorot ponong sid nunu-nopo. It nokokristian it ulun, nga atag do nokosodia iosido mongopud di vaza misavo, ong i savo dau dit amu-po nokokristian obebas do mogidu do mokiopud di savo ko amu-no. Tinantu di Paulus dot aso hoturan kananganko i hal dino ong antad sid Tuhan Yesus. Sabap i hiza di Yesus, aso-po hal nokembulai di iadino, tu sokovia i ongoulun diri, nga ulun kavi do Yahudi di nokosuhut di hoturan do Kinoringan. Sabap ino, sokovia i hoturan di Paulus dino, bai dau do jangkaan om vaza mogkovosihan dit ongoulun di iadino o kogolivangan. Na i tinomod dioti mongoduat, rinumosi ioti ong kakal-po misavo-savo di kakali labus, amu kadapat ioti do kosusian di Tuhan. Topot tanid i gama di Paulus mancadang om manarang, ino-no, gam it ulun Kristian posusi di savo om anganak dau dit amu-po nokokristian, gima mopud iosido antad sid kuasa di Sundu dot Osusi. Ino kuasa dino rumaliu sid savo di kakali sid labus, ka. I kovosihan do Kinoringan akansangko i kobuatano di savo dit amu mangasip sid Kinoringan. Tu ong okonko iadino, it anganak dioti, nga amu abarakatan di kovosihan di Tuhan. Mad nohorotizan laid dioti sid Korintus dot nosusi-no it anganak dit ulun Kristian om nakamung-no sid piumpugan, minsanko bai it iso't ulun do nokosuvang-no. Aso boros di Paulus do kuran o kolombus di kosusian sid ulun dit amu-po nakasip.

Ong mangada ko mokiada do savo it ulun dit amu-po mangasip, tantu it ulun Kristian amu nokotombil sid savo dau laid. Ino-no o sabap dot it ulun Kristian, kuran-kuran nokodulung-no iosido ponong sid kopioondusan om ponong-po sid savo dau dit amu ozi sumuhut di hoturan do Kristian. Tanid mantadko ino, ipetung-po di Paulus it ulun di mongitung dot, osuhul ong amu--no miada, tu alaid-no dati kadapat-no iosido pemumui di savo dau dit amu-po mangasip, it titongkizad. Ino-no ot orosizan i Paulus, okon-okonko it ulun di nokokristian-no o kadapat pemumui di savo dau ko kadapat mongogorot, inoi nga tigogi, gamko iosido kondiri tumagak vagu sid piumpugan, gima amu atahan i kosipan dau. Sabap i minisavo dino okonko hal do migorot ko monguasa di savo, inoi nga suvai antad sid ginavo do kopionong om kopisuhut. Suvai sompi ozi ioti do mirurut misavo om atag-ogi do minisavo ioti dino.

d) 17-24 I kongkod di nokodim it ulun Kristian sid Tuhan.

Varo opurimanan om ohorotizan di Paulus dot it ongoulun Kristian sid Korintus banalko oruhai o mongitung do monimban di hoturan do koposizan o tomodon, ong kodung i nokokristian-no. Tu nokemot-po ioti do kobebasan antad sid hoturan om ugama laid diri, mad pinsimbanan i sokovia i hoturan, iadko it ulun di kisavo do labus, varo-no mongitung do mad amu-no mongopud di savo daum suhulon-no dot iseso ko bituanon. Monundali ong i-po monumbozo dot ivou. Iti-no o kinabaran di Paulus dot ipat-ipat it ulun opudon-no i savo dau om i dau do hoturan om kavazao om kobuatano. Sabap ipat-ipat kavazao om kobuatano, nga antad kavi sid Kinoringan, i mangahatul di nasip di dau om dau do koposizon om koposizan. Ipat-ipat it ulun Yahudi, ka, iosido, ko Yunani, puhavang ko obebas ko uripon, ruruton-no i vangun dau it antad sid Kinoringan ko i dau om dau do situasi. Amu mangakun i Paulus do kodung kokristian-no it ulun, osimbanan-no i sokovia i kobuatano om kavazao sid tanga di razat om sid pomogunan dau. banal-no, it ulun Kristian om i piumpugan dot ulun Kristian amu sumuhut di hoturan do Yahudi ko labus. Topot i kodim do Kinoringan bai mananus di kuasa di karaatan om kasalaan, okonko potongkizad dit ulun sid tanga do razat.

Ozi i Paulus dot varo piniizaan dit ulun Kristian sid tanga do piumpugan. Topot kakali dot amu enirad o koumbalo dit ongoulun Kristian, tu kakali varo't uripon om varo't ulun di puhavang om mosikim. Iti-no o sabap do moniag i Paulus dit ulun Yahudi di nokokristian-no do monimban di nokosunat iosido. Varo-no laid ot ulun Yahudi di iadino mokisuri di sunat dau, gima ozi ioti dot i kobuatano dioti miabal dit ulun labus. Topot moniag i Paulus di iadino o gama, tu i nokodim it ulun dino posuhut sid Tuhan Yesus, nga okodim iosido dot ulun Yahudi iosido. Pengkaa dino moniag i Paulus dit ulun di kokristian antad sid labus do mokisunat-po, isuhut di gama monunat dit ulun di minamung sid ugama Yahudi antad sid labus. Ong sid Kinoringan, enizo it ulun di tasantanid-tanid ot inantadon om kavazao. Iti-no

o sabap dot atag dot ipat-ipat it ulun mintoron sid dau om dau do kobuatano do Yahudi, ka ko Yunani, uripon ko ulun dot obebas iosido. Gam varo boros di Paulus sid uripon dot, sisino-ko'id kouripanan-nu. Kada-no simbanai i koumbalo. Sabap i kobebasan antad sid kuasa do karaatan lobipo agazo o harati mantadko i bai obebas dot amu-kono ouripon. Tu kodung nokokristian-no it ulun, obebas-no iosido dot aralom o harati di kobebasan dino. Tu ino kobebasan dino nokokogos sid hoturan di Kristus (Fas. 5) sampai minsanko it obebas ot ulun, nga mad kakali nouripanan-no di hoturan vagu di Kristus. Iti-no o sabap do bai iso o hal dit agazo o harati, kadan-no mokiuripon dot ulun ko hoturan om kobudayaan dot ulun, gima notobus-no di Tuhan it ulun Kristian dot agazo o horogo. Gam toudon-no banal i kohormatan dikou di nokodim-kou di Tuhan.

e) 25-38 Kananganko it ongosumuni.

- 25-28 Mad varo duaton dioti kananganko it ongosumuni, it ongondou di miuma do mokisavo-no. Bahagi dioti, nga aso suhu ko kovosihan di Kristus. Baiko i Paulus o pogili di dau do kovosihan dot rasul iosido, ino-no, Sabap oduruk-no om korikot vagu i Yesus monuluk di karajaan do Kinoringan, osuhul ong amu-no mokisavo it sumuni. Banal-no, aso sala ong mokisavo, antawa ong i kisavo-no, nga atag-no. Topot ong kakali dot aso-po savo, osuhul ong amu-no mokisavo, tu i kiroon di Paulus, osomok-no i hiza do penlaid, a-milo-milo nga ogumu o kosusaan om kosompitan, iadko i noboros laid di Yesus sid Matius 24,19 om Luk. 23,29. Na lobipo osusa i hiza dino ong ondu di kianak dot opodok-po. Ozi i Paulus mangapad dit ongosumuni, supaya amu oholian kopogos dioti di hiza di rumikot-ogi. Na elaan tokou dot ino kiniro di Paulus diri dot osomok-no banal i hiza do penlaid, mad ogolivong i Paulus sampai kaharati tokou sid ongosurat vokon dot alaid-po nosimbanan-no di Paulus i harapan dau di iadino. Iti-no o sabap do sid cadangan di Paulus dino humarati tokou dot kuran i boros di Paulus nokosokot sid situasi diri om i kiroon dot ulun mongintutun di hiza om i kentalangan. Otudukan tokou siti dot atag ong monodiri tokou di tudukan di Paulus om i dang ongorasul vokon, supaya amu sumokot tokou sid toriso-iso i linsou do boros, inoi nga humarati tokou dit onsi di Habal do Kovosihan, okonko it ongohurup.

- 29-35 Insan-po dino pogili i Paulus di dau do kiroon, ong apajak mongitung i hiza di ponong sid kovian do vinangun (26). Nokensomok-no it adau di Tuhan (1. Tes. 5,6 om Rom 13,11). Iti-no o sabap dot iso-no o tugas dit ulun Kristian, ino-no, tumatap om sumodia sumamung di Tuhan. Mad momurimon i Paulus di korungazan di vinangun. Iti-no o sabap dot mamakai i piumpugan di kobebasan antad sid nunu-nopo songkobuatano do riniba di pasangkut dot ulun Kristian sumuhut di hoturan di karajaan do Kinoringan iadko i minisavo, i kohigakan om karamazan, i gama mansahari ko it ongokosusaan om kapagasan. Sabap ino kavi dino, tigogi tumanusi. Topot i harapan om rikoton dit ulun Kristian, ino-no i vangun vagu om i karajaan do Kinoringan. Iti-no o harapan om panangan om kosungguvo dit a-milod kiroon om itungon om onongon. Aso boros di Paulus do mogidu sid kobuatano di vinangun om riniba di didino, ino-no o rontob, engat dot ino sokovia i kavazao do riniba nga titanus, okonko panangan dit aso't tolibon. Manjadi ong iseso it ulun dot okonko kisavo om kiongkob, ensanan o ginavo dau kadapat mongitung om monong sid Tuhan om i korikatan dau vagu. Topot ong it ulun di kiongkob mad oboludan, tu osusa iosido mongitung dit ongohal do jasmani, kakanan om kopudan dit savo om anganak dau, mad nopiduvo i ginavo dau ponong sid Tuhan om i jasmani. Rontob-nopo, ino kovosihan di Paulus dino okonko monusa di ginavo dioti o tomodon, inoi nga mongonsug do monodiri, ombo it atag om ombo it agazo o guna om rikoton.

- 36-38 Na sid a-ko piro it ayat dino humarati it ongomomogun dot i hiza di Paulus, varo hoturan iadko sid Momogun, ino-no i molohing mongitung om mogkorelo sampai mangahatul di kopisavaan di sumuni dioti dino. Mad a-po kaharati i sumuni dot ombo it atag om isai o kenginan dau. Na mancadang om manahak i Paulus do kovosihan sid molohing di kianak do sumuni dot obebas ioti mongitung om

mangahatul, pusavaan ko amu i sumuni dioti dino. Ino dino, okonko hal dot adat ko hoturan dit a-milo-milo nga suhuton, inoi nga hal do kiroon om hal di katatap do kosipan om ginavo. Ino dino, nga antad sid pongitungan di Paulus dot osomok-no it adau di Tuhan, iadko i noboros laid sid savat. Insanpo dino ozi i Paulus mongorinding dit ongoulun, i sumuni om i molohing dau, supaya ahatul o gama dioti mangarancang di kopisavaan. Sabap insanpo dino mongohodtol i Paulus dot it ulun dit obebas banal minsamung di Tuhan dit iseso iosido sampai amu oboludan dot ongekob om savo, lobipo avantang o gama om vaza dau sumuhut di Tuhan sid karajaan dau.

- 39-40 Kananganko it ongobituanon, varo vagu boros om cadangan di Paulus, ino-no, Ong ondu di kisavo, ohoturon iosido dit ongekob dau sampai mad noboludan sid ongekob dino. Ong iadino, aso't elaan dit ondu mogidu sid kavazao di iadino, tu iti-no i nasip om koposizan dau. Ong nokobituanon-no, obebas-no it ondu mongitung om mangarancang di dau do koposizan dot mokitaud-po, ka iosido-no ko iseso-no,ka iosido ponong sid Tuhan. Noboros-no laid i iadino sid ayat 8-11, nga imbulit-po vagu di Paulus, supaya sumondot i boros dau sid ginavo dit ongobituanon. Ong mokitaud (ong sid Momogun) ko mokisavo vagu, isuhut di hoturan dit ongobansa vokon, ong mokisavo sukul ulun Kristian, okonko ulun do labus om atag-i, ka di Paulus. Tu kuran-kuran, suvai atag o gama ong sukul andaman i hoturan di Tuhan. Iti-no kagi i hal dit atag do kiroon ong it ulun Kristian, hiza do mogihim do sovoon, supaya i kopisavaan amu manarik dit ulun sid ugama vokon ko sid labus...

2. I vaza monimbang dot ombo it atag om amu: i kohorotizan om i samod 8,1-13

a) 1-3 I rontob di kohorotizan

Tumoguvang i Paulus di hal vokon, ino-no it onsi di dupot di nakasamba-no laid sid padaha dit ongopinokokinoringan do Yunani. Sid Korintus diri, i sokovia i it onsi dit ojuval sid pasal, nga nakasamba-no laid hiza di minangagarasi di dupot, sapi ko kambing om domba. Iti-no sabap dot it ulun di dumagang dot onsi sid pasal, amu kadapat momili dot onsi, tu enizo it onsi diri do nakasamba-no laid sid ongopinokokinoringan. Manjadi varo't ulun sid piumpugan di minomoros dot, ino hal dino, nga aso harati, tu aso kuasa dit ongopinokokinoringan bahagi dahai. Iokoi diti, sokovia nga kavasa, ka. Amu dumahava i Paulus di boros di iadino, ino-no o rontob, rumosi iosido dot ino keloo om kohorotizo dino mongimbulai do kosumbungan om harapan sid kondiri dau. Suvai onong ino, ong amu alazan i samod ponong sid ulun dit amu enizo i gama mangasip om humarati. Sabap varo't ulun vokon sid piumpugan di mad okugui o kosipan, amu mangakan dit onsi di iadino, tu, ka dioti, inot onsi dino nakakahit sid hal do rogon om it ugama do Yunani, ka. Manjadi ong it iso't obpinai sid piumpugan dinumagang sampai minangakan dit onsi dino, osusa-no i ginavo dit vokon, tu minongitung iosido dot it obpinai di iadino nakagavul sid hal do rogon. Antad di duvo o kohorotizan dino varo-no gagut sid piumpugan sid Korintus dit aso tinganan manalasai. Na i kovosihan di Paulus sid hal dino, suvai antad sid samod ponong sid Kinoringan om it obpinai o kiroon om atag-ogi i gama di suvab-suvab, minsanko sid hal dot onsi di nakasamba laid sid rogon.

b) 4-6 It puun di kohorotizan

Ino-no i kopigogutan dioti, ong mangakan dot onsi di nakasamba sid rogon. Tu kodung onsi dit ijuval-no sid pasal, dupot di nagaras-no sid panambayangan do pinokokinoringan do Yunani, iri-ogi inovit sid pasal, tu mongojuval sid isai-nopo i dumagang dot onsi. Ong iadino, it onsi dino nakasamba-no laid sid rogon om notudu-no di bobolizan do rogon. Sabap varo hoturan sid ulun do Yahudi dot nunu-nopo i nakavaza om nokensomok sid panambayangan do rogon a-kavasa mamakai. Na it ulun Kristian di gulu diri minamakai di hoturan dino, gam i sinoda dit ongorasul sid Yerusalim (UR 15) minongolumbatos dot it ulun Kristian antad sid labus a-milo-milo mongitung dot a-pakavasaan it onsi di nakasamba sid rogon (it a-kavasa tuduon ko akanon). Rontob-nopo, kurozon-no ong aso't iso o bansa dot onsi sid pasal dit a-nakasamba laid sid rogon om i sokovia i i kobudayaan om hoturan do razat kopigavul dit ugama do

labus? Kuran o kopudan dot ulun Kristian sid tanga do razat di iadino o kavazao? Kadapat-ka mopud antad sid bai totodukon om gandum ko parai? Tanid mantadko ino, nakaharati-no it ongoulun Kristian do kodung mangasip om humarap sid Kinoringan, aso-no harati om aso-no guna dit ongorogon om i sokvoai i gama sumamba sid dioti dino, tu ong otopot, aso rogon om aso pinokokinoringan. Tu ino kavi dino bai sorohon om kiroon do riniba. Na it a-ko piro it ulun sid Korintus minangavid di kohorotizan di iadino sampai minomoros, Sabap aso rogon om aso pinokokinoringan, iti-no o sabap dot aso pantang ong mangakan dit onsi antad sid pasal. Tu iso-no o Kinoringan, i minongurug di vinangun sampai it ongodupot. Iti-no o sabap do kavasa mangakan dit onsi dit ongodupot, tu iadino-no laid i nahatul do Kinoringan sid Buuk Kinotimpunan (9).

Sabap tu varo duvo o kopongohorotizan sid Korintus, osusa-no i Paulus mangambat om mogkovosihan. Mangakun i Paulus dot tantu aso rogon om pinokokinoringan sid vinangun, ka, iri-ogi mangakun i Paulus do varo rogon om tuhan om ongokuasa sid tanga do vinangun, Ino-no rontob, okonko kikuasa om kihak tantu inot ongorogon dino, sabap ong sid Kristian, bai i Kinoringan it iso-no o kiharati om kikuasa. Iosido o minongurug sampai minongimbulai di sokovia i vinangun om i Yesus Kristus i pakakas do Kinoringan mongurug. Manarang i Paulus do pibidaan do Kinoringan om it ongoharapan dit ugama do Yunani ko Rom, tu sid dioti dino varo kiroon do varo tuhan, ino-no i harapan dit ongobansa om varo i retanko do kinoringan dit ong otopot, sampai indoson om kolu-koluvon dot ulun. Sid ugama do Yunani varo songongkob o kinoringan di minisavo om i kianak di retanko mongohoturan di sokovia i vinangun, dot ikid o kuasa, varo dau do vatas om dau do panangan. Gam ikid bandar varo dau do harapan om kuasa di retanko kinoringan. Manjadi manarang i Paulus dot tanid iono tumpuk dit ongoharapan dit ugama Yunani om Rom, it ongoulun Kristian elaan dot iso-no o harapan, ino-no i Kinoringan, i minongurug di vinangun, ino-no i Yesus Kristus, gima boros do Kinoringan iosido, i varo-no laid di kinourugani diri.

c) 7-13 I kobebasan dot ulun Kristian mongontupat om mongoguna dit okugui i kosipan dit ulun vokon. Nakun-po di Paulus do tantu aso rogon ko kuasa sampai it kosipan sid Kinoringan pobeas dit ulun Kristian dot aso pantang mangakan dit onsi antad sid pasal, mongunopod-po i Paulus di kobebasan di iadino, tu varo-po't ulun Kristian di kakali rumosi do rogon om ongokuasa sampai amu katama ioti do milang sid onsi di iadino. Antad dino duvo o vaza mangasip varo duvo o rombongan sid Korintus, it iso ino-no i retan dot akansang om i koduvo i retan dot atalou ko okugui, it amu katama mangakan dit onsi dino. Sid F. 14 varo vagu gagut di iadino kananganko i kavasa monginum dot anggul ko amu. Banal-no, amu enizo i kohorotizan dot ulun di nokosuvang do Kristian.

It ulun di noubas-no laid sumamba sid rogon, topot nakamung sid piumpugan dot ulun Kristian, ong kodung nokemot dot onsi, tantu andaman-no i hiza di gulu diri di kakal-po sumamba ioti sid patung. Manjadi amu ozi ioti do minsomok vagu sid rogon, tu osompirang o ginavo, ong kemot vagu ioti di nakavaza sid panambayanan do rogon. Na i Paulus dino amu mamajal dit ulun di iadino o kiroon, gam doromoi i gama dau monuduk om mangagazad dioti dino sid kobebasan. Topot it ongoulun di retan dot akansang, minongogorot sampai minomuruvak, retan dot aso nunu-nunu dino't onsi dino. Sampai sid tinoguvangon dit ongoulun dit okugui do minilang ioti sid poginakanan dot ahatul di sid panambayanan do pembulai di kobebasan dau o tomodon. Retan dioti ko minsan sid panambayanan do rogon, kakali kamung ioti sid piniizaan do Kinoringan, ka. Na moniag i Paulus di koburuvako di iadino om pounkok di kobuatano dioti di iadino. Banal-no, i hal do mangakan ko it amu nga aso bida sid tinoguvangon do Kinoringan, ong it ulun Kristian. Ino-no i kiguna om it agazo o harati, it obpinai om i kopiobpinezan sid piumpugan, supaya amu kotongkihal it obpinai, ong sumasi iosido di kakansango dit obpinai dau di milang mangakan dit onsi dino sid panambayanan do rogon. Sabap tigogi dati, it ulun dit okugui o kosipan, nga mamung vagu milang makan sampai atarik vagu iosido sid ugama laid. I gama mangakan sid tinoguvangon dot ulun dit okugui okonko posurut di kosipan do piumpugan, inoi nga baiko vaza monuba om mamalid dit obpinai sid piumpugan. Iri-ogi sompi naratu-

no sid karaatan om kasalaan, it iso, i minamalid om i koduvo, i napalid. Manjadi ino-no i kovosihan di Paulus sid kovian, Osuhul ong pempatai amu-no tumudu vagu dit onsi, ong pinasadu sampai nakapangaratu dit obpinai, gima nokemot iosido di vaza-ku milang mangakan dit onsi do nisamba. Ong sid 14,15 okonko bai it onsi dit otopotko nakasamba sid rogon ot binoros di Paulus, inoi nga ensanan it onsi, tu minsanko amu-ku elaan dot sionngo antad it onsi, nakasamba ko amu hiza di kinagarasan i dupot, osuhul ong tumatap-oku dot amu-no mangakan ko tumudu dit ensanan it onsi dit ijuval-juval sid pasal. Ino-no i vaza mongontupat di hal dino, ino-no, i samod o mongorontob di kobebasan.

3. I suntuan di rasul Paulus 9,1-27

a) 1-3 I hormat di rasul. Mad tanid o tinomod dit a-ko piro it ayat dino, topot iri-no ko iri o hal do kobebasan. Sabap sid dau do kobuatano om kavazao o vinazaan di Paulus manarang di kobebasan dit ulun Kristian. Manarang i Paulus dot okonko rontob amu mangakan iosido dot onsi, gima it ongoulun Kristian dit okugui, inoi nga ogumu o kuasa om hak pemozon dau, gam tumahan dit ogumu o kosusaan om kosompitan, supaya posuntu iosido sid dioti di vaza om samod di Yesus. Iadino o gama di Paulus dumahava di gama dit a-ko piro it ulun di popusala dau i mangamu-amu do rasul i Paulus, tu amu atarang om amu kembulai i hak om kuasa do rasul iosido. Iti-no o sabap do manarang i Paulus sid dioti di dau do gamaon om ino gamaon dau dino nokopionong-no di suhu dot amu-no tumudu dit onsi di nakasamba-no. Pogili i Paulus di dau do gamaon do iadko suntuan bahagi dit ongopiumpugan. Ino-no i vaza dau manarang. Keso, i Paulus kondiri ulun dot obebas iadko it ulun sid Korintus di retanko ulun dot akansang. Iri-ogi rasul iosido, gima nokopikangkab di Tuhan Yesus sid Damshek, i minamangkat dau do rasul iosido ponong sid ongobansa. Kagi, i piumpugan dot ulun Kristian sid Korintus o tanda om sijil di Paulus do rasul iosido. Varo-ka piumpugan sid Korintus, ong okonko i Paulus o nokorikot om napahabal di Habal do Kovosihan? Gam mangagauk i Paulus dot, ong okonko rasul banal iosido iadko it ongovokon, kakali ong sid Korintus do iosido-no o rasul dioti. I Paulus o minongimbulai di kahabaran di Habal do Kovosihan sampai i kosipan dot ulun Kristian sid Korintus.

b) 4-27 I hak di rasul om i gama dau posimozo di hak om kuasa dau do rasul iosido.
- 4-7 i kuasa om hal di rasul. Mad tolu o hak di rasul, ino-no kihak iosido mokibalanja di piumpugan do kakanan om kenuman. Kihak mokibalanja o piumpugan, ong kovoza i savo do rasul, iadko it ongorasul vokon di nokovoza i savo om mokibalanja. Nokosuvang-kagi sid hak dino i kuasa om kobebasan do manansavo i rasul. Kihak iosido dot amu mansahari, tu mokipasi di piumpugan. Mongohondom i Paulus di koruhang dau i Barnabas di iadko iosido, tu kondiri dau mansahari do koposizon, supaya amu emvagatan i piumpugan dit ongoulun do mosikim do mamarai di balanja di rasul. Sid a-ko piro o jabatan manarang i Paulus dot iosido nga banalko kihak mokibalanja, topot pinosimozo dau i hak dino, tu monginggaan di piumpugan. Kasalaan-nopo, ong ioti sid Korintus, iti-no o pinavazaan mongimuai, retanko ino-no tanda dot okonko rasul banal i Paulus.

- 8-10 I Kitab manantu di hak di rasul. Ong varo boros sid Kitab (Ulangan 25,4) dot amu atag do manabaong di munung di sapi ko karabau di mangaladtak o parai ko gandum di mongulok, ka. Ino kovosihan dino nokonong-po bahagi di riniba. Ong atag o vaza manaud do dupot dit opogos mangagama kiharati-po ponong sid ulun dit opogos mongusaha di tugas dau. Pengkaa dino it ayat koduvo i kiboros dot, ombo o nagama, varo inula, i mangaradu ko i mongulok.

- 11-12 I kosondoto di sabap di hak dino. I Paulus minananom di Habal do Kovosihan sid dioti sid Korintus sampai nokembulai i kosipan om i kosunduvo do Kiningan sid dioti. Ong tumorima dara iosido sid dioti do balanja-po do kakanan, aso karaatan. Ino dino bai hal do guvas om gituko dau, i harati, hal dot opodok ot oulian dara. Varo't ulun vokon, ino rombongan om koruhang di Petrus dati di minokibalanja dioti sid Korintus. Ong apatut ioti minokibalanja, iokoi di Barnabas om Timotius, nga

lobipo mantadko ioti, ka di Paulus. Topot pinosimozo-za i hak dino, gam minanansahari-okoi kondiri (4,12; 1.Tes. 2,9; UR 18,3 om 20,333-34), supaya amu emvagatan it ulun kristian om amu atabanan i Habal do Kovosihan. Ong iadino, atalahas-no dot i Paulus amu mokiaakan sid Habal do kovosihan, gam iseso o ginavo dau magavi posurut di Habal do Kovosihan. Iso nga aso kadapat momoros dot i gama di Paulus mangahabal di kovosihan do Kinoringan baiko mansahari o tomodon. Sid 2. Kor. 11-12 manarang i Paulus di koozoo di gama dau momurimon do kapagasan om kosuasan om kosompitan, gima i mangahabal do Habal do Kovosihan o tomodon dau.

- 13-18 I sabap dot amu mamakai i Paulus di hak om kuasa dau do rasul iosido.

Insan-po dino manarang i Paulus di hak dau di kerad di hak dit imam dot i parsambaan sid panambayanan o kopudan om koposizon (Bilangan 18,31 om Ulangan 18,1...) Iti-no o sabap dot it ulun di mangahabal di Habal do Kovosihan apatut do mokibalanja sid Habal do Kovosihan. Iadino i hoturan di Yesus sid Mat. 10,10 om Luk. 10,7. Topot ong i Paulus, amu mamakai iosido di hak om kuasa dino. Amu mokibalanja i Paulus di piumpugan sid Korintus ko sid Efesus. Gam moniag iosido di kiroon dot ulun do kaluto ong biano mokibalanja i Paulus. Iri-no ko iri i pongitungan om gama di Paulus dot amu mokibalanja iosido do piumpugan. Gam ino katahanan dau dino minongitung i Paulus di hormat om bantug dau.

Kagi, i gamaon dau dino, tugas dit a-milo-milo nga gamaon, tu nagaratan iosido mangagama do iadino. I gorot do Kinoringan nakababo sid likud di rasul iadko it ongonabi diri, i Yeremia ko i Amos. Mongitung i Paulus di kondiri dau sid tinoguvangon do Kinoringan iadko uripon dit a-milo-milo mongusaha ombonopo i nosuhu iosido di sanganu dau. Iti-no i tanggung jawab dau di ponuhu iosido di Tuhan. Banal-no, varo-po nakamung sid tanggung jawab dino dit a-milo-milo usahaon, ino-no, amu mokibalanja iosido sid gama di iadino. Ozi dara i Paulus dot ioti sid Korintus mongoguna di gama dau di iadino, om i gama dioti mongoguna dara di bantuk di rasul.

- 19-23 I Paulus uripon di sokoviai. Ino-no i kobebasan dau.

Lumombus i Paulus manarang di hak om tugas dau do rasul iosido. Ensan i kobebasan pinakai di Paulus bahagi di kosurutan di Habal do Kovosihan om i kosurutan di piumpugan om gorija di Kristus. Ong sid Habal do Kovosihan ino-no it ulun dit obebas, i mokiuripon di sokoviai (2. Kor. 4,5; Mat. 20,26-28). Sabap i kobebasan di rasul aso pangarantaban, sinumakap iosido sumandad di sokoviai it ongoulun di tasantanid-tanid ot inantadon. Ino-no o panangan di mokiuripon iosido, posuhut di kogumuai dot ulun. Ong momoros i Paulus do iadino, lumbotoson dau mamajal di kavazao di kosumbungo om koburuvako dit ulun sid Korintus i retanko it ongokristian dot ongokakansang. Noboros laid di Yesus i iadino sid Markus 10,43... Antad sid kobebasan dino minsomok i Paulus sid ulun Yahudi om Yunani, it ulun di kipinuhuan do Kinoringan om i sid labus. Sid sokoviai i gama dau sumandad sid tasantanid-tanid ot ulun, nohoturanon iosido di pinonuhuan di Yesus, ino-no i pinonuhuan dot asamod, i monunda dot ulun, supaya sumuhut iosido di kenginan do Kinoringan. Ino boros di Paulus dino mad hoturan om panarangan di kavazao dit ulun di posurut di Habal do Kovosihan: i mangahabal di Habal do Kovosihan minsomok sid kobuatano dot ulun dit isai-nopo, supaya it ulun dino momurimon di samod do Kinoringan sid dau do situasi om dau do kavazao om humarati iosido di vaza do Kinoringan mongodim dit ipat-ipat it ulun sid siombo-nopo ot intoronon dau. Sid gama di iadino monuluk it rasul om mangahabal di dau do kosopulan.

- 24-27 I kopogovian ponong sid rikoton.

Sid suriban do tumangkus sid pandang, varo-po laid kiroon dot iso-no o kamanang. Iti-no o sabap do suvai magavi tumangkus ko suvai magavi posurut di Habal do Kovosihan. Iri-ogi pongohodtol i Paulus di hoturan di vaza gumavul sid gama milavan tumangkus ko mamabo di tugas do rasul om ponuhu di Tuhan it ulun. Kodung milavan tumangkus, suvaiko kogoos om tumahan di nunu-nopo o kapagasan

tumangkus, ino-no mongubas di guvas, amu makan om minum dot oholian do sampai avuk. Tu kodung miaanggan tumangkus, ogumu o hal dit osusa mongontupat. Topot i pokionuvan, baiko gindung o roun iadko antub-antub di lumondihu koduruk. Tu iadino i koubasan sid Olympia, i padang it osomok sid Korintus. Ino tongkuso sid vaza milumba kagi diri o puun dit Olympia biano. Topot i hiza diri aso-po't amas ko perak om saring o tanda di kamanangan, bai gindung o roun do kazu i tanda do nakamanang it ulun. Ong i pokionuvan dit ulun Kristian di pasasi di Habal do Kovosihan, tanid-no ot antub-antub, ino-no i kopoulosan penlaid, it amu lumondihu (2. Tim 4,8; 1. Petr. 5,4; Yakub 1,12; Kentalangan 2,10 om 3,11). Enizo magavi it ulun di miaanggan ko milavan, tumangkus ko monuntuk. Gam iadko it ulun di monuntuk moniim do konong sid saapon dau, o gama di Paulus momogos di dau do guvas, supaya ensanan i kosog do guvas sid iso o panangan, ino-no i kosopulan dit ongoulun om i kosopulan di kondiri. Sokovia i gama posurut di Habal do Kovosihan, supaya it ongoulun sumuhut di kenginan do Kinoringan. Topot aso guna, ong i kondiri dit ulun ot amu kogoos sumuhut di kenginan do Kinoringan (Mat. 23,4). Suvai kopionong i gama mangahabal om i kavazao sumuhut di Habal do Kovosihan, om atag-ogi. Na i Paulus posuntu dit atag o gama di iadino.

4. It onsi di nisamba sid rogon om i hoturan do piumpugan 10,1-11,1

a) 10,1-13 it araat o suntuan di bansa dot Israel.

Varo suntuan dot avantang o kavazao, ino-no i rasul Paulus kondiri sid F. 9, niamung-po di Paulus i suntuan ponong sid karaatan, dot enizo o tinomod, ino-no pemumui dioti om popuhondom sid dioti dit atag o gama om nunu o rontob di kobebasan dit ulun Kristian. Iadko i kolunduo do kosunduvo sid piumpugan do Korintus, varo-no laid tinuturan di kavazao di bansa dot Israel, di sid tanga do ralan antad sid Masir di muli sid pomogunan do Kana. Nitupak do Kinoringan ioti sid rahat do kitundusan om ginazad-no ioti di kavut om apui. Nuluhungan ioti hiza dot alasu ot adau. Mana o niponinumad do Kinoringan dioti om inimbulazan do vaig antad sid pampang di hiza sid tanga do belantara. Topot ginumuvail om rinumanggal ioti di kenginan do Kinoringan. I harati, minsanko notorima dot ogumu o kovosihan, kakali pinolangan ong kodung kipensubaan i hiza sid tanga ralan. Ong amu atatap it ulun kumaa ponong sid rikoton. It ongoulun dot Israel natarik sid karaatan do sumamba sid patung om rogon dit ongobansa om linumugagai-po ioti. Sabap ino nanangan ioti di hukum do Kinoringan di kakali sid tanga do ralan ioti. Kodung amu sumuhut di kenginan do Kinoringan, minsanko varo kosunduvo di nunu-nopo, nga ohukumani. Sabap ino it ulun Kristian suvai atatap ong sumuhut iosido dit ensanan i kenginan do Kinoringan i nokembulai sid hoturan di Kristus. Ong akansang om opihot i kosipan sampai mongitung dot aso-no harati dit ongorogon, sampai lumalam-no sid ongoulun di mamadsamba sid rogon, tigogi, nokotombil-no vagu sid rogon. It ulun di nakada i sala dau amu-no monimbaru ko minsomok-po vagu sid sala dino, tu ong minsomok, tigogi, kosulungan-no vagu (Yahya 8,11). I sokovia i kobuatano dot ulun Kristian tokou, it nopodsu-no, i kadapat tokou-no mamung sid poginakanan di Tuhan Yesus o kakali dot okonko kilaisen tokou monimbaru ko humambil sid karaatan. Aso tinganan momoros, retanko dot amu otoguan ko atahan sid pensubaan iadko i kabalan. Tu nunu-nopo i varo sid di tokou ulun Kristian, varo-no laid sid bansa dot Israel, tu i nitupak ioti sid rahat, iadko kinopomoduan, i noluhungan sid kavut, iadko noluhungan-no di Sundu do Kinoringan, i Mana om i vaig do pampang, iadko i poginakanan di Tuhan Yesus ko i nunu-nopo. Iti-no o sabap dot atag ong i piumpugan engat i suntuan dot araat sid ulun dot Israel. Kagi it ongokaranggalan di bansa dot Israel miabal-no di karanggalan sid Korintus. Ong amu mongontupat, kempus, tu hukum o kosungguvo dioti sid Korintus, kempus di bansa do Israel. Iso-po o harapan di Paulus, amu ozi i Kinoringan dot oholian i pensubaan, gam Kinoringan o mangapad om mongorinding, supaya amu sumuvang sid pensubaan, gam kaalai i pensubaan. Iti-no kagi o tinomod di tudukan di Paulus, ong sukul mongining-ogi ioti.

b) 14-22 I piniizaan sid Tuhan om i sid rogon.

Mongimbulit vagu i rasul di noboros laid sid F. 8 do kuran-nopo, nga atag ong tolikudon it ongosasambaon sid rogon. Humarap i Paulus sid kohorotizo om hukum dioti dino sampai pogili sid dioti di kosodirizan di harapan om kosipan. Varo duvo o piniizaan di sompiopud antad sid raha. It iso, i piniizaan dot ulun Kristian sid poginakanan di Tuhan Yesus, tu sid poginakanan dino, kondiri di Yesus manahak dit ulun Kristian di guvas om raha dau, om iri-ogi i piniizaan sid rogon, tu i raha di dupot di nagaras o manantu bahagi di gama mongoguna di rogon. Isai o mamung sid poginakanan di Tuhan Yesus milang om mizo-no sid di Kristus. Isai-nopo i milang sid onsi di nagaras-no do sid ongorogon o pinanangan, nokezo sid rogon. Ino kakanan di nabahagi-no sid poginakanan di Tuhan o tanda do nakamung sampai nokezo-no di Tuhan om i piniizaan dot ulun Kristian. Minsanko aso kuasa dit ongorogon, tu bai ginama ong i rogon sid kiroon om suromo do riniba, kakali i gama mamung sid pasambaan sid rogon o harati, tumolikud-no sid Tuhan om pokihi om pakaso do Kinoringan. Mamaraling i Paulus dioti dit ongakakansang do kaluto ong elo ioti mantadko i Tuhan kondiri sampai tumalib di Tuhan.

c) 10,23-11,1 I suhu do Paulus kananganko it onsi di nagaras-no do sid ongorogon o pinanangan. Pogili i Paulus sid dioti di tanggung jawab di dang ulun Kristian. Songkuro-nopo o keloo om pongohorotizan dot ulun Kristian, kakali atag ong mongitung om monunda iosido dit obpinai dau sid piumpugan, supaya amu kapamalid iosido di koruhang dau. Kagi atag dot mongohondom it ulun Kristian do kuran i poginakanan di dang rogon i kikuasa pogolivong om manarik di ginavo dot ulun dit amu-po atatap banal. Mongimbulit i Paulus di koburuvako di boros dioti kananganko i kobebasan, Sokoviai kavasa. Banal-neno, ka di Paulus. Rontob, okonko sokoviai kiguna, okonko sokoviai mongumbasih. Tanid i di Paulus do kovosihan, ino-no, suvai koumbosihan ot ihimon om kiguna-ogi i gama dot ulun Kristian. Ong baiko misingelo ko misimbebas di kondiri dau, tantu aso guna om aso panangan, gam korungoi di piniizaan do piumpugan. Iti-no o sabap do varo tolu o kovosihan di Paulus.

Keso, I gama manangkis dit ongorogon okonko harati, a-kavasa dumagang om mangakan do nunu-nopo songonsi dit ijuval sid pasal. Tu ong iadino, tantu amu kavasa kakan dot onsi. Amu monuhu i Paulus do iadino. Ino-no ot atag, amu monginsosok dit inantadon dit onsi di dagangon dau sid pasal. Tu ong iadino o gama, amu monusa it ulun di ginavo dau. Amu sumuhut i Paulus di kakansango dit ongoulun dit akansang om amu tumurut iosido di korosizan dit ongoulun dit atalou. Popuhondom i Paulus dioti dot i nunu-nopo sid vinangun, nga antad kavi sid Kinoringan, tu kosinangan do riniba. Iti-no o sabap dot aso't a-kavasa (Rom 13,14,20; 1. Tim. 4,4). Amu mangakun i Paulus di poniagan dit ulun Yahudi dit amu koho do dumagang dot onsi sid pasal.

Koduvo, ong ingutan it ulun Kristian sid valai dot ulun labus. Ong tumurut ko tuminong it ulun, atag do mangakani iosido dot ombo-nopo i nosodia-no dot aso vaza mogkoduat ko monginsosok do nunu i kakanan dino. Obebas it ulun Kristian do iadino. Rontob-nopo,

Kotolu, ong varo manarang dit inantadon do kakanan, ino-no, antad sid rogon ino, iri-ogi sumasi it ulun Kristian dot amu-no milang iosido sid onsi di iadino. Sabap iadino o kososizan dot amu gumavul iosido sid kapanambaan sid rogon, supaya atalahas sid tuan rumah om isai-nopo i nakamung sid poginakanan dino dot ong ulun Kristian amu milang di raha do rogon. Minsanko sid valai dot ulun dit okonko Kristian atag dot atarang o gama, supaya aso't iso kopolidan ko kopongoliman. Ino kososizan di iadino amu mongorongoi /mongohuzas / momudali di keloo dot nunu-nopo o kakanan di mangakan it ulun di minoronima kaseh-po laid iosido bahagi di kakanan dino, atag dara, nga kakali ino-no i kovosihan di Paulus: i sokoviai i gama tokou ko kakanan om inumon tokou suvai kiguna ong ino kavi ipongohormat do Kinoringan. I nunu-nopo o hal di pasadu ko pogolivong om mamalid dit obpinai sid piumpugan om it ulun vokon di nunu-nopo songbansa, ino-no atag do tolikudan om alazan. Kondiri di Paulus manahak do suntuan sid gama dau posurut di piumpugan om kosopulan di kinogumuai. Iti-no o sabap do mongonsug i Paulus dioti do sumusui di dau do kobuatano om kavazao. I kavazao om kosipan dot ulun Kristian ohoturan di kovosihan ponong sid ulun vokon o panangan.

Bahagi kapat

I Paulus manalasai di hoturan do piumpugan 11,2-14,40

1. It ongosulung dit ongondu 11,2-16

Toguvangon vagu di Paulus it iso o popigogutan sid Korintus, ino-no, varo ongondu sid piumpugan dit amu atag o kosulungan om bahazan. Atag dara i hoturan sid piumpugan, isuhut di nahatul laid di Rasul. Rontob-nopo, varo't a-ko piro't ongondu di tumohiang sid hoturan dino. Manjadi poguluvon di Paulus mangarazou ioti, gima i vaza dioti tumatap sid hoturan kananganko i bahazan om kavazao dot ulun Kristian sid tanga do razat. Iri-ogi mogkovosihan iosido, ombo it alanta sid Korintus, ino-no i kobuatano dinot ongondu dino.

Na amu oruhai tumorima tokou dino kovosihan di Paulus diri. Sabap atalahas-no dot ino kovosihan dau diri kopionong di kavazao om kobudayaan di dau do hiza om i sid pomogunan do Yunani. Ong imatan tokou it ongoulun Yahudi, amu kavasa i kusai do sumuvang sid panambayanan, ong aso sirung ko topi dau. Gam i jaga pintu manahak sid isai-nopo i kusai it aso sirung do topi, supaya konong i kosulungan dau. Antawa, sid Hari Enam a-koho ioti dot anaru it obuk dit ongondu ko kitinimbuku. Suvai ogoriting it obuk ko onibak om kavasa-ogi, ka. Varo vokon di momoros, ong amu notimbuku it obuk dot ondu, oruhai it ongorogon sumuvang sid obuk, ka. Manjadi banalko ogumu o vaza posondot di boros di Paulus diri, dot iseso o tinomod, monusa om mongusiba dit ongondu.

Ong tiiman tokou humarati i kovosihan di Paulus, pengkaa dino, I hiza diri varo hoturan dot it ongondu monongkuluvu, ong sid tinoguvangon dot ulun vokon. Na varo't ongondu sid Korintus di minomoros dot, Sokoviai kavasa. Iti-no o sabap dot amu osusa do sumuhut-po dit undang-undang do monongkuluvu, gam mongimpaparak minta dua it ongoondu sid rinuvang do panambayanan om monorou-po. Ino kobuatano dino niruput-no sid di Paulus. Iti-no o tinomod dau tumimpa mangahatul. Ino-no o kovosihan di Paulus, varo hoturan di kinourugan, keso, Kinoringan, iri-no Kristus om kusai om ondu-ogi. I pongitungan di Paulus, varo pitonidan dot ondu om kusai antad sid kenginan do Kinoringan. Minsanko varo't ondu di minta dua ko monorou sid tinoguvangon di piumpugan, kakali atag ong sumuhut it ondu di hoturan do kosulungan. Baiko it ondu dit ogilat om akanggau o mangaranggal di hoturan dino. Baiko it ongondu dit aso bahazan, iadko sundal i tumohiang di hoturan. Na ioti, gam buturon it obuk, tu tanda dioti di dau do kobuatano. Topot kenginan di Paulus, it ongondu sumuhut di hoturan di kobudayaan, tu ino hoturan dino inanu-no sid hoturan di kinourugan. Na ino kovosihan di Paulus dino kinumavid di tuturan di kinourugan di Kinotimpuunan 2 om amu engat i Kinotimpuunan 1. Sid F. 2 retanko bai i kusai o nokoluu di kobuatano do Kinoringan. Topot sid Kinotimp. 1 varo boros do kodung minongurug do riniba i Kinoringan, minongurug iosido dot ondu om kusai isuhut di dau do kobuatano dino, ka. Noboros-po di Paulus dot minsanko it ondu nga antadi sid kusai, ka, inompusan-no dau dot it ongokusai nakalandai antad sid ondu. Iti-no o sabap do sompi nokezo it ondu om kusai sid piniizaan do Kinoringan (12). Ino-no i kiroon di Paulus, sid ensanan i kinourugan, varo hoturan do varo kogulu om varo kotohudi, ko varo kikuasa di lobipo mantadko i vokon.

Ong otopot, tasantanid-tanid i vaza di Paulus mogkovosihan om manalahas do sabap di hal dino. Varo-no ong anaru it obuk dot ondu, tu ino konoruvo dot obuk dino o tanda di kohormatan dau. Na elaan-no sid Momogun dot i kodori diri, minsanko it anganak vagu, nga anaru ot obuk, do tanid i tinomod diri kopongonoruvan dot obuk diri, ino-no: tanda dot aso-po savo dau. Ong manansavo i sukod vagu do butul-no laid, hukumon-po laid do tavag om iri-ogi kosurut i hukum manansavo. Ong anaru it obuk, mokisalampad do sumuni i kenginan dara rumait. Ong sumamung i ginavo do sumuni, keso monumbozo, koduvo, gumompit-no banal sid likud om banalko otuud o gama maanalampad, tanda do varo kenginan dioti miginavo. Ko ong kodung kianak i kusai, buturon-no dau it obuk, tu tanda do kisanganu-no iosido om amu-no osongkutan dit obuk i tanggung jawab dau. Antad sid kobudayaan dino elaan om ohorotizan tokou dot ino kovosihan di Paulus okonko hoturan do Kinoringan, bai vaza di Paulus mangahatul di piumpugan sid Korintus. Ong onuvon tokou ino boros di Paulus do iadko boros

om suhu do Kinoringan, apalid om natagak tokou sid ongohal dit okonko kiguna om aso harati. Na mongimot tokou sid a-ko piro o rombongan do Kristian di banalko ahatul o gama sumuhut di hurup om boros di Paulus dino dot amu koho ioti do sumuvang sid gorija it ondu ong aso torindak dau, ong saputangan-po o varo omogot-no, tu sukul atakapan it ulu dot ondu. Antawa varo hoturan dot a-kavasa mononsigal ong sid panambayangan. Topot ong sid Momogun, suvai kisigal do tinohian ko tinogob dot amas om otimung-ogi banal i kosulungan do kusai, iadko i lintai om kot sid ulun ponong sid Barat. Kananganko i boros di Paulus do madsangu-po dit ongomalaikat dot agazon dati it ondu, ka, banalko hal do kogolivong. Songkuro-nopo it ongoelo moniim do mongintutun om mangaharati di boros dino, tantu aso kosondoto om aso kopupusan di gama monondot om mangaharati. Rontob it ongoulun sid Korintus o nakaharati dati di vaza di Paulus manarang... Varo dati kopianangan di boros di Paulus dino sid hiza do biano i gama dot ongoondu mononsulung. Baiko simpon dot opokong om sukul-po kitokop i susu do sumuni. Asarok ajadi it ongoama di nosuvangan do rogon ong emot it adan dau modop dot a-otoron it idi, rogolon it aanak. Antad dati siti i hoturan dot Ongosilam do monokop banal di guvas do sumuni om ensanan it ongondu, ong kodung lumabus sid valai dau.

2. I poginakanan di Tuhan Yesus 11,17-34

Mad amu enizo mangarazou i Paulus di piumpugan kananganko i hoturan di niopung di Paulus sid piumpugan sid Korintus, ino-no, amu atag o gama dioti mongoguna di poginakanan di Tuhan Yesus. Na i hiza diri varo koubasan do monikid ong miumpug sumambayang, pilombuson-po mongohormat i poginakanan di Tuhan Yesus. Na sid Korintus varo pioduhan, hiza do sumambayang misodiri it ongoulun sid a-ko piro o rombongan, isuhut di noboros laid di Paulus sid F. 1. Avantangan dara i Paulus ong osodiri ombo it ulun dit atatap om i kukumioduw, supaya atalahas dot ombo it atag om it amu. Sabap ong osodiri, atatap i gama sumuhut om mangasip. Rontob-nopo, ong sid Korintus, rinumaat banal i gama sumambayang om mongoguna di poginakanan di Tuhan Yesus. I vaza mongohormat di poginakanan di Tuhan Yesus diri pengkaa dino, Ipat-ipat it ulun Kristian do piumpugan mirurukut om miirung iadko i Momogun. Topot kakali dot ino poginakanan dino, dang Tuhan sampai it ulun di mamung sino, kelang-no sid meja di Tuhan, ka. Kasalaan ka-nopo ong sid Korintus, ipat-ipat it ulun di minongovit di dau do kakanan om mangakan di dau dot kokorui. Ong varo't ulun dit aso't kokorui, kakali ovitil sampai pempongo do gama sumambayang. Alaid-nopo, ombo it ulun dit amu osusa mansahari, osopung-po miumpug-no do monongkokorui-no laid dit akanon dau om kotimpuun-ogi makan sumambayang-no, tu amu-no monginud di kapampunan do piumpugan, dot iti nga retanko poginakanan di Tuhan Yesus, ka. It ulun dit asadapan kumaraja sid pangkalan, om iri-ogi mamung-no sid piumpugan sumambayang, kakali vitilon ong ioti. Aso kotibangan ong dioti do mongoi-po dot akanon. Ong kitopod ko kimumuk it ulun dit ovizau-no laid diri, ino-not ongotopod ot akanon dit ongomosikim, it opogos, tu nasadapan gumama dot asadapan, tu kakali ioti uripon dit ongoulun do lumundu. Ino gama sumambayang do iadino, amu avantangan i Paulus, gam mamajal iosido di gama di iadino. Humungot i Paulus sid ulun dit amu kadapat minud dit ongoobpinai, gam akanon koduruk i dau do kokorui, tu tiakan-no. Ong vitilon-kou, osuhul ong makan-kou laid sid valai do misingvizau banal om mumpug-ogi sid piumpugan. Sabap i dikou do gama mangasau di poginakanan di Tuhan Yesus. I dikou do gama mongusiba di kopiizaan dot ulun Kristian om i gorija di Kristus, gima suhulon dikou i kopiobpinezan dot ulun Kristian kabaranan om usibaon dikou ong it ulun do mosikim om it opogos mansahari. Ong ino iadino dino amu mongindazou i Paulus, gam pogili vagu sid dioti di hoturan do poginakanan di Tuhan Yesus.

Ino-no, kondiri di Tuhan Yesus minongimbulai di hoturan di poginakanan dau dino. Minongusul vagu i Paulus di kinembulazan di poginakanan dino. Minamakai i Paulus di tuturan di gorija diri di mad longoi om boros dot ohondom banal, koluu di nokosurat sid Lukas 22,14... om Mark. 14,22.. om Mat. 26,26.. Baiko varo-po nakamung di boros dot, *susuzai-no dikou iti do pangahandaman dikou dohon*. Atalahas dot ino hoturan dino okonko hoturan di Paulus, inoi nga inanu-no sid Tuhan Yesus.

Noboros-po dau i hoturan dino, mangalapik-no om manarang-po iosido di tinomod banal di poginakanan dino, ino-no, i poginakanan dino mad kokorui sid pialatan di kinapatazan di Yesus om i korikatan dau vagu om tanda do monginud di kotulukan di karajaan do Kinoringan, ino hiza do milang vagu di kakanan om anggul sid meja di Tuhan Yesus. Iti-no o sabap dot ino poginakanan dino engat i kovian do pomogunan om masi sid harapan ponong sid Tuhan, di rumikot vagu. Sid poginakanan dino a-milo-milo pazazad it ulun di Habal do Kovosihan om i kogunaan di kinapatazan di Tuhan Yesus. Nemot tokou-no do kuran di Paulus manarang om manantu di hoturan sumambayang diri di kolombus sid di tokou biano. Ino hoturan dino okonko hal dit aso tantu-tantu ko momozon dot ulun om bai monginakan o tomodon. Gam i poginakanan dino luhung di hiza do penlaid om i karajaan om hoturan do Kinoringan, ong sukul atag o gama mongohormat, sumuhut di hoturan do gorija. Ong amu ahatul o gama mongohormat di poginakanan dino, tantu sumuvang do sala it ulun dit amu monodiri ko mongoguna di meja di Tuhan ko i kopezaan sid guvas di Kristus. Okonko it akanon ot agazo o tinomod, inoi nga i piniizaan dot ulun Kristian di milang om mizo di Tuhan. Ino-no i sala, povizau di gituko dau dot amu ohondom ong i vitil dit obpinai dau. Ong kakali monongkudau it ulun Kristian, amu osodia iosido do pelang dit obpinai sid piumpugan. Topot i kogunaan om panangan di poginakanan di Tuhan, ino-no, kengkakatan di piniizaan vagu dit ulun di nokosuhut di Tuhan Yesus, i nilabus dau antad sid kuasa do karaatan om kasalaan om kosodirizan di dau om dau do ginavo om kenginan (Yeremia 31,34).

Posondot-po kagi i Paulus dino karaatan dino, tu sid piumpugan varo't a-ko piro o kosusaan, iadko varo't ulun di kioruol om okugui sampai varo minatai-no sid tanga do piumpugan, ulun dit amu ataud do piumpugan. Iri-ogi mongimbulit vagu i Paulus dit avantang o hoturan, ino-no, Atag do minud sampai nosodia i sokoviait it akanon om opompon it ongoulun do piumpugan. Isai-ka it vitilon, osuhul ong makan laid sid valai dau om mumpug-ogi. Suvai iadino om atag-ogi i gama mongoguna di poginakanan di Tuhan Yesus.

Mad varo-po hal vokon dit amu-po atag sid piumpugan, nga suvai toguvangon di Paulus ong kandaha vagu iosido sid Korintus.

Nunu banal o kogunaan om tinomod di poginakanan di Tuhan Yesus? Sid pongitungan di Paulus, ino-no o kogunaan om tinomod,

a) i pangahandaman di kinapatazan di Yesus. Niamung-po di Paulus i tuturan sid Markus om Matius dot, *susuzai-no dikou iti do pangahandaman dikou dohon*. Ong i Markus om Matius bai minongusul ombo o najadi di sodop diri. Topot ong i Paulus posondot-po di poginakanan diri bahagi di kogunaan do piumpugan dot ulun Kristian biano. Sabap i piumpugan di mongoguna di poginakanan di Tuhan Yesus kezo di Tuhan di nogulian om i nensavat-no sid Kinoringan. I Kristus diri nga kakali Tuhan di piumpugan do sampai sid tanga di piumpugan om i meja di potimpakan dit akanon, ino-no i meja di Kristus. Kagi i Tuhan dino sid tanga do piumpugan, i Tuhan i nisangkap om pinatai diri. I harati, i piumpugan mozo di Tuhan sid kazu do sangkap om sid lobong. Rontob-nopo, minsanko iadino o gama, kakali agazo o pitonidan sid poginakanan di baiko mongohondom dit ulang toun di kinapatazan antawa mongukas dit ama ko aki dot ulun. Sabap i poginakanan do iadino aso tantu kogunaan. Ong i poginakanan di Tuhan, varo-po harati vokon, ino-no

b) Kapangazazadan di Habal di kinapatazan di Tuhan (11,26) Okonko bai mongohondom di kinapatazan iadko kapatazan dot isai-nopo ot ulun, inoi nga ino kinapatazan di Tuhan o vaza popiandus om palabus om nokotobus di riniba, ino gama i retanko kobungoho ko kosoduvo ong it ulun dit amu mangasip, Yunani ko Yahudi. Sid poginakanan momurimon it ulun Kristian dot ino kinapatazan di Yesus diri o kiguna bahagi ipat-ipat it ulun Kristian om it ensanan i piumpugan (Rom 6,1-14). Sabap i kinapatazan di Tuhan diri o vaza di kuasa om keloo do Kinoringan bahagi di kosopulan di sokoviait it ulun di mangasip (1,18...) Okonko it akanon ot agazo o kogunaan, inoi nga i kapangazazadan di

kinapatazan di Tuhan ko poronuw di vaza di Tuhan. (Kokiraai ong kodori mongukas, ong biano mongohormat ko monimin. Mongukas ko monimin, isoi o harati sid Momogun monginsuhat di minatai om pengilo di varis ombo it a-ponokotorontog di hiza di kinalabangan. Topot ong i vaza milang sid poginakanan di Yesus, gam mongingvagu sampai pazazad di sabap di kinapatazan di Tuhan sampai poronuw tokou di Tuhan).

c) Sid poginakanan kopitaru i janji vagu (Yeremia 31). I Musa diri minonguza di raha do dupot, tanda di janji laid sid Kinoringan. Na kondiri di Yesus pouza di raha dau bahagi di janji vagu di mananus di sokoviai i karaatan om kasalaan om karanggalan do riniba. Manjadi it ulun di milang makan sid poginakanan di Tuhan momurimon di kosunuan di janji dino.

d) Iri-ogi i poginakanan nga kopiizaan sid di Tuhan Yesus Kristus. Minsanko i dila om i tatalanan momurimon om miim-tiim di kentaranan di Tuhan sid tanga di piumpugan. Aso boros di Paulus dot it akanon om it anggul sumiliu do raha ko onsi. I kopiizaan sid akanon dino bai hal do kosunduvo. Okonko i kakanan ko it inumon o kiguna iadko ubat do kaposizan, inoi nga bai i boros di nakavalang om i panarangan di kogunaan di poginakanan o pengilo om patatap di ginavo dot ulun Kristian.

e) Ino kopiizaan sid di Tuhan sid saralom di poginakanan mongimbulai-po di kopiizaan dit ensanan it ongoulun di mangasip. Sid poginakanan tumantu i piumpugan. I milang sid iso o kakanan pajadi dit iso o guvas di Kristus. Sabap ino amu atag do iseso it ulun mangakan i dau dot akanon, amu-no minud di koruhang. Monikid ong mongohormat di poginakanan di Tuhan i piumpugan posunu di piumpugan di guvas di Kristus.

f) Sid saralom di poginakanan di Tuhan ohondom di piumpugan i korikatan vagu di Tuhan. I poginakanan okonko rontob mongohondom di kinapatazan om manantu di kentaranan di Tuhan sid tanga do piumpugan di didino, inoi nga humarap-po di korikatan vagu di Tuhan om i kotulukan di karajaan do Kinoringan. Ong sid Lukas varo-po boros pentalang do varo hiza rumikot do miilang vagu i kinoruhangan sid meja di Tuhan ontok di karajaan do Kinoringan (Luk. 22,16-18). Iti-no o sabap dot i poginakanan dino iadko kokorui dit ulun pakaa ponong sid karajaan do Kinoringan.

Na hiza di Paulus i sid Korintus diri, kakali kopiamung i poginakanan banal om i poginakanan di Tuhan Yesus do miirung it ulun Kristian monginakan do sompi mongohondom di poginakanan di Tuhan Yesus. Alaid-po, osodiri-no dit ulun i gama monginakan sid dau om dau do valai ko i miirung i piumpugan sid poginakanan i retanko AGAPE = ino-no i poginakanan do misasamod, om i poginakanan di Tuhan Yesus. Dot i poginakanan di Tuhan Yesus bai mamakai-po dot okudik-kudik ot akanon om inumon iadko tanda do kopiizaan, okonko vaza povizau di vitilon om tuliou dot ulun Kristian. Ong sid Korintus kakali monginakan dot abarakatan-po laid it kakanan om abahagi-ogi, iri-ogi i tudukan om kapangazazadan di Habal do Kovosihan om it usul di poginakanan di Tuhan Yesus dit insan-ogi iadko i nokosurat sid ayat 23-25.

3. I patahak do Sundu 12,1-14,40.

a) 12,1-3 I tanda di Sundu do Kinoringan.

Iti diti timpa vagu di Paulus kananganko i duaton om kogolivongo di piumpugan sid Korintus, iadko nokembulai-no sid surat dioti diri. Mad varo kosunduvo di banalko nogunaan dioti om ino dino kagi o kopigavul sid kosumbungo dioti diri. Sabap ino, poguluvon di Paulus manarang om manalahas it onsi om panangan do Sundu do Kinoringan om kuran kadapat monodiri di Sundu dot Osusi, ino-no, ombo o Sundu dot Osusi om okon. Sabap varo-po kosunduvo di bai dang rogon om ongokuasa di mongunang om mangasau. Minsanko it ongougama laid okuasa do hal di mad sundu ko rogon dit elo pentalang om monorou ko ansamung dot ulun dot aso't elaan do bobolizan do kumuro iosido ong rundukan, gima

agazad om osoruvangan iosido di kuasa dino. Boros di Paulus, suvai sid tudukan di Sundu ot otutunan dot ombo i sundu di dang Kinoringan om i vokon, nga okon. Popuhondom i Paulus dioti dot i hiza di gulu diri, ioti nga nosuvangan do rogon sampai varo nokopurimon dioti dit ongokuasa do iadino. Ong oluhungan di Sundu dot Osusi, sumasi it ulun dot isai i Yesus. Topot ong varo kolupu di Yesus, atalahas-no dot ino dino antad sid rogon do kotuvangan. Na i kososizan dot, I Yesus o Tuhan, ka, ino-no i kososizan om kosipan dot onibak banal, i nataud laid dit ongoulun Kristian di nokogulu nokokristian. Manjadi ino pongoretan do Tuhan mad garal om bantug, napakai laid i hiza diri bahagi di Kaisar om it ulion dit agazo o pomogunan, na pinakai-no vagu dit ulun Kristian bahagi di Yesus, tu it ongoulun Kristian sinumasi-no dot i Yesus o Tuhan di songriniba om songvinangun, okonko i Kaisar do Rom ko isai-nopo i vokon. Ong iadino, bai sid piumpugan dot ulun Kristian o kembulazan om kentaranan di Sundu dot Osusi.

b) 4-11 Minsanko tasantanid-tanid i patahak di Sundu, kakali bai it iso-no o Sundu i manahak do posundu, varo tolu o hal dit atag hondomon, ino-no, i kosunduvo di Sundu do Kinoringan, i nokotuntug-no sid ulun Kristian, varo tasantanid-tanid o kavazao om kobuatano. Topot iseso i Sundu ot inantadon. Kagi kondiri di Sundu o manahak, isuhut di kenginan do Kinoringan. Pengkaa dino, iadko i panahak di kosunduvo antad sid Sundu dot Osusi, natahakan di Yesus do tugas it ulun di nakaramit di kosunduvo om nokuasa do Kinoringan. I harati, kuran-kuran dit ulun Kristian noluhungan di Sundu om notugasan di Tuhan Yesus om nokuasa do Kinoringan, okonko mopud iosido antad sid dau do kakansangan ko kenginan om ginavo. I piumpugan dot ulun Kristian mopud om kumansang om engkansangan di Sundu do Kinoringan, i nagama di Kristus. Iti-no o sabap, i sokovia i kosunduvo, nga okonko gama di dang riniba, inoi nga dang Tuhan, i mamakai dit ulun Kristian iadko pakakas om palad ko kabang dau ponong sid kosurutan om kengkakatan do piumpugan om it ongoulun vokon dit okodim di Tuhan.

Iri-ogi manarang i Paulus dot ipat-ipat it ulun Kristian, varo tasantanid-tanid o panahak do kosunduvo, isuhut di dau do kavazao om kobuatano. Topot ipat-ipat i panahak do kosunduvo, nga iri-no ko iri, tu ponong sid kosurutan do piumpugan o panangan. I kihukum, ino-no i kosunduvo dot it ulun elo pavalang om manalahas di suromo do Kinoringan dot apatong o boros. It elo paharati, nga miabal dino, rontob-nopo okonko antad sid vaza mumbongut, inoi nga antad sid ginavo di osuau o gama manarang. Minsanko elo it ulun do iadino, amu misingsavat ko misingsumbung iosido, gima i keloo dau dino. I kikosipan, mad sodirizon di Paulus it ulun Kristian dit oubas mantadko it ulun Kristian dit atatap o kosipan om apatong o gama mongingkansang dit ongokoruhang, hiza dot opiduvo o ginavo dioti. I kikuasa do pengkod do sakit, nga kosunduvo iadko i gama di Yesus sid Mark. 9,23 om Matius 17,20. I kopongimbulai di kokuasaan, ino-no i kosunduvo, dot i Sundu mamakai dit ulun ponong sid ongosuromo do Kinoringan, it aso't engat di riniba. Ong iadino, kondiri di Sundu polombus di gama di Yesus diri, dot it ulun o pakakas di kosunduvo di Sundu. Pengkaa dino, otudukan it toriso-iso't ulun monodiri dit ongokosunduvo om i-po gama dit ongorogon mangasau dara ko mamalid dit toriso-iso't ulun Kristian. I-pot ulun dit elo kumiboros do Sundu, ong sid Korintus, inot ulun dino o mad nakalalui sid piumpugan. Topot ong sid di Paulus, okonko iadino o kosodirizan, inoi nga bai iso o kosunduvo sid pialatan dot ogumu i vokon o kosunduvo. Kiguna-kagi ino, ong varo-po vokon ot ulun dit atahakan dot elo pangaharati di boros do Sundu. Noboros-po kavi ino, insan-po dino pohodtol i Paulus dot ino dino kavi, antad kavi sid hoturan do Kinoringan ponong sid kenginan dau.

c) 12-26 I suriban do guvas manarang di kavazao do piumpugan di tasantanid-tanid o koburuo.

Sid suriban do guvas mongintalang i Paulus do kuran ino tasantanid-tanid o kosunduvo i kopudan do piumpugan. Pengkaa dino tarangan dau dot ino sokovia dino, nokoluzung sid kesaan do guvas. Iso nga aso koburuo do mopud antad sid kondiri dau ko kadapat mongontok dit ensanan i guvas dino. Tau-no

varo naku kiroon dara sid Korintus dot suvai kristian banal it ulun ong arangkap iosido ong varo kavi di sokovia i it ongosunduvo dino, naku? Iti-no o sabap do pohodtol i Paulus dot okonko enizo it ongosunduvo dit ulun Kristian om amu atag dot ipangagil i Sundu di varo sid dau. Enizo it ongoulun Kristian di nopodsu-no, nakamung-no sid piumpugan dot ulun Kristian. Sionggo-nopo ot inantadon dit ulun Kristian, amu-no nokiro it inantadon ko bantug om garal ko kosikimo laid diri. I kopomodsuan om i poginakanan di Tuhan Yesus ot agazo o harati om kosondoto di pezo dit ulun Kristian sid piumpugan om kezaan di Kristus. Amu mongimvogat i Paulus di harati di kakanan om inumon sid poginakanan di Tuhan Yesus.

Iri-ogi toguvangan di Paulus it ipat-ipat i kosunduvo: Amu apatut kumisodiri it iso o koburuo di koburuo sid ensanan o guvas, gima tanid i dau do tugas sid guvas mantadko i dang vokon. Pengkaa dino amu atag do mongiro i dau do koburuo do nokoronuw sampai iosido-no o kiguna banal. Nokosumbung dati inot ongoulun i retanko ioti-no o napampanan sampai pokihi-no ioti dit ongoulun Kristian koubasan. Ino-no i vaza di Paulus manarang, Sabap ogumu o panahak do kosunduvo dot ikid kosunduvo, iri-no ko iro o hak. Kondiri do Kinoringan o pinopioonong, supaya okonko oponongkogunaan it iso om ensozuvon i koduvo i koburuo. Gam hinatul-no do Kinoringan it ongoskoburuo, supaya ombo it okurang o kematan om harapan dot ulun, lobipo kiguna om kihormat sid guvas. Iadino o vaza di Sundu mangahatul, supaya aso kopiinsazu. Ong iseso o guvas i piumpugan om gorija, ino-no o harati, i piumpugan miizo sid kezaan dit arangkap sampai pempatai om pengrikot di karajaan do Kinoringan, do kondiri di Kinoringan o minangahatul di iadino sid dau do hoturan om panangan. Sokovia i kosumbungo ko koburuvako om misingsavat dino, tantu engkod-no, miabal dot varo kopurimanan do piumpugan dot okihizon iosido dit ensanan i riniba om i razat.

d) 27-31a I suriban manarang di kogunaan di kosunduvo

Biano mongimbulit-no i Paulus dot i piumpugan, ino-no i guvas di Kristus. Ipat-ipat it ulun Kristian, sambahagi sid guvas dino. Tanid o vaza di Paulus mangarait dit ongosunduvo om ongotugas dit ulun Kristian sid piumpugan, ino-no, Rasul, nabi, guru, kikuasa do sundu, kikuasa do pengkod do sakit dot ulun, i ponulung, i mangahatul om i kumiboros di kosunduvo. I vaza di Paulus manarang enumpak it ongotugas om ongobantug dino, banalko tanid mantadko i kiroon di kogumuai dot ulun Kristian sid Korintus om i tradisi do gorija antad di kodori. I rasul, nabi om guru okonko ulun di kumavid di hoturan do gorija iadko i bishop (i mangahatul). Sabap i rasul bai mangahabal di Habal do Kovosihan, gima sasi i rasul di kinogulianan di Yesus. I rasul miongimbulai di piumpugan, topot okon mangagazad di piumpugan di nokengkakat kondiri. Pengkaa dino i nabi, nakamung iosido sid piumpugan do pentahan dit ongobahanda om kososorou bahagi dioti. Topot okonko agazo o hak sid hoturan do piumpugan. I guru monuduk om manarang di boros do Kitab Laid om i Habal do Kovosihan, hiza do sumambayang om hiza vokon, supaya karamit kavi it ulun Kristian di kosipan dot ulun Kristian.

Tanid mantadko ino mongiro i Paulus di gama mangahatul di piumpugan, i tugas di ponulung om pandita om bishop do karisma om patahak do kosunduvo, om i gama monulung dit ongookugui om orukung ko kisakit. Suvai sid kovian om mangarait-ogi i Paulus di tahak (karisma) do kumiboros do Sundu. Poontupat i Paulus di piumpugan do mongoguna kavi dit ongosunduvo dot iso nga aso kihizon. Pengkaa dino varo boros dau mongonsug dit ulun Kristian, supaya osodia ioti om mindamo ioti dot i Kinoringan manahak om mongoluhung dit ulun Kristian di kosunduvo dau.

Nunu o harati ong gorija ko piumpugan sid tudukan di Paulus?

Aso kiroon di Paulus dot i piumpugan om gorija miabal do rombongan ko persekutuan di dang riniba. Sabap i sokovia i it ongorombongan om persekutuan di dang riniba mimbulai antad sid bai kenginan dot a-ko piro it ulun, isuhut di dioti do kenginan om kiroon om rancangan. Topot i Paulus o minananom om nipoturug di gorija di Kristus (3,10...) sampai magavi posurut di kezaan di piumpugan dino. Iti-no o sabap mongonsug om mongimuhun iosido di sokovia i it ulun Kristian di nakamung sid piumpugan. I

gorija, ino-no i piniizaan dit sokoviai it ongoulun di mangasip dit nokodim-no di Tuhan ponong sid karajaan dau. Ino piniizaan dino ginama om tinaud do Kinoringan. Ong onibak o vaza mangarait, varo boros di Paulus dot i piumpugan ko gorija do Kinoringan (1,2; 10,32; 2. Kor. 1,1; 1. Tes. 1,1 om 2. Tes. 1,1) ko, i piumpugan di Kinoringan it Ama, ka. I gorija, ino-no i tagad di Tuhan ko puvalazan do Kinoringan. I pongoretan gorija inanu-no sid Kitab Laid dot, EKKLESIA ko ong Ibrani KAHAL =bansa do Kinoringan ko piumpugan dot Israel. It ulun Kristian dit antad sid bansa Yahudi dati minamakai laid di pongoretan dino bahagi di piumpugan dot ulun Kristian. Ong iadino o ngaran di piumpugan, ino-no o pongohorotizan dit ulun Kristian, i gorija, ino-no i rombongan di dang Kinoringan, i nokodulung-no ponong sid karajaan do Kinoringan om tinungkusan di bansa dot ulun Israel. Sid boros Yunani, i EKKLESIA o harati, it umpug dit ensanan it ulun di warga negara di nokodim-no sid pongumpugan bahagi di gama mangahatul di razat. Ong sid Kristian o harati, nokodim-no antad sid pialatan do razat, niamung sid bansa do Kinoringan.

Vokon-no ong varo boros di Paulus dot i Piumpugan di Kristus ko gorija di Kristus (Rom 16, 16) ko i piumpugan di sid ngaran di Kristus (1. Tes. 1,1). Iti-no o sabap do sumasi i piumpugan dot i Yesus o Tuhan (di piumpugan), ko sid poginakanan, i Tuhan mongingut dit ulun Kristian do milang sid meja dau. I Kristus, ino-no it origi do gorija (3,11), ko i gorija, ino-no i guvas di Kristus. Ong iadino, i gorija o polombus di gama di Kristus sid tanga do razat. Okonko i gorija manansanganu di Kristus, inoi nga i Kristus mangahatul di gorija om manansanganu di gorija. I gorija mongontok di Kristus sid tanga do riniba, isuhut di gama di Kristus pamung dit ulun sid gorija dau sid kopomodsuan om pelang dioti sid poginakanan dau. Kagi i gorija o tanda di karajaan do Kinoringan di rumikot-ogi ontok di titanus-no i riniba om vinangun ponong sid kovian do pomogunan, tanda di hoturan om vinangun vagu ko tanda di kinourugan vagu (Efes. 2,15). Siombo-nopo o varo karait i kuasa om hoturan di Kristus do Tuhan iosido, sino-no o gorija. I Kristus, ino-no it ulu om ulion do gorija om ulu dit sokoviai it ongokuasa om ongohoturan (Kol. 2,10). Iti-no o sabap dot i gorija ko piumpugan, nga valai ko panambayanan do Kinoringan om inintoronon do Kinoringan. I Paulus amu-po monodiri piumpugan om gorija, iadko i gorija, ino-no ensanan it ongopiumpugan om i piumpugan, it umpug dit ulun Kristian sid iseso o tempat ko pomogunan.

Na i hiza di Paulus aso-po hoturan do gorija iadko bianco om aso-po't ongotugas iadko bianco, topot ahatul-no laid i piumpugan antad sid hoturan di Paulus. Ong sid di Paulus amu misaap i hoturan om i kosunduvo, sabap miduvo-duvo dino suvai kiguna ong mopud ponong sid kosurutan do piumpugan. Amu ozi i Paulus do varo mangahatul di mangaladtak dit razat ko it ulun biasa, inoi nga suvai varo kopiobpinezan di sokoviai it ulun sid saralom do mitotorundakai om mitutulung (Gal. 6,2) om misasamod-samod. Okonko i hoturan mangahatul, inoi nga i samod om i kopioondusan o mangahatul di piumpugan, sabap i gorija om piumpugan mopud sid saralom di kuasa do Sundu suvai atag, ong ahatul kavi i gama mitatabang om mipapasi-pasi.

e) 12,31b- 13,13 I samod, ino-no i tahak rumbul satu di Sundu

- 13,1-3 ong aso samod, aso guna.

Indoson dioti sid Korintus ong i keloo kumiboros do Sundu, ino-no o kiontok sid kobuatano do Kristian. Na mongonsug i Paulus mogihim di kalabao do rumbul satu di kosunduvo, ino-no i samod. Kananganko i kumiboros do Sundu, sid F. 14 varo-po panarangan. Topot sid f. 12 noboros-no laid dot okonko iadko agazo o kogunaan dino gama di iadino. I samod do Kinoringan tumalib di sokoviai i vokon, gam ong aso samod, i nunu-nopo o kosunduvo, mad aso guna om aso panangan. Baiko i samod monuluk di sokoviai it ongopatahak (karisma) vokon. Na i samod okonko bai kavantango do kavazao do riniba, gam i samod, ino-no antad sid Kinoringan, isuhut di panahak di Sundu do Kinoringan (Rom 5,5; 15, 30; Gal. 5,22). Ino samod mad ponukat di sokoviai i kavazao om kobuatano dot ulun Kristian di noluhungan di Sundu dot Osusi. Ong salazon di Paulus i kobuatano dot ulun Kristian, sid kumiboros do Sundu tumimpuun i Paulus sampai mongohodtol, Ong aso samod ino gama kumiboros do Sundu, tantu aso

guna, ka. Baiko mongugangau ino. Okonko bai boros do riniba, minsanko malaikat om osundu, kakali dot aso guna, ka.

Garanggazon di Paulus pogili it aso guna, ino-no i gama di nabi, i gama mongintutun di suromo do Kinoringan, i kosipan di monimban dot ongoburul, ong okurangan o samod. Minsanko i magavi posurut di Habal do Kovosihan, hiza dot osunsungan o barat sampai anangan do kapatazan, gima ogusa di sangod di Kristus (iadko sid Rom diri hiza di Kaisar Nero) ko mongojuval di tana om valai dau bahagi dit ulun mosikim ko vokon, ong aso samod, kakali porosuma i gama di iadino, ka. I sokoviai i gama bahagi di kosurutan do piumpugan, suvai atag om opud ong agama sid saralom di samod. Iti-no o sabap dot i samod o ponukat om puun di sokoviai i kosunduvo di kiguna.

- 4-7 i vaza do samod:

I samod sumaap di nunu-nopo o gama monongkudau om pokoiosido om sumumbung ko momuruvak ko mokieelo om i nunu-nopo songkaraatan ko kenginan dit ulun kondiri. Sid panarangan di samod dino, ogumu o hal suvai dot atarang ong sid omuon o boros: amu mongivogu..., topot ozi di kabanaran, tumatap, mangasip, humarap lumanut di sokoviai. Ong iadino, atalahas-no dot ino dino okonko bai samod iadko koubasan do dang riniba. Sabap ong i samod di koubasan dot ulun, varo rontob om varo humalib, gam vokon-no i samod ong sumiliu do hungot om sana. Ong atahakan di sundu do Sundu do Kinoringan, kogoos do tumahan kavi om amu engat i kopupusan ko rontob di gama manamod.

- 8-13 I samod dit aso kengkadan.

Popibandung di Paulus di samod di sokoviai it ongopannahak (Karisma) do Sundu vokon. Songkuro-nopo i varo antad sid kuasa do Sundu, i gama di nabi, i kumiboros do Sundu, i keloo om i kihukum om i iadino, tantu varo kovian om koingkadan hiza do tumanus i riniba biano. Mad pongodumparan ino kavi ponong sid kotulukan di karajaan om hoturan do Kinoringan. Ong sid vangun vagu amu osusa do varo-po hal di iadino, tu kopitoguvang do Kinoringan om kopiharati sokoviai, gima alanta kavi it ongosuromo do Kinoringan. Poperadon di Paulus i hiza do didino om i hiza do penlaid miabal di pitonidan dot anak-po om osukod. Kodung osukod, otoliban i vaza mongitung om mongiro do iadko anak. Ong osukod-no it ulun Kristian, hiza di kotulukan do vangun vagu, kotutun kavi it ulun Kristian. Varo-no vagu ponuribanan di Paulus, ino-no i soromin. Dot it ongosorimin hiza di Paulus okonko iadko it ongosoromin biano. Amu-po elaan dit ulun i hiza diri mangagama do soromin antad sid galas. I soromin bai basi dit oludou banal mital. Ngaran-no emot it ondig-ondig dot ulun om it ondig-ondig di vuos dau. Iadino ot otutunan om ohorotizan i katatapo do Kinoringan (2. Kor. 5,7; 1. Yahya 3,2) Ong otuluk-no, kopitoguvang om kopitutum-no banal do Kinoringan, iadko i Kinoringan di kentutun-no laid di tokou biano. Baiko i samod om i kosipan om i harapan, ino-no o monungkus mongopud om mangahatul dit ulun Kristian dot aso-no koovian. Banal-no, varo pitonidan do samod om i kosipan om i harapan, sabap i kosipan om i harapan, ino-no o vaza laid dot ulun Kristian mopud om sumuhut di Tuhan (Rom 8,21-25). Iti-no o sabap do pentahan i Paulus dot i rumbul satu banal o vaza mopud sid tinoguvangan do Kinoringan, ino-no i samod.

samod, manamod, misasamod, it inantadon di pongoretan dino, ino-no i gama dit idi monorundakai om mamasi di ragang-po it anak dit amu-po milo do mongugad do togonok sid vuos dau. Iti-no o sabap dot it idi mongontupat, supaya minsanko togonok nga amu monusa dit anak. Ino gama dit idi do iadino antad sid kogozoo di ginavo dau posinang om mongopud dit anak dau. (Pongoretan di vaza do molohing sid anak dau sid tangon: *Amu asakatan do togonok*). Amu aharagaan i gama manamod, inoi nga antad sid koginavaan om ensanan o kavazao o gama ponong sid ulun vokon om ponong sid Kinoringan, tu Kinoringan-no laid o suntuan di gama manamod sid saralom di gama di Yesus. Ong manamod okonko bai engin om miingin ko tumanggaii. Yahya 3,16 I Kinoringan banal-noko minanamod do riniba sampai nitahak it anak dau it iso-no. Iti-no o sabap, i Kinoringan ot ovud do samod.

Ong sid di Paulus, varo tolu o sunduk di samod, ino-no,
- i samod do Kinoringan manapul om mamasi di riniba (Rom 5,5.8; 8,37...; dot i Kristus o minongusaha di samod dino (Rom 8,35; 2. Kor. 5,14; Gal. 2,20)
- i samod dot ulun sid Kinoringan ko sid di Kristus (1. Kor. 16,22 om Efes. 6,24) om iri-ogi
- i samod sid ulun vokon om sid ongobpinai (Rom 12,9. 14. 20; 13,8..; 14,15; Gal. 5,6; Fil. 2,1-2; 1. Tes. 1,3)

f) 14,1-40 I kumiboros do Sundu om i monorou i nabi

- 1-6 Lobipo kiguna i monorou ko kumiboros do Sundu
Insanpo dino manarang i Paulus dot ombo i lobipo kiguna mantadko i kumiboros do Sundu, do nembulit-no laid i keso o kosungguvon, ino-no sumusui di samod. Bianco atalahas-no do nunu banal i hal do kumiboros do Sundu. Amu kaharati i piumpugan di boros do Sundu (14 om 16). Ino kobuatano dino miabal di rundukan i bobolizan. Mad avuk it ulun di kumiboros do Sundu dot amu avalang i boros dau. It ulun di iadino varo kopurimanan dau do nokensomok-no iosido sid Kinoringan om kumiboros-no do Kinoringan. Topot it ulun vokon amu kaharati di dolou dit amu avalang. Iti-no o sabap dot ino boros di iadino aso't ontok sid piumpugan. Topot i boros di nabi di monorou om pentahan di kovosihan do Kinoringan sid piumpugan sampai monginsasamod di piumpugan antad sid tudukan di Tuhan, ino-no kiguna sampai posurut di piumpugan (24-25). Kondiri di Tuhan minomili dit ongorasul om momili om mongodim vagu dot ulun di mangagazad om monunda om mogkovosihan di piumpugan, supaya atarang o gama di piumpugan sumasi di Tuhan sid tanga do razat om lumombus sumuhut di hoturan di Tuhan sid tanga do pensubaan om kosusaan.

Amu mangaraat i Paulus di gama kumiboros do Sundu, gam iosido kondiri nga nokelo di boros di iadino. Ino-no o rontob, aso guna ong aso't ulun kadapat posondot om mangaharati di boros dino. Mangalu-kalu iosido do kuran ong iosido kumiboros do Sundu sid tanga dioti. Ong iadino, bai gumolivong ioti di kobuatano di Paulus sampai kaharati dot nosoruvangan iosido do Sundu, nga kakali aso guna bahagi dioti ino kobuatano di Paulus. Suvai atarang o tudukan om keloo om ira antad sid Kinoringan om kosondot-ogi i kovosihan do Kinoringan sid piumpugan di mindamo ko mokigazad om kensasamadan.

- 7-11 Ongosuriban di kogunaan dit atarang o tudukan.

Ong i gama kumiboros do Sundu iadko uni dot ongounizon dit amu atarang o lagu ko i surumpit di monguni, it amu atalahas do nunu o habal. I kodori kodung monguni i surumpit do sojal, atarang sid sojal dot ombo o tinomod monguni, momosik do sasarap ko pongumpug makan ko pogusa do sangod ko pedu, gima notori-no i tentara. Ong aso tantu tantu dit uni dino, bai ogolivong i sojal om endorosi-nopo. Pengkaa dino ong varo't ulun di mamakai di boros do ulun antad sid sodu it amu kopiharati dit ongoulun, tantu aso guna dino. Na i gama kumiboros do Sundu, iadino o keningan om iadilo ot aso guna bahagi di piumpugan. Sabap it ulun di kumiboros do Sundu om i piumpugan miabal di duvo it ulun di mamakai do boros dit amu kaharati i koruhang.

- 12-19 Ino-no o kosondoto di hal do kumiboros do Sundu.

Sid piumpugan sid Korintus banalko ogumu it ulun di kumiboros do Sundu diri, retanko ioti-no ot nokensomok sid Kinoringan sampai tumalib-po di rasul om it ulun vokon. Moniim i Paulus do mongonsi di kogunaan di kobuatano di iadino. Avantangan i Paulus do varo kosunduvo sid piumpugan om avantangan-no dau dot it ulun Kristian mogihim do kosurutan sid kosunduvo om it ongokarisma. Rontob-nopo, suvai kiguna ino bahagi di piumpugan om atag-ogi. Ong bai tipomurimon dino rundukan dot okikip i guvas, it ongoulun vokon bai mongo-vongo. Ong iosido kondiri, minsanko i ginavo dau om

it utok, nga amu elaan do nunu ino (2. Kor. 5,13). Omogot dara ong it ulun kadapat mangaharati di gama kumiboros do Sundu.

Ong otopot, tanid mantadko sid Korintus diri i rundukan di iadino, varo tasantanid-tanid o vaza dit a-ko piro o rombongan do Kristian di magavi posurut dit ongohal di iadino, vokon-no ong sampai mimburuvid sid palampag, vokon-no ong miandak-andak mari-lari om ogumu-po i vokon dot ensanan i piumpugan tari-tari ko gumulou dot okudik nga aso boros dit avalang om kopiharati. Bai kogangau dot ahatul ino dino. Ong ulun vokon bai pokulau di kobuatano di iadino. Ong ioti kondiri, varo kopurimanan do nokensomok-no sid surga. Ino kobuatao di iadino, varo-no laid sid ongougama vokon. Iadko sid Kaling, varo-no ong sampai kadapat monibas di guvas dau ko suluhon o dila om poriling ko longon dot amu momurimon do nunu songoruol. I harati, ino rundukan dino okonko otopotko hal do Sundu do Kinoringan. Ong i Sundu do Kinoringan ozi do pakansang di piumpugan. Ong varo do bai kogangau ot ening, nga retanko pomintaan dua ino, kuran-no di piumpugan mangamin, momihot di pomintaan dua dino, ong amu kaharati dot ombo it nokopinta dua-no?

Supaya isot ulun nga aso kadapat manala di Paulus, retanko i Paulus moniag di gama kumiboros do Sundu, mongoho iosido dot iosido lobipo nokelo kumiboros do Sundu. Rontob-nopo, suhulon dau momoros do limo-no linsou o boros dit atarang antad di ginavo om i kiroon dit utok dau mantadko sokuyan o boros do Sundu, ka dau.

- 20-25 Ong ulun labus mongining di duvo o vaza do karisma...

Ioti sid Korintus pinosimozo di ginavo om kohorotizan, retanko ong kumiboros do Sundu tumalib di keloo om kohorotizo, tu nokokondiri it ulun nokensomok-no sid Kinoringan, ka. Topot manarang i Paulus di gama di iadino iadko misinganak om minomoi ino dot amu kopionong dit ulun Kristian dit osukod-no. Sabap amu misaap i Sundu dot Osusi om i keloo om kohorotizo dot ulun. Gam i ginavo di nosusi-no (Rom 12,2) humarati di kenginan do Kinoringan om ombo it atag o gama sampai i karangkapo. Bai i keloo di dang riniba ot amu nokonong sid Sundu do Kinoringan. Mamakai i Paulus do boros di nabi Yesaya di manarang dot i Kinoringan mamakai di gama kumiboros do Sundu do pokodohon i ginavo dot ulun dit amu mangasip o tomodon. Topot okonko ino ot atag o gama sid tanga do piumpugan. Ong i pentahan di kenginan do Kinoringan om monuduk di kovosihan do Kinoringan, ino-no o mongimbulai do kosipan. Posuntu kagi i Paulus i kopurimanan om kohorotizan dot ulun dit insan-ogi mamung sid piumpugan dot ulun Kristian, it okudik nga aso't elaan-no laid kananganko i kosipan dot ulun Kristian. Ong it ulun di kumiboros do Sundu, pokoulahon dit ulun dino. Topot it ulun di monuduk di suromo do Kinoringan, mad otobokan i ginavo dau, tu kaharati. Gam oruhai mangasip iosido om sumuhut sid piumpugan. Iti-no o sabap do banalko agazo o pitonidan di duvo o vaza mamakai di kosunduvo.

- 26-33a Bahagi di gama mangahatul di piumpugan

Manarang-po i Paulus dit atag o gama sumambayang. Mad ogumu o vaza sumambayang sid Korintus diri, mindolongoi, monuduk, monuturan do pangalaman, kumiboros do Sundu, mangaharati di kumiboros do Sundu. Rumosi i Paulus dot ino sokovia i gama di iadino amu ahatul, gam mitotori ko misaap o gama. Avantangan i Paulus ong ipat-ipat it ulun Kristian sid piumpugan, varo dau do bahagi. Rontob-nopo, suvai ahatul o gama misusuhut-suhut om amu oholian kogumu. Ong kumiboros do Sundu, duvo ko tolu ot ulun miuna-no. Kagi suvai varo-po ulun dit elo manalin ko pangaharati di boros dino. Ong aso't ulun sid piumpugan dit elo mangaharati, amu atag ino sid tanga do piumpugan. Osuhul dot it ulun dino kumiboros do Sundu sid dau do valai dot iseso iosido. Pengkaa dino, suvai mivoli-voli monuduk sampai i piumpugan mongining om momorisa dot otopot i boros ko amu. Sabap kuran-kuran, i Sundu do Kinoringan ozi dot ahatul i gama sumambayang om monuturan om monuduk, ko mindolongoi om sumasi di dau om dau do pangalaman. Bai iadino om varo-ogi kosurutan di piumpugan.

- 33b-36 It ongondu sid piumpugan

Varo't ongoulun dit elo mongintutun di Kitab di momoros dot inot a-ko piro ayat dino okonko kovosihan di Paulus, inoi nga varo't ulun di minamung di boros dino sid surat di Paulus, hiza do manalin vagu di surat di Paulus. Sabap sid F. 11 mangakun i Paulus dot it ongondu momoros ko minta dua sid piumpugan. Ko sid Rom 16, gam varo ondu di minomungaran di Paulus do rasul om bishop. Na elaan tokou dot sid kobudayaan dit ongobansa, tasantanid-tanid o vaza mongoguna dit ongondu ko pokihi dit ongondu. Ong sid Momogun, gam i tugas do bobolizan, ino-no i tugas dit ongondu laid diri. Iti-no o sabap dot amu avagatan tokou dino kovosihan dit a-ko piro ot ayat dino.

- 37-40 Mongohongkos i Paulus di kovosihan dau bahagi dit ongokosunduvo ko Karisma.

Mongolumbatos i Paulus dot ino kovosihan dau dino antad kavi sid Tuhan. Okonko impro-piro minonodiri i Paulus di dau do kovosihan om i suhu om kenginan di Kristus. Ong sukul it ulun Kristian kaharati sampai mangasip om oluhungan di Sundu dot Osusi, tumorima iosido di boros di Paulus antad sid kovosihan do Kinoringan. Noboros-po i iadino, mongonsug-po i Paulus dioti do posurut di tudukan di Sundu om i gama kumiboros do Sundu, sukul ahatul i gama di iadino sampai kibahazan it ulun di iadino o gama.

Ong i Paulus manarang sid F. 11-14 dot i kosondoto di Sundu okonko bai vaza pengilo dot isai i Kinoringan ko i kuasa di pabahazan dot ulun ko mongimbulai di rundukan om kokikipo dot ulun. Ino-no i gama di Sundu mongoluhung om monguasa dot ulun, supaya it ulun mopud ponong sid karajaan do Kinoringan (Rom 8,23 om 2. Kor. 1,22) Tasantanid-tanid o vaza di Sundu mangagazad om mongoluhung dot ulun (12,28., 14,26). Varo kosunduvo do pengkod do sakit om varo porundukan. I Sundu paharati di ginavo dot ulun om varo-po kososorou om kopongintalangan dit okonko it utok o karamit. Ino kavi, antad kavi sid Sundu om Tuhan om Kinoringan. Topot kakali varo pibidaan, ino-no, ong monuduk ko monorou sid saralom di kuasa do Sundu, ino dino lobipo kiguna mantadko bai kumiboros do Sundu. Iri-ogi, suvai sid saralom di samod ot kembulazan om kiguna-ogi i kosunduvo. Moniag i Paulus dioti sid Korintus do humarap banal sid gama kumiboros do Sundu om i gama gumulou iadko sid ugama laid do mirurunduk-runduk i kogumuai dot araat o hoturan, dot indoson ong iadino it atag, tu ogolivong om kovongo-vongo om aralom o kavazao i kiguna banal om tanda dot otopotko nokenksomok-no sid Kinoringan. Suvai ahatul o gama om kibahazan it ulun di iadino o gama sampai i kosurtan do piumpugan o tomodon om panangan.

Ong mamasa tokou di boros di Paulus diri om mongohondom di gama dit a-ko piro o rombongan dot ulun Kristian di mongitung dot ong sukul ologod banal i gama monginggogongou om monuntung di sandangau ko drum, korikot i Sundu do Kinoringan. Ko suvai kopihiza it ongoulun minta dua do mongogizak-po om osundu-ogi o piumpugan. Ino dino kavi okonko kenginan di Paulus om lobipo ong i Kinoringan. Aso't abasa sid ongoinjil do iadino i gama di Yesus diri. Iti-no o sabap sid di Yesus ot kadapat tokou momorisa ombo it atag o gama. Sid ugama do Yunani varo-no laid retanko boros do surga it kadapat mamakai ong kumiboros do Kinoringan. I harati, ino gama kumiboros do Sundu okonko hal di nokembulai sid ulun di sumuhut di Tuhan Yesus, inoi nga i vaza laid dit ongobansa sumamba sid ongopinokokinoringan om ongorogon, iadko i gama di bobolizan mogorunduk. Na mongusul i Paulus sid 2. Kor. 12,4 dot iosido, hiza di nokosorou iosido dot amu elaan do bai hatod-ka ko nokenan nokorikot iosido sid surga, nga nokorongou iosido dit ongopamarasan dit amu otinganan monusul i boros, ong baiko munung do riniba. Topot ino dino, suvai atag o gama om ohoturanan di samod di Tuhan om kiguna-ogi sid tanga do piumpugan.

Bahagi kolimo

I kogulianan dit ulun minatai 15,1-58

1. It usul om kososizan di kinogulianan di Kristus 15,1-11

Sid fasal dino tumompik i Paulus sid agazo o tajuk di surat dau. Okonko hal do hoturan do piumpugan, inoi nga it onsi di kosipan dot ulun Kristian om i puun di Habal do Kovosihan iadko nihabal di Paulus sid Korintus diri. Nokotondok-no i teologia di Paulus sid fasal dino. Sabap i kinogulianan di Kristus ot origi om gamut di piumpugan dot ulun Kristian om i rikoton dit ipat-ipat it ulun Kristian. Varo tomodon di Paulus mongonsi di kogulianan dot ulun minatai, ino-no, varo't tudukan om boros sid piumpugan sid Korintus o pakaso di kogulianan (12) ko monimban di kogunaan di kogulianan dino. Iti-no o nakasabap do pokulau i Paulus di boros dioti dino. Mongohondom iosido dot i hiza di minangahabal iosido di Habal do Kovosihan sid diri, ino kinogulianan di Yesus o puun di kosipan om kinosopulan dioti. Ino habal do Kovosihan amu nosimbanan, iri-no ko iri. Suvai sumokot sid Habal dino om varo-ogi kosopulan. Iri-ogi manantu i Paulus dit usul di Habal do Kovosihan om mamakai di kongkod dit usul dino, miabal di sid fasal 11,23... Ino boros dino okonko boros om usul di Paulus, gam mamakai i Paulus di kososizan di piumpugan do pasok Kristian. Gam sid iso't ayat dino mongonsi di sokoviai i Habal do Kovosihan sid kososizan dino. Ino-no i kososizan dino,

keso: i kinapatazan di Yesus gima i kasalaan tokou, nisuhut sid Kitab. Aso panarangan di Paulus do kuran i Kitab Laid sumasi di kinapatazan di Yesus. Hinondom dau dati i Yesaya 53 iadko sid Rom 4,25 ko i boros di Yesus diri sid kinoruhangan dau di pakaa sid Emaus (Lukas 24,25-26). Sid kiroon di Paulus tinuluk-no di Kristus i bahanda sid Kitab Laid (imatai sid Rom 3,25...; 6,6; Gal. 3,13 om 2. Kor. 5,19).

koduvo: nokolobong-no i Kristus. Minatai-no banal i Kristus sampai aso-no banal iosido. kotolu: nogulianan-no i Kristus, nisuhut sid Kitab. Aso panarangan vagu, nga hinondom dati di Paulus i boros di nabi Hosea 6,2 ko Zabur 2,7 om 16,10.

Ong iadino, ino kinapatazan om kinogulianan di Kristus agazo banal o pitonidan mantadko i sokoviai i kapatazan do riniba, gima kondiri do Kinoringan nakatanga sid kobuatano dino om mongusaha di kinogulianan. Pengkaa dino ino kinapatazan om kinogulianan di Kristus ot onsi di Habal do Kovosihan, aso vokon. Ino kososizan dino minilalapis-no sid apat it Ongoinjil. Sabap ino, i kosipan sid kinapatazan om kinogulianan di Kristus, ino-no o kosipan di pajadi di piumpugan dot ulun Kristian om minanapul dit ongoulun. Manarang i Paulus dot ino kosipan dino kongkod kosipan do gorija om kososizan di gulu-no banal. Iosido dino bai pinolombus di kosipan om kososizan dino sid ongoulun sid Korintus. Manjadi sumasi i Paulus dot i dau do Habal om tudukan nokopisuvang di tudukan di gorija sid Yerusalim om it ongorasul vokon. Mangasip om humarap i Paulus sid kopolosizan om kinapatazan di Yesus iadko i gorija pasok, i nibahanda laid sid ongonabi di sid Kitab Laid. Iti-no o sabap dot i piumpugan dot ulun Kristian di mangasip do iadino, ino-no i bansa do Kinoringan do kavagu..

kapat: ingonom nakasasi-no i kinogulianan di Yesus Kristus: i Kefas, i hopod om duvo, i limo natus it ongoulun, i Yakobus, i sokoviai it ongorasul om iri-ogi kondiri i Paulus. Okonko bai it ongobahanda di Kitab o manantu di gama di Yesus, inoi nga it ongorasul om i vokon o sasi do sumasi dot otopotko nogulianan i Kristus. Suvai minokimot dioti om nokosondot-ogi i harati di ginama di Kristus sampai jinumadi-ogi i piumpugan om gorija di Kristus, ino-no i bansa do Kinoringan di kavagu. Okonko bai nogulianan i Kristus, gam ingonom pokimot dot ulun i Kristus, tu manantu om momihot di kinogulianan dau. Mongohondotol-po kagi i Paulus dot i kogumuai dit ongosasi dino, nga kakali i hiza diri sampai oruhai kadapat monginsosok dioti dino. Ino-no rontob, suvai ulun Kristian di nokosuhut di Yesus diri o kemot di Yesus, ko it ulun di nakasip-no di tudukan di Petrus. Ong i jaga sid lobong di Yesus ko it ulun Parisi di sinumana di Yesus diri, bai rinumosi, vokon-no ong nokotigog hiza di nosukab i lobong, vokon-no ong pomuduton om lumpotihon i kososizan di sojal supaya it ulun vokon, nga mangamu-amu di kinogulianan di Yesus.

Sid kogumuai dit ongosasi, amu narait ong i Mariam Magdala om it ongoondu vokon. Sabap i hiza diri amu hinumarap it ulun di kososizan di bai ongondu (Yahya 21) Bai i Petrus, i panangahabaran dit ongondu o nakarait om iri-ogi i hopod om duvo i rasul. I Yakobus, ino-no it obpinai di Yesus i jinumadi dot origi di piumpugan sid Yerusalim (Gal. 2,9). Om varo-po boros dot i kenglimo i sokoviai it

ongorasul o nokemot di Kristus, varo dati nakamung it isai-nopo i najadi do rasul om ponginjil di Habal do Kovosihan, iadko i Yakobus, i Pilipus om Stepanus om ipo vokon. Sid kopupusan-po mongusul-no i Paulus di dau do pangalaman sid Damshek dot amu ekum iosido manarang di dau do kobungahan om karaatan di mongogusa dit ongoulun Kristian. Banal-no, momihot iosido di dau do kobuatano di mad anak dit amu-po nemongo. I harati, okonko bai misinganak iosido, inoi nga mad amu-po nakalandai o kavazao dau diri. Kagi i kinemumuzan di Paulus sid di Kristus o kinojodizan dau do rasul iosido. Nokopihiza okodim iosido sumuhut di Yesus om notugasan iosido do mangahabal di Habal do Kovosihan. Ong mongusul i Paulus dino pangalaman dau sid Damshek, ino-no o harati, minsanko iosido nga nakamung-no sid ongosasi di kinogulianan di Yesus om kadapat iosido manantu di kinogulianan di Kristus. Aso bida di kososizan di Petrus om i di Paulus ko it ongorasul vokon, tu enizo ioti do nakadapat di kovosihan do Kinoringan, tu minokimot i Kristus dioti dino. Ino tuturan di pangalaman dau sid Damshek mongimbulai di kosibako di ginavo di Paulus, nga kopihiza dot iosido mongindazou di tugas om garal dau do rasul iosido dot amu olingan dau dot it atag o gama mongindazou, ino-no ponong sid Tuhan i minongodim di Paulus. Bai iso-no i kiguna om kipanangan, i kapangahabaran om i kosipan dot ulun Kristian.

Ong pigimbangan tokou it usul di Paulus om it ongoinjil, tantu varo pitonidan om varo o miabal banal. Ong sid Injil di Lukas 24,34 om Mark. 16,7 bai onibak nakarait i Petrus sid lobong di Yesus. Topot i Paulus manantu di kavagato di kososizan di Petrus, iadko i nokosurat-no sid Injil di Matius 16,18 om it UR 2,14... om i vokon dot i Petrus ot ulion om origi di piumpugan (Gal. 2,9; UR 15). Ong i hopod om duvo i minokimot i Kristus, kaluto ong i noboros sid Matius 28,16-20 ko UR 1,4-11 o nousul sino. Topot aso boros di Paulus do siombo i kinojodian di iadino. Tanid mantadko ino aso habal sid ongoinjil di miabal di Paulus ot usul dino. Ino-no rontob, ino surat di Paulus pakaa sid piumpugan sid Korintus kakali osomok sid hiza di kinogulianan di Yesus. Ong it ongoinjil, suvai otoliban i hiza di Paulus om nokouropod-ogi sid surat.

2. A-kavasa dot onuvan pibidaan i kinogulianan di Kristus om i kogulianan dit ulun minatai 12-19

Notontuan-po di Paulus i kinogulianan di Kristus, tumompik-no iosido sid boros dot ulun, retanko aso kogulianan dot ulun minatai. Amu elaan tokou o sabap do varo boros do iadino sid piumpugan dot ulun Kristian sid Korintus. Banal-no ong sid ugama do Yunani varo boros do bai i hatod dot ulun o gumulian om rumikot sid pinokokinoringan do Jupiter. Antawa varo kiroon do kodung nokotorima di Sundu dot Osusi, i nokemaro-no it ulun dot amu osusa do gumulian-po, iadko i tudukan dit ovudut sid 2.Timotius 2,18. Ino-no i timpa di Paulus, ong pakaso do varo kogulianan dit ulun minatai, tantu aso kinogulianan di Kristus. Sabap i kinogulianan di Kristus om i kogulianan dit ulun minatai miopuput dot aso tinganan potongkizadon ko pobidaon (Yahya 11,25-26; UR 4,2). Kodung varo kinogulianan di Kristus, varo-no kogulianan dit ulun minatai. Sabap i kinogulianan di Kristus o kotimpuunan di vangun vagu om riniba vagu om i kotimpuunan di karajaan do Kinoringan. Kondiri di Kristus o minonimpuun di iadino. I kinogulianan dau okonko bai suromo bahagi di Kristus, inoi nga vaza vagu do Kinoringan pomizau om poturug di riniba di nokedu-no sid tinoguvangon dau. Sabap ino, isai-nopo i pakaso di kogulianan dit ulun minatai, nga pakaso do varo kotimpuunan vagu do Kinoringan bahagi di riniba. Iti-no i tinomod di Paulus manarang sid dioti sid Korintus. Ong kodung pakaso di kogulianan dot ulun minatai, nakapakaso-no di kinogulianan di Kristus. Tu nunu-ka o kogunaan di Habal do Kovosihan, ong amu otopot nokembulai i hiza vagu, ino-no i hiza do vangun vagu? Kagi, ong iadino, it ulun di mangahabal di habal dino bai ulun do momudut om monipu. Minsan i Paulus nga ulun di momudut, naku? Ko i kaadaan do kasalaan, nga amu otopot, gam i piumpugan nga kakali nokotombil sid tanga do karaatan. Topot i kinogulianan di Kristus o minongimbulai di kolobusan antad sid kasalaan om karaatan. Suvai nogulianan-no i Kristus om kiguna-ogi i kinapatazan dau bahagi di kasalaan tokou (Rom 4,24-25). Gam i kinogulianan di Yesus o siji ko cap dot i Kinoringan minongoho om minomihot di gama om i

kinapatazan di Yesus. Pengkaa dino porosuma i kosipan dit ulun di hinumarap sid di Yesus om i kinapatazan om kinogulianan dau di minatai-no laid, ong aso guna di kinogulianan di Yesus bahagi di kogulianan dot ulun. Suvai nogulianan-no i Yesus om varo-ogi koposizan vagu sid saralom di piniizaan sid di Kristus om i kinosopulan dau. Ong i harapan sid di Yesus kiguna biano om didino sid ulun do mizau, tu sokoviai i kosipan dot ulun Kristian, aso guna om aso panangan, gam oholian kosian dit ulun Kristian mantadko it ongoriniba vokon dit aso tantu-tantu. Ong suvai banalko aso harapan di kinogulianan di Kristus. Ino-no i kolovongo dit ongoulun sid Korintus dit amu humarap di kogulianan dit ulun minatai, pakaso ioti di Habal do Kovosihan.

3. I panangan di kogulianan dot ulun minatai 15,20-28

Sid a-ko piro ot ayat dino manalahas i Paulus di hiza di rumikot-ogi i retanko hiza do penlaid ko hiza do kotulukan di janji do Kinoringan di monimbaru di vinangun. I Kristus ino-no i minomuradsung di hiza do penlaid bahagi dit ongoulun di minatai (Kol. 1,18 om UR 26,23). Sabap i kinogulianan di Kristus o kinembulazan di kogulianan di sokoviai it ulun minatai. Ino-no i vaza di Paulus manarang, popigimbangan dau i Adam om i Kristus (Rom 5,12) I Adam, ino-no i suntuan di riniba laid. Iosido o minongimbulai di kasalaan om kapatazan bahagi di riniba. Topot ong i Kristus, ino-no i suntuan di riniba vagu, i minongimbulai di kogulianan om i koposizan vagu. Miabal di kuasa do huntung antad sid di Adam i nakaraliu sid sokoviai i riniba, i gama om kuasa di kinogulianan di Kristus rumaliu sid sokoviai i riniba vagu. Sid di Kristus nokogom-no i koposizan vagu bahagi di sokoviai i riniba. Mad monorou i Paulus di hiza di rumikot-ogi, hiza di nokotimpun-no i kinogulianan di Kristus. Iosido-no o minonimpun. Tu i kogulianan dit ulun Kristian di minatai, hiza-no di korikatan vagu di Kristus i retanko kembulazan om kotulukan di karajaan do Kinoringan om iri-ogi i kovian do pouli vagu di Kristus sid Kinoringan it Ama i sokoviai i kuasa om hoturan om karajaan dau di sid palad dau (Fil. 2,11) Apajak-no nosorou-no najangka di Paulus ino iadino dino dot amu manarang iosido di kopongohukuman penlaid. I Paulus bai monorou di kotonusan di hiza om vinangun biano om i kuasa di nunu-nopo songrogon dot i kinogulianan di Kristus o minonimpun di sokoviai i iadino. I Kristus, i minonori iosido do kapatazan diri sid sangkap om monori di sokoviai it ongokuasa vokon di kakali kikuasa sampai nakamanang iosido sid sokoviai it ongokarajaan om ongosangod do Kinoringan sampai pogili dit ongokuasa di notori-no dau sid tinoguvangon do Kinoringan, gima antad sid Kinoringan nakanu iosido di kuasa do monori di sokoviai. Ong ioti sid Korintus diri minongitung sokoviai nga nopongo-no laid i hoturan vagu do Kinoringan. Iti-no o sabap dot osusa manarang i Paulus do varo hoturan ponong sid kovian sampai it ongoulun Kristian kakali sid tanga do ralan ponong sid hoturan vagu. Amu-po notuluk i hoturan di Kristus om amu-po nokorikot it ulun Kristian sid kopupusan do hiza. Amu kopihiza i kinogulianan di Kristus om i kovian. Iso o nelaan di Paulus, a-milo-milo nga rumumpak i Kristus dit ongosangod do Kinoringan sampai otori kavi. Ino-no it ongosangod, i kasalaan om i kapatazan (Kentalangan 20,14; 21,4; 2. Tim. 1,10 om Rom 5,12.21). I Kristus o palabus dit ulun antad sid kuasa do kasalaan sampai mananus di kapatazan (Zabur 8,7). Ino-no i tugas om tanggung jawab di Kristus antad sid Kinoringan. I Kristus o posusi di ngaran do Kinoringan sid tanga do vinangun pengrikot di karajaan do Kinoringan sampai monuluk di kenginan do Kinoringan sid surga om sid riniba. I kotulukan di kuasa om karajaan do Kinoringan o panangan di sokoviai i gama di Kristus.

4. I kobungahan di pakaso di kogulianan dot ulun minatai 29-34

Insan-po dino mongohondom i Paulus di kobungahan dit a-ko piro it ulun sid Korintus, iadko noboros laid sid ayat 14. Ino-no, varo koubasan sid Korintus do ipopodsu it ulun di minatai-no laid. Amu pokoraat ko pokovantang i Paulus di vaza di iadino sid Korintus. Tu i kiguna i kogulianan dot ulun minatai, ka di kovosihan di Paulus. Kagi okonko sokoviai it ongoulun Kristian sid piumpugan do Korintus minamakai di kavazao di iadino. Rontob it a-ko piro it ulun di pakaso di kogulianan o

sinumuhut di kavazao do momodsu dit ulun di minatai-no laid. Iti-no o kinapanarangan di Paulus dot amu kopionong i kavazao di iadino om i gama pakaso di kogulianan.

Pengkaa dino, mad bai kobungoho di rasul Paulus ong magavi posurut di Habal do Kovosihan dot asarok iosido sisiri apatai om orundun ko opunovot, gima i gama dau magavi posurut di kahabaran di Kovosihan do Kinoringan, ong aso kogulianan (2. Kor. 4,10..; 6,4; 11,23...) Tu ong aso kogulianan, osuhul-po do minang-sinang i rasul, okonko sid kapagasan om kopunavatan sid tanga do ralan do posurut om polombus di Habal do Kovosihan do sanaon om hungatan iosido dot ulun. Nemot om nososizan kondiri dioti sid Korintus i vaza di Paulus magavi posurut di Habal do Kovosihan do sampai okugui om sinumakit iosido sampai toropatazo-nopo (2. Kor. 4,11..). Na sid Usuran do Rasul asot usul dot i Paulus kinumiombal dit ongodupot dot orongit sid Efesus (UR 19,23...), topot kakali dot ino pangalaman dino manantu do suvai kiguna ino, ong antad sid varo kogulianan dot ulun minatai. Ong aso, tantu aso guna, osuhul-po ong sumuhut di cadangan di Menander, it ulun do kihukum sid bansa do Yunani, i mancadang dot i koposizan dot ulun bai makan om minum sampai pempatai. Baiko it ulun di magavuk o momoros om humarap do iadino. Topot ong it ulun di kipongitungan om osihat om otopot, mongohondom di panangan di kovosihan do Kinoringan, ino-no i koposizan penlaid (2. Kor. 1,9 om Markus 12,27).

5. I vaza di kogulianan: i kinourugan do vinangun o suriban di kogulianan 35-58

a) 35-38 I suntuan do lininsahan.

Sid ayat 1 sampai 34 minionodiri i Paulus di sabap do kogulianan. Iri-ogi tumompik iosido sid vaza om kokukurozo di kogulianan dit ulun minatai. Tumimpa i Paulus di duaton dioti do, Kuran-ka o kogulianan om kuran-ka i kavazao do guvas vagu? ka. Retan dioti ko, Aso tinganan mongitung om mangalu-kalu di kokukurozon dino. Manjadi i timpa di Paulus minamakai do suriban di vinangun, ino-no i kogulianan iadko i vaza sumuni do nunu-nopo isusumuni antad sid linsou. I riniba di napatai-no iadko i linsou di nakasasad-no. Suvai humobu om mudou sampai masa i linsou om sumuni-ogi vagu i totonomon. I totonomon mopud vagu antad sid kapasaan di linsou laid. Pengkaa dino i koposizan mimbulai vagu antad sid kapatazan. Manjadi i suni do totonomon vagu okonko iri-no ko iri tinanom, inoi nga hal-no vagu. Topot kakali dot antad sid linsou laid. Iti-no o sabap dot i guvas vagu tanid-no mantadko i guvas laid di matai om masa. Topot kakali antad sid guvas dino o kosino i guvas vagu. Ino dino nga suromo di kopongurugan do Kinoringan, i mongimbulai di guvas vagu antad sid kapatazan di guvas laid. Topot ino koposizan vagu amu miabal di tudukan dit ulun Yahudi (Markus 12,25) di poperad di guvas vagu om i guvas laid. Gam i Kinoringan, i minongurug di riniba laid o mongurug di riniba om guvas vagu dit ipat-ipat it ulun isuhut di dau do kenginan om umba. Ong i linsou iadko i buntung di noluhusan-no ponulung, amu-no otutunan i linsou do kuran i suni dau vagu. Topot i guvas di kogulianan mad napakazan-no dot ongosulung vagu dit aso-po't elaan do riniba. It urug laid bai suntuan bahagi di urug om vangun vagu dit otoliban-po it urug om vangun laid.

b) 39-44 Mitatanid-tanid i vaza do Kinoringan mongurug dit ongo guvas (onsi)

Manarang i Paulus dot aso rontob dit ongovaza do Kinoringan mongurug dit ongo guvas di vangun vagu do miabal di vangun laid diri di mitatanid-tanid o kavazao. Insanpo dino mongurug i Kinoringan do kovongunan di banalko tanid mantadko it urug laid dau. Kagi kopongurug ong i Kinoringan dot amu osusa mamakai do barang iadko i tukang muvalai do mamakai dit ongo babaal dot ipuvalai (Rom 4,17 kopongimbulai i Kinoringan di hal dit aso-po). I monodiri i Paulus dit ongonsi do dupot om ulun, posuntu iosido di pitonidan do guvas laid om guvas di dang surga (i vangun vagu sid karajaan do Kinoringan). Atalahas sid panarangan di Paulus do minsanko pisok domburan, kakali amu-po miuma poperad om posuntu di hal om kokukurozo di kogulianan vagu. Minsanko i suriban dit ompiling di korimbutuon om i mato dot adau ko vulan, nga amu-po miuma posondot om paharati di kokukurozo di

kogulianan dit ulun minatai. Na elaan tokou bianco dot i kanavaho di vulan bai binahang di mato dot adau. Aso't ompiling di vulan kondiri. Ong i Paulus manarang sid dau do keloo om dau do kohorotizo. Topot i panangan di panarangan dau, ino-no, miabal di suromo di kinourugan do vinangun laid diri dit a-milo-milo nga tumanus, varo suromo di kokuasaan do Kinoringan mongimbulai di vangun vagu om i guvas vagu dit amu-no tumanus, gam apasi sampai penlaid (Markus 12,25). Kagi, ombo i varo laid, antakan di vagu, i guvas di dang riniba antakan di guvas di dang Sundu. A-milo-milo matai om masa i guvas di dang riniba, supaya masi i guvas di dang Sundu. Ino gama do Kinoringan banalko tanid mantadko i tudukan dit ugama Yunani ko Buddhism om Hinduism dot bai i hatod amu matai, gam maliu om rumangkat sid tasantanid-tanid o guvas, gima amu matai i hatod, ka. Ino-no it onsi di tudukan di Paulus, it ulun, guvas di kiginavo, i najadi antad sid kinourugan do Kinoringan, osopulan di gama di Kristus ponong sid vangun vagu jumadi do guvas dot osundu di kiginavo.

c) 45-49 I riniba laid om i riniba vagu

Monodiri i Paulus di pitonidan di guvas laid om guvas vagu sid boros do Kitab, ino-no i pitonidan di Adam om i Kristus (Kinotimp. 2,7) Varo-po panarangan di Paulus sid Rom 5,12-21. Ong nokorikot i Kristus sid riniba, iosido ot ulun di riniba vagu om kotimpunaan di urug di vangun vagu, nga mongitung i Paulus dot i kopolosizan vagu (penlaid) sumuhut di kovongunan di Kristus, i kiguvas do Sundu. I popirompokon di Paulus di Kristus om i Adam i vaza dau manarang om monodiri sampai pamung sid boros di Kitab dot, I Adam tohudi, ino-no i Sundu do kapasi ino-no i Kristus o boroson. Ino-no o harati, Ong i Adam antad sid tana = (adama =it ulun do tana, ong boros Ibrani) kopiamung di pinuhobo do Kinoringan. Topot ong i Kristus Sundu di kapamasi sampai elo kapamamasi sid kopolosizan vagu om penlaid. I Adam mongontok di riniba om vinangun laid. I Kristus mongontok di riniba om vangun vagu ko i piumpugan om gorija di Kristus, isai-nopo i nakamung om nakasip sid di Kristus. Manjadi it ongoulun Kristian di mad anganak di Adam nokotoguvang-no sid kopolosizan vagu sampai nokoluu--no di kobuatano dit antad sid surga. Ong sid Fil. 3,21 manarang i Paulus dino kobuatano dit antad sid surga sid pongoretan dot, I guvas di kikohormatan. Na kuran-kuran, ino kosimbanan dino, ino-no i kogulianan di minatai i hiza di rumikot-ogi. Topot it ulun Kristian nokontok laid bianco sid kavazao vagu sampai najadi dot ulun di dang surga ko ulun di bansa vagu om anak do Kinoringan.

d) 50-58 i kotulukan di karajaan do Kinoringan om i korikatan di Kristus.

Sabap i hiza di Paulus diri hinumarap dot oduruk-no om rumikot-no vagu i Yesus sampai sumunu kavi i nakabahanda, varo duaton dot ulun sid Korintus do kuran it ongoulun Kristian ong i kakali mizau nga korikot-no vagu i Kristus. Na toguvangon-po laid di Paulus it indoson dot ulun ong i buntung di nokolobong-no sumiliu do guvas vagu iadko nosorou di Yehezkiel dot it ongotulang muonsi-no vagu om tumungag sampai mizau. Pengkaa dino it ulun di mizau amu sumiliu dot vangun vagu, sabap it guvas bianco, onsi om raha di dang riniba laid dit amu sumuvang ko lumombus turus sid karajaan do Kinoringan. I kopolosizan penlaid sid karajaan do Kinoringan okonko nokosuput sid kavazao laid dino, inoi nga i kapatazan di vangun laid o vazaan posuvang sid karajaan do Kinoringan, okonko iadko buka pintu, inoi nga kotonusan di vangun laid, supaya mongurug i Kinoringan di vangun vagu. Ino iadino dino it ulun minatai om i mizau nga miabali. Kagi i kopolosizan vagu di tigogi, nga kembulai, mad suromo dit aso tinganan sodirizon ko talahason. Mamakai vagu i Paulus di boros do varo toburi di monguni, tu pentahan di kovian di hiza laid om i kotimpunaan-no vagu (1. Tes. 4,16 om Mat. 24,31). Iri-ogi i kogulianan dit ulun minatai om i kosimbanan dit ulun di kakali mizau, nga iri-no ko iri suromo dit aso tinganan tarangan.

Noboros-po i iadino, mongindazou-no i Paulus di gama do Kinoringan di kamanang om monori di kuasa do huntung om i gama pengkod di kuasa di panansara di momogos di riniba. I pongoretan di panansara inanu-no do suntuan sid pakakas dit ulun mukabun kodori di iadko papatuk di kirugi nitandon sid pompod. Ong amu mamananau i karabau ko kuda potukon nga mamananau-no. Ino rugi dino iadko i

singot dot ompoluluhu do manansara di sasakaan. Retan di Paulus dot i kasalaan iadko panansara di kapatazan. Kagi i pinonuhuan o manalahas di rontob om karanggalan dot ulun. Sid Rom 7,7... lobipo atarang i gama di Paulus monodiri di kuasa di pinonuhuan om kasalaan. Na i Kristus om i kinapatazan om kinogulianan dau pengkod di sokovia i it ongokuasa di monusa om mangaraag di riniba (Rom 7,25 om 8,37...). Ino habal di kapamanaran do Kinoringan, i nokembulai-no sid kinapatazan di Yesus o sabap om puun di habal do koposizan. Mangamung-po i Paulus di gama mongimuhun, supaya atatap it ulun Kristian mangasip sid kinamanangan do Kinoringan om i kogulianan di rumikot-ogi. Iti-no o sabap do humarap i Paulus dot it ulun Kristian sid Korintus sumurut sid kosipan om i gama monuluk di kenginan do Kinoringan (16,10 om Rom 14,20), ino-no i kopiobpinezan sid piumpugan dot ipat-ipat it ulun Kristian kitugas ponong sid koturugan om kapapagan di gorija di Kristus. Ino harapan sid kogulianan o kakansangan bahagi di gama suvab-suvab posurut di gama di Tuhan (Yahya 20,21).

Ong it apakai sid Kitab Momogun i pongoretan *kogulianan*, i napakai-no laid sid nolud do Momogun bahagi di kiroon dot ulun, dot it ulun minatai, muli i hatod sid sodop kotolu, tu mongoi do kokorui kumaad Nabal. Ko i kobuatano dot ulun di novunusan, nga ogulian vagu. Na atalahas-no dot i harati sid Kitab banalko tanid. I gama do Kinoringan mongimbulai do koposizan penlaid om i vangun vagu aso tinganan tarangon ong okonko sid pongoretan om boros dot ulun, minsanko amu kopionong i kiroon laid om i harati vagu. Ino hovoron do Momogun dot i hatod dot ulun lumombus sid Nabal, tu mamung sid kinogumuai, ka, bai vaza mangalu-kalu do kuran om siombo it ulun minatai. Minsanko i kiroon do varo't onghatod dot ulun, nga bai kolu-koluvon dot aso tinganan kovidan om tontuon. Topot, gima tu varo pongoretan do kogulianan om gumulian i minatai, varo pongitungan diri dot osuhul ong mamakai di pongoretan dino sid gama manalahas dit otopot o gama do Kinoringan mongimvagu dot ulun.

Kananganko i panarangan di Paulus ong i kogulianan dit ulun minatai, pengkaa dino, mitanid banal di kohorotizan dit ulun Yahudi om Yunani: Iadko it kosipan dit ulun Yahudi engat di Paulus do kovian-no do pomogunan om i vinangun om varo-ogi kogulianan sid koposizan vagu sid karajaan do Kinoringan di mad vangun vagu. Ino-no i pitonidan ong i di Paulus do tudukan:

keso, nokorikot-no laid i Kristus (i Almaseh ko Minananggung, it hinarap-no laid dit ulun Yahudi dit kakali amu-po nokorikot), gam nogulianan-no i Kristus sampai minonimpuun-no iosido di kogulianan dit ulun minatai. I Kristus o nokogulu nogulian om sumusuhut-ogi i riniba, ombo i mangasip sid di Kristus. Isai-nopo i pakaso di kogulianan di minatai, ino-no o pakaso di kinogulianan di Kristus. Sabap i Kristus o Sundu, i mamasi om manahak sid di tokou di harapan sid koposizan vagu di dang karajaan do Kinoringan.

koduvo, monodiri i Paulus di kavazao laid om i kavazao vagu. Ong it ulun Yahudi minongitung dot i koposizan vagu sumusui di koposizan laid do iadko it ulun di maliu antad sid iso o kampong sid kampong vokon, do kakali iri-no ko iri iosido. Bai it intoronon dau ot osimbanan. Na i Paulus sumusui di tudukan di Yesus sid ulun Saduki (Mark. 12,18...) dot i koposizan vagu tanid-no o kobuatano sid tanga do riniba, ino-no, it ulun di mangasip om abanal, sumuvang sid kohormatan om binahang di karajaan do Kinoringan.

Pengkaa dino sumaap i Paulus di kiroon dit ugama om filosofia do Yunani i manarang dot bai i hatod o kiguna, ong minatai-no it ulun. Sabap amu matai ong i hatod dot ulun, retanko sumiliu do kinoringan. Kiroon kagi do Yunani dot it ulun varo tolu bahagi ino-no, guvas, hatod om sundu. Hiza do kapatazan, i guvas di mad torungku do hatod matai om masa. Iri-ogi i hatod obebas, lumombus sid surga, ko ong sid Hinduism om Budhism, nga sumuvang sid guvas vagu, riniba ko dupot. Topot i sundu tumanus miabal di guvas, ka. Na i di Paulus do tudukan pengkaa dino, it ulun om i riniba ensanan norumpug sid vangun laid di nohoturan do kasalaan om kapatazan. Baiko i suromo di gama do Kinoringan o kapananus di kapatazan om mongimbulai di kogulianan. Sabap ino, i kosopulan dot ulun okonko kolobusan di hatod antad sid torungku di guvas di dang riniba, inoi nga kogulianan om kembulazan di guvas vagu, isuhut di kobuatano di Kristus. Kagi, atag do onsizon banal ino boros do kogulianan. Sabap okonko it ulun o gumulian iadko dau do kenginan, inoi nga i Kinoringan pezau dot ulun, iadko momosik

dit ulun di modop. Varo-no boros dot ulun ong i minatai iadko modop (1. Tes. 4,13-18). Iti-no o sabap do varo-po pongoretan di miabal o harati di kogulianan, ino-no, kopomosikan di minatai. Manjadi ino kopomosikan dino o vaza di Kristus mongimbulai di vangun om guvas vagu. Om ino ino kopomosikan dino hal di jumadi sid tohudi. Minsanko nakatalib-no i kinapatazan om kinogulianan di Yesus Kristus, kakali dot amu-po notuluk. Ong i kopomosikan dit ongoulun di mangasip sid di Kristus om i kovian do pomogunan, iadko i noboros laid di Yesus sid Mat. 28,20. I tokou diti masi-pasi om humarap sid pialatan di kinotimpunan di kogulianan om i vangun vagu om i kopupusan om kotulukan di gama di Kristus mongimvagu do vinangun om riniba. Kondiri di Kristus o sijil om kotimpunan di kogulianan di riniba vagu.

Kovian do surat: it a-ko piro o hoturan di Paulus bahagi di piumpugan 16.1-24

1. 1-4 i rukut bahagi di piumpugan sid Yerusalim

Mad varo kogolivongo sid Korintus kananganko i rukut bahagi Yerusalim. Iti-no o sabap manarang-no vagu i Paulus di kogunaan di rukut dino. Kenginan di Paulus dot humogizo i piumpugan sid Korintus monukup di balanja di piumpugan sid Yerusalim. Tu keso, atag dot i piumpugan sid Korintus monulung di kosusaan di piumpugan sid Yerusalim. Ino-no i kosusaan sid Yerusalim: ogumu it anggota di nakamung sid piumpugan sid Yerusalim dot ulun do lumohing-no, antad sid ongopomogunan vokon ot inantadon. I tinomod dioti rumangkat sid Yerusalim: engin matai sid bandar om ibu kota dit ugama Yahudi. Nokorikot-po ioti, minamung-no ioti sid piumpugan dot ulun Kristian. Minsanko kikorui dara ioti antad sid inantadon diri, navi-po, osusa-no i piumpugan monumad om monorupasi dit ulun dino (imatai sid UR 5-6). Manjadi ino tugas do momiara dit ongoulun do lumohing dino o kinembulazan di kosusaan do piumpugan sid Yerusalim. Na i pongitungan di Paulus mancadang do mongorukut, ino-no, atag dot i piumpugan sid Korintus om ongotampat vokon, monorima kaseh sid inantadon di Habal do Kovosihan. Sabap antad sid Yerusalim o kinembulazan di Habal do Kovosihan om nakazad sid ongopomogunan vokon. Iadko nokohompit i piumpugan do Korintus di Habal do Kovosihan sid Yerusalim. Sabap ino atag do pohompit-po dioti sid Yerusalim di kosukupan sid Korintus. Ino-no i kovosihan di Paulus kaananganko i rukut. Kodung minggu mananid-no dot okudik o hombit dioti sid Yerusalim, alaid-po ogumu-no ot orukut om kadapat manahak dot amu nopupurimanan i kigumuan dino. Kagi, kenginan di Paulus dot it ulun do Korintus kondiri o mangatod di rukut. Ong i rasul bai mozo mangatod, ong ogumu banal o rukut di noumpug sid Korintus.

2. 5-12 It umba di panahon di rasul om i habal kananganko i Timotius om Apolos.

Varo't umba di Paulus do magandaha iosido sid Makedonia sampai lumombus iosido sid Korintus. I hiza di minonurat i Paulus di surat diti, ontok do vulan Mar ko April om i kiroom di Paulus, suvai otoliban i Pentakosta om tumulak-ogi iosido antad sid Efesus. Tu sid Efesus o kinoponuratan di surat diti (UR 19). Rontob-nopo, kakali mongohondom i Paulus dot it umba dau dino suvai kopionong di kenginan do Kinoringan. Sabap nagazad-no laid di Tuhan tanid mantadko it umba di Paulus (UR 16,7) Monuturan-po i Paulus dot i sid Efesus agazo o kinosuruto di ponginjilan dau. Iti-no o sabap dot amu kapanau koduruk iosido, inoi nga mogihim-po iosido di koriatan sid Efesus pahabal di Kovosihan do Kinoringan. Mamakai i Paulus di suntuan do rongobon di nogiang iadko sumuva i tuminong it Injil sid ongoulun sid Efesus. Nakatalib-no dati i kumodou i Demetrius, i modzupu (UR 19) do tiningulun, sampai ozom-no vagu i pomogunan sid Efesus. Ong i varo boros di Paulus dot ogumu o sumaap, ka, ino hal di Demetrius dati ot boroson (Sid Momogun, ong sumuva-no i tuminong, ino-no o harati, nogiang-no laid i rongobon i sirang dit ondu, supaya amu osusa mogihim do siombo it ongkob di sovoon sampai amu-no apalid. Tu ong apalid, kohukum).

Iri-ogi popuhondom i Paulus sid dioti dot i Timotius om i dau do tugas, supaya otulungan iosido om orindingan sid tugas dau. Tinarang di Paulus dot i di Timotius do gamaon miabal di gamaon di rasul kondiri. Kagi ozi i Paulus dot i piumpugan monuhu vagu di Timotius sid di Paulus, tu pahabal iosido di

kinosurutan do piumpugan. Om mongohondom i Paulus di Apolos sampai manantu dot upakat do kopionong banal di Apolos om i Paulus. Mad sid Efesus i Apolos i hiza diri. Rontob aso-po't umba dau magandaha sid Korintus.

3. 13-24 Imuhun om salamat di Paulus.

Sid kovian mongimuhun i rasul di piumpugan om it ipat-ipat it ulun Kristian sid Korintus, supaya aso bambaran, gam opihot i kosipan om osiou om akansang i kopudan dioti ulun Kristian sid saralom di sokovia i gamaon posurut di samod. Iri-ogi mongonsug iosido dioti, supaya mongoguna om mongohormat dit ulun di gulu-no kokristian sid Korintus, ino-no i Stepanas om it isai-nopo i mangagazad om mangahatul di piumpugan. Sabap amu atag ong iadko i gama dit a-ko piro, tu mongusiba om mangaladtak di rasul ko i sagama-gama sid piumpugan, ino-no it ongomangahatul di piumpugan. Ong i Stepanas nakandaha i hiza diri sid di Paulus om duvo-po o koruhang dau. Gam ioti minonginsasamod di Paulus om pinotomon di ginavo di Paulus dit sumusa, gima i habal di nening dau antad sid Korintus.

Noriat-po dau it a-ko piro o salamat sid di Akila om Priskila, i koruhang laid dau sid Korintus. Sabap sid valai dioti ot inintaranan di Paulus di sid Korintus iosido. Polombus-po i Paulus di salamat dit ongoulun Kristian sid Efesus om isai-nopo i kinoruhangan di Paulus sino. Iri-ogi mongonsug iosido do misasalamat ioti sid piumpugan dot mamakai di vaza dot osusi, ino-no i midungu-dungu do tanda do kopiobpinezan. Noboros-po i iadino, niamung-po di Paulus i tanda tangan dau do sumain kondiri sid surat, i sinuratan di sekretaris dau i Tertius.

Ong it ongoulun di kakali tumohiang, tu ino-no i tanda dot amu manamod di Tuhan, linupu di Paulus. Ioti dino tantu a-kamung sid piniizaan di piumpugan. Avadsak i boros dau mongolupu, tu i kiroon dau, kaluto ong tumolikud ioti antad sid araat o gama mangasau do piumpugan.

I ponutup di surat diti, io-no boros dot Aramai, ino boros do Yahudi hiza di Yesus, dot, **MARANATA**, i harati, Rikot-no o Tuhan-za (Kentalangan 22,20). Ino boros om indomoon di piumpugan sid Yerusalim najadi-no do kodim di napakai-no hiza do sumambayang sid liturgia om vaza manansalamat mitongkizad. Iri-ogi i boros do mindamo do barakat bahagi di piumpugan sid Korintus di rumait di samod om i harapan.

Surat koduvo di Paulus pakaa sid piumpugan sid Korintus

Salamat di kopitoguvangan di piumpugan 1,1-2

Iadko sid surat keso narait-no laid i ngaran dit ulun di minongirim di surat om i pangkat ko garal om tugas dau, ino-no rasul di Kristus i Paulus antad sid kenginan do Kinoringan. Ong rasul i Paulus, ino dino okonko dau do kenginan om kiroon, inoi nga kinodim iosido om inanu di Kristus do rasul. Kikoruhang i Paulus di mongirim iosido di surat diti, ino-no i Timotius, it ulun di nokorikot laid sid Korintus. Ong i rikoton di surat, keso sid piumpugan sid Korintus i dang Kinoringan om iri-ogi sid ensanan it ongopiumpugan sid Akaia. I bandar sid Korintus di mad ibu kota di daerah dot Akaia om i piumpugan sid Korintus mad pusat dit ensanan it ulun Kristian sid Akaia diri. Noboros-po it inantadon om i rikoton di surat, sinusuhutan-no di Paulus di boros do barakat minsamung, ino-no, i kovosihan om i kopioondusan do Kinoringan aharap i Paulus do mopud om rumaliu sid piumpugan dino.

1,3-11 I gama di Paulus monorima kaseh sid Kinoringan.

I vaza monorima kaseh sid surat diti banalko tanid mantadko sid surat keso (1. Kor. 1,4-9), gima banalko osusa i pangalaman di Paulus di nahajangan dau. Mad varo nahajangan do sampai opupusan iosido toropatazo. Topot nosopulan iosido. Ino-no nokotorima i Paulus do iadko insasamod do Kinoringan om polombus-no iosido dit insasamod dino sid piumpugan sid Korintus. I dau do kapagasan minongitung i Paulus do iadko nakamung iosido sid kapagasan di Kristus sampai nensinangan-no iosido

sid saralom di pangalaman dino, supaya iosido kadapat monginsasamod om posinang di piumpugan. I nunu-nopo it ahajang di rasul, kosusaan ko kosinangan, nga polombus iosido sid piumpugan. Sabap i rasul om i piumpugan dau milang-ilang sid kosusaan om kosinangan di mad piniizaan do miobpinai ioti. Iadko sid kinapagasan di Kristus nokembulai-no i kosopulan dit ulun Kristian, minongiro i Paulus di dau do kosusaan do iadko puun do kosinangan om kobebasan di piumpugan sid Korintus. Ong siti aso-po't elaan tokou do nunu i kapagasan om kosusaan sid Korintus diri. Varo mangalu-kalu do varo kosusaan antad sid piumpugan dot ulun Yahudi. Ong i kosusaan di rasul sid Efesus, amu avalang banal. Ino-no rontob, siri-siri ong apatai i rasul, tu sisiri-po ong a-nokedu sid kosusaan dino. Ino kosusaan dino tanid mantadko i noboros laid sid 1. Kor. 15,32. Varo mongitung dot i hiza di kinumodou i Demetrius (UR 19,23...) ot sinusa dara i Paulus, gima orongit i gama dit ongokoruhang di Demetrius sid ongoulun Kristian. I Paulus o gulu ponuduk dit ugama vagu. Na i Paulus amu panaru sid pangalaman dau dino. Tu ino-no i tinomod dau, sumasi iosido di kotulungan do Kinoringan di minanapul dau, minsanko aso-no kiroon-po di rasul do kalabus-po iosido sid kosusaan diri. Tu baiko i kogulianan-po di minatai ot hinarapan di rasul om i koruhang dau. Topot amu porosuma i harapan om kosipan dino, gam kondiri di Kinoringan o minanapul dit ongorasul. Iti-no o sabap do mangasip om humarap iosido dot aso kengkadan di kotulungan om koponopulan do Kinoringan. Kagi mongohondom i Paulus dot minsanko i gama di piumpugan mongontok minta dua bahagi di rasul, nga minongorinding om minangalapis di gama do Kinoringan manapul sampai mindamo iosido, supaya i piumpugan amu engkod mongontok minta dua do mobozo di Paulus sid tugas dau. Sabap sid gama di Paulus mongontok minta dua bahagi di piumpugan om dioti do gama di iadino, mitatabang posurut di kosipan om harapan sampai i samod di rasul om i piumpugan. Ino dino kiguna kavi ponong sid kohormatan do Kinoringan.

Bahagi keso:

Dumahava i Paulus sid vaza dau do rasul iosido om monguji-po di kohormatan di tugas do rasul iosido 1,12-7,16

A. Mamanal i rasul di dau do gama di rasul iosido 1,12-2,17

1. 1,12-14 I katatapo di rasul sid surat dot aso novudut ko lumpok dau. Antad sid onibak o boros monimpuun diti surat, turus tindogon di rasul it ongovaza dit a-ko piro it ulun sid Korintus manala di Paulus. Amu elaan tokou do nunu banal i gama dioti manala di Paulus. Varo dati boros dioti do retanko dot odila-dila do Mandahatan i Paulus. Iti-no o sabap do manarang om manantu i Paulus dot otopot i boros dau sampai okudik nga aso vaza kumilong sid boros dau. I ginavo dau sumasi do kuran ot otulid om arantang iosido, gam peradon dau i karangkapo om kotulido do Kinoringan. Ong bai sid kovosihan do riniba varo-po mongolumbok ko monguji dot ulun sid tinoguvangon dara dot ulun, topot mongindaraat-no ong sid likud. Ino-no i vaza di kopintaro om keloo do riniba. Topot ong sid saralom di kovosihan do Kinoringan, aso-no iadino. I Paulus sumusui di keloo do Kinoringan (1. Kor. 1,17...) i katalib-po di keloo di dang riniba. Gam sumasi om mongindazou i Paulus dot i kovosihan do Kinoringan o gamut di koposizan om tugas dau. Iti-no o sabap dot i sokovia i it ongosurat di Paulus manarang dot atarang om atantu o boros, okonko bombing-bombing ko posusut do harati di tanid mantadko i linsou do boros dau dino. Iti dati i gama pasala di rasul, tanid i boros om tanid i tomodon di Paulus monurat sampai amu alanta o tinomod om harati di surat di rasul, ka. Sabap ino manarang i Paulus dot i sokovia i boros om surat om gama ajadi sid tinoguvangon di Tuhan, ontok di didino om sampai sid penlaid dot iri-no ko iri o tinomod om panangan di rasul, tu mamantug di kohormatan di Kristus sid tanga do riniba.

2. 15-22 It umba di panahon di Paulus om i katatapo dau.

Manarang i Paulus dit umba di panahon om it andahaon dau. Ino-no o tomodon dau sid Korintus, kenduvo-no mangatod di kovosihan do Kinoringan iadko it insan-ogi korikot sid dioti. Okonko bai mirimpanau i Paulus ko makan angin ong korikot iosido sid pomogunan do Yunani ko i siombo-nopo, inoi nga varo tugas dau om varo't oviton, ino-no i kovosihan do Kinoringan. Sabap kodung nakatanga i rasul sid piumpugan dot ulun Kristian, kosondot-no i kovosihan do Kinoringan. Antad dit insan-ogi korikot i rasul sid Korintus, hiza di minonimpuuni iosido di piumpugan om i nokorikot-no vagu iosido sampai linumombus sid Makedonia dot i poduan diri, ong muli-no antad sid Makedonia, mapit-no vagu sid Korintus. Rontob-po-no, a-nokosunu, tu varo sampit dau om varo gulou sid Korintus di sinumaap di rasul sampai minongitung iosido dot osuhul ong turus muli iosido sid Efesus dot amu-no mapit vagu sid Korintus. Suvai nasalasai it a-ko piro o hal om mongumba-ogi vagu i Paulus magandaha sid dioti. I harati, it umba di dino tanid mantadko i sid 1. Kor. 16,5. Sabap a-nokosunu it umba laid diri, varo pamarasan sid Korintus dot aso tantu-tantu i boros om umba di Paulus, tu minsanko mongoho iosido, nga kakali omuon dau it oho dau. Manjadi mangakun i Paulus dot nosimbanan dau it umba laid dau diri. Topot ino dino okonko hal dot a-netung, inoi nga varo sabap. Ino-no it ongoumba dau om kolumbatasan dau okonko hal di dau do ginavo, inoi nga isuhut di kenginan om suhu do Kinoringan. Sabap ino, i boros di Paulus okonko mihaba-haba, gam notontuan di kenginan om katapatan do Kinoringan. Sabap otopot i Kinoringan, i rasul bai kadapat manangamin di boros om katapatan do Kinoringan, aso vokon. Kagi, kondiri di Tuhan Yesus Kristus o sasi om sijil di katapatan dino, i nihabal-no laid sid Korintus, okonko lumbok. Tu i rasul bai uripon om ponuhu di Tuhan dau, i Paulus kondiri om Silvanus om i Timotius miiradi. Enizo ioti nokosokot om nokototol sid Tuhan dioti, i rasul songkoruhang om ioti ulun Kristian sid Korintus, gam notumbukan di ngaran di Kristus (do Kristian ioti) om tinahkan di tanda do Sundu. Ino pongoretan tanda, ino-no o harati, ong monobus do valai ko barang dot agazo o horogo, hiza di miupakat do sera mamayal di barang dino, manahak-no laid do hopod peratus i horogo iadko tanda dot otopot-ko dumagang ko monobus. Ong amu osunuan i monobus, ololob-no i hopod peratus i nokogulu. Ino hopod peratus dino mad tanda do pinipangaan di janji midagang ko mitobus.

Ong varo sumaap it a-ko piro it ulun sid Korintus diri, iti-no i timpa di Paulus kondiri di piumpugan dot ulun Kristian i nokembulai antad sid usaha dau o tumbuk dot i Kinoringan minongimbulai di piumpugan di Kristus sid Korintus (1. Kor. 3,11 i Kristus ot origi di piumpugan dino), ino-no i kopodsuan dot i Sundu dot Osusi o mangagazad di piumpugan om it ipat-ipat it ulun Kristian. Ino tanda di kopodsuan dino mad sijil do nasanganu do Kinoringan it ulun Kristian. Sabap it ulun dino hinatul di Sundu dot Osusi. Varo-po boros di Paulus di iadino sid Efes. 1,13 om 4,30, ino-no, notumbukan-no di Sundu dot Osusi it ulun Kristian, ka. Isai-nopo it hinatul di Sundu dot Osusi, nokotorima-no di tanda di karajaan do Kinoringan di rumikot-ogi, nakatanda-no om nakatantu-no laid di didino.

3. I sabap dit a-nokosunu i Paulus magandaha, ino-no i surat do romou 1,23- 2,4.

Ino-no i sabap dot a-nokosunu i Paulus magandaha, minungkok-po i Paulus, tu minomuhobo-po iosido , tu sumakaban iosido do hungot sid dioti pinozom-ozom-po dau i gulou sid Korintus. Ong kandaha koduruk i Paulus diri, a-milo-milo osusa iosido mamajal om potorong iosido dioti dot okodou o hoturan om pamarasan do mangagaranggai dit ongokaraatan om kinolonduan om kinovunsuto (1. Kor. 4,21 om 5,3..) Tu elaan di rasul dot amu-no otubis om amu-no mongutip-po iosido momoros ong mamajal dioti sampai apagon it ongoulun tumorima di kovosihan dau, gam pangalasu om pokodou-no iosido di ginavo dit ulun di kisala. Iti-no o sabap dot amu minamanau koduruk i rasul kumaa sid Korintus. Tu i kenginan di Paulus, monulung om pemumui, okonko mongohukum ko momorinta di piumpugan (1. Kor. 7,35). Sabap i rasul di Kristus mangatod di katamanan antad sid Kinoringan, okonko hukum om kapanalaan dot ulun.

Mad varo-po pangalaman di Paulus sid Korintus dit okonko noboros om nousul-no. Na i kinandahaan dau diri varo hal dot banalko amu kopionong ioti, tu varo't ulun di tigran di Paulus. Amu tinumorima ioti di kovosihan om imuhun di Paulus, gam sumana om sumaap di Paulus. Iti-no o sabap do minonurat

vagu i Paulus dot iso o surat i retanko surat romou, gima i minonurat i Paulus diri miulam-no do romou dau mihi-tihi sid surat dau diri. Insanpo dino manarang iosido dot i tinomod di surat dau, ino-no pemot dioti di kogofoo di samod dau ponong sid katagan om kopudan do piumpugan.

4. Mad nasalasai i kopidukaan di piumpugan om i Paulus 2,5-11

Biano om mimbulai-ogi it a-ko piro sid ayat do nunu i hal dot a-kopionong i rasul om it ongokorintus diri. Topot kakali amu alanta banal ino. Ino-no dati o najadi i hiza do sid Korintus i Paulus diri. Varo't ulun sid piumpugan di pakaraat di Paulus. Na i piumpugan di nokening di gama di iadino minotosi, minsanko elaan dioti dot amu otopot i boros dino. Iti-no o sabap do mad nokotombil i piumpugan sid gama pakaraat om manala di Paulus. Iti-no o sabap do manarang i Paulus dot i gama pakaraat niuli sid piumpugan, tu amu nokobongut ko nakadahava di gama pakaraat di Paulus. Ong sid 7,8-12 monuturan i Paulus do nakangaat iosido do boros sid minongusiba di ngaran om gama di Paulus. Amu rinait di Paulus i ngaran dit ulun dit araat o gama ko i nunu banal o vaza dit ulun dino pakaraat di Paulus. Suvai nokoponurat i Paulus di surat di retanko surat do kiromou om nohorotizan-ogi di piumpugan sid Korintus i hal dino om tinasil-ogi dioti it ulun dit araat o gama dau ponong sid rasul. Norongou-po di rasul do nasalasai-no i hal dino, inonsug-no di Paulus i piumpugan monginsasamod dit ulun di nasalano, supaya it ulun dino amu otongob o ginavo, gam kemumui-no vagu sid piumpugan. Sabap i di Paulus do kiroon, ong sukul nohukum-no i karaatan dit ulun dino sampai oupus-no it ulun dino do sampai mokiada di karaatan dau, atag dot insasamadan-no. Sabap i tinomod mongohukum dot ulun sid piumpugan okonko i kotonusan om kosusunsuban sid piumpugan, inoi nga i kemumuzan dit ulun sid atag o ralan om sid piniizaan di piumpugan. Ong sukul otuluk-no i hukum (1. Kor. 5,5), koguli-no it ulun dino om sumuhut-no vagu di hoturan sid piumpugan om i piumpugan nga tumorima-no vagu dit ulun dino do iadko obpinai. Ong nasalasai-no kavi ino sid piumpugan, i Paulus nga nikiro-no i hal dino do nasalasai-no om niada i karaatan dino. Sabap sid gorija di Kristus amu atag do pohonuton it ongokaraatan do sampai pempatai, ong kodung nakada-no i hal dino. Baiko i vozoon do rogon ot ozi dot aso kengkadan do karaatan om kopisalaan sid pialatan dot ulun. Tu iosido sumaap di gama dot ulun miandus om misasamod, gam mongonsug dit ongoulun misasana om misasaap (Yakobus 3,14...)

5. Sid Troas om sid Makedonia i Paulus 12-17

Mongimbulit-no vagu i Paulus dit kinapanahan dau diri. I nokorikot iosido sid Troas, nopurimanan-no dau dot ahatul dara sino i tugas dau mangahabal di Habal do Kovosihan. Mad nosodia-no it ongoulun mongining om inindamo-no iosido mintoron sid Troas. Topot oruol i ginavo dau dit aso-po habal antad sid Makedonia. Sabap amu-po nokouli i Titus antad sid Korintus. Iti-no o sabap do hinumago-no i Paulus kumaa sid Makedonia do niopung-no i gamaon sid Troas. Tisamung di Paulus i Titus sid Makedonia, tu monungkap di habal antad sid piumpugan sid Korintus. Notungkapan-po iosido, minintoron-no i Paulus mongusul di pangalaman sid panau dau. Ino-no o kompuso di tuturan dino, suvai sid fasal 7,5.. om varo-ogi, ino-no kuran i katamanan di Paulus di notungkapan di Titus, i nokouli-no antad sid Korintus pinahabal do nasalasai-no it ongohal sid Korintus om ahatul-no vagu i piumpugan sid Korintus. Ong siti, turus mongindazou i Paulus di kohormatan om kogofoo di gama do Kinoringan mamakai di rasul do iadko sakup dau mimbaris sid kinamanangan di Kristus. Nisuntu di Paulus i kosurutan di Habal do Kovosihan do iadko mabaris it ongosojal di Kaisar sid Rom, hiza di muli i tentara antad sid rumpak dot kiumpakai ioti om kivuntun do notutudan do tanda di kamanangan om kohormatan di Kaisar. Ino gama di sojal di Kaisar dino iadko i gama dit ontok dit Adau do Malaysia do mabaris i mata-mata om sojal om razat do rumazou di kogofoo do negara Malaysia. Sino dino ogumu it ongobondira om varo-po bajil do tutudan (vuntun) ko it ongotarabang tumulud do kilisun om varo-po bungaapi. Ombo it ongosojal di mabaris sino di nakamanang ioti sid rumpak dit opongo-no, kadapat do hormat om bintang om garal. Topot it ongosangod di natangkap-no om ginazat-no sid kabarisan, namalu-no om nanangan do kapatai ko nouripanan-no. Manjadi sid suntuan dino manarang i Paulus

kananganko it ongoulun di nokening-no di Habal do Kovosihan, a-milo-milo osusa do tumimpa. It iso kotorima di Habal do Kovosihan sampai kamung mabaris sid kamanangan do Kinoringan. Topot ong i vokon di mangamu ko sumaap di Habal do Kovosihan sampai sumaap di kovosihan do Kinoringan. Na i rikoton dioti sid kobinasaan.

Ong i tugas di rasul mad it avau do vuntun dit ovongi nigili sid ongoulun di kotutunan do Kinoringan, sabap i rasul pogili sid ongoulun dot isai om kuran di Kinoringan mongingud dit ongoulun sumuhut di kenginan dau. Iri-ogi tumimpa it ongoulun ponong sid kosopulan ko kobinasaan. Noboros-po dau i iadino, sodirizon-no di Paulus i kopotuto sid tugas dino. Sabap nokotimpuun-no i hiza diri do varo't ongoulun di pazazad di Habal do Kovosihan do iadko ponsohorian dau. Tinarang-no vagu di Paulus, iadko sid 1. Kor. 9 dot iosido amu mokigaji ko mokibalanja, ong iosido gima nasanganu-no di Kristus iadko it uripon dit okonko gojian.

B: 3,1-6,10 I hormat di tugas di rasul, minsanko opogos om okugui-po iosido

1. I piumpugan sid Korintus o surat do katarangan di Paulus 3,1-3

Lumombus-po i Paulus do manarang di dau do hak om tugas. Mad varo't ulun di momoros do manala di Paulus retanko i Paulus bai mokindazou om mongolombok ko momuji di kondiri dau (4,2; 5,12; 10,12). Minoniim ioti mongorongoi di ngaran di Paulus, iadko i boros dot okonko rasul i Paulus, ka laid diri. Na monuli i Paulus di gama dioti manala dau. Monginsosok iosido do kuran ong iosido, osusa-ka mokitahak ko pogili do surat katarangan di hak dau, dot ong otopot iosido o minongimbulai di piumpugan do Kristian sid Korintus. Gam i piumpugan sid Korintus o surat katarangan di hak di Paulus. Tu ong okonko i Paulus o minangahabal di Habal do Kovosihan sid Korintus, tantu aso piumpugan sino. - I hiza diri varo hoturan sid ongopiumpugan di Yahudi dot isai-nopo i mirimpanau magandaha dit ongopiumpugan vokon, suvai varo surat katarangan antad sid piumpugan dit inantadon dau, supaya sid piumpugan vokon atalahas do kihak it ulun magandaha om monuduk. Na sid momuruvak o kabarasan di Paulus dot ong iosido kondiri amu osusa do varo surat do iadino, ong sid Korintus, gam i piumpugan do Korintus, o mad surat katarangan di rasul Paulus (1. Kor. 9,2), dot i kopogovian di gama di Paulus ponong sid dioti dino, antad sid agazo o ginavo dau magavi posurut di piumpugan, nga banalko alanta sid sokoviai it ongoulun. I mad surat katarangan, ino-no i piumpugan sid Korintus, i ginama di Kristus do minamakai di rasul (palad-za) porikot sid dioti di surat antad sid Sundu do Kinoringan, okonko bai ginama sid karatas om dawat om unturu do riniba. Ong manarang do iadino i rasul, mongohodom iosido di hopod pinonuhuan di nisadi sid vatui, ginama di Musa. Ong i bahanda di nabi Yeremia (31,33-34) sid janji vagu do Kinoringan isurat sid ginavo dot ulun i kenginan do Kinoringan okonko bai sid batu.

2. I hormat di tugas di janji vagu katalib di janji laid 4-11

Pihabagon di Paulus dumahava manantu di garal do rasul iosido om manarang dot okonko antad sid keloo om kosilato dau o nakagama di iadino. Okonko cadangan ko linantik do piumpugan. Okonko vangun antawa kakansango do riniba, inoi nga i harapan dino nensanan antad sid Kinoringan i minomihot om minorigi di gama di Paulus om i kosipan dioti sid Korintus. Kinoringan o pinatatap di Paulus do rasul iosido, gima i janji vagu di nokembulai sid di Kristus. Nakalanta-no sid di Kristus i hoturan vagu do Kinoringan om i rasul o ponulung di hoturan dino. Ino-no i hoturan sid Habal do Kovosihan om hoturan di Sundu dot osusi. Manjadi ong kodung ponulung di hoturan dino, okonko iosido o mangahatul, inoi nga hoturon iosido di hoturan dino. Na i pitonidan di hoturan laid nga manarang-no i Paulus sid a-ko piro it ayat di Buuk Kolobusan 34,29-35, ino-no, i pinonuhuan diri, nga natantu-no sid ongohurup di boros diri, dot ikid hurup dino manalahas di kolonduan om karaatan dot ulun di nakaranggal di pinonuhuan. Sabap ino, i tugas dit ikid hurup diri bai manala om mongohukum di karangalan dot ulun dit amu obinsuhut di kenginan do Kinoringan. Topot ong i hoturan vagu dino

hoturan di Sundu dot Osusi di potugas di rasul monuduk om mangagazad ponong sid koposizan om vangun vagu.

Ong i pinonuhuan bai manalahas di karaatan om karanggalan dot ulun ponong sid kobinasaan. Topot ong i Habal do Kovosihan pogili di janji vagu do Kinoringan sid riniba, supaya tumorima i riniba di Sundu dot Osusi kumaa sid koposizan penlaid. Sabap ino, i tugas di rasul lobipo mantadko i di tugas di Musa, ino-no it ulun, i minangagazad dit ongoulun dot Israel lumabus antad sid kinuripanan sid Masir. Topot amu mongusiba i Paulus di tugas di Musa, gam mongindazou iosido dot i tugas di Musa diri kikohormatan, iadko kiompiling i vuoros di Musa di nakasamung iosido do Kinoringan sid burul do Torsina. Topot ong i hormat di rasul, it uripon di janji vagu, lobipo kiompiling, gima it ompiling dino om i kohormatan dino amu tumanus, gam kiguna om mopud sampai penlaid.

3. I Kristus o minongidu di kurundung di janji laid 12-18

Sid kobuatano om tuturan di Musa di sid Torsina iosido manalahas-no i Paulus di pibidaan di dau do tugas om di Musa. Sabap i razat diri a-kasakap sumonsob di vuoros di Musa, tu opondou-ogi. Sabap nokotoguvang i Musa sid Kinoringan sid burul, natakapan di Musa i vuoros dau do iadko monokop di janji laid diri. Iri-diri mad tanda do nobolou ioti dit amu kogoos tumorima di janji do Kinoringan sid tanga do belantara. Mad kakali nokosusut-no i kohormatan om kogunaan di janji laid diri. Gam it ongoulun do Yahudi di kakali bai humarap sid janji di Musa dino, kakali mad bolou om kakali nokosusut i janji om kovosihan do Kinoringan dot amu-po emot ino sid dioti. Minsanko mamasa ioti di Kitab di Musa, kakali dot amu-po otutunan dioti i harati om kosondoto di janji do Kinoringan sampai kakali mad natakapan i hoturan di Musa. Topot ong i rasul, tanid-no o kopurimanan, tu kogoos di katapatan dau sumasi di janji vagu om i harapan dot ulun Kristian. Katama iosido momoros dot okudik nga aso't alazan ko isusuton, gima i hoturan di Sundu dot Osusi o pinatama di Paulus. Ong kodung i Kristus-no o mangahatul, varo-no kobebasan sampai alanta i kohormatan om ompiling di Habal do Kovosihan. Ino-no i hoturan vagu dit antad sid Sundu. Na ino dino okonko bai pangalaman di rasul, inoi nga ensanan it ulun Kristian nga nakamung om nokovoza-no sid pangalaman do nakanu-no dit ompiling di Sundu. Iti-no o tinomod di Paulus momoros dot, i tokou nga iadinoi. Kosonsob tokou-no kavi di kohormatan do Kinoringan, ka. Ong i bansa dot Israel diri mad okodou o ginavo sumaap do Kinoringan di natakapan i ginavo dioti. Topot i piumpugan om gorija di Kristus obebas sumirot di kohormatan do Kinoringan. Ong i Paulus mamakai di suntuan do soromin, banalko tanid o harati siti om i sid 1. Kor. 13,12. Ong sid 1. Kor. 13 i soromin ngaran-no mongimbulai di kobuatano do Kinoringan. Ong siti osuntu i kohormatan do Kinoringan sid soromin di palanta banal dit ompiling di kohormatan do Kinoringan. Sabap ino, i kematan di iadino ivaza sid Sundu dot Osusi i patarang di mato di piumpugan. Okonko i mato dot ulun ot atarom memot, inoi nga i Sundu posonsob di mato tokou. Ensanan tokou ulun Kristian atahakan di kematan di kohormatan di Kristus.

4. Amu rumosi i Paulus, gam atatap i vaza dau mongusaha di tugas dau 4,1-6

Kakali polombus i Paulus manarang di dau do vaza mongusaha di tugas dau do rasul iosido. I nunu-nopo i gama pakaraat di rasul, tantu amu onong. Amu atalou iosido, gam osiou dot amu rumosi di nunu-nopo o gama do sangod monobon di panahon ko momogos di rasul. Aso gama di Paulus momudali di Habal do Kovosihan ko mansahari sid tugas dau. Gam i Habal do Kovosihan kondiri o pasasi di katatapo om kotulido di rasul. Baiko it ulun di natarik di kuasa do kotuvangan om i vozon do rogon o kadapat manala om mangaraag di rasul. Insan-po dino pogili i Paulus di pibidaan di kuasa do kotuvangan om i kuasa do Kinoringan di monguasa dit ongoulun, ponong sid kotuvangan om ponong sid kohormatan do Kinoringan. Songkuro-nopo i gama dit a-ko piro it ulun mongusiba om pakaraat di Paulus, a-kotori ioti di ginama do Kinoringan mongimbulai di kohormatan dau sid di Kristus, om i

gama di Kristus polombus di kohormatan dino sid riniba ivaza sid ongorasul. Ong it ongorasul okonko ulun di kikuasa kondiri ko kihak kondiri, inoi nga ponuhu ioti om uripon di Kristus. Sabap tu i Kinoringan minongimbulai di hiza vagu di kianavau, iti-no o sabap dot i rasul nosuvangan di kanavaho dino ponong sid kemot-no it ongoulun do nunu i kohormatan do Kinoringan.

5. I kapagasan di rasul sid tugas dau om i harapan dau sid kotulukan di karajaan di pakansang di rasul 4,7-5,10

a) i kapagasan dau di kolu di kapagasan di Yesus 4,7-15

Nouji-po dau i kohormatan di Kristus do tanda di tugas dau do rasul iosido di Kristus, iri-ogi mongusul-no iosido do kuran i kobuatano di gama dau suvab-suvab, ino-no, ogusa iosido om opogos, ousiba, okiro-no do iadko tai do riniba. Ong mamasa tokou di boros di Paulus di iadino, mad ogolivong tokou, tu ino duvo o hal dino misaap o buatan. Ino kapagasan di Paulus mad pokoulau om pokovudut di kohormatan? Ulun do Yahudi om Yunani, sompi mongitung do kodung ulun di ponuhu do Kinoringan, a-milo-milo nga osinang om osihat om akansang om kikuasa di nunu-nopo. Topot ong i Paulus manarang dot i kohormatan do Kinoringan om i kapagasan mivaris, tu sid kapagasan o nakamang i Kristus diri.

Peradon di Paulus i Habal do Kovosihan i barang di banalko kihorogo, iadko i moligun, ino kiluvang antad kodori, it ooling dot ulun do songkuro kagazo di horogo dino, gima barang dot hinotusan tounno ot umul, i rasul kolu, tu bai pongizanan di barang dino di mangatod di barang. Topot kakali dot amu koubozo do horogo ko hormat di barang dino. Tu iadko i rungou dit obimbabak i ponuvangon dot amahal o poizonon banalko amu kopionong, i pongizanan om it izonon, nga kakali inanu i Paulus om i kinoruhangan dau dot ulun om rasul, tu paatod om poromot sid ongoulun di Habal do Kovosihan. Okonko i pongizanan o mongoguna dit izonon, inoi nga it izon dino mongoguna om mamakai di pongizanan ponong sid kohormatan om i kuasa do Kinoringan. Okonko i rasul o pakansang di kuasa do Kinoringan, inoi nga i kuasa do Kinoringan o mamakai ko sumuvang sid kokuguzo di rasul.

Sid apat o hal dino pogili i Paulus di vaza di kuasa do Kinoringan mamakai di kokuguzo om kapagasan di rasul ponong sid kohormatan. Ino-no, opogos iosido di sokoviai, nga kakali dot amu osompitan. Ong osompitan, kakali do varo vazaan. Ong ogusa, nga kakali dot otunda do Kinoringan. Minsanko dumpahon, nga kakali dot amu obinasa. Ino-no o tanda dot i rasul kopurimon di kapatazan di Kristus om i kogulianan dau di kiguna bahagi di piumpugan di kasanganu di koposizan om kosinangan. Mad mongontok i Paulus di piumpugan, supaya varo kopudan om koposizan dioti dino. Antad sid kapagasan om kopogovian di rasul sumurut i kovosihan dit ongoulun di kemumui om i gama dioti monorima kaseh om mongindazou do Kinoringan.

b) Ong matai ko humino i guvas (vangun) nga invoguvan i vangun vagu 16-18

Mongitung i Paulus dino kapagasan dau do mad soumul toropatazo do mad okudik-no o vaza humarap di koposizan om vangun vagu. Mamakai iosido di pongoretan dot, it ulun di sid soribau om i sid saralom. Rontob-nopo, ino vaza monodiri amu oubas ong Momogun, it ongoulun Yunani diri di minonodiri guvas om ginavo. I di Paulus do kiroon, ino-no i hiza di didino (Rom 6,6; Kol. 3,9; Efes. 4,22), ino-no i hiza di tumalib, hiza di nohoturanan di kasalaan om karaatan. Ong i hiza di vangun vagu nohoturanan di Sundu dot Osusi ponong sid karajaan om hoturan di Kristus (Gal. 2,20; 4,19; Kol. 3,10). I hiza laid tumanus, topot i hiza vagu sampai penlaid. Topot iri-no ko iri. Emvoguvan i ginavo do suvab-suvab, ino-no o harati, tumorima it ulun di mangasip di harapan di koposizan penlaid, minsanko suvab-suvab iosido nga anangan do kapagasan. Om i harapan dino pakansang dit ulun Kristian, minsanko opogos iosido dot ahatul o gama. Nelaan di rasul dot i kapagasan di hiza bianco tumanus. Topot i kohormatan di karajaan do Kinoringan, tantu aso kovian.

c) I harapan di Paulus sid vangun vagu om i karajaan do Kinoringan 5,1-10

Moniim i Paulus do poluu di kobuatano di vangun vagu sid gama dot ulun di mizon sid belantara di soumul mitorumaliu, ino-no, kodung maliu sid tempat vokon, huzason-no i basalag om lumombus sid tempat vokon. Sid tempat vagu apakai-no vagu i babaal laid di basalag, tu mubasalag vagu. Rontob-nopo, i di Paulus do panarangan, i kapatazan dot ulun iadko i kohuzasan di basalag. Topot rumangkat it ulun sid valai di ginama om nosodia laid do Kinoringan. Ino-no i guvas om koposizan penlaid ko i vangun vagu. Ino kosungguvo sid karajaan do Kinoringan, ko retan do surga, it intoronon sid tinoguvangon do Kinoringan, okonko palad do riniba o minangagama ko minamakal, inoi nga antad sid kenginan om kuasa do Kinoringan. Ong sid kiroon di Paulus i surga kakali mad tempat sid sampaping dit avan, iadko i kiniro dit ongoulun kodori diri di kakali minongitung di pomogunan iadko pinggan dit arantai do nokuluban dot avan i pinggan dino om sid santak, ino-no i surga, it inintoronon do Kinoringan. Na kiniroon di Paulus, sid surga nosodia-no laid i guvas vagu. Iadko sid 1. Kor. 15,35... humarap i Paulus sid guvas vagu, it kourugan vagu do Kinoringan sampai i kapatazan dot ulun iadko kosimbanan-no di guvas di obintanus do guvas dit amu-no tumanus, gam sid penlaid o rikoton. Na aso boros di Paulus do mihiza di kapatazan otukal-no i guvas om i guvas-no do osundu. Bai it otopot, nosodia-no om varo-no. Aso boros dau do sera om otorima-no i guvas vagu dino, tu ino dino sumuhut di kenginan do Kinoringan. Bai sid harapan di Paulus di iadino agazo o ginavo om lumangad i Paulus do tumorima-no koduruk di guvas dot osundu (Rom 8,23). Sabap ong kakali kiguvas dot obintanus, ogumu o kapagasan di Paulus sampai tilabus-no iosido sid guvas om kobuatano dino. Na pad-nopo iadko i koubasan di Paulus, tu misalagingis o suntuan do pakazon dau manarang. Kogulu-po i basalag om i valai di nosodia-no laid, iri-ogi pakazan (kosulungan) dot ulun dot i kapatazan iadko mongimaro. Mad i kiroon di Paulus, ontok di kapatazan mananus i kosulungan di guvas dot osundu di guvas laid. Mad i macik sid TV dot it ulun di bai ruhak o pakazan, tigogi sumiliu dot ulun di banalko avantang o kosulungan, iadino o kiniro di Paulus diri. Ino-no i kalalangad di Paulus, ino koimaraan vagu miovoli banal di hiza di kohuzasan di guvas laid, supaya aso hiza sid pialatan dot mad nokendai it ulun. Rumosi i Paulus dot amu kopihiza i kapatazan om i kosuvangan sid karajaan do Kinoringan. Sabap ino i rasul dit asarok sisiri ong apatai dot ulun, amu tipatai, inoi nga tiramit-no di kosulungan di guvas dot osundu (1. Kor. 15,53-55).

Ong sid kiroon dit ongoulun Yahudi i hiza diri varo korosizan do varo hiza sid pialatan di guvas laid om i guvas di ogulian. Rinumosi it ulun Yahudi do varo hiza dot natanus-no i guvas laid, nga aso-po guvas vagu. Topot ong it ulun Yunani, tanid o kiniro dioti, ino-no, kodung matai it ulun, obebas i hatod dot ulun, tu nakalabus-no i hatod antad sid torungku di guvas. Na i vaza di Paulus manarang, kakali mamakai di notud dit ulun Yahudi do varo tolu o laang, ino-no i guvas di tumanus ko guvas di vangun laid, iri-ogi edu-no i kuhakop di guvas laid dot nedu-no i mad hatod ko sundu. Sid tohudi, ontok di kenginan do Kinoringan, tumorima it ulun do guvas vagu. Topot varo-po panarangan di Paulus dot nosodia-no laid do Kinoringan, gam nakapanahak-no di Sundu dot Osusi do iadko tanda do kotontuan. Manjadi ino Sundu dino mad kotimpunaan dit ulun om vangun vagu, minsanko kakali it ulun sid tanga diti vinangun. I tanda di kotontuan (1,22) manantu di kotulukan om kopupusan.

Tanid-no vagu o vaza manarang, ino-no, i hiza vagu, ino-no i hiza do sid tinoguvangon di Tuhan. Ong bianco, mad osodu antad sid Tuhan, dot i dara harapan, mobpuput-no sid Tuhan ko muli-no sid Tuhan (Fil. 3,20) Topot suvai sid tohudi't adau om kentoron-ogi sid Tuhan (1. Tes. 4,17). Na sid sokovia i it ongopongitungan om ongoharapan dino okonko i kenginan om kiroon dot ulun o kiguna, inoi nga i kenginan do Kinoringan, i mangahatul di sokovia i iadino. Ong i Paulus diri o minongitung, amu-no songkuro om korikot-no vagu i Yesus monuluk di karajaan do Kinoringan, iadko i noboros laid sid UR 1,8-11. Ong it ongoulun di matai gulu di korikatan vagu di Yesus, aso't elaan di Paulus manarang do siombo om kuran inot ongoulun dino, isuhut di pongitungan dot ulun Yahudi diri. Bai iso ot harapan dau, varo kogulianan dit ulun minatai ong korikot-no vagu i Tuhan (4,11-14; 1. Kor. 15,51-52; 1. Tes. 4,14...)

Topot ino harapan dino kotombil sid kobatano om gamaon dit ulun Kristian, ino-no sumuhut it ulun Kristian di kenginan do Kinoringan, supaya embaran iosido sid hukuman penlaid. Aso bida, sitid pomogunan ko sinod karajaan do Kinoringan, iri-no ko iri, tu atag dot it ulun sumuhut om monuluk di kenginan do Kinoringan. Amu atag i boros dit a-ko piro it ongoulun di momoros do, Suvai lumohing-oku-no om tumatap-oku-ogi sid tinoguvangon do Kinoringan, ka.

Ong sid Fil. 1,23 tanid o kiniro di Paulus, tu i sid torungku iosido, varo boros dau dot, *engin-oku-no matai, tu muli sid di Kristus*, ka. Ko sid Rom 8,38.. minsanko i kapatazan amu kopotongkizad dit ulun sid samod di Tuhan, ka. Na it ulun dit amu mangasip sid Kinoringan, kodung apatai, atanus-no, tu aso harapan. Topot it ulun Kristian ong matai, mad ulun di baiko modop sid saralom di Kristus (1. Tes. 4,16) Sabap i Kristus-no o Tuhan dit ongoulun di mizau om minatai (Rom 14,8). Minsanko amu ensanan kavi di Paulus manalahas i kavazao om kokukurozo di kapatazan om kogulianan dit ulun minatai, varo duvo o pongitungan dau do iadino, keso, A-milo-milo monuluk i Kristus di kosimbanaan di vinangun do varo kogulianan di sokoviai it ulun minatai, sabap i kokuasaan do Kinoringan monguasa om monuluk di karajaan om hoturan do Kinoringan sid ensanan i vinangun (Rom 8,21...; 1. Kor. 15,24.... Ino-no i kosungguvo, i kogulianan ko i kosimbanaan di sokoviai it ongoulun (1. Tes. 4,12-18). Koduvo, ipat-ipat it ulun Kristian i nakamung sid piniizaan di Kristus kanu di Sundu do Kinoringan sampai mopud sid di Kristus (Gal. 2,20), do sumurut sid piniizaan dino, minsanko iadko notupak-no i kapatazan, gima notori-no i kapatazan. Ino-no rontob, ino piniizaan dino suvai otuluk, ong kembulai i hoturan vagu.

d) I kohormatan di tugas di rasul sid gama miaandus 5,11-6,10

Sid kiroon di Paulus bai i samod di Kristus o kiguna om monguasa dit ulun Kristian. Sabap iadko i Kristus i minanahak di kondiri dau mongontok dit ongoulun o gama dot ulun Kristian manamod dit ulun vokon do sampai amu mongitung di dau do kopolisan. It ulun Kristian nokezo di nasip di Kristus. I kinapatazan di Kristus minongontok di kapatazan dit ensanan i riniba dot i panangan di kinapatazan dino, ino-no i kopolisan vagu. Ino kopolisan vagu dino amu monongkudau ko mogihim di dau do kohuntungan om kosinangan, inoi nga mopud om mongusaha sid samod di Kristus, ino-no tumalad di Kristus sid gama dau manapul om monulung dit ongoulun (Gal. 2,20; Rom 14,7-9).

Imatai it ayat 16: i boros *popipotuon* sid Kitab Momogun, varo nalazan i hurup, *popipotuton* om onong-ogi. I harati di boros dino, It ulun bianco amu kotutun sid kobatano do riniba. Manarang i Paulus dot amu atag do kakali mongitung di kobatano dot ulun isuhut di kavazao laid dit aso-po Minananggung. I hiza dot i Yesus kakali sid tanga di kinoruhangan dau, nga notoliban-no. Aso boros di Paulus do nakatambi iosido di Yesus ko amu guluko i kinapatazan di Yesus. Topot kuran-kuran, ino dino okonko kiguna bianco. Sabap bianco varo kavazao vagu om vangun vagu. Iadko i Kristus di nakanu-no di vangun vagu, ipat-ipat it ulun di mangasip, nga pengkaa dino, tu nakamung-no sid vangun vagu. Ong nokosikul-ogi i Paulus, i kakali-po Saulus o ngaran i hiza diri, sid Yerusalim sid sikul do Parisi, a-milo-milo varo koriat memot di Yesus ko kovovoza-no iosido dit ongoguru dau di minongingsosok di Yesus diri. Topot ino dino, nga notoliban-no. Iti-no o sabap dot aso boros di Paulus do mongohondom-po di hiza diri, tu i kobatano laid diri natanus-no om notoliban-no. Ino dino retan di Paulus urug om vangun vagu. Na ino kobatano vagu dino okonko bai hal do kobatano, inoi nga kiguna ponong sid usaha dit ulun dino, tu it ulun vagu najadi-no dot ulun di miaandus om popiaandus. I gama di Yesus diri sumurut sid gama dit ulun Kristian popiaandus. Ino-no i garal om pangkat dot ulun Kristian. Iadko i boros di Yesus diri (Yahya 20,21) *iadko i gama dit ama-ku monuhu dohon o gama-ku monuhu dikou*, ka, ino gama di Yesus, i mongimbulai di kopioondusan do Kinoringan o gamaon tokou ulun Kristian popiaandus om mangahabal di kosunuan di kopioondusan do Kinoringan.

Sid ongoboros dino manantu i Paulus dot i kavazao dot ulun Kristian om i hal di karajaan do Kinoringan, varo duvo o harati om duvo o pangarantaban, ino-no, keso, iadko i boros di Yesus sid kazu do sangkap dot, Notuluk-neno, ka, notori-no i kuasa do huntung om i kapatazan, i vinangun laid om i

vozon do rogon, i minomogos di vinangun om riniba, nga kakali varo-po hal. Koduvo, ino-no, Amu-po alanta i karajaan om i kamanangan di Kristus. Gam sid 6,1 mongimbulit i Paulus di boros laid di Yesus sid Kaparnaum (Luk. 4,17-18: Bianco...)

Kananganko i kopioondusan, okonko pongitungan do riniba o nakagama, inoi nga Kinoringan. Kondiri Kinoringan-no o mongurug vagu di riniba sid saralom di koposizan om kinapatazan di Kristus, okonko i riniba o minangandus do Kinoringan iadko i kiniro dit ulun Yahudi om Yunani ko Momogun di monogit, tu mangandus dit ongorogon o tomodon. Ino retan do kopioondusan miabali o harati do kapangadaan do sala, tu i nunu-nopo i sid pialatan do Kinoringan om i riniba, tinanus ko niada do Kinoringan, gam ong sid retan do kopioondusan varo lobipo o harati, ino-no ong kodung nokopiandus, nokopezo-no om nokopiso-no di Kinoringan om i riniba. Na ino nagama di Kristus nakaraliu-no sid kinoruhangan om it ongorasul dau. Sabap i rasul mongontok di Tuhan dau. Ong varo vaza di Paulus mangahabal do iadino, sukungon iosido do Kinoringan om i Kristus. Sid panarangan di iadino humarati tokou dot i di tokou do khotbah, nga okonko bai boros di kabang om ginavo tokou, inoi nga ino khotbah tokou nga sukungon om lopolisani di kuasa di Sundu do Kinoringan (Mat. 10).

Iso-po dino o nivagat i Paulus, ino-no i kosimbanaan om kopigontian i Kristus, ino-no, it ulun dit aso sala topot jinumadi dot ulun do kisala, iadko iosido-no o rumpungan do sala (Yahya 1: minonoruntud iosido di sala di songriniba, ka). Om it ulun om i riniba di kisala nga nembanaan-no. Ino-no it urug vagu om vangun vagu. Iri-ogi posondot i Paulus sid dioti sid Korintus dot iosido, nga ponuhu om ponulung om uripon do Kinoringan, sampai atag do torimaon i boros om tudukan dau dot okonko alang-alang o gama mongining om mangasip. Sabap kodung ahabaran-no di Habal do Kovosihan, nokorikot-no it ontok dot it ulun momili-no dot ombo o suhuton dau, tumorima sampai mangasip antawa pakaso do Kinoringan. Amu kadapat pavantazon-po i kopomilihan om kolumbatasan dino.

e) Tumatap om tumahan i rasul sid tanga do kapagasan om kosusaan, gima i kuasa do Kinoringan 6,3-10.

Kakali varo gama di Paulus dumahava di gama dot ulun pakaraat dau. Noboros-po om natarang-po i panangan di tugas di rasul do popiandus om mongontok di Kristus, mongohondom om mongusul-no i Paulus di dau do pangalaman sid gama dau posurut di tugas dau. Ong varo koubasan sid razat dot isai-nopo i kipangkat kadapat mangagama do hoturan bahagi di kondiri dau di tanid mantadko i hoturan bahagi di razat, retan do kodung kipangkat amu-no anangan do hoturan di sokovia, inoi nga varo hoturan dau kondiri, topot ong i Paulus, tanid o vaza dumahava. Aso gama dau mamalid ko pasadu dot ulun sid gama mangaranggal dit atag om apatut o gama. I gama di rasul, aso sisiu. Gam manarang i Paulus dit ongokosusaan dau dit apatut dara do mogidu ko momili di kagaanan o vaza om kantasu, gam sid tanga di kosusaan dino tinumatap i rasul. Na sid tanga dit ongokosusaan dino nokembulai i kuasa do Kinoringan di monungkod di ponulung do Kinoringan. Amu mokiakan ko mokitahak do piumpugan i rasul, gam iosido-po o kapanahak om koponompukan om koponulung di sokovia, isai-nopo it asampit.

C: Miandus di rasul om i piumpugan 6,11-7,16

1. Mindamo i Paulus di kopiizaan dioti 6,11-13

Tumoguvang vagu i Paulus di kezaan dau sid dioti do mindamo om mongimuhun o tomodon. Tinarang-no laid i kogosoo di ginavo om samod dau ponong sid piumpugan sid Korintus, mongogorot iosido dioti, supaya ioti nga amu-no orivot, gima kakali dot opiduvo o ginavo dioti ponong sid rasul om varo-po't a-ko piro o gama dot amu humarap om sumuhut di rasul. Mindamo iosido dot monuli ioti di kogosoo di ginavo di Paulus sid dioti do ginavo om kiroon ponong sid kopiizaan di rasul om ioti. Ino gama mongimuhun dino iadko it ama sid anganak di nokokodou ponong sid ama.

2. Pongontupaton dau ioti, supaya amu gumavul sid karaatan, gam tumatap sid kosusian 6,14-7,1

Tigogi varo-po hal di toguvangon vagu di rasul di iadko sid keso Korintus, ino-no supaya i piumpugan amu rumanggal di volit dit ugama do labus om i dang rogon. Tu it ongoulun sid Korintus minomoros dot, sokovia i kavasa, ka, amu-no engat it atag om amu i ponong sid labus ko sid kensasakahan om kaagazan om ogumu-po it ongohal vokon. Tu kodung nokemumui-no sid kopioondusan do Kinoringan, nokotongkizad-no sid kobuatano laid diri. Isai-nopo i nakanu di kabanaran di Kristus, a-no kavasa do monimbaru-po vagu do karaatan (5,21). I vaza di Paulus posuntu di gama dit amu atag, ino-no i paud do duvo o pangazam manarik do kurita ko radu. Suvai otimbang o gama monompuzung di paud om atag-ogi o gama manarik. Topot sid vaza manarik dino, ensanan nga amu atag. Ong sid kiroon do Momogun osuhul manarang sid pongoretan dot, Kadan-kou-no kumiobpuput dit ongoulun dit amu mangasip. Ensanan it ongosuntuan di pinakai di Paulus, iso-no o tomodon, amu atag i sokovia i vaza do iadino: i kabanaran a-kopiamung do karaatan, ko i Kristus om i vozoon do rogon ko i kosipan om it amu mangasip, i patong do rogon sid rinuvang do panambayangan do Kristian. Ino dino kavi amu atag do popiomungon ko kopigovulon. (Ong Momogun: Amu atag do pirusodon dot asin om i gula sid iso o pongizanan)

Mamakai kagi i Paulus do bahanda antad sid Kitab Laid, ino-no, I Kinoringan suvai mizon sid bansa dot Israel om osusi ioti dot amu gumavul-po dot asakau di dang rogon. Sabap i Kinoringan o minonusi dit ulun Kristian sid gama di Kristus, atag dot it ulun Kristian nga sumusui dot amu gumavul vagu sid asakau om araat. Suvai it ulun Kristian rumonok om humarap sid Kinoringan, ong amu pagavul iosido di kabanaran om karaatan, i gama sumambayang sid Kinoringan om i sid rogon, ko i kosipan om it amu mangasip.

3. Insan-po dino mongohodtol i Paulus di dau do gama kananganko i piumpugan 7,2-4

Magavi i Paulus mongogorot dioti sid Korintus, supaya miopuput vagu ioti di rasul. Dumahava vagu iosido dot amu otopot i gama dit a-ko piro it ulun manala di Paulus, retanko i Paulus minongindaraat dioti ko minangasau di piumpugan ko minomorinta dioti. Insanpo dino mangarait i Paulus dino boros diri, supaya opurimanan dioti i kogofoo di ginavo di Paulus sid dioti. Aso putut di gama di Paulus mongimbulit di kogofoo di ginavo dau sid dioti. Ino kagazo do ginavo dino amu engkod sampai sid kapatazan. Kagi, tu varo habal di Titus antad sid Korintus, humarap-no i Paulus sid dioti, gam mokindazou, tu ioti ot ipokindazou dau.

4. I habal di Titus om i vaza di piumpugan tumorima di surat di Paulus di mad surat romou 7,5-12

I boros dit a-ko piro ayat dino sumuput sid Fas. 2,13, ino-no, i habal di Titus di manantu dot i gama di Paulus sid piumpugan diri kiguna. Tu minangahabal i Titus dot oupus i piumpugan, gima i karaatan dioti sid di Paulus. Agazo o kenginan di piumpugan mandus sid di Paulus, gam mindamo ioti do magandaha-no vagu i rasul sid dioti. Sabap ino i Paulus humarap-no vagu do varo katagan sid piumpugan sid Korintus. Ino surat dit aso't elaan tokou do nunu o nokoponurat dino, mad surat di minoguhang dioti. Topot i kanangan, ino-no i kapanarantagan dioti, ombo it amu atag sid tanga di piumpugan. I Paulus kondiri, kodung nokokirim i surat dino, minupus-no, tu rinumosi dot amu-no osuau ioti tumorima di surat, gam humungot om sumana di Paulus. Topot i habal di Titus minanantu do kiguna i surat dau. Sabap i hal dit amu atag, inatagan-no dioti, gam agazo o ginavo dioti sid di Paulus monorima kaseh bahagi di surat om mongodim-no ioti di Paulus magandaha vagu sid dioti.

Banal-no, i notorima dioti i surat di Paulus, oruol o ginavo dioti do iadino avadsak o boros di Paulus mamajal om manala. Mad varo duvo vaza do korualan do ginavo, ino-no, kumodou it ulun sumaap om dumahava iosido ponong sid ulun di mamajal, ko rumuol do mupus sampai monimban ombo i nipajal it amu atag. Na retan di Paulus it iso bansa dino do kengruol om sumangal, dang riniba dit amu

tumorima do pajal ko nunu-nopo o gama potorongot dara di bahazan, om i korualan/koupusan di ponong sid kenginan do Kinoringan. I korualan di dang riniba gam pokodoho banal di ginavo ponong sid kosurutan do karaatan. Na sid Korintus, ong kodung notorima i surat diri, oupus ioti sampai kaharati dot amu atag i vaza dioti posuhul om pemozoon di karaatan sid tanga dioti. Iri-ogi minokimahap om minokiandus ioti sid di Paulus om minongohukum dit ulun di kisala sampai atag-no vagu i hoturan sid piumpugan.

Mongimbulit i Paulus manarang dot i tinomod dau monurat okonko mokibanal iosido antawa tazon-ko mokimahap ioti sid dau, inoi nga kenginan di rasul potorongot di piumpugan, supaya osusi om atag ioti sid tinoguvangon do Kinoringan. Ino-no ot atag, oupus it ulun di kisala om agazo o ginavo pada di sala dit ulun vokon. Tu ong iadino sumurut i kabanaran do Kinoringan sid tanga do piumpugan. Okonko it toriso-iso ot ulun om i bantug om ngaran dau ot agazo o harati, inoi nga i katagan dit ensanan i piumpugan. Iti-no o sabap do varo hoturan sid PCS, isurat sid perlembagaan dot varo gama monunda di piumpugan. It ulun di tumohiang sid piumpugan dot aso tinganan pemumui vagu, nga sid kobuatano dau di iadino o manantu dot okon-noko ahli-po iosido do piumpugan, supaya amu orungoi i ngaran di Kristus om i piumpugan. Ong i piumpugan amu ozi pedu dot ulun sid piumpugan, gam mogihim di kemumuzan, ong sukul oupus it ulun sampai tiuli-no sid piumpugan dot atarang o gama.

5. I pangalaman di Titus sid Korintus 7,13-16

Inokouli i Titus antad sid Korintus okonko bai ensasamadan i Paulus di habal do nokotorontog-no vagu i piumpugan, gam agazo o koginavaan di Paulus, tu iadko i gama dau di gulu diri monusul sid di Titus mongindazou di piumpugan sid Korintus, ong bianco di nokouli i Titus, gam i Titus nga minongindazou-no di piumpugan iadko i gama laid di Paulus. Rinumosi i Paulus dot amalu iosido di kobuatano dioti, hiza do nokorikot i Titus sid Korintus, tu varo't arampus om ogumu-po o hal dit amu atag, na kouli-po i Titus, gam minongindazou-no i Titus di gama dioti iadko i gama di Paulus diri. Tu nokotorima dit ongoulun Kristian sid Korintus i sokovia i gama di Titus mangatag om mongohoturan do piumpugan, isuhut di cadangan di Paulus. Iti-no o sabap nembulit-no vagu i harapan di Paulus sid piumpugan sid Korintus.

Bahagi koduvo

I rukut bahagi di piumpugan sid Yerusalim 8,1-9,15

1. I suntuan dit ongopiumpugan sid Makedonia 8,1-6

Sid duvo fasal 8-9 manarang i Paulus di tinomod om vaza mongorukut di piumpugan sid Yerusalim. Sid sinoda dit ongorasul (UR 15) minangakun i Paulus do mangahatul do rukut sid ongopiumpugan di dau do watas (Gal. 2,10 om 1. Kor. 16,1... om Rom 15,25). Nigili-no laid di rasul i dau do samod om i kavazao om kapagasan dau sid piumpugan dot mongonsug dioti manahak do rukut o tomodon. Oromoi o gama di Paulus popuhondom dioti di rukut. Ong popongoon-no i gama miaandus mad amu oruhai monuhu ko mongogorot mongorukut. Iti-no o sabap do mongusul-po laid i Paulus sid dioti i gama dit ongopiumpugan sid Makedonia di mad suntuan. Sabap inot ongopiumpugan sino okonko piumpugan dot ulun di lumundu, gam ogumu o kasansaraan dioti sino, nga kakali agazo o gama dioti mongorukut dot ogumu ot endukut bahagi sid Yerusalim. Gam ahatul o gama dioti mongorukut dot otomon o ginavo om i vaza dioti monginsosok do kuran kadapatan monulung di piumpugan sid Yerusalim tanid mantadko i bai siin. Nosodia-no dioti o guvas kondiri manahak om mamung mongorukut sid koposizan om mongopud di piumpugan sid Yerusalim. Nohorotizan-no ioti dot ino rukut dino okonko rontob it ongoulun sid Yerusalim o panangan, gam itahak sid Kinoringan. Na otomon i Paulus, tu sid gama di iadino nokosuhut-no om notuluk-no dioti i kenginan om kovosihan di Paulus dot okonko bai ginara

garatan, inoi nga kagaan di dau do ginavo. Iti-no o sabap dot ino rukut dioti mad tanda di kovosihan dioti ponong sid piumpugan vokon om sid di rasul.

Manjadi antad sid pangalaman di Paulus sid Makedonia o sabap do monuhu-no iosido di Titus do posurut di gama di iadino sid Korintus, supaya varo't endukut do rukut sid Korintus, isuhut di nokosurat-no laid sid 1. Kor. 16,1... (Sabap i varo gagut diri, nolingan-no dioti mongonsug mongorukut sampai i hiza diri. Suvai nosuhu di Paulus i Titus om nokosurat-ogi).

2. Mongonsug i Paulus dioti magavi mongorukut 7-15

Kenginan di Paulus dot it ulun sid Korintus sumusui di suntuan sid Makedonia. Monguji i Paulus di kolunduo do kovosihan om kosipan om samod om kelaan dioti sid Korintus di nadapat dioti antad sid rasul, kenginan di Paulus ong sid gama mongorukut pembulai-po ioti di kovosihan om kolunduan di gama monulung. Mongimbulit i Paulus di gama monguji di piumpugan iadko nokosurat laid sid 1. Kor. 1,5-7. Minsanko it obintahak it ulun, ino dino nga kovosihani. Tu aso tinganan monuhu, ong it ulun obintahak. Tu asarok ong kodung kosurut i kolunduan dot ulun, dumoot-no, gima rumosi do musikim vagu iosido. Iti-no o sabap dot odoromoi o gama di Paulus mongonsug om mogkovosihan sid vaza manahak, supaya varo kopurimanan dioti kondiri dot obebas ioti manahak, okonko suvai suhuo. Kagi sid gama posuntu i gama dit ongoulun sid Makedonia popianggan i Paulus dioti, kaluto ong varo kumianggan ioti sampai ozi tumalib dit ulun sid Makedonia. Topot i suntuan dit aso-no katalib, ino-no i Tuhan kondiri, i minanahak di kondiri dau dot mosikim iosido, supaya lumundu tokou ulun Kristian. Pogili i Paulus sid dioti di gama di Yesus dit antad sid Kinoringan nokoriniba sampai ulun iosido dit okudik, nga aso nunu-nopo barang, ko valai ko tana ko ongkob (aso poulunan dit ulu dau modop, ka di Yesus) do polundu di tokou do kovosihan do Kinoringan.

Mongohondom i Paulus di kinotimpuunan di gama dioti mongorukut di toun. Iti-no i boros di manarang di koledo antad sid surat laid (1. Kor. 16) Ino surat keso diri, hiza dot osomok-no it adau do Paska (1.Kor. 16,8), iti surat diti nga toun vagu-no, ponong-no sid kovian do toun o koponurat. I hiza di Paulus diri oubas it ulun mongiro dit ongotoun isuhut di hoturan di Kaisar Julian om i bansa do Yahudi do vulan October o kotimpuunan do toun.

Ong agazo i piumpugan diri mongorukut, tu iadino o boros dioti diri, suvai otuluk i gama mongorukut om miuma-ogi. Amu miuma do mongoho mongorukut, nga kakali iri-no ko iri, tu aso't oumpug. Suvai tumoguvang it ongoulun mongusaha di gama mongorukut. Kagi okonko i kogumuo ot it agazo o harati, inoi nga it agazo o ginavo manahak dit okudik, ong okudik-no laid i dau do kosukupan. Sid tuturan di gama dit ulun Israel mongumpug di Mana sid belantara o pinanarangan di Paulus dit atag o gama. Tu ioti kavi songkuro-nopo o gama minurut dit ongolininsahan do Mana, kakali enizo do varo miuma, aso kalaba (Kolobusan 16,18). Pengkaa dino isuhut di kenginan do Kinoringan it ongoulun amu kadapat dot oholian podrusuk, tumalib di kovisahan banal. Ombo i laba, aso-no guna. Sabap i laba dino amu kadapat mongovit sid lobong (Luk. 12,13-20).

3. Pongintutun di ponuhu di Paulus 8,16-24

I porikot sid Korintus do ponuhu di Paulus, pentutun i Paulus dit ulun dino sid piumpugan om mongonsug dioti do tumorima dit ulun dino iadko kondiri dau o korikot. Amu narait i ngaran di duvo it ulun dino, minsanko oubasan i Paulus mangarait dit ongongaran dit ongokoruhang dau. Bai i vaza do momili dioti do koruhang om ponulung di Paulus o noboros, ino-no it ongoulun Kristian sid piumpugan (sid Efesus) minomili dit ulun dino, tu i purimanan dioti atag ong varo koruhang di tumabang di Paulus sid sokovia i tugas dau om sid panahon dau mangatod do rukut porikot sid Yerusalim. Avantangan-kagi i Paulus di vaza di Titus posurut di gama sid Korintus. Elaan di Paulus i pitonidan dot antad sid bai nosuhu o gama dot ulun posurut di tugas dau. Ong i Titus banalko ahaki o gama dau posurut di tugas do rasul bahagi di piumpugan sid Korintus, ong kodung nengat dau dot amu koriat i Paulus ponong sid Korintus.

Sid gama di Paulus mangahatul di vaza mangavid om mangatod di rukut dino o horotizan tokou it atag o gama mangavid di persembaan om rukut sid gorija. Sabap ong amu atarang o gama mangavid, oruhai varo kiroon om tondos dot ulun dot it ulun di kisiin do gorija sid palad dau, nga momusing ko humambil sid siin dino. Iti-no o sabap dot atag dot osodiri banal ino siin dino antadko i siin dit dang ulun. Kagi suvai duvo ko tolu ot ulun sumasi di gama mangavid di siin dino, supaya alanta kavi i gama mangavid om mangatod om porikot sid pusat ko ombo i tinomod di siin dino. Ong kaharati i razat do piumpugan dot atarang o gama mangahatul di kosukupu do piumpugan om gorija, agazo o ginavo monukung om monukup di kosiinan do piumpugan. Na sid cadangan om imuhun di rasul, varo-no laid kovosihan ponong sid gama tokou mongorukut om mangahatul di kosukupu do gorija tokou.

4. I tinomod do porikot sid Korintus dit ongobpinai dino 9.1-5

Kakali polombus i Paulus manarang om posondot di kogunaan di rukut om i kogofoo di ginavo dau posurut di gama mongorukut monukung di piumpugan sid Yerusalim. Gam moniim i Paulus mongonsug dioti iadko it ongopiumpugan sid Makedonia, supaya i gama dioti mongorukut peradon-ko i gama mianggan, tu tumalib di vokon. Antad sid gama di Paulus di iadino varo vaza sid a-ko piro o piumpugan do kodung mongorukut, mamananau-po laid sid iso't ulun dit elaan dot amu odoot iosido manahak, do mokitahak di rukut. Iri-ogi i ngaran dit ulun dino sid surat rukut ponong sid savat om i kogumuo di katahak, nga nokosurat sino. Iri-ogi it ulun di tohudi-no o rikoto, ong kodung nemot-no i kogumuo di nakapanahak-no gulu, tumiim-no tumalib di kogumuo dino. Iri-ogi banalko ogumu o rukut dot oumpug bahagi di kogunaan di rukut dino, valai do panambayanan ko kurita do pandita ko vokon-po. Na i Paulus minongonsug dit ongoulun sid Makedonia, retanko ioti sid Korintus, i toun nokotimpuun-no laid mongorukut, ka. Iri-ogi, nikirim-no dau i duvo it ulun do mongonsug mongorukut o tomodon dioti sid Korintus, povozoon i habal di Paulus dot it ulun sid Makedonia, aparuh manahak do rukut, supaya ompus i gama mongorukut sid Korintus dot ahatul o gama om ogumu ot oumpug om orukuti. Ino duvo it ulun dino nokemot om nokovozo-no laid sid gama mongorukut sid Makedonia sampai varo pangalaman. Iri-ogi monguji i Paulus dot sid kogumuo do rukut mimbulai i kogofoo di ginavo dot ulun Kristian manahak do rukut om sumuhut di kenginan do Kinoringan. Ong otopot, i gama manahak do persembaan, i mamahagi di dau do barang ponong sid gorija om Kinoringan o tanda di kosipan dot ulun. Okonko i kogumuo do ringgit, inoi nga i kogofoo do bahagi antad sid balanja dot ulun, iadko i bituanon diri sid Markus 12,41-44 di minanahak di nosingkudan-no do balanja, i kopsizon dau.

Ong i Paulus kondiri rinumosi dot amalu iosido, ong kembulai dot okudik i rukut sid Korintus mantadko i nihabal dau laid diri, nga mamading-po iosido dot ino komoluan dino karaliu sid dioti, ong banalnoko okudik i rukut dioti. Supaya okon-ko rontob do iadino o kokirim di Paulus i duvo it ongobpinai sid Korintus, supaya ioti momongo di kopongorukutan sid Korintus om varo hasil sid vaza mongorukut dino di mad tanda di kovosihan om barakat do Kinoringan, okonko tanda dot kodoot dioti. dino. Ong iadino, i gama di Paulus papaanau di duvo it ulun dino sid Korintus, tu mangahatul di rukut dioti, nga mad pongimuhunan bahagi dioti do magavi mongorukut om aparuh sampai ahaki manahak.

5. It amu odoot manahak abarakatan do Kinoringan 9,6-15

Sid gama di mukabun manarang i Paulus do kuran mopud i barakat do hasil antad sid gama dit amu odoot manahak. Mongimbulit i Paulus di boros di Kitab Laid, ino-no Amsal 22,8; Zabur 112,9 om Hosea 10,12, ino-no, I Kinoringan manamod dit ulun di manahak dot otomon o ginavo. Na varo't ulun di mongitung dot kodung kapanahak, a-milo-milo atahakan ioti do barakat do Kinoringan, tu i tinomod dioti manahak, bai mokitahak sid Kinoringan. Topot i di Paulus do lavis di boros dino, tanid-no, ino-no, sabap antad sid agazo o tahak do Kinoringan, i notorima tokou, iti-no o sabap dot atag dot i gama tokou monuli dino di samod om kovosihan om barakat do Kinoringan, sid gama polombus dot okudik bahagi dit ongobpinai sid gorija, ino-no it atagi o gama antad sid ginavo dit ahaki manahak. Isai-nopo i

manahak, ong inrubaton i tahak dino, iadko amu nakapanahak om amu abarakatan i gama manahak di iadino. Ong otopot, natahakan tokou-no di kogumuo om kosukupu, supaya varo't otibang om oriat tokou mamahagi bahagi dit ulun dit okurang mantadko i di tokou kondiri. Ong sid Silam, varo hoturan di Zakat di iadino dot ipat-ipat it ulun manahak sid mosikim do 2,5% dit hasil ko gaji ko kohuntungan dau. Ong sid Kina, 5% antad kohuntungan dau bohogizon sid ongokuli hiza di toun baru, ino-no i retan dot Ang Pau.

Ino boros di Paulus, *Aso-no karantaban di gama do Kinoringan manahak*, nga varo kosolinan vokon dot, *i kabanaran do Kinoringan sumampai sid penlaid*, ka. Ong posuntu i Paulus dino gama dino sid gama mananom ko mangasok, engat di Paulus dot okonko i mukabun di mangasok ko monizas do lininsahan ot elo monginggumu di totonomon, inoi nga i Kinoringan, i minongurug dit vinangun om i pongopud dit ongotagad om ranau om ongotabas dot ulun. Na iadko i gama do Kinoringan padarun om posuni di totonomon o gama dau monginggumu om mamarakat di di tokou do gama mamahagi om mongopud dit ulun mosikim. I rukut di noumpug sid Korintus om Makedonia monulung om mongopud di piumpugan sid Yerusalim om mongimbulai di gama monorima kaseh sid Kinoringan, gima i bontuan di nokorikot sid Yerusalim. Sabap sid saralom di gama mamahagi do iadino gumazo-no i kohormatan om razou do Kinoringan. Ong i Paulus, minonorima kaseh-no laid sid Kinoringan, i monunda om mamarakat di sokovia i gama dioti mongorukut.

Bahagi III

Dumahava i Paulus di vaza manala dit a-ko piro it ulun sid Korintus 10,1-13,10.

A. 10,1-18 Amu tumorima i rasul di panala dit ulun di sumaap di Paulus.

1. It atalou om korumaato di rasul o pavazaan dioti manala 1-6

Tigogi banalko tanid o hal do toguvangon di rasul sid fasal dino, ino-no i vaza om onsi di gama dit a-ko piro ot ulun sid Korintus pakaraat di ngaran om gama di Paulus. Ong odoromoi om osuau o boros di Paulus sid saralom diti surat iti (6,11.. om 7,2...), tigogi, tindogon i linsou do boros ong siti. Topot ino duvo kobuatano di boros di Paulus okonko hal dit amu atag. Bahagi di piumpugan osuau o boros mangandus om monginsasamod. Topot it ulun di mangaraag di rasul, aso tinganan dot okonko kilavis dot atarom o boros om timpa. Okonko ensanan i piumpugan minongitung di Paulus dot atalou ong sid Korintus, osiou sid sodu iosido, bai it a-ko piro it ulun minoniim mongindaraat di Paulus. Banal-no, i piumpugan diri amu oruhai minonombol di kabang dit ongoulun di pakaraat di rasul. Suvai nokoponurat-no vagu i rasul di surat romou om nakaharati-ogi ioti dot amu atag o gama dioti pemozo dit ulun dit araat o boros. Ong sid F. 10 mangambat om dumahava i Paulus dit araat o boros dit a-ko piro ioti dino, dot i timpa dau dumahava, nga mad aparad o boros miabal sid Rom 16,17..; Gal. 6,11 om 1. Kor. 16,22. Ong varo boros di Paulus do iadino, ino dino okonko hal dot obinglasu i ginavo di Paulus ko obinghungot, inoi nga amu tumorima iosido dot ousiba iosido, minsanko magavi iosido posurut di tugas do rasul iosido. Sabap isai-nopo i pakaraat di Paulus dot amu otopot i gama manala, pakaraat di gama posurut di Habal do Kovosihan. Sabap i rasul mongontok di Tuhan dau, i Yesus Kristus, i minonuhu om potugas di rasul. I bantug om garal di rasul antad nagaral-no om nabantug-no di Tuhan.

Ino-no o tinomod di Paulus dumahava: engin iosido monodia di kandahaan vagu dau sid Korintus, supaya ong korikot, aso karaatan sino di mongohigong dit andahaon dau sino. Ong amu dara nokonong i gama di rasul, a-mopud i piumpugan di nembulai antad sid gama di rasul. Aso't elaan di Paulus do monodiri di pribadi om umum (Gal. 2,20 om Rom 14,7-9). Sabap kodung rasul, nga uripon-no iosido di Tuhan Yesus, ponuhu iosido di Tuhan, tu nokokodim di Tuhan mongontok di Tuhan (5,20). I pakaraat di rasul pakaraat di Tuhan di rasul. Sabap i rasul minagavi posurut di tugas di Tuhan (4,1; 5,11...; 6,3..) Ong sinala-no i rasul sampai i piumpugan dit antad sid tugas di rasul, i mad surat katarangan di rasul (3,1...), tantu amu-no atag do pemozooni i gama manala om mangaraag. Sid hal diti, a-milo-milo sodirizon ombo it atag om otopot o rasul om amu (10,6; 11,13; 13,2...) Tu kuran kadapat

posurut om patatap do piumpugan ong kakali varo't ulun di mangasau om mongunang. Iti-no o sabap do varo boros sid surat diti dot, Ioku diti, i Paulus....ka. Manantu i Paulus di boros om timpa dau sid kabarajao om kotukuo om komomoso di Kristus. Insanpo dino okonko i ngaran di Paulus ot osusa jagaon om apadan, inoi nga it onsi di Habal do Kovosihan o tomodon. Mindamo iosido dit ongoulun sid Korintus do mampaping om tumabang di gama di Paulus dumahava, supaya amu osusa iosido pembulai di rampus dau. I momoros iosido do iadino pembulai dot amu atalou iosido sid tinoguvangon dot ulun iadko i boros dioti diri. Banal-no, varo boros laid di Paulus sid 1. Kor. 2,3 dot okugui iosido hiza di nokorikot iosido sid Korintus dit insan-ogi. Topot ino kokuguzan diri okonko hal dot kotoholo, inoi nga nanangan iosido do sakit. Na it ulun di sinumaap di Paulus, retanko kodung rasul, a-milo-milo akansang, tu abarakatan di Tuhan. Ong okugui, ino dino tanda dot okonko antad sid kovosihan di Tuhan it ulun dino, gam tantu okonko rasul it ulun di iadino. Na i timpa di Paulus, banal-no riniba-ok, ulun di varo kokuguzan. Topot i gama-ku posurut di habal do kovosihan okonko i dohon do kakansango o harapan-ku om pakakas-ku, inoi nga i kuasa do Kinoringan o pakakas-ku dot ino kuasa dino kahabai do kuta iadko i Yeriko om palanta di vudut dot ulun sampai momurugou di keloo do dang riniba di sumaap do Kinoringan. Ong ioti susumaap minamakai do papakas do dang riniba sid gama mongorongoi di ngaran di rasul, retanko okugui iosido, atalou, aso hak om aso sanga, aso hukum di Paulus. Topot i Paulus mamakai di pakakas dot osundu, isuhut di gama di Yesus diri monori di nunu-nopo i gama monobon di samod om kovosihan do Kinoringan, i nokembulai sid gama di Kristus. Ensan i koguvelo do riniba di tasantanid-tanid o kobuatano di sumaap om kumodou ponong sid Kinoringan, nga ahaba om otori om ohukuman-no, ong sukul i piumpugan sid Korintus sumuhut dit onsug di rasul, i noboros-no sid ayat 2. Aso boros siti do nunu i hukum bahagi dit ongoulun di minonimbaal di rasul. Ong antad sid 13,2 varo kiroon dot it ulun dino nosunsub-no sid piumpugan.

2. I kokuguzo di rasul diri 7-11

Siti mimbulai it a-ko piro o boros monimbaal dot araat sid rasul. It ulun di pakaraat di Paulus manantu dot i Paulus nga kisundu om ulun iosido di dang Tuhan. Na mongoduat i Paulus sampai mongonsug dioti mongitung do kuran. Isai-nopo i momoros do iadino, ong sukul amu osumbung iosido, nga elaan-no sampai koho dot varo't ulun vokon di iadino kisundu om dang Tuhan. Isai-nopo i momoros do bai iosido o kisundu om bai iosido ot i Kristus o sanganu manantu dot otopotko nakalandu iosido sid kosumbungo sampai nokedu-no sid piniizaan di Sundu dot osusi om i piumpugan di dang Tuhan. Iti-no o tanda do nokedu-no, ong kodung momuruvak do bai iosido o dang Tuhan. Ong i Paulus mongitung dot amu osusa iosido do momuruvak ko mokindazou di iadino, gima rumosi iosido dot i gama di iadino okonko ponong sid kengkakatan do piumpugan, gam ponong sid kohuzasan om korungazan do piumpugan o panangan, gima monuduk do miaanggan-anggan om miinggil-inggil dot isai it kogulu om keso ot kristian. Na varo vagu boros do pakaraat, retanko bai it ongosurat di Paulus ot apatong om ohodtol, ka, topot ong otoron i Paulus sid Korintus, aso hukum di Paulus, ka. Iti-no o sabap do tumimpa i Paulus dot it ongosurat dau mangatag om monginsasamod o tomodon. Pengkaa dino, hiza do magandaha iosido sid Korintus, okonko mongohukum om mongindorosi i boros dau, inoi nga iri-no ko iri o tinomod om panangan. Kaluto ong it ongoulun di sinumaap di Paulus inot ongoulun di sid rombongan i retanko, dang Kristus-okoi, ka (1. Kor. 1,12). Amu tinumorima ioti di boros di Paulus di mongohodtol di pamarasan dot, *i Kristus o sanganu* (1. Kr. 3,23; 15,23;) Ioti minongitung dot amu osusa do varo-po rasul di mangahabal di Habal di Yesus, tu ioti nokokondiri tumabil di Kristus. Na i Paulus amu mangamu di kososizan dioti, retanko ioti nga i Kristus o sanganu, ka, ino-no o rontob ot ambat dau, ioku, nga dang Kristus, ka. Sabap okonko i Paulus o monodiri om mongohukum dot isai i dang Kristus. Sabap, iadko i boros laid di Yesus sid Mat. 7,21 *Okonko sokoviai it ulun di mongodim dohon dot, O Tuhan, o Tuhan, ka o kosuvang sid karajaan do surga, inoi nga it ulun di sumuhut di kenginan dit Ama-ku sid surga,ka.*

3. 12-18 Varo duvo o vaza mokindazou, i di Paulus di nokonong om i dang sumaap dau dit amu atag.

Sid ongoayat laid bai dumahava i Paulus dit ongopamarasan di pakaraat dau, topot ong siti, gam tumoguvang iosido om monoro di mad sangod dau om i vaza dioti mokindazou di kondiri. Amu kumiinggil i Paulus mokindazou di kondiri sumusui di kobuatano dioti. Tu ino kobuatano dino bai kobungoho om kolovongo. Okonko it ulun kondiri o pogili di ponukung ombo it avantang om otopot sid tinoguvangon do Kinoringan. Sabap bai kondiri do Kinoringan mangaratu di kopotuto om kavantango dit ulun di sumuhut di kenginan do Kinoringan. Nunu o kogunaan dot ulun pokotatap di kondiri ko pokobanal di kondiri. I tanggol di rasul, ino-no i tugas it inanu dau sid Tuhan. Varo boros laid di Paulus sid 1. Kor. 4,5... retanko ovizau-no ioti di Habal do Kovosihan om arangkap o kosipan dioti diri. Ino gama di iadino bai koburuvako om kosumbungo. Kagi, i di Paulus do kiroon ong ponukung nokogili-no sinod piumpugan do Korintus. Sabap ioti mad tagad dot omoton di Paulus, minsanko it ongopiumpugan sid vatas do Korintus, nga antad-no di kapangahabaran di Paulus di Habal do Kovosihan. Iti-no o sabap dot amu osusa do kumiinggil i Paulus ko mokindazou-po i kondiri, tu alanta kavi i gama dau sid Korintus om it ongopiumpugan vokon sino. Suvai i gama di Tuhan ot ipongindazou om kiguna om ajadi do garal dot ulun, okonko i vaza monginggazo do kondiri om i gama pokihhi di vokon.

B: Mokindazou i rasul iadko kolovongo 11,1-12,13

1. 11,1-4 Mindamo i Paulus do tumahan ioti di misinglovong iosido, tu mokindazou.

Sampai siti bai ngaran-no monoro i Paulus dit ongoulun sid Korintus di sumaap dau. Bianco-ogi do pokolovong i gama di Paulus pogili sid dioti ombo it atag, i dau do gama diri ko i dioti do gama mangasau. Binoros-no laid dau dot i boros dino bai pokolovong, tazonko kosondot ombo it otopot om it atag. Poluuvon di Paulus i piumpugan do sumuni dot iosido o minagat di patod di sumuni sid sovoon dau (i hiza diri, okonko i kusai tuminong sid ondu, inoi nga it ondu iatod sid kusai hiza do mogontong) dot i mogontong hiza do penlaid. Sid suriban dino rumosi i Paulus do kalandu i sumuni i mozo do vokon, tu varo vudut di mamalid dit ondu iadko napalid-no i Hava di boros do vulanut. Mamakai i Paulus di suriban di Hosea dot i razat di bansa dot Israel iadko i sovoon do Kinoringan, nga nagai-no dot ongorogon. Pengkaa dino i Paulus rumosi dot it ongokristian sid Korintus polidon di boros di tanid mantadko i Habal do Kovosihan di Paulus, gima i vaza dit ulun mamalid elo banal mongolumbok dit ongoulun sid Korintus. Okonko bai i sid Korintus onining i piumpugan dit ongohabal vokon, inoi nga sid Galatia, nga pengkaa dino (Gal. 1,6...) Amu manarang i Paulus do nunu i pitonidan di habal dioti dino. Topot varo kiroon dot ino habal dino opigavul dit adat do Yahudi ko i keloo do Yunani i retanko Gnosis. Na kuran-kuran, ino-no ot atalahas, sabap i Paulus tu rasul di nokotugas-no di Kristus sino, aso Habal do Kovosihan vokon mantadko i nihabal laid di Paulus. Isai-nopo i monimban ko osodiri antad sid habal di Paulus dino, mongimbulai-no do habal dit okonko dang Kristus.

2. 5-15 I Paulus korompok dit isai-nopo i retanko kongkod do rasul randavi.

Varo pamarasan sid Korintus dot inot ulun sino retanko kongkod do rasul (i Petrus dati ko koruhang di Petrus). Na momoros i Paulus do kogimbangio iosido dit ulun dino. Banal-no, ong sid vaza moro-boros do pisok domburan, amu nokelo i Paulus, tu a-nokosikul do moro-boros o tomodon. Topot okonko i vaza moro-boros o kiguna, inoi nga it onsi om panangan di boros om habal o kiguna. Sabap minsanko pisok domburan ot ulun moro-boros, vokon-no kakali okudik nga aso't onsi do bai apol-nopo ot ouza, ko vudut, okonko vagas. Iri-ogi mongohondom i Paulus dioti do kuran i dau do habal om i gama dioti mongining om sumuhut di habal do Kinoringan. Iri-ogi tumompik i Paulus sid hal koduvo, ino-no, i hiza di sontoun intanga iosido sid Korintus amu nokengvagat iosido di piumpugan do mokibalanja dioti, gam minanansahari iosido, supaya amu osusa mokitahak dot akanon. Varo-not okudik o balanja antad sid ongopiumpugan sid Makedonia, topot okudik nga aso't antad sid ongoulun Kristian sid Korintus.

Ino-no o tanda dot okonko mansahari iosido sid tugas dau di mangahabal di Habal do Kovosihan. Mongoduat iosido do kaluto ong moguhang ioti, tu amu minokibalanja iosido dioti diri, naku? Sabap it ongosangod di Paulus minomoros dot kodung amu mokibalanja it ulun, mad tanda-no dot okonko rasul, ka dioti. Ong otopot, natarang-no laid di Paulus ino sid 1. Kor. 9 do kihak iosido do mokibalanja dara, topot amu minamakai iosido di hak dino. Ino gama pemozo di hak mokibalanja dino nga tanda-no di samod di Paulus sid piumpugan dit okonko olundu. Sabap ogumu ot ulun Kristian sid Korintus diri do bai uripon om ulun di mansahari gumaji. Suvai norongou dit ongopiumpugan sid Makedonia dot asampit i Paulus om varo-ogi sid ioti mangatod di balanja di Paulus. Ino-no i kogolivong, ioti sid Makedonia, iso nga aso minoniim do pokurang di garal di Paulus. Topot ong ioti sid Korintus, minsanko opurimon dara i kokurangan di rasul, iso nga aso minongitung ko osusaan, ogi-po ka ong monukup-po di kokurangan di rasul om varo.

Ong iadino okurang ot ohorotizan dit Ongokorintus i kogofoo di samod di Paulus sid dioti, kuozon-po ong ino. Miuma dot nakatahu-no ino sid Kinoringan. Noboros-po i iadino om mongimbulai-no i Paulus dot isai banal ong ioti ongosusumaap, ino-no, koruhang om sakup di vozoon do rogon, iadko i vozoon do rogon nokotiim-no laid do misingmalaikat om misingkinoringan om misingrasul. Mongidu i Paulus di toping dioti dino.

3. 16-21a Kentolu mindamo i Paulus do tumahan ioti di kolovongo dau.

Manarang i Paulus dot ong misinglovong iosido do sumusui dit ongoulun di sinumaap dau, banal-ko amu kerad dioti kolovong ong iosido. Na it ongoulun Kristian sid Korintus tinumorima kavi di kolovongo dioti dino, keso, i mokindazou ioti di kondiri do bai i vaza do riniba o kendazahan. Topot minangasip ioti di kolovongo dioti, retanko ioti kondiri ot elo banal, om minokiuripon ioti dit ulun dino, isuhut di dioti do hoturan. Minsanko ikokihi ioti dit ongoulun, tu retanko okonko otopot-poko Kristian ioti, gima antad sid di Paulus gima it inantadon, nga tinumorima-no dit ongoulun do Korintus di kikhizon dino. Ino dino kavi, avangaan i Paulus sampai mongonsi di pangalaman dino dot, Banal-no, ong ioku diti, tantu amu katama mongirad dino, ka.

4. 11,21b-12,10 I pokindazou di Paulus

a) 21b-33 It inantadon, i tugas om i kapagasan di rasul Paulus.

Lumavan i Paulus di kolovongo mokindazou, supaya otombol i kabang dit ulun di sumaap di Paulus. Pogili kavi i Paulus di dau do kobuatano om gamaon sampai kapagasan. Ombo i sumaap momoros dot iosido nga varoi, i Paulus manantu dot iosido otopot-no nga varo, gam katalib-po di vokon. Keso, Ulun Ibrani, Israel, mongkupu di Ibrahim, ponuhu di Kristus, lobi-okup, ong momoros do iadko neduan do tuo, ka. Iri-ogi polombus i Paulus mangarait di sokoviai i pangalaman sid torungku, sid tanga do ralan, sid rahat, sid ongomorinta do Rom om Yahudi. Banal-no, ong sompuruvon ino, ino-no it onsi, mokindazou i Paulus gima i kokuguzo dau sid sokoviai it ongopangalaman dino. Ong momoros i Paulus do iadino, oruhai dara it ongosangod pogili di dioti do pangalaman di iadino bahagi di gama dioti posurut di Habal do Kovosihan, ong sukul varo pangalaman do iadino. Dot atalahas-no laid, iso nga aso dioti do kapagasan di iadino. Gam bai mansahari ioti sid kosusaan di Paulus, retanko ino dino kavi tanda dot okonko rasul iosido. Ong sid di Paulus, ino-no pangalaman dino o tanda dot lumuu iosido di kapagasan di Kristus. Topot ong ioti retanko ino kavi dino tanda dot okonko rasul iosido. Sid kovian di pangalaman di Paulus nousul-no i kineduan dau sid Damshek. Sabap hiza di sid Damshek i Paulus diri, nogusa-no iosido sampai najaga-no i lalavangon do kuta, supaya amu kalabus i Paulus. Na varo't ulun do niuluw i Paulus sid sampaping kuta. Ino dino mad pangalaman keso dot nogusa i rasul Paulus sid koduvo toun antad kemumuzan-no do Kristian iosido sid Damshek.

b) It ongokosomungan (kasarahan) di Paulus om i panakit dau 12,1-10

Ong nagaratan-no i Paulus di gama dit ongoulun di sumaap dau migimbang ombo i lobipo kigalar om kipangalaman sid di Tuhan, minsanko atalahas-no laid dot i Paulus amu mokindazou di kondiri dau, mangarait i Paulus di dau do pangalaman sid Kristus, ino-no, varo nosorou om nipemot dau di Tuhan. Rontob, kodung monusul i Paulus di pangalaman dino, tanid o pinongoretan, tu retanko varo't ulun di iadino o pangalaman, ka dau. Ong varo nabambaran do iadino, ino dino okonko garal ko keloo dot ulun, inoi nga gama di Tuhan di mogkovosihan dot ulun Kristian. Iti-no o sabap dot ino sokoviai dino okonko hal dit apakai ponong sid kendozohon dot ulun, it isai-nopo it ulun dino, rasul ko okon. Noboros-po dau i iadino, mongoduat-no i Paulus do, Varo-ka't ulun Kristian, ko ulun di dang Kristus di pengkaa dino o pangalaman? Mad pembulai-no i Paulus di kobuatano dau kondiri, iosido dino di bai riniba om iosido dino di dang Kristus ko ulun di kisundu. Na inot ulun di kisundu endazou di Paulus, gima i pangalaman do nakamung iosido sid vangun vagu di mad surga sid kotolu misantak do surga ko i tana sosogulian. Ino pangalaman dino iadko i pangalaman di Yesus om i tolu i kinoruhangan dau sid Matius 17, i sid burul diri, ko i pangalaman di Muhammad i novit-no iosido sid surga. Rontob-nopo, amu monusul i Paulus di kobuatano sid surga ko sid tana sosogulian iadko i tuturan di Muhammad sid Quoran, inoi nga bai ngaran-no monusul di norongou dau sino dit aso tinganan susuron ong bai boros do riniba. Gam mongohodtol i Paulus dot ino pangalaman dino mad novunusan iosido ko navuk dot amu elaan ong kumuro iosido, kakal-po riniba ko hatod-no ko sundu-no. Ino pangalaman di Paulus dino iadko it ulun di novunusan dot alaid-laid dot aso ginavo om ogulian-ogi vagu... Na amu moniim i Paulus do manarang ko manantu dot okuro-kuro i pangalaman dino. Tu ino dino, bai Kinoringan o nokelo, ka di Paulus. Ong riniba, aso tinganan manarang ko a-opibambaran i kavazao do surga. Ong sid 1. Kor. 13,1 noboros-no laid di Paulus dot minsanko i boros do malaikat, nga okonko hal di kiguna, ong okurang-no i samod dot ulun. Ong siti, i boros di dang riniba amu kotivol manarang di kobuatano do surga. Isai-nopo i momurvak do nokosori iosido sid surga sampai monusul di nemot sid surga, mad gama dau dit amu atag ko apatut. Amu mongohondom i Paulus di pangalaman dau sid Damshek, i nokodim iosido di Tuhan do rasul iosido. Bai ino pangalaman do mad novit iosido di sundu om i hatod dau sid surga sid nosorou dau o tanda di Paulus dot noguna iosido di Tuhan pinemot iosido di korolomo om kasavato di Tuhan. Ino dino mad kovosihan di kiguna banal, tu ino kovosihan dino o momihot di kosipan om katatapo di rasul.

Ong i boros di Paulus do nokorikot iosido sid kotolu misantak do surga, sinumusui i Paulus di vaza kodori diri mongitung di vinangun om i surga, iadko i Momogun di minongitung do varo turu misantak o surga. Pengkaa dino i tana sosogulian. Sid ulun Yahudi diri varo tolu ko turu misantak o surga. Ong nokorikot sid kotolu misantak, i harati nokorikot-no sid lombus banal do surga, ino tampat dit inintaranan laid di Adam om i Hava (Luk. 23,43 om Kentalangan 2,7) Topot minsan iadino o navazaan, kakali dot amu kapalid di Paulus sid kendazou di kondiri dau di iadko osunduvon iosido. Gam turus manarang di dau do kokuguzo, gima ino sakit dau dot ino kokuguzo dino nga antad sid Kinoringan om i Tuhan Yesus. I Tuhan di pinemot di Paulus do surga o pinopurimon di rasul do kapagasan, ino-no i sakit dau, supaya amu mokindazou ko momurvak iosido. Iti-no o sabap-kagi dot i Paulus amu rumatu sid kobungahan dit a-ko piro it ulun sid Korintus di tumalib dit isai-nopo it ulun vokon, rasul ko okon. Manjadi it usul di Paulus kananganko i sakit om korukungo dau anaru mantadko it usul di novit iosido di sundu sid surga. Ong i minongindazou iosido dit ulun di novit-no sid surga, dot inot ulun dino, nga gam iosido kondiri, gam i gama di Tuhan ot inindazou dau, okonko it ulun di novit. Ong ipokindazou i iadino, suvai sid kokuguzo varo-ogi panangan om tomodon. Kenginan di Paulus, pembulai sid ongoulun Kristian sid Korintus di kokuguzo om korukungo dau sid saralom di gamaon dau posurut di Habal do Kovosihan do momihot dit ongokosipan dot ulun Kristian sid dioti om sid ongotampat vokon. Amu narait di Paulus dot ombo i sakit dau dino. I sakit dino retan dau do rugi sid guvas dau dit antad sid vozoon do rogon. Sid surat vokon kembulai do varo't oruolon dau, ino-no i mato dau (Gal. 4,15). Topot ino rugi dino, mad tanid o panakit di Paulus, dot i panarangan dino sumuhut di vaza kodori manarang do panakit. Ong ahali ot oruol, vokon-no ong retanko rugi, vokon-no ong retanko dila do bilok do

sangod om vokon-po. Ino dino tantu oruolon sid guvas, sid kangkab ko sid ulu om toruntud ko husuk dot aso tinganan tarangon. Ino-no ot atalahas, banalko osusaan i Paulus dit oruolon dau dino sampai intolu-no iosido gorot minta dua sid Tuhan mokidu dit oruolon dino. Rontob-nopo, i timpa di Tuhan sid kasarahan dino, ino-no, aso keduana dit oruol dino, tu inot oruol dino tanda om vaza di Tuhan mongimbulai di kovosihan dau sid di Paulus. Minsan retanko ino dino antad sid vozoon do rogon, nga kakali do vaza di Tuhan monunda om mangagazad om monukung di rasul sid tugas dau, supaya amu oburuvak ko oturazou iosido. I kakansango om i katatapo di rasul dino okonko kuasa om hak di dang riniba ko kakansango di Paulus, inoi nga ensanan dot antad kavi sid kovosihan di Tuhan. Manjadi ong mokindazou i rasul di kokuguzo dau, iuli dau i kendahan om kopongohormatan sid Tuhan, i minongodim om pinotugas Kagi i kokuguzo om korukungo om sakit dau dino, nga vaza manaan di kapagasan om kokuguzo di Kristus diri. Sabap ino, i rasul iadko i Tuhan dau.

5. Pongovian di pokindazahan di rasul 11-13

Noboros-po i iadino, pokolovong-no vagu i Paulus dino gama dau sumusui dit ulun di momuruvak. Bai nakalandu i Paulus, tu it ulun dit apatut mongindazou di rasul nolingan i tugas dioti di iadino. Ioti-no kondiri ot apatut pogimbang di Paulus dit ongorasul vokon i retanko rasul bagaral. Amu monginsavat i Paulus di kondiri dau, ong momoros iosido dot, *minsanko okonko ulun-oku do bagaral*, ka, nga kakali manantu i Paulus dot i dau do gama korompok dit ongorasul di nagaral-no. I piumpugan sid Korintus o tanda di garal om bantug di Paulus dit aso tinganan habaon om tonuson. Gam ong okonko ioti sid Korintus nga atalou sid tinoguvangon dit ongoulun di sumaap di Paulus, okonko i Paulus ot osusa manantu om tumimpa ko dumahava di gama dioti pakaraat di Paulus. Niamung-po di Paulus i duaton dau do kuran dioti, varo-ka nelaan dioti do varo nalazan di Paulus sid gama dau pengkakat di piumpugan sid Korintus ko kuran. Ong varo, boroso-no dikou, ka dau.

C: It umba di Paulus magandaha vagu sid Korintus om boros pongovian 12,14-13,10

1. Pentahan dot engin magandaha vagu i Paulus 12,14-18

Insanpo dino momihot i Paulus di dau do koubasan dot amu mokibalanja di piumpugan di rikoton dau. Posuntu iosido di gama dau di iadino sid gama do molohing monumad om mamlanja dit anganak. Okonko it anganak posusu om monumad di molohing. I Paulus pouza sid dioti di samod dau, supaya i samod dino monong sid ongoginavo dot ulun. Okonko i barang ko kosukupu dioti o tinomod om panangan di Paulus. Mad varo-po vudut sid Korintus do retanko i Paulus minomusing om minonipu, tu i gama mongorukut o vaza di Paulus mokibalanja, ka. Iti-no o sabap do monginsosok iosido dioti do kuran o kiroon dioti, ong i kandahaan dioti Titus songkoruhang, tu minsanko ioti, nga iadiko iosido, tu amu minokibalanja dioti sid Korintus. Valangon kavi di Paulus ombo it nongokoruput om panalaan dioti sid Korintus. Varo ong nosondoko, varo ong bai borolingo, supaya atalahas om atarang kavi sid pialatan di rasul om i piumpugan.

2. Rumosi i Paulus dot amu kaharati ioti di gama di Paulus dumahava 12,19-21

Alaid-nopo dumahava i Paulus mangapad di kondiri om manantu di dau do tugas. Manjadi noboros-no kavi ino iadino, rumosi-no i Paulus ko amu kaharati ioti di gama dau dumahava. Sabap i gama dau dumahava dino okonko iadko i gama sid pihukuman, dot ioti sid Korintus o mangahakim di Paulus, inoi nga pogili i Paulus di sokoviai i hal dino sid tinoguvangon do Kinoringan dot i Kinoringan o sasi (2,17) om lawyer di Paulus. Ong dumahava iosido, okonko i dau do kabanaran ot inihim dau, inoi nga i kopudan om kosurutan di piumpugan sid Korintus, supaya atatap om kotundong ioti iadko i bongunan do Kinoringan (10,8; 13,10). Rumosi i Paulus dot i piumpugan sid Korintus kakal-po amu osodia do minsamung di rasul, ong magandaha iosido, gam kakali ogumu o karaatan om kobungahan om pioduhan sid tanga dioti dit osusa salazon. Ong kakali amu-po atag i kavazao dioti, amu-po osinang

i Paulus do iadko i kinandahaan dit insani. Ong narait it a-ko piro o karaatan, amu atalahas dot ino dino, iri-no ko iri ot ongoulun di kisala laid diri ko varo-po hal vokon. Ino-no ot atarang, amu ozi i Paulus dot i kapagandahaan dau vagu orugi om osusa, gima it kobuatano sid piumpugan dit aso tantu-tantu. Okonko bai i rasul ot osusa om ousiba, ong iadino o gama dioti, inoi nga ousiba-no i Kinoringan, i mamakai di Paulus ponong sid gama mongumbasih om patatap di piumpugan.

3. 13,1-10 Mongimbulit i Paulus do tipagandaha iosido sid Korintus om mongimuhun dit atag o gama mangatag di piumpugan.

Kentolu kumaa i Paulus sid Korintus. It insan-ogi, nokentoron iosido sori do labaan do sontoun mintanga. Kenduvo, bai oduruk iosido sid Korintus do mangatag di piouduhan o tomodon dara dau. Rontob-nopo, amu nompus i gama diri, gima okodou i ginavo dit a-ko piro ot ulun di sumaap di Paulus om i kogumuai do piumpugan, nga pinosimozo di gama di Paulus mangatag ko mongumbasih. Iti-no o sabap do banalko osusa o ginavo di Paulus rumosi dot porosuma i gama dau sid Korintus. Na bianco mangarancang-no i Paulus dot ombo i hal dit amu-po nasalazai, ino dino a-milo-milo nga atagan om susion dau, supaya alus i piumpugan om arantang o gama mangasip. Ong i kenduvo diri, amu kogoos i Paulus mongorodus om mongohukum, gam minogidu iosido diri. Topot ong bianco, amu timbangon-ku, ka dau. Mamakai i Paulus di cadangan di Yesus sid Mat. 18,16 dot ombo i hal dit araat, poguluvon miboros-po do bai duduvo ot ulun, iri-ogi musasi-no. Ong kakali amu mongining it ulun di nokoponimbaru do karaatan, oviton-no sid piumpugan sampai pentahan-no dot inot ulun dino nokedu-no sid piumpugan. Pengkaa dino i hoturan do PCS sid origi kavalu: Kodung aso tinganan pemumui dit ulun di nakalandu dot okonko impiro-piro kotiimai pemumui, atalahas-no om atarang-no dot inot ulun dino nakalabus-no om nokedu-no sid piumpugan. Ino-no rontob, suvai it ensanan i piumpugan nga nokelo-no di karaatan om mangakun do iadino. Sabap, ong bai i rasul o pogili dit amu atag, topot ong i piumpugan kakali pemozoon om bozoturur di kobuatano dit amu atag, tantu aso guna om aso katagan di gama di rasul.

Kagi mongohodtol i Paulus dot ino gama dau dino, tantu antad sid kuasa do Kinoringan, i kuasa di retan dioti ko okurang ko aso ong sid di Paulus. Insanpo dino momihot i Paulus di kobuatano di kuasa do Kinoringan, i nokogulu kembulai sid kinapatazan di Yesus sid kazu do sangkap om iri-ogi sid kokuguzan di rasul di notugasan di Tuhan Yesus, isuhut di nitarang-no laid sid 11,30 om 12,9... Aso kengkadan di Paulus mongimbulit dot i kuasa do Kinoringan monguasa di rasul om poluu di rasul sid kokuguzan om kobuatano di Tuhan Yesus. Iadko i Kristus nokokugui laid diri sampai apatai iosido diri, om kikuasa-no vagu di nogulian-no iosido sampai nokopomoros i Kristus dot, Sokovia i kuasa, nakatahak-no kavi sid dohon, ka, pengkaa dino ino kuasa di Kristus mozo-vozo di rasul, i mongontok di Tuhan, sid Korintus om siombo-nopo o kolombusan dau.

Mongimuhun i Paulus dit ongoulun Kristian sid Korintus do porisaon i kondiri dau do kakal-po mangasip ko amu-no om kuran o kopurimanan dioti do kakal-po i Kristus o manansanganu dioti sampai nokendoron sid ginavo dioti ko amu-no. Tu banal-no, kodung mangasip it ulun, mintoron-no i Tuhan Yesus sid ginavo dot ulun om i sokovia i gamaon om kobuatano, nga sumuhut di kenginan di Tuhan. Ong mangasip, ino-no o harati, mintoron sid Tuhan ko i Tuhan mintoron sid ginavo dot ulun (Gal. 2,20 ko Efes. 3,17). Monginsosok banal i Paulus di kobuatano dioti dino, kakali-po ka andaman dioti do mokot-sokot ioti sid Tuhan, ko nolingan-no dioti i piniizaan sid Tuhan. Na sokovia i gama di Paulus mongimuhun om monginsosok, nga i katatapan om i kotunggaran do piumpugan o tomodon. Ong sukul tumorima ioti di kovosihan di Paulus di iadino, tantu varo katagan om kosurutan om kotunggaran om kopihatan.

Boros do Kovian: 11-13 Salamet om minta barakat.

Iso-po niamung di rasul: mindamo dioti do manansalamat ioti do humarap do varo katagan: varo limo o harapan kananganko i gama dioti tumorima di surat di Paulus, ino-no, mongumbasih ko

mongintomon-kou, mimumui-kou, misasamod-kou om miaandus-kou. Sabap suvai iadino kavi om osuku-ogi i gama manamod om mimbulai i kopioondusan do Kinoringan. Kuran-ka sumondot i samod om i kopiondusan do Kinoringan, ong i piumpugan, nga amu manaud om kumavid di samod om kopiondusan. Ong sukul atag i gamaon do piumpugan, osulian om otimpa i gama do Kinoringan manamod om mangandus. Ong atag o gama dioti tumorima di surat di Paulus, kadapat-no ioti mitotorima di surat om ongimuhunan di Paulus sampai polombus-no ioti di kovosihan om selamat dau sid ongokoruhang sid gama mitatabi-tabi om midudungu-dungu, iadko it ororohonon dot anak. Iti-no o tanda do kopiobpinezan sid Tuhan Yesus, okonko tanda do miginavo iadko ondu om kusai. Ino dino vaza kodori diri pembulai di kopiobpinezan dot ulun Kristian ko rombongan dit iseso ot ugama. Topot ong sid Momogun om sid kobudayaan dit ogumu it ongobansa vokon, amu oubas do iadino. I harati, ino gama di iadino midungu sid piumpugan sid Korintus, hal do kobudayaan rontob, okonko hal dit a-milo nga suhuton sampai biano. Tasantanid-tanid i vaza dit ongobansa mitabi om minsamung mitoguvang, iadko it Ongosama. Vokon-no ong minsanko midungu o kobuatano, nga varo nosodia i karis do monobok dit ulun dino, antawa bai nokoob sid ginavo it araat o pongitungan ponong sid ulun dino. Topot ong sid tinoguvangan, kakali avazau om mingin i vuros. Manjadi atag dot it ulun Kristian sid Momogun mogihim do vaza misasalamat om mitotoguvang sid piumpugan, supaya varo gama dit atag om oimbulai i kopiobpinezan sid saralom di ngaran di Kristus. Avantang dara ong varo vaza di dang Momogun mantadko sumusui di kavazao dot ongobansa vokon mitabi om misasalamat.

Amu olinangan di Paulus do polombus-po di selamat dit ongoulun Kristian sid Efesus pakaa sid dioti sid Korintus. Iri-ogi mindamo i Paulus di barakat do Kinoringan bahagi di piumpugan sid Korintus. Ino pinta dua di Paulus sid surat diti nanu-no bahagi di liturgia dot ulun Kristian sumambayang. Sabap sid pomintaan barakat dino arait i Kinoringan, it Ama om i Yesus Kristus om i Sundu dot osusi, dot ikid tolu kobuatano do Kinoringan, varo tahak, ino-no, kovosihan, samod om piniizaan. Bai sid surat diti varo iadino o panansalamat om pinta barakat. Ong i kogulu karait i Tuhan Yesus, ino dino antad sid 1. Kor. 16, 23 ko Rom 16,20, dot sino dino onibak i gama pinta barakat do bai i Yesus ot arait. Sid 1. Kor. 12 minakakai-no laid i Paulus di tolu o vaza om kavazao do Kinoringan do puun om inantadon di tahak do Kinoringan om i kuasa di mongimbulai di kotunggaran do piumpugan.

Ong mamakai i Paulus dino tolu o kobuatano do Kinoringan, aso-po gama dau mononteologia di Trinitati, iadko i teologia di gorija sid tohudi di minamakai di filosofia sid gama manarang di tolu o kobuatano dino. Ong i Paulus, bai iso-no o panangan di boros dau di iadino, I Sundu dot Osusi, ino-no i kuasa om pakakas do Kinoringan porikot sid ongoulun dot isai i Kinoringan om i Kristus om monuduk di samod om kosusian dot ulun Kristian. Topot i Tuhan Yesus, ino-no i manansangau di Sundu dot Osusi (3,18) sampai i Sundu dot Osusi, ino-no i kuasa di Tuhan di mintoron sid ginavo dot ulun Kristian do iadko kondiri di Kristus nokosuvang sid ipat-ipat it ulun Kristian om sid piumpugan om gorija (Mat. 28,20). Ino-no i kosusaan, sid tohudi, varo vaza dot ulun mangaharati di trinitati do iadko tolu o kinoringan, ko i Muhammad, nga iadino ot ohorotizan dau, tu varo rombongan do Kristian di minomoros do varo Kinoringan it Ama om varo Mariam, it idi di Yesus om iri-ogi i Yesus, it anak do Kinoringan om i di Mariam. Iti-no o sabap do moniag i Muhammad do pokoruhang sid Kinoringan dot ondu, iadko i Kinoringan om i Mariam o molohing, i minanganak di Yesus. Sabap ong otopot, kuran-kuran, bai iso-no o Kinoringan, ino-no i Minamangun ko minongurug om i Yesus, nga boros om samod do Kinoringan di sumampai sid riniba, tu monobus om mangalabus di riniba antad sid kinouripanan do karaatan, sampai i Sundu dot Osusi, nga i kuasa do Kinoringan di mintoron om monguasa dit ulun di mangasip sid Kinoringan.

Tafsiran di Surat di Paulus pakaa sid ongopiumpungan sid GALATIA (Kartar Kerja sid Kursus Tumpuk 1992)

GALATIA: Daerah sid sarazo do Asia Minor ko Asia dot opodok, ong bianco, Pomogunan do Turkey. Varo-no nokosurat sid Usuran Rasul F. 13,13; 14,1ff 16,5. Na it ongoulun di daerah dino, varo-no ong retanko Kelt ko Gaelik dot ino bansa dino okonko bai sorid Turkey, inoi nga kinodorizon-po diri tinumanzag sid ongopomogunan vokon, iadko sid England (Wales), Ireland om sid Franzis. Sampai bianco varot ongoulun sori di mamakai di boros do Gaelik om i kobuatano dino tanid mantadko it ongoulun vokon. Rontob-nopo, ino hal dino amu-po osodiri om otontuan banal.

Ino-no it atalahas, amu oruhai kembulai i piumpungan dot ulun Kristian sid Galatia dino di nokorikot i Paulus sori, imatai sid F.13 om 14, banalko saapon iosido dit ongoulun do Yahudi. Sisiri ong minatai iosido dit odumpahan do vatu.

Hiza do minamanau-no vagu i Paulus sori ponong, notiag-no iosido di Sundu do Kinoringan, om iri-no tu nokolombus-no i Paulus om i rombongan dau kumaa sid Troas sampai tumupak-no sid Europa, tu notudukan-no iosido dit inipi dau do tumupak.

I piumpungan sid Galatia nokotimpuun sid tanga do pioduhan om kasanaan dit ongo-ulun Yahudi, dot mad tigogi, sumusui-no ioti di kobuatano dit Ongoyahudi, tu varo nokorikot sid dioti dot ulun di retanko Kristian, topot kakali sumangkut dit adat laid do Yahudi. Ioti minangasau di piumpungan sampai minanarik dit ulun Kristian dino sid kobolikungo. Varo-no kembulai do boros dot i Paulus okonko rasul banal, om i vaza dau mangahabal di habal do Kovosihan, okonko nonong. Tu suvai toudon i Taurat om i boros di Yesus om atag-ogi. Dot i Taurat isuhut di tafsiran dit Ongofarisi om it ongokatib. Norongou-po di Paulus i iadino, monurat-no iosido di surat diti.

Ong i Paulus, kodung norongou dau i habal do iadino antad sid ongo-piumpungan do Galatia, ino-no Perge, Ikonja, Lustra om Pisidia om i vokon, turus minamanau-no dara kumaa sid ongopiumpungan dino do manalasai di hal dit amu atag, aso surat dara antad sid di Paulus bahagi dit ongopiumpungan om aso surat pakaa sid Galatia dot emot tokou. Topot mad surupu tokou tu amu nokoriat iosido kumaa sid ongopiumpungan hiza do varo kosusaan do iadino. Sabap antad sid sampit di Paulus mamanau om magandaha nokosurat om nakatandon-no sid karatas i boros om kenginan di Paulus. Pengkaa i Surat pakaa sid Tesalonika, ino-no i surat di nokogulu kosurat di palad di Paulus.

Na i tudukan di Paulus okonko rumbul satu manarang om monuturan di tuturan di Yesus om i kobuatano di sid tanga do riniba iosido, inoi nga i hoturan om i tudukan di Yesus pinoromut iosido sid ongoulun, isuhut di boros di Yesus dot:

" sampai tudukai-no dikou ioti sumuhut di sokovia i nunu-nopo i nimuhun-ku sid dikou." Mat.28,19. I Paulus pinorikot, om pinosondot di hoturan di Yesus sid ipat-ipat it ulun, ong sukul mongining di tudukan dau, atarang, alanta, alus om otulid. I tomodon dau posuhut dit ongoulun om mangatag om pemumui dit ulun sid ralan dot otulid, ino-no i ralan do koposizan.

Na ino surat di Paulus dino binasa-no sid ongopiumpungan sampai pinisosolin-solinan-no, supaya okonko rontob iso o pomogunan o kabasa, inoi nga kotongkop-po sid ongopomogunan i surat di Paulus. Ong pinorikatan-no nga sid Galatia, topot nakazazad-no sid ongopiumpungan vokon, dot ombo o nokorongou do varo surat di Paulus. Alaid-nopo, nakazazad-no tumongkop sid pomogunan dot Asia Minor om vokon-po sampai i surat dino jinumadi do puun di buuk di retanko KITAB VAGU. Na i surat pakaa sid Galatia, orijinal banal di Paulus, tu varo tanda tangan dau sid kovian. Palad kondiri di Paulus o nakasain dino.

Fasal 1,1-2,10 Baiko iso o Habal do Kovosihan:

Amu koho i Paulus do varo hal vokon nakagavul sid Habal do Kovosihan.

1,1-5: Sid surat dino kadapat tokou humarati di vaza kodori monurat. It ulun monurat mangarait-po laid di ngaran dau om iri-ogi porikatan sampai varo-po salamat.

It onibak o gama di iadino, ino-no sid Surat di Yakub. Ong i Paulus, mad turus mangamung-po dot a-ko piro o hal do manalahas laid i tomodon dau monurat. Manarang iosido di dau do tugas om pangkat. Sid ongosurat vokon mangarait i Paulus di kondiri dot "uripon di Tuhan". Ong siti mongohond tol iosido do "rasul" iosido dot i korosulan dino okonko bai iadko it ongorasul vokon di nokokoruhang laid di Yesus, inoi nga iosido rasul antad sid kondiri di Kristus om Kinoringan. Gulu tarang dau i iadino do ponombol di gama dit ulun di mongindaraat di Paulus di retanko okonko rasul i Paulus. Imvagat di Paulus, ino-no i kinosomungan dau di Yesus sid tanga ralan kumaa sid Damshek, tu i nogulian Yesus o minamanggil di Paulus. I harati, i Paulus it ulun di nokotohudi banal katambi di Yesus dit nogulian. Iti-no i hak di Paulus dino.

Iri-ogi ginovit-no di Paulus i rombongan dau. To okonko iseso iosido sid tanga ralan diri di mangahabal di Habal do Kovosihan, inoi nga kikoruhang iosido sid tugas dau. Ong it ongoulun di minangasau di piumpugan sori, asarok iseso mamananau om mansahari om povongo dit ongoulun om piumpugan sampai momuruvak do baiko ioti o kakavid dit atarang o Habal di Yesus. Sid gama dioti pokih di Paulus om mongindaraat di gama di Paulus minanansahari ioti do balanja om kohormatan. Iti-no o sabap do manarang i Paulus dot i dau do gamaon ino-no tumpuk do kopitatabangan o posurut di Habal do Kovosihan.

Sid saralom di gama manansalamat di piumpugan om poromot sid dioti di kovosihan do Kinoringan, mad onibak, tu nonsi i sokovia i gama om tomodon di Yesus ponong sid riniba, om amu alazan di Paulus do mongohormat di ngaran do Kinoringan. Ino vaza di Paulus mangarait om mongohormat di ngaran do Kino-rian, kakali sampai bianco nataud dit ongosilam do kodung kapangarait di Kinoringan ko i nabi dau, nga iamung-no i gama mongohormat.

1,6-10 Iri-ogi turus tumoguvang i Paulus sid tomodon-no banal dau monurat. Okonko baiko murung-burung iosido ko malu-kalu dit ongohal om kobuatano dit ongopiumpugan do Galatia, inoi nga avalang i boros dau mamajal om mongindaraat di gama dioti tumohiang sid Habal do Kovosihan. Monodiri iosido dit atag o gama kumavid di Habal do Kovosihan om i vaza pagavul dit adat laid om i bahazan di gulu sid Habal do Kovosihan. Aso tanganan porolot om popigavul di duvo ohoturan dino,ka dau, sampai i hal dino okonko hal do misingkavaro. Kodung amu atarang om iseso sid Habal do Kovosihan, mad natagak it ensanan om nokedu-no kavi sid ralan dot abanal. A-kadapat do piroloton i duvo i ralan dino, tu amu mirad o rikoton, gam misaap banal ino duvo i ralan dino. Iti-no o sabap do sampai minongolupu i Paulus dit ulun di mangasau di piumpugan om it isai-nopo i sumusui dit ralan di iadino. Apatong i boros di Paulus, tu, ka dau, Minsanko malaikat do Kinoringan a-kadapat monimban di Habal do Kovosihan. Sinod tinomod di gama pahabal di Habal do Kovosihan kembulai do varo panangan ko aso, varot ulun di baiko mansahari sid Habal do Kovosihan o tomodon posuhut dit ulun sid dau om varot ensanan sid Kinoringan o panangan di gama mangahabal di Habal do Kovosihan.

Siti diti atag ong momorisa tokou di kondiri do nunu banal o tomodon tokou, ong tumpuk do kopitatabangan tokou om baiko mokibalanja om mokiopud tokou do PCS, bai mokisisinang ko i kosurutan di Habal do Kovosihan om i PCS o tomod tokou do Tumpuk tokou om kumurusus tokou bianco. Povizau di gituko om ambit sampai mogom sid station do Puruvan mangakan di balanja do PCS om i rukut dit ongoulun sid Basel, ko agazo o ginavo dot a-milo-milo pahabal om posuntu di Habal do Kovosihan om i samod do Kinoringan sid isai-nopo it ulun om razat om piumpugan?

1,11-23 Ong i Paulus amu ekum do mamalang di kobuatano dau laid diri dit amu-po nokemumui iosido sid Kristus. Gam sid gama do Kinoringan om i Kristus di monimban di kobuatano om panahon dau, mad tinuntuvad i kavazao dau di manarang i Paulus nokopikondiri di Kristus om iosido sampai

nakaramit-no iosido di Habal do Kovosihan dit alus om atarang banal. Iadko narait-no laid dau i KENGINAN do Kinoringan sid salamat dau (1,3-5), manarang iosido dot ong sukul kenginan do Kinoringan, aso tenganan sumAAP dit ulun ko moguhang di hoturan om kovosihan do Kinoringan. Sid dau do kobuatano di gulu diri posuntu i Paulus dit atag o gama om it amu. Iosido diri nakakavid om hinumarap banal sid adat dit angaki, ino hoturan di Parisi om Katib diri di minanaud di hurup di Taurat. Rontob-nopo sid gama dioti di iadino, minangalai ioti di tinomod om kogunaan di Taurat. (andaman i boros di Yesus do " manahas-ko do togonok, nga inumoni dikou ong it unta" Mat. 23) Na iosido banalko atatap nokosuhut di hoturan diri, dot tigogi, orikatan iosido di kodim do Kinoringan. Ino kodim dino okonko bai kinabambaran, inoi nga vaza-no laid do Kinoringan momili om monodia dit ipat-ipat it ulun bahagi di dau do kogunaan, sampai ino kodim dino nga kiguna banal om ino-no o sabap di vangun vagu dau.

Sabap nokokondiri sid di Yesus rumamit iosido di Habal do Kovosihan, amu osusa iosido mokituduk do rasul ko mokipangkat i Paulus sid tugas dau, tu miuma-no ong i Kristus-no o minanahak do tugas om pinosuhut dau. Baiko it ongoulun di minongunang di piumpugan sid Galatia o minomoros dot, i Paulus okonko rasul, Topot minanarang-no i Paulus dot iosido dino kopisamung-no di Petrus om nokopiakun sid valai di Petrus om nokotogung-no sid di Yakub, it obpinai di Yesus, ino-no it ulun di retanko origi do piumpugan.

Tanid mantadko ino popuhondom-po i Paulus dit ulun di kobuatano dau laid diri di nakasasi do kuran i Paulus nokotolikud-no di kavazao laid om nokotoguvang-no iosido di gama posurut di Habal do Kovosihan. Kagi ino kososizan dit a-ko piro i piumpugan di nendorosi diri di gama di Paulus mongogusa dit ongokristian, di gama mongindazou ioti do Kinoringan. Sabap sid gama mongindazou do Kinoringan mongimbulai di kogunaan dit ulun Kristian, iadko nokosurat sid Fasal 2,20: "Sabap ino, okon-oko mizau-oku-po vagu, inoi nga i Kristus ot apasi sid saralom-ku. Tu nunu-nopo i koposizan-ku dino, nga apasi-oku sid saralom di gama-ku mangasip sid Anak do Kinoringan, i minanamod dohon om i minongontok dohon".

Monodiri i Paulus di duvo o tomodon di tudukan di nokorikot sid Galatia

kenginan do Kinoringan	kenginan do dang riniba
kabanaran do Kinoringan	adat om undang-undang do riniba sid ugama ko hoturan vokon
i janji vagu (3,15-29)	ko hurup di pinonuhuan
kosipan (3,1-14)	ko kotulukan dit ongoadat
samod (4,7)	kotubazaan do riniba, mumpalad, monongkudau,
momodrusuk,	mogulu di kondiri (Kain om Habil)
kolobusan, kemerdekaan (5,1)	kinuripanan dot undang-undang
kouvaan di Sundu (5,22-25)	kanangan di guvas

Fasal 2,1-10 I Paulus om i rasul vokon

Nakapanarang-po i Paulus sid F.1,13-24 do rasul iosido, tu kinodim om ginazad di Tuhan

Yesus, lumombus-no iosido manarang dot rasul banal iosido, tu notorima-no di Petrus om it ongorasul vokon iosido do rasul. Ino iadino dino najadi-no sid Yerusalim sid miting dit ongoulion di iadko EXKO do gorija diri, minsanko i hiza diri aso-po hoturan ko perlembagaan do gorija. Ino miting dino nousul-no sid Usuran dit Ongorasul F. 15. Vokon-no ong varo momoros dot ino miting diri mad sinoda keso do gorija. Rontob-nopo okonko ensanan it ongowakil dit ongopiumpugan nokoumpug siri, baiko it ongoulion i retanko "origi" di piumpugan.

I minamanau i Paulus kumaa sid Yerusalim, minongontok iosido di piumpugan sid Antakia. Topot amu apanggil iosido om okonko varo minonuhu, inoi nga antad sid tudukan di Sundu do Kinoringan o kinapanahan dau sinumamung di Petrus om i vokon. I hiza diri, i Paulus nakarasul-no do hopod om apat toun, antava ong iamung-po i tolu toun sid Arabia, 17 toun do nakarasul-no iosido. minsanko ino

koledo di rasul iosido manalahas-no dot i kuasa om hak do rasul iosido okonko antad sid Yerusalim. Kagi, i minamanau i Paulus mad mangagazad iosido do Tumpuk do Kopitatabangan, tu i Barnabas om i Titus nga nokovozi-no. (UR 11,22; 13,1; 15,35; 2. Kor. 2,13 om 7,6; 2. Tim. 4,10; Titus 1,4:

Na i tomodon sid Yerusalim, manalahas om mokitalahas om mongolumbatos dot iso-no o Habal do Kovosihan om iso-no o gorija. Engin i Paulus mongimpuras do nokokuro, tu varo ulun antad sid Yerusalim di retanko anggota do gorija di mangasau dit ongopiumpungan sid sodu. Mokibanal iosido diotit ongorasul sino di dau do vaza mangahabal di Habal do Kovosihan, tu iti-no i gama dit ongoulun di minongunang dit ongopiumpungan, retanko i Paulus okonko rasul om i habal dau okonko inanu antad sid ongorasul, gam minsanko nakasamung i Paulus dit ongorasul sori, nga amu-po. Retanko amu mangakun ioti sid Yerusalim di gama di Paulus,ka. Sabap ino, mokisalasai i Paulus dinot ongohal dino om mangakun iosido do varo mad kabanaran antad sid dioti, minsanko amu agazo o harapan di Paulus sid dioti, i retanko "origi di gorija". Elaan di Paulus dot okonko i ngaran o hak om harapan, inoi nga i Habal di Kristus.

I nokovozi i Titus, nga varo-po tomodon tanid mantadko kamung iosido sid tumpuk di Paulus. I Titus, ulun Kristian antad sid labus, Yunani, okonko nokosuvang laid dot ugama Yahudi, i harati, amu nosunatan iosido om nokokiro-no iosido dit ulun dot Yahudi dot ulun labus iosido om ulun dit asot ugama. Ong it ulun di iadino a-kavasa gumavul sid umpug dit Ongoyahudi. Nokorikot-po sid Yerusalim, aso tiagon dit ongorasul di Titus do mamung sid miting dioti om milang dioti makan.(3) Ino dino nga tanda dot obebas om otorima-no iosido dioti.

Na varo-po i retanko obpinai di momudut do nakamung sid miting diri do mongoliduk o tomodon sampai mongogorot dit ongorasul sino do moniag di Paulus om i tumpuk dau sampai manarang sid di Paulus di syarat dioti, ino-no suvaiko sumuvang-po laid sid ugama do yahudi om mokisunat-ogi om iri-ogi Kumoristian. Ponong sid ulun diri amu opian i boros di Paulus, gam mad mamajal iosido dioti iadko i noboros-no laid sid Fasal 1: olupu-no ioti,ka. I kiroon di Paulus, it rumbul satu araat o gama sid gorija, ino-no mangasau om mongunang sampai momudali om momolikung di Habal do Kovosihan.

6-10 Antad sid atarang o boros di Paulus manalasai om mokisalasai olumbatas i kinapangaan di miting dioti diri: Gulu minanarang i Paulus di vaza dau monginjil sid Habal do Kovosihan, iadko inovit-no sid ongopiumpungan ponong sid labus. Iri-ogi i Petrus minongusul di dau do tugas ponong sid ulun Yahudi di nakazad sid ongopomogunan, nga atalahas-no do miabal i gama dioti dino. Baiko i rikoton o tanid-no, isuhut di suhu di Kristus. Nopongo-peti, minangaratu-no it ongorasul do kovosihan dot i Paulus kitugas ponong sid labus om i Petrus ponong sid Yahudi, sampai binarakatan-no dioti i Paulus om i rombongan dau sampai tinumabi-no dioti. Baiko iso o syarat di niamung dioti, ino-no, atag dot it ongopiumpungan sid sodu mongohondom dit ongoulun mosikim (di sid Yerusalim.) Mongimbulit-no i Paulus mongusul di miting diri, omungan-no dau dot, Aparu-oku-no posurut di rukut bahagi dioti dino.

Ino-no i kinapangaan di miting sid Yerusalim (imatai-po sid UR 15)

- a) I vaza di Paulus mangahabal di H.d.K, avantangan om nosuhut-no dioti.
- b) Minongoho om minantu-no ioti dot i Paulus rasul antad sid kodim di Kristus
- c) Mangakun-no ioti do varo vatas di H.d.K. ponong sid labus om ponong sid ulun Yahudi dot i Paulus ponong sid labus om i Petrus ponong sid Yahudi di nakazad sid pialatan dit ongobansa
- d) It ongopiumpungan mongitung di balanja dit ongomosikim sid Yerusalim
- e) Bai iso-no gorija do kopiamung Yahudi om vokon.

Ong kening tokou di kinemumuzan di Paulus sid di Kristus om i gama dau monodiri om manantu di Habal do Kovosihan, atag dot i tokou kondiri, ipat-ipat tokou nga mongohondom om mongimpuras di kondiri do kuran i dau do kinemumuzan om kuran kagazo do ginavo tokou om gama tokou, supaya amu orungoi ko okihi antava ounang i Habal do Kovosihan. hondomo tokou-no do kuran ong sid

tanga dit ongopiumpungan do PCS, tu varot a-ko piro di moniim mangasau do piumpungan sid gama mangamung di dau do hal sid tudukan ko mongohino di habal dino. Atag tokou do iadko i Paulus magavi tokou manalahas om manantu om mongingsosok di bai Iso o Habal do Kovosihan om nunu banal i tomodon dit ulun di mongunang.

2,11-14 Mongusul-po i Paulus di pangalaman dau sid Antakia do manarang dot isai o kitanggung jawab ongvaro hal dit a-milo-milo mad salazon. Sabap i Antakia nokotohiang i Petrus, okonko i Paulus sampai minanahak dot araat o suntuan. Dot i Petrus retanko origi do piumpungan om "pampang". Nokorikot-po i Petrus sid Antakia, hiza di nakatalib i miting sid Yerusalim, mamung iosido sid piumpungan dit ulun dit okonko ensanan Yahudi laid. I minamung iosido sino, aso nunu, tu mad opongo-no sid Yerusalim dot amu mamakai-po dit adat do Yahudi. Minilang iosido makan om mamung sid poginakanan di Tuhan Yesus. Aso kiroon dau dot a-kavasa tumabi dit ongoulun vokon om i iadino, dot tigogi, varo-po nokorikot dot ulun do piumpungan sid Yerusalim di mad mongoliduk om momorisa o tomodon. Ulun ioti di sakub di Yakub. Kodung sumuvang ioti sid umpug sid Antakia, minogidu-no i Petrus dot olingob o gama mogidu om tumanid, mad a-nokelang dioti sino.

I Paulus, i monurat di pangalaman dino sid piumpungan do Galatia, manarang di tolu i hal di kembulai sino, ino-no:

- a) bai iso Habal do Kovosihan, amu kavasa monimban ko momudali
- b) iosido Paulus okonko rasul-rasul, inoi nga rasul banal di Kristus
- c) Potorontog-po iosido di gama dit rasul vokon dit amu onong.

2,15-21 Inot a-ko piro ayat mad tudukan di Paulus, keso iadko it ahandaman dau sid Antakia di mamajal om potorongot iosido di rasul Petrus, om iri-ogi ponong sid ongoulun Galatia di mad misimpalid. Mongimbulai i Paulus do suvaiko sumokot sid di Kristus om apasi-ogi it ulun Kristian, lobipo ong i rasul. Inot a-ko piro ot ayat di tudukan di Paulus manantu di kogunaan di teologia dit amu kopigavul dit ongohal, inoi nga monodiri banal om mangarantang di Habal do Kovosihan. Amu misimban-simban ko humaba it ulun di kumavid di teologia mad girizan ko tungkat om kopihoton di kosipan dau. Sompi nakamung di Petrus om i Paulus sid Yerusalim, dot tigogi, oluvau i kososizan di Petrus do sumamba iosido sid ulun dit mongunang o tomodon. Amu katama iosido dumahava om moniag dioti. Atag do kumitoguvang dit ulun di mangasau, okonko bai mumbongut om mogidu it ulun dino. Atag do mongohondom banal dit ongokapangaan sid nunu-nopo i hal, supaya ong kembulai o gagut, oruhai pogili om atarang manarang dit ombo it atag om amu. Banal-no, ong amu opihot it keloo-ku om kosipan-ku, varo korosizan dot amu andaman banal ko a-kotori. Iri-ogi suhulon-ku motos ko mumbongut. Rontob-nopo, kodung varo minangasau om minongunang om minanazad di vudut, apagon potorongot-no vagu.

Ong i gama di Petrus, baiko i korosizan om kobungahan, tu amu katama, topot ong i piumpungan sid Antakia, agazo dara o pensubaan, ong okonko i Paulus mingkakat om minanarang sampai minongimbulai di gama di mangasau om monodiri dot ombo it otopot om kiguna sid piumpungan: Kosipan antava sunat, momoug do palad om pinggan ko manamod dit okugui. Iti-no o sabap dot apatong i tudukan di Paulus diri, tu potorongot di piumpungan om pemumui-no vagu di Petrus om i kosipan dau baiko atalou, om iri-ogi i tudukan sid surat pakaa sid Galatia, i minongimbulit i Paulus di sokoviai i hal dit atag toudon om suhuton, ino-no:

- a) Ong tumanid i Petrus sid meja do Kiningan, mamalid iosido di piumpungan dot ulun Kristian dit okonko Yahudi om Adat do Yahudi. Kurozon-no do varo-no hiza do gumavul sid ulun vokon om iri-ogi sumodiri sampai mongolim-no do nakagavul iosido?
- b) Sid Kristus kemot tokou do kabanaran, nokokuro-ka tu mokibabanal vagu sid bai adat dot ulun om i vaza monodiri di Taurat sid kogumuai it ponuhuan?
- c) Ong obebas tokou di Habal do Kovosihan, nokokuro-ka do mokiuripon vagu dit adat?

- d) I gama di Kristus manapul di riniba amu monodiri ko momili dit ugama laid dot ulun. Ensanan it ulun kotorima di kaadaan do sala, ong sukul mangasip om kumavid di kovosihan do Kinoringan.
- e) Iri-ogi masi vagu it ulun di nanangan-no do kapatazan, ulun do labus laid ko Yahudi laid, nga i koposizan vagu hinatul-no di koposizan di Kristus.(20)
- f) Baiko i gama di Yesus o kiguna sid gorija dau, okonko i vaza laid dot ulun mokibabanal sid tinoguvangon do Kinoringan.

F. 3,1-29 PINONUHUAN ANTAWA KOSIPAN OM JANJI VAGU?

Duvo-no o ralan di misaap:

A) i pinonuhuan mad i hoturan ponong sid Kinoringan om ponong sid razat dara:

Ong i Ibrahim, aso agama do nunu-nopo, nga inanu iosido do puun do barakat, sabap minangasip om sinumuhut om minongusaha di kenginan do Kinoringan.

Na i Ibrahim o minangaranzat dit ongobansa om i kosipan do Yahudi, Silam om Kristian.

Topot minsanko i hurup dara o nokosuhut di pinonuhuan do Kinoringan, alazan it avagat banal, ino-no monongkudau o tomodon di sandad riniba. I vaza mamakai di pinonuhuan, iadko monobus di kovosihan do Kinoringan. Iti-no o sabap dot minsanko ponong sid kavantango i pinonuhuan, ajadi do lulupuhon do riniba.

Iti-no o sabap dot i pinonuhuan bai iadko guru di mangalapos dit anganak do pemumui dioti o tomodon . I pongoretan guru: paedagogus = mangalapos (iadko i harati do *sharia* sid Silam = i ralan kumaa sid Oasis, ino talaga sid tanga do belantara. Sid tanga do ralan bambangon i unta dit amu ozi lumombus, tu ohuzan. Suvaiko alapos om ouru-ogi sid talaga om apasi-ogi.

B) Sid di Kristus tokou-no: Kosipan, koposizan om vangun vagu (2.Kor.5,17)

Sid di Kristus tinumimpuun vagu i Kinoringan do porikot di kovosihan om samod om kabanaran dau, supaya i riniba tumorima om tumimpa. om okonko uripon do karaatan, inoi nga uripon do kabanaran, tu nobebas-no ponong sid kabanaran. Antad sid gama di Yesus obebas tokou dot aso pitonidan do bansa ko suku bansa ko bai ondu kusai. Anganak tokou dot amu monodiri do kotuaan ko komulakan. Mirantas pusod di samod do Kinoringan. Sid di Kristus tokou-no !

Fasal 3,1-14 om 22-29 I Paulus polovong dit Ongogalatia!

Insan-po dino pokoulau ko polovong i Paulus di gama dioti sid Galatia. Olondok o boros di Paulus. Amu opian ko odoromoi o gama dau mamajal dioti, tu i kiniro di Paulus mad oholian-no i gama dioti sid Habal do Kovosihan om sid dau. Ino kobuatano dit ongoulun sid Galitia mad amu kasip dot iadino kobolikung o gama tumolikud di Paulus om i habal dau. Sabap i hiza dot i Paulus sid dioti diri, sisiri ong minatai i Paulus, tu asaap iosido dit ongoulun dot Yahudi di sinumaap di Paulus diri sampai mangahaazad di Paulus sid siombo-nopo o rikoton dau, tu manasang om mongunang. Atag do mamasa-po sid U.R. 13,13-43, ino vaza di Paulus monginjil om mongimbulai dit usul dit Ulun Yahudi om ugama do Kristian, ombo o puun-no banal, antad sid di Ibrahim sampai sid di Yesus. Sino dino, om sid ongoayat 44-50 sampai 14,1 om 14,19 karamit tokou di kapagasan di Paulus sorid osomok sid Galatia diri. Nelaan dioti sid Galatia kavi ino pangalaman di Paulus. Iti-no i boros di Paulus, "sid tinoguvangon di mato dikou o pinosuratan-ku do nakasangkap i Yesus Kristus." om popuhondom i Paulus dioti do kuran kinadapatan dioti di Sundu do Kinoringan di banalko kikuasa sid dioti diri. Ino dino, mad noling-an-no dikou kavi, naku, ka di Paulus. Iti-no sabap do nokoboros iosido do iadino karaat o pongoretan napakai dau: Nokokuro-ka, tu iadino o kolovong dikou? Kiroon-ku, ino dino miabal dit a-ko piro it ulun siti ponong, nokotiim-no laid dit araat o gama dot a-ko piro ot ulun di misingmontori do pomogunan, nga kakali sumamba sid dioti sampai ong miundi, momili vagu dioti tu

kakali mangasip di vudut dioti dino di retanko ioti-no o mamasi do pomogunan, ka. Banalko magavi i Paulu popuhondom dioti di hiza di kinembulazan di piumpugan sid dioti, tu mad nolingan-no kavi om nokotolikud-no sid vazaan laid diri. Suvai -ko lovong-no banal ong iadino, mangasip dit ulun di minongunang laid diri sampai minangahatul di kinosusaan di Paulus di sisiri ong minatai iosido diri. Noboros-po i iadino do mad nokolinggata-no dau i ginavo di banalko osusa, tumiim-no vagu iosido manarang di tinomod di pinonuhuan, tu i pinonuhuan dino mangatag om pemumui di bansa dot Israel dara o tomodon, i najadi-no do kukurungan sit aso-no kalabus, tu tinuvarig dit ulun sampai najadi i pinonuhuan dino do iadko pongizanan dit oponu do rugi di momogos dit ulun, okonko pemumui om posinang dit ulun di sid tanga do ralan sumuhut di hoturan do Kinoringan. Tu i pinonuhuan, mad kokovidon sid ralan sumuhut di kenginan do Kinoringan dara o tomodon, topot, tigogi mad tobon di mongohigong di ralan sino.

Iri-ogi i Paulus mamakai-po do suntuan vokon kananganko i pinonuhuan. Boros dau i pinonuhuan mad guru. Rontob-nopo ong i guru di tinarang di Paulus, okonko iadko it ongoguru biano. Ong guru i hiza diri, tanid. Koubasan dit ulun Rum do dumagang dot ulun Yunani, ulun dit elo monurat om monuduk, nga inuripanan dit ongoulun do Rumi. I tugas dit uripon sid valai dot ulun Rumi, monuduk dit anganak do Rumi. Na i koubasan monuduk diri, maamakai do lalapos om sid gama monuduk, mangalapos patanon di keloo sid guvas om ginavo dit anak. Tu ong kodung alapos, amu-no olingan vagu i hal do rumbul ko hurup om i iadino. I ngaran di guru diri, Paedagokus, ino-no, momobog dit anganak. Siti diti varo hal di mad osomok iadko it kohorotizon it Silam i hal di retanko syariah. Tu i harati di pongoretan dino, = i ralan kumaa sid talaga. Ong sid tanga do belantara, vokon-no ong kaanaman ko koturuan om korikot-ogi sid talaga, dot it untu di manaan di vaig dot ulun di mamantau sino, kogoos mamantau do iadino ot osodu om alaid dot a-insan kenum. Suvai korikot sid talaga vokon om ouru-ogi vagu. Na vokon-no ong it untu, minsanko nokensomok-no sid talaga vagu, mad malan lumombus, mintoron-no ko modop-odop-no, mad sang laang, nga amu-no mamantau vagu ong okonko bambangon. It sanganu osusa do mamambang dit untu dau, supaya it unta korikot sid kosinangan dau, ino-no sid talaga di mongouru do tuliou.

I panarangan di Paulus, i pinonuhuan baiko pongodumpanan do pemumui di tokou, topot antad sid vaza dot ulun humarati, amu-no nopud i tomodon dino. Suvaiko kondiri di Yesus om nakalanta-ogi banal i ralan kumaa sid Kinoringan, tu nanu tokou-no dot anganak do Kinoringan, ong sukul mangasip om tumorima tokou i gama di Yesus om i kovosihan dau. Gam, sid hoturan vagu it antad sid Yesus, ogumu o hal tumanus-no. Tumanus i vaza do memot di pibidaan dot ulun om bansa sampai i pibidaan dot ondu om kusai, retanko aso guna dit ondu sid tinoguvangon do Kinoringan om iadino. Tu kodung nakamung-no sid hoturan di Yesus, nokensomok tokou-no sid Kinoringan dot aso bida do Yahudi, bansa vokon, ondu, kusai, anak osukod, ensanan tokou do nakamung-no sino.

Atag do mongohondom tokou dinot ayat 3,28, tu iti-no i kopomihatan di kezaan tokou ulun Kristian sompomogunan om songriniba sampai sid ayat dino misingilo tokou dit atag o gama mongoguna it ongokusai dit ongondu om it ongondu dit ongokusai.

Na sid Fasal 4,1-7 varo-po panarangan di Paulus do kuran tokou Kristian do nokotombil sid Ibrahim, dot iosido o mad aki tokou. Noboros-no laid sid 3,29 dot i tokou mad monungkus di Ibrahim. Topot suvai nokorikot i Yesus om nopud-ogi i tinungkusan dit antad sid Ibrahim diri. Na minanarang-no i Paulus sid Fasal 4,21-31 manarang dit usul di Ibrahim diri. Avantang dara do porolomo-no inot a-ko piro o boros di Paulus kananganko i Isaak om i Ismael, i Sara om i Hagar, tu i harapan dit Ongosilam, nga sid Ibrahim, it ama di Ismael, om i Hagar, it idi di Ismael. Na kiroon-ku, sera varo kotibangon do tumoguvang sid tugas tokou ponong sid ugama vokon, atag do tumoguvang di tafsiran dit a-ko piro it ongotat dino.

Fasal 4,8-20 pendongou i Paulus di tokou do kuran i ginavo dau ponong sid piumpugan sid Galatia. Ong sampai biano kiroon tokou dara dot i Paulus mad ulun dot arampus, tu mamajal om humungot

iosido, sitid a-ko piro ot ayat kembulai do kuran i ginavo di Paulus, di banalko osusa, mad mogihad iosido om opus iosido, tu mad porosuma (11) i gama dau diri sid Galatia. Magavi iosido mongonsug, mongimuhun om mokisian, mongogorot pomumui dioti vagu sid ralan dot arantang. Sino kembulai do songkuro o kozoos i kapagasan di Paulus sid dioti om kuran o gama dioti tumorima diri: "iadko malaikat-oku do Kinoringan o gama dikou pendakod dohon sid dikou.." Ino hiza diri, osinang-kou diri,ka dau.(14) om iri-ogi sid kovian, momoros i Paulus dot iosido mad idi dioti, tu "iadko hingoton-oku pousu dikou, ot anganak-ku", mad aso vaza tumalib manarang di samod di Paulus dit amu abasan mongonsug pemumui dioti dino.

Fasal 5,1-15 Kavid-kou di kolobusan dikou.

Inot ayat keso dino, iadko it ayat sid Rom 5,1 banalko agazo o harati i hiza di kinotimpuunan di Reformasi. I kapamanaran om i kolobusan dit ulun Kristian antad sid kinuripanan di Gereja RC diri ot banalko agazo o hal, tu Habal do Kovosihan hiza dot mad nokotorungku i gorija sid ongohal dit aso tantu-tantu. Ino-no rontob, kakali amu-po arangkap i gama dit ongokristian do Protestant rumamit di harati do kapamanaran om kolobusan. Tu i Martin Luther, ulun di nokotiim sumuhut di hoturan do semfuk. Nokosuvang iosido sid nokuta i gereja do posuvangan dit ongokusai dit amu-no gumavul vagu sid ongoulun vokon om i nakakun dot amu-no manansavo om obinsuhut sid di nunu-nopo songhoturan dot ulion do gereja, nonong ko amu, sampai minangakun dot amu mogihim di nunu-nopo i kolunduo do pomogunan, misingmosikim sinod umpug dino, alaid-no, nakabasa-no iosido di Kitab, ino-no surat i pakaa sid Rum om Galatia, mongoduat-no iosido do kuran kadapatan-ku di kosianan do Kinoringan. Tu ong i sid ongopandita o nening dau, atandas rodus om hukum do Kinoringan do manala di riniba om i sokoviai i gama do riniba o tomodon. Tu i hiza diri, sid gama mongindorosi di piumpugan, retanko it ulun dit amu manahak do rukut kosuvang sid naraka (apui it aso kopisakan), i razat do gereja banalko osusa o ginavo, isai-nopo it ulun dit okosog. Ong it ulun vokon, minongitung-no dot banalko aso guna dino tudukan do gereja sampai minogidu-no iosido sid gorija diri, antava baiko misingkristian, supaya aso manala dau. Tigogi, minamasa-no i Luther dino duvo it ayat dino do varo kapamanaran antad sid gama mangasip, okonko antad sid gama manahak do rukut - dot i tinomod di rukut diri, agazo i ginavo di Pope do pengkakat do valai gereja sid Rum di banalko asavat dit a-po insan nokotiim di riniba. Topot suvai agama ong ensanan it ongogereja varo rukut om bantuan, sampai mad ogiang-no i mato dau memot di kovosihan do Kinoringan i nokembulai sid di Yesus. Iri-ogi minumbongut-no iosido sampai diumahava sinod ongopandita vokon do kuran i dau do kohorotizan di Habal do Kovosihan om kuran i gama di gorija posusut di Habal do Kovosihan. I hiza diri okonko rontob a-nasalin i Kitab sid boros dot ulun di siombo-nopo, gam tiniag-po di Pope dot okovidan dot ongo-anggota i Kitab, tu ka dau, i Kitab bai mongogolivong dit ongopiumpugan om it ongoutok dot ulun. Bai i Pope om it ongobishop om i pandita o kavasa mamasa om manafsir di Kitab, ka dau diri. Antad sid ogulou i kembulai sino, minoniim i Pope om i Kaisar do potos di Luther, gam varo suhu di Kaisar dot isai-nopo i kemot di Luther, atag do patazoni, aso sala dau, ka. Na amu kosunu ino, tu varo isot ulion do daerah di minanapul di Luther om pinasako di Luther sid kuda dau do manapul sampai minonuhu di Luther do manalin di Kitab sid boros do Jerman. Iadkeno o kinotimpuunan di Reformasi. Ino-no o rontob, minsanko nohorotizan-no ngaran dot nunu ino kapamanaran dit antad sid Habal do Kovosihan om i kolobusan antad sid kinuripanan di pinouhuan, kakalii dot amu engkod i Luther sumamba om mongoguna dit ulion di dau do pomogunan om daerah om monuduk dot kodung Kristian it ulion do pomogunan, tantu iosido-no o mongontok do Kinoringan sid tanga do riniba sampai aso tenganan om amu kavasa do dahavaon i dau do hoturan om i dau do vaza manarang om manantu dot ombo it otopot om ombo it abanal om ombo it amu abanal. Sid saralom dot apad abad vagu mad nokotorungku om noboludan i gereja sinod ongohoturan dit ongopomogunan, dot i Kaisar antawa i raja o minomorinta dit ongogereja sid ongodaerah.

Na ino pangalaman dino monuduk di tokou do kuran dioti sid Galatia, i naratu-no sid pensubaan. Varo-po pangalaman vokon, nokosurat sid Kitab. Kodung naka-labus it ongouripan di retanko dot ulun Ibrani antad sid Masir, nakasamung-po ioti dot a-ko piro o kosusaan, minongogizak-no ioti: Osuhul-neti ong muli tokou vagu sid Masir. Omogot-po ong sid Masir, tu songponu-ponu it ongekava dot onsi,ka. Mad noling-an-no i kinapagasan sino sampai tinumolou-no i pongitungan. Amu nakaharati ioti di kobebasan om kolobusan dioti diri.

Antava, hiza di nokorikot it ongomisionari sid Banjermasin sid Kalimantan Selatan, ogumu it ongodayak dot uripon dit ongoulun di mad Sulutan om Sarip. Na i kiniro dit ongomisionari, banalko osusa inot ongouripon dino, tu amu obebas ioti. Osuhul ong mogihim tokou do siin om dagangon inot ongouripon dino sampai ilabus ioti dino. Na minongindugut-no do siin sid Europa om nikirim-no sid Kalimantan. Nakalabus-po it ongodayak diri, tumoronong ioti sid ongomisionari sampai ginumrot ioti mokisumad. Tu ong bianco, ikou o manansanganu om mamasi dahai, ka dioti. Manjadi banalko opogos it ongomisionari mogihim do balanja om ongotana om ongobibit do monuduk dioti do masi kondiri sid dau om dau dot tana o tomodon, nga amu tinumorima it ongodayak di gama dino, tu retanko dioti ko ino tana dino dang missionari om inot oula dino, nga dang mission. Suvai nagaratan om minangagama-ogi ioti sid ongotana dot opodok nga asot antad sid pongitungan kondiri, tu amu nakaharati ioti rumamit di kobebasan om kolobusan.

Sid hal diti mongimbulit i Paulus di tudukan dau laid, indoson dau, ong naramit-no laid dioti. Nosusa-no vagu iosido manarang dot iri-no ko iri vaza dit ulun Yahudi mamakai di pinonuhuan do monobus om monuluk di kabanaran o tomodon, banalko kopialai di kabanaran dino sampai i vazaan di Yesus, nga banalko tanid. Okonko it riniba o monobus di hoturan om kabanaran do Kinoringan, inoi nga i Kinoringan o manahak di kabanaran sid isai-nopo i tumorima di Yesus om mangasip sampai sumuhut dit ihud di Yesus. Kagi, ino gama sumuhut di kenginan do Kinoringan mad vaza monorima kaseh sid Kinoringan, tu ogiang-no i ginavo do Kinoringan ponong sid riniba om amu-no orindingan-po i ralan kumaa sid Kinoringan.

Kasalaan-ka-nopo dioti sid Galatia, nakalabus-no ioti, kodung nokemot ioti do nadawai o kandang, minogihim-no vagu ioti do suvangon sid kandang dino, tu oruhazan ioti mopud sid rinuvang do kandang ko sid kalabus om it obebas ioti. Iti-no o sabap dot minonginggulit-no i Paulus pogili sid dioti dot ombo o kiguna:

nosunat-no	ko i gama mongimbulai do samod
baiko nopigis-no it onsi	antad sid gama mangasip
it okudik it ovunos	om rumamit di kabanaran
di momunos di sokoviai	sampai mamakai kolobusan

Insanpo dino mad araat i pamarasan di Paulus: inot ulun di iadino o gama mangasau om mongunang dikou, osuhul do mokiontoluw sampai mongorongoi di dau kondiri.

Fasal 5,16-26 I Sundu ko guvas o suhuton

Nasalasai-po di Paulus i hal di sunat, nigili-no dau it hal di mad nalazan dit ulun di mongogorot posuhut dit ulun sid undang do Yahudi. Sabap ong baiko i sunat ot gunaon, kakali dot amu-po otuluk i sokoviai i pinonuhuan. Kagi it usuran di bansa do Yahudi manarang dot ogumu ot nalazan sid gama dioti posurut di dau dot vazaan. Sid gama mongitung di pibidaan di guvas om i guna di Sundu, nigili-no di Paulus i duvo o rikoton om i duvo o panangan. Boros di Paulus, Baiko mokisangkut o tomodon dioti do mongimvagam di kogunaan di gama sid guvas do kusai: tu ong i guvas mangahatul di kenginan dot ulun, varo-no karalazan ponong avuk, tu i guvas atarik di kinomol om tarak, retanko ino dino pahakang om pakansang dit ulun, om it ongokaralazan vokon di poulau-po di ginavo dot ulun. Topot ong it ulun di nakalabus-no sid hoturan om kenginan di guvas, obebas-no iosido ponong sid

Kinoringan om ponong sid ulun vokon, tu i kolobusan di iadino kiguna sid kondiri dit ulun om sid koruhang dau om lobipo ong ponong sid Kinoringan.

Pogili i Paulus di samod om i gama misasamod sid tinoguvangon dioti do iadko potimpak sid ponimbangan, dot sid sampaping i hal di guvas, supaya ioti kondiri kadapat monodiri om manantu dot ombo ot avagat om ombo ot aga-an. Kagi i Paulus popuhondom sid dioti dot antad sino o kopigogogutan sid tanga do piumpugan dot ombo it otopot, ogumu o gama dioti do mad asu miiit-iiit om miaagil-agil om mianggan-anggan minongorongoi di piniizaan dioti. Iri-ogi mancadang iosido do supaya mongitung banal ioti di tomodon om i panangan dit ongohabal dino. Sid hasil di mimbulai sid dioti ot kembulai ot ombo it otopot om isai-nopo it sambaon sid Galatia. Sid duvo i vaza dino osusa it ulun diri om i tokou biano momili om manantu dit ombo o suhuton:

guvas	kosipan
sunat	Sundu
sumulung sid tavos	kolobusan
mangasau	misasamod

Siti diti ipat-ipat tokou kondiri kadapat monurat ponong sid gibang ombo i dang guvas om ponong sid vanan ombo o dang vangun vagu om uva do Sundu:

Fasal 6,1-10: Minongorokoi-no vagu i Paulus dot ombo ot atag o gama menggembala om vaza manaud di koruhang.

Minsanko iadino o kosusa di Paulus gima i kobuatano di piumpugan sid Galatia, kakali manahak iosido do kovosihan do kosurutan di piumpugan, okonko rontob mangatag o tomodon dau monurat, inoi nga ino-no i boros dau, "Atag ong rumundun tumalad dit ulun di kikosusaan, tumabang monulung mamabo dit avagat" (1-2).

Avantang ong kadapat-po mongohondom om patahu banal sid ginavo dinot ayat 6,2. Pinabagon monulung dit ulun do kikosusaan, tu ahakang om akansang gima ong iosido om mongontupat di kondiri, supaya amu rumatu iosido sid pensubaan, ko tolikudan i dau do boboon. Sid a-ko piro ot ayat pogili i Paulus dit atag om i gama mamung om mangahatul di piumpugan.

Fasal 6,11-18 Insuhahat sid kapangaan do surat. I tanda tangan di Paulus sid agazo o hurup PAULUS, ka o manantu do banalko original do di Paulus ino surat dino. Minsan okonko i Paulus kondiri o minonurat, tu varo sakit di mato dau dot amu kosonsob banal. Iti-no o sabap do suvaiko agazo o hurup dau. Insanpo dino inggulito i nivagat i laid dau dot, Sid kinapatazan di Kristus mitongkizad i ralan dit ulun, varo tumorima di vazaan sid kinapagasan om varo tumolikud dino gama di Yesus. Kagi ino sangkap di Yesus onuvon di Paulus do dau do hormat om bantug om garal, aso vokon. Vangun vagu o tomodon om rikoton om guna tokou, ka di Paulus om mamakai-po iosido di pongoretan dot i tokou nga Bansa vagu ko Bansa dot Israel i dang Kinoringan (dit antad sid Ibrahim om mirantas pusod sid di Yesus). Sid kovian, moniag i Paulus do varo-po vagu monusa, sabap-no miuma i nasaadan di gulu iosido sid Galatia di mad kikalas iosido iadko i Kristus sid palad om kangkab om hakod dau. Iri-ogi poromut-po sid dioti di barakat om kovosihan do Kinoringan.

